

Q. 1/12

L'IDEE
D'UN
CHRISTIEN
PARFAIT.

Digitized by the Internet Archive
in 2011 with funding from
University of Toronto





GASTON JEAN BAPTISTE DE RENTY
*Seigneur de Citry Baron de Landelles &c.
mort à Paris le 24 d'Avril del'an 1649 le 57 de son âge*

LA VIE

DE MONSIEUR

DE

RENTY.

Par le P. JEAN BAPTISTE SAINT IVRE.
Religieux de la Compagnie de IESVS.



A PARIS,

Chez PIERRE LE PETIT Imprimeur & Libraire ordinaire
du Roy, rue S. Iacques à la Croix d'Or.

M. DC. LI.

AVEC PRIVILEGE ET APPROBATION.

[Faint, illegible handwriting at the top of the page]

CP

EX
4705
R445
1657



AVERTISSEMENT

A V L E C T E V R .



ON cher Lecteur, j'ay à vous avertir en peu de mots de trois choses touchant le contenu de ce liure.

La premiere, que comme la Verité est la principale partie & l'ame d'une Histoire, vous poués vous asûrer qu'elle est exactement obseruée en celle-cy: dautant que ce que vous y verrez, est quasi tout tiré des originaux & le reste des copies authentiques, ou il est rapporté par des témoins oculaires & irreprochables.

La seconde, que si nous nous seruons souuent des Lettres de Monsieur de Renty, & si nous emploions son propre témoignage pour le produire, cela ne doit point vous faire douter de la verité; parce que premierement sa haute vertu l'a rendu tres-veritable en tout ce qu'il a dit, & mesme de foy. Secondement pour ce que ses Lettres sont pour la plus-part adressées à son Directeur, à qui il décou-

uroit confidemment les choses de sa conscience, & luy rendoit compte de ce qui se passoit en son ame, comme aussi il le deuoit : & Dieu qui sçait si bien prendre des moyens propres pour paruenir à ses fins, ayant dessein que sa vie fût écrite & mise en lumiere pour donner à tous les Fideles le patron d'un parfait Chrestien, disposa tellement les affaires que son Directeur demeura quelques années hors de Paris, afin qu'il fût obligé de luy faire sçauoir par lettres ses dispositions interieures, lesquelles nous auons mieux sçuës de cette façon, que par aucune autre. En troisiéme lieu nous ne pouuons rien connoître de l'interieur d'un homme que par sa propre declaration, & ce que nous sçauons des Saints de cette nature, qui fait le principal de leur sainteté, ne nous est venu que par cette voie, c'est à dire, eux mesmes s'en ouurans à quelqu'un, qui apres l'a publié: ainsi Monsieur de Renty a dû luy mesme manifester les secrets de son cœur, & dire ce qui estoit caché dans son esprit, autrement il nous eut esté caché & inconnu pour toujours; encore tres-assûrement n'a t'il pas ny tout manifesté ny tout dit.

La troisiéme chose est, que desirant d'obeir au Decret de nostre saint Pere le Pape Urbain VIII. daté du 13. de Mars de l'année 1625. & à l'explication qui la suiuit le 5. de Iuin 1631. où il est ordonné que celui qui compose la vie de quelque persone de grande vertu, se declare & fasse protestation, sur certains chefs: pour cela.

PROTESTATION DE L'AUTEUR.

Je proteste que ie n'entend & que ie n'ay deffein de faire entendre à perſone tout ce qui eſt rapporté en ce Liurè en autre maniere, qu'en celle qu'on a coûtume de prendre les choſes qui ne ſont appuyées que ſur la foy & le témoignage des hommes, & non ſur l'autorité de la ſaincte Eglife; & que par le nom de Saint que ie donne en quelques lieux à Monsieur de Renty, ie veux ſeulement dire qu'il eſtoit doüé d'une vertu qui paſſoit bien le commun, & ie m'en ſers au ſens, auquel ſaint Paul le donne à tous les Fideles, & non pour le mettre au nombre des Saints canonifez, ce qui n'appartient qu'au ſaint Siege.

A P P R O B A T I O N.

LE CLAUDE DE LINGENDES Prouincial de la Compagnie de Iesus en la Prouince de France permets au P. Iean Baptiste de saint Iure, de faire imprimer vn Liure qu'il a composé qui porte pour titre *La vie de Monsieur de Renty*, & qui a esté veu & approuué de trois Theologiens de nostre Compagnie. En foy & témoignage dequoy i'ay signé la presente, à Paris le 24. de Iuin. 1651.

CLAUDE DE LINGENDES.

EXTRAIT DV PRIVILEGE DV ROY.



PAR Lettres patentes du Roy données à Paris le 4. Aoust 1651. & scellées du grand sceau de cire jaune sur simple queuë, il est permis à PIERRE LE PETIT Imprimeur ordinaire de sa Maieité d'imprimer ou faire imprimer vn liure intitulé *La vie de Monsieur de Renty*, & ce durant l'espace de sept ans entiers, avec inhibitions & deffences à toutes personnes de quelque qualité & condition qu'ils soient de l'imprimer ou faire imprimer, ny mesme d'en vendre de contrefaits à peine de deux mil liures d'amende, & tous despens, comme il est plus au long porté par lesdites Lettres, Signées, Par le Roy en son Conseil, CONRART.

TABLE



TABLE
DES CHAPITRES
ET DES SECTIONS.

PREMIERE PARTIE.

| | | | |
|------------|----------|--|--------|
| CHAP. I. | S | <i>A Naissance, son Enfance, sa Jeunesse.</i> | page 2 |
| CHAP. II. | S | <i>Son Mariage, & comme il a vécu jusques à l'âge de vingt sept ans.</i> | 8 |
| CHAP. III. | | <i>Son changement entier & son appel à une haute perfection.</i> | 14 |
| CHAP. IV. | | <i>Des vertus de Monsieur de Renty en general.</i> | 20 |
| SECT. VN. | | <i>La source, d'où ces vertus sont découlées.</i> | 24 |

SECONDE PARTIE.

| | | | |
|-----------|----------|--|----|
| CHAP. I. | S | <i>Es Penitences & ses Austeritez.</i> | 29 |
| CHAP. II. | S | <i>Sa Pauvreté d'esprit.</i> | 33 |

TABLE DES CHAPITRES,

| | |
|--|----|
| SECT. VN. <i>Sa Pauvreté exterieure.</i> | 37 |
| CHAP. III. <i>Son Humilité.</i> | 41 |
| SECT. I. <i>Son Humilité de cœur.</i> | 44 |
| SECT. II. <i>Suite de son Humilité de cœur, & son Humilité dans les paroles.</i> | 50 |
| SECT. III. <i>Son Humilité dans les actions.</i> | 55 |
| SECT. IV. <i>Son Amour pour la vie cachée.</i> | 61 |
| CHAP. IV. <i>Le Mépris qu'il faisoit du monde.</i> | 64 |
| CHAP. V. <i>Sa Patience.</i> | 68 |
| SECT. I. <i>Suite du mesme sujet.</i> | 73 |
| SECT. II. <i>Ses Trauerses domestiques.</i> | 78 |
| CHAP. VI. <i>Sa Mortification.</i> | 82 |

TROISIEME PARTIE.

| | |
|---|-----|
| CHAP. I. S on Application à nostre Seigneur IESVS-CHRIST, au regard du Prochain. | 89 |
| CHAP. II. <i>La Charité qu'il auoit pour le Prochain, prise en general.</i> | 93 |
| SECT. I. <i>Sa Charité enuers les Pauures.</i> | 99 |
| SECT. II. <i>Sa Charité enuers les Pauures Malades.</i> | 104 |
| SECT. III. <i>Suite de la mesme Charité, avec le succès.</i> | 108 |
| SECT. IV. <i>Son zele pour le salut du Prochain.</i> | 112 |
| SECT. V. <i>Suite du mesme zele.</i> | 115 |
| SECT. VI. <i>Continuation du mesme sujet.</i> | 125 |
| SECT. VII. <i>Quelques autres qualitez de son zele.</i> | 129 |
| SECT. VIII. <i>Deux autres qualitez de son zele.</i> | 134 |

ET DES SECTIONS.

| | |
|---|-----|
| SECT. IX. <i>Les succès que Dieu donnoit à son zele.</i> | 140 |
| SECT. X. <i>Sa grace pour aider en particulier quelques ames choisies.</i> | 145 |
| SECT. XI. <i>La grande connoissance qu'il auoit des choses interieures.</i> | 150 |
| CHAP. II. <i>Sa Composition exterieure & sa Conuersation.</i> | 158 |
| CHAP. III. <i>Sa Conduite dans les affaires.</i> | 163 |
| CHAP. IV. <i>L'usage qu'il faisoit des choses, & l'application qu'il auoit pour cela, à l'Enfance de nostre Seigneur.</i> | 174 |
| SECT. VN. <i>Suite du mesme sujet.</i> | 181 |

QVATRIEME PARTIE.

| | |
|--|-----|
| CHAP. I. S on interieur & son application à la tres- sainte Trinité. | 188 |
| CHAP. II. <i>Sa Foy.</i> | 192 |
| CHAP. III. <i>Son Esperance.</i> | 196 |
| CHAP. IV. <i>Son Amour enuers Dieu.</i> | 200 |
| CHAP. V. <i>Son Respect enuers Dieu, qui produisoit en luy une admirable pureté de conscience.</i> | 207 |
| CHAP. VI. <i>Son Respect enuers les choses saintes.</i> | 212 |
| CHAP. VII. <i>Sa Deuotion enuers la sainte Eucharistie.</i> | 219 |
| CHAP. VIII. <i>Son Oraison.</i> | 224 |
| SECT. VN. <i>Sa Contemplation.</i> | 231 |
| CHAP. IX. <i>Son Etat de Mort mystique & d'Ancantissement.</i> | 240 |

TABLE DES CHAP. ET DES SECT.

| | |
|--|-----|
| SECT. I. <i>Suite du mesme sujet.</i> | 244 |
| SECT. II. <i>Continuation du mesme sujet.</i> | 252 |
| CHAP. X. <i>Sa Mort Corporelle.</i> | 257 |
| CHAP. XI. <i>Conclusion de tout l'ouvrage, comme il faut lire les Vies des Saints.</i> | 265 |



LA VIE
DE MONSIEUR
DE RENTY

PREMIERE PARTIE.

CHAPITRE PREMIER.

Sa Naissance, son Enfance, sa Jeunesse.



Les vertus de feu Monsieur de Renty sont si grandes, & les belles actions, qu'il a faites, si éclatantes, que d'abord ie confesse ingenûment, que ie m'estime incapable de les représenter selon leur mérite, & de les faire voir dans leur iour, non seulement en ce qui estoit caché dans son interieur, qui est le principal, mais mesme en ce qui en a paru aux yeux des hommes. P'entreprenez toutefois d'en écrire, pour n'auoir pû le refuser à beaucoup de personnes de pieté & de qualité qui l'ont desiré de moy,

A.

& qui sçachans que j'auois eu le bien de le connoître particulièrement plusieurs années, & lors que sa vertu a esté dans le plus haut point de sa gloire, ont crû que ce tresor ne deuant pas pour l'honneur de Dieu & le bien du public demeurer inconnû, ny cette vie excellente & parfaitement chrestienne estre enseuelie dans l'oubly, i'estois en quelque façon obligé d'empescher ce dommage.

Faisons-le donc à la plus grande gloire de Dieu, qui est admirable en ses Saints, & à celle de son Fils Nostre-Seigneur IESVS-CHRIST, qui a comblé de ses graces cét hommerare, & luy a communiqué abondamment son esprit; & faisons-le aydez de leur secours, dont i'ay tres-grand besoin, & que ie leur demande aussi de tout mon cœur.

MONSIEUR DE RENTY tire son origine d'une des plus nobles maisons d'Arthois, qui est la maison de Renty, illustre pour son antiquité; pour la grandeur de ses alliances, entre lesquelles on marque la maison de Croüy, d'où sont fortis les Ducs d'Ascot & Princes de Simay; pour les charges honorables que ses ancestres ont exercées, & pour les celebres actions qu'ils ont faites dans les armées & dans les batailles; & sur tout pour la pieté, dont dès l'an cinq cens soixante & dix Wambert, dit le bon Comte de Renty, & Hamberge sa femme laisserent à la posterité vn grand témoignage, fondans & dotans de bons reuenus dans leurs terres, sous le nom & la protection de S. Denis, vn Monastere de Religieux, qui eût mesme la benediction d'auoir vn Sainct pour Abbé, qui fut S. Bertulphe; & non contens d'auoir donné vne preuue si remarquable de leur deuotion, comme les Iustes, suiuant le dire du Sage, vont tousiours croissans en vertus & en bonnes œuures, ainsi que l'aube du iour en lumiere, ils bastirent encore trois autres Eglises, la premiere dediée à S. Pierre, la seconde à S. Martin, & la troisiéme à S. Wast.

MONSIEUR DE RENTY fut fils vnique de Charles de Renty & de Magdelaine Pastoureau, laquelle estoit yssüe du costé maternel de la mesme maison de Renty. Il nasquit au Beny en la basse Normandie, dioceze de Bayeux, l'an

de grace mil six cens vnze, & fut tenu sur les Fonds par les pauures, Dieu ayant disposé par vne prouidence particuliere qu'il eût pour Parrains ceux, dont il vouloit qu'il fust pendant sa vie le Solliciteur, le Protecteur & le Pere. Il fut nommé Gaston au Baptesme, & à la Confirmation Iean Baptiste, & nourri en ce lieu iusques à l'âge de six à sept ans, & puis amené par Madame sa Mere à Paris, qui le tint auprès d'elle enuiron deux ans, iusques à ce qu'il fut mis au Collège de Nauarre, & de là enuoié à Caën au College des Peres Iesuites, sous la conduite d'un Precepteur Ecclesiastique, & d'un gouverneur, qui par mal-heur se trouua heretique, & qui en suite luy pouuoit faire vn notable preiudice pour la corruption de sa creance & de ses mœurs. Mais Dieu ayant des bontés toutes particulieres & des soins paternels pour luy, dans la veüe du dessein qu'il auoit de le faire vn iour vn grand instrument de sa gloire & du salut de beaucoup d'ames, le preserua de ce peril, empeschant toutes les mauuaises volontez, & tous les pernicieux effets de cét homme dangereux, & se rendant luy mesme sa conduite; ce qui luy fit dire du depuis, que Dieu dès son enfance luy auoit fait de grandes graces, & auoit esté, ainsi que Dauid disoit de soy, sa sauue-garde dès le ventre de sa Mere.

Comme il auoit naturellement vn tres-bon esprit, vne intelligence penetrante, & vn grand iugement, il fit vn notable progres & parût avec éclat dans les Estudes; d'où neantmoins il fut tiré à l'âge de dix-sept ans, & mis en l'Academie à Paris, où il se rendit fort habile & tres-adroit en tous les exercices: mais celuy, qui de tous luy plût dauantage & qui le charma, pour ainsi dire, furent les Mathematiques, aufquelles il s'appliqua avec tant d'assiduité, que pour y vacquer, il se priuoit de toutes sortes de diuertissemens, qui pourtant sont si agreables à la ieunesse, & y reüffit avec tant de capacité, qu'il les entendoit parfaitement, & en composa mesme des Liures.

Or comme le temps estoit venu, que Dieu vouloit travailler de plus près à son ouurage & disposer cette ame

d'écrire à l'exécution de son dessein; Il fit que le Libraire, chez qui il alloit souuent pour acheter les Liures necessaires à contenter sa curiosité, & le desir ardent qu'il auoit de sçauoir toutes les sciences conuenables à sa condition, luy presenta vn iour le Liuret si celebre de l'Imitation de IESVS-CHRIST, & le pria de le lire; mais luy, qui auoit l'esprit pour lors attiré à d'autres connoissances, n'en fit point d'état pour cette premiere fois: le Libraire luy ayant porté vn autre iour quelques Liures, dont il auoit besoin, luy presenta derechef celuy-cy, & le supplia, mesme avec instance, de le vouloir lire; il se rendit à ce coup, & le lût, & en fut si éclairé & si touché, comme déjà deuant luy vne grande multitude de toutes sortes de personnes l'auoient esté, que prenant d'autres pensées & d'autres affections, il se resolut des'appliquer serieusement à son salut, & se donner à Dieu: de façon qu'entre les grands fruits que ce Liuret a faits, & entre les signalées victoires qu'il a remportées, il faut y mettre cette operation de grace & ce changement de Monsieur de Renty; qui aussi du depuis eût tant d'estime & tant d'amour pour luy, qu'il le portoit par tout sur foy, & s'en aydoit en tous ses besoins.

L'effet de grace, que la lecture de ce Liure produisit en son ame, fut si grand, qu'elle luy fit naistre la pensée, & alluma dans son cœur le desir de quitter tout à fait le monde, de se consacrer entierement au seruice de Dieu, & se faire Chartreux, encore qu'il se veit fils vnique, heritier de grands biens, & avec des qualitez & des perfections, qui luy ouuroient le chemin aux grandeurs du monde. Comme il estoit naturellement resolu, ferme & constant, assisté du secours de Dieu, à qui il vouloit plaire & faire vn sacrifice de foy-mesme, apres auoir bien examiné & concerté son dessein, il se mit en deuoir del executer, ce qui se passa de cette sorte.

Estant vn iour sur le Pont de Nostre-Dame, avec Madame sa Mere, il la pria de trouuer bon qu'il descendist de carosse, pour acheter quelque chose, ce qu'elle luy ayant permis, il se dérobe aussi-tost à ses yeux, & se coulant subri-

lement & en diligence de ruë en ruë, il sort de Paris à pied, au mois de Decembre, l'an mil six cens trente, & prend le chemin de Nostre-Dame des Ardilliers; peu de iours apres son euasion, il écriuit cette lettre à Monsieur son pere pour l'en auertir.

MONSIEUR,

Je ne doute nullement que ce changement ne vous donne de l'affliction, les premiers mouuemens n'estans pas au pouuoir des hommes, & mesme la nature nous portant à regretter la perte de ce qu'elle ayme. Mais puis qu'il y va de Dieu, ie vous supplie tres-humblement d'oster toute passion de vostre ame, & de considerer ce qui vient de sa part. C'est, Monsieur, qu'apres auoir combattu deux ans contre moy-mesme, & resisté à toutes les inspirations que Dieu m'a données pendant ce temps, i'ay esté enfin contraint de rompre à vn si long delay pour quitter le monde, auoüant n'auoir pas assez de force pour entreprendre de faire mon salut en vn lieu, où se pratique le contraire de ce que ie voudrois faire: cela est trop perilleux pour vne personne foible, qui veut marcher seurement, & partant i'ay iugé qu'il seroit plus à propos d'étouffer le mal en sa naissance, que d'attendre qu'il soit deueuu plus grād, pour apres peut-estre n'y pouuoir mettre ordre: car les maximes du monde sont tellement dissemblables de celles de IESVS-CHRIST, que ie ne crois pas qu'une ame, qui craindroit de l'offencer, y puisse viure long-temps, & principalement dans la Cour, qu'elle ne soit bien-tost contrainte de l'abandonner, quand elle se verra obligée d'assister à rous les effets de la corruption du siecle, qui ne me seroient pas bien de dire, puis que desormais mon dessein est de cacher plûtoft & de mettre en oubly toutes ses sorises, que de tâcher de m'en resouuenir. Je veux me demesler de ce labyrinthe, encore que ie sçache que l'on dira que ie pouuois bien viure dans le monde, & m'empescher de faire les choses qui s'y font mal à propos; Je l'auoue; mais qu'on re-

garde ce qui s'ensuiura de là ; il faudra donc se refondre d'estre l'entretien d'un tas de ces Messieurs à la mode , qui diront que l'on est un bigor, un farouche , un homme sans repartie, qui est à charge à tout le monde , & mille autres semblables discours, que ie n'ay desia que trop expérimentés. En effet ce seroit une chose plaisante de voir un ieune homme de ma sorte entrer dans la Cour , & vouloir y faire le reformé : si vous voyez cela, n'est-il pas vray, Monsieur, que vous seriez le premier à vous en moquer ?

Ie vous supplie donc de considerer quel déplaisir ce seroit à un pere de voir son fils dans la Cour & dans les compagnies, pour y estre ainsi méprisé : ce n'est pas pourtant qu'une bonne conscience ne tint à tres-grand honneur de souffrir toutes ces choses pour Dieu; mais ie crois plus faire pour vostre contentement de me retirer ; car il faut viure à la Cour comme à la Cour , & ne pouuant seruir à deux Maistres, ie conclus avec l'Euangile, que celuy qui sert Dieu, le doit donc suiure.

I'ay tousiours veu pratiquer dans le monde, que quand un amy a querelle, non seulement son amy ne va point s'offrir à son aduerfaire, mais qu'il fuit encore sa compagnie & sa conuersation : de mesme Dieu & le monde estant apointez en fait contraire , ie croirois faire une tres-grande offense de ne faire pas pour Dieu, ce que ie ferois bien pour un amy , qui n'est qu'un homme mortel : & puis quand on aime une chose, on ne va point chercher celle qui luy est opposée : le moyen d'cuiter le peché, c'est d'en fuir les occasions , & pour une miserable vanité qui va à parestre & faire parler de soy, est-ce à dire que l'on doive se mettre en danger de perdre son ame ? Non, non, & ceux qui sont de cette opinion, la changeront quand il faudra rendre compte à Dieu du passé : ce sera lors qu'ils connoistront ce que c'est de viure bien ou mal : mais ce sera trop tard. C'est pourquoy laissant aux morts enseuelir les morts , si nous auons un peu de lumiere, traueillons à reformer nostre vie, & à faire quelque chose pour l'amour de Dieu, qui a dit si expressement & si souuent qu'il falloit renoncer à soy-mesme, quitter

tout & le sçavoir, que ie ne crois pas que vous voulussiez vous porter contre.

Vous estes la cause de mon retardement, & depuis ce temps j'ay tousiours prié pour cette separation, apprehendant beaucoup vostre affliction, qui sera pourtant bien-tost modérée, quand vous penserez que Dieu fait tout pour le mieux, & qu'il vous a peut-estre enuoyé cette tribulation pour en faire sortir de bons effets.

Je laisse cela à ses secrets iugemens, & vous supplie de croire que ie peux autant pour le moins vous seruir en cette nouvelle profession, que dans celle où vous m'auies destiné, Dieu m'en fasse la grace. Je ne vous mande point encore le lieu où ie suis, craignant qu'au commencement la passion ne vous y fist venir: mais dans quelque temps, lors que ie sçauray l'estat de toutes choses, ie ne manqueray de vous en auertir. En attendant ie prieray incessamment celuy que j'ay resolu de seruir, de demeurer avec vous, & de vous faire connoître avec quelle passion ie suis,

MONSIEUR,

Vostre tres-humble fils & tres-obeïssant seruiteur,
GASTON DE RENTY.

Voilà la lettre qu'il enuoya à Monsieur son pere, qui fait voir son bon esprit, sa deuotion, & les pures & solides lumieres dont son entendement estoit dé-jà éclairé. Monsieur son pere extremement en peine de son éloignement, enuoie de tous costez le chercher, & Dieu qui luy auoit donné cette volonté, sans en pretendre l'effet, voulut qu'on le trouuast à Amboise, & qu'on le reconnût quoy qu'il fut trauesti & deguisé, pour auoir changé son habit qui estoit couuert de passement d'or, contre celuy d'un pauvre. Il fut de là ramené à Paris à Monsieur son Pere, qui iugea à propos de le faire venir avec soy en son chasteau du Beny, où il rentra dans les exercices conuenables à sa naissance, dans lesquels il fit paroître tant de vertu, tant de sagesse & de bonne con-

duite, qu'encore qu'il n'ût que dix-neuf ans, il fut choisi & député de la Noblesse du Bailliage de Vire, pour assister aux Estats de Normandie qui se tindrent à Roüen, & auxquels presida Monsieur de Longueville, où il parla si pertinemment & si prudemment des affaires, que les trois Estats en demeurèrent non seulement satisfaits, mais encore étonnés.

Après ces exercices de Noblesse il s'employa à faire rebastir l'Eglise du Beny, comme elle se voit aujourdhuy, & bien loin de prendre les diuertissemens qu'ont accoustumé les Seigneurs de condition & de son âge, il estoit tous les iours réglément leué à quatre heures, & puis il s'en alloit doucement, sans éveiller son homme de chambre, dans son cabinet, prier Dieu, & de là à cinq heures à l'Eglise, & à son bastiment, d'où il ne reuenoit que sur les sept ou huit heures du soir, s'y faisant mesme apporter à manger, & travaillant continuellement avec les ouuriers. Nous ne pouuons douter qu'une telle action faite par une personne de cette qualité, & de cet âge, & avec une telle ardeur n'ayt esté tres-agreable à Dieu, & ne luy ayt acquis de grandes graces, puis qu'une action heroïque y prepare dauantage une ame, & l'en rend plus capable, qu'un grand nombre de petites & communes.

CHAPITRE II.

Son Mariage, & comme il a veſcu iuſques à l'âge de vingt-ſept ans.



EN CORE que l'estat Religieux soit, ainsi que la Foy nous enseigne & que l'Eglise l'a défini, beaucoup plus parfait que celui du Mariage, neantmoins comme la perfection d'un homme ne consiste point en la perfection de l'estat qu'il a embrassé, mais à faire précisément la volonté de Dieu, & à se comporter d'une eminente manière en la condition où il l'a mis: Dieu
pour

pour ne point priuer tout à fait Monsieur de Renty de la gloire & du merite de la Religion , luy en a donné la volonté & inspiré le dessein , pour l'accomplissement duquel il a fait ses efforts ; mais ayant resolu de le proposer à toutes les personnes mariées qui sont dans son Eglise , comme vn patron parfait & acheué de toutes les vertus necessaires à l'état de mariage, il l'y a appellé, dont il disoit auoir tant de certitude, qu'il n'en pouuoit point douter.

Il se maria à l'âge de vingt-deux ans , & épousa la fille de Monsieur de Dunes , Comte de Grauille , Elizabeth de Balsac de la maison d'Entragues ; Dame de grande vertu, de qui la modestie m'empêche d'en dire dauantage , & m'empêchera dans le cours de cette Histoire, de luy donner deuant les hommes la part de la gloire qu'elle a meritée en beaucoup de bonnes œuures que Monsieur son mary a faites, pour la luy reseruer plus grande deuant Dieu.

Les mariages se faisant dans la crainte de Dieu & dans le respect du Sacrement , Dieu verse tousiours dessus ses benedictions spirituelles , & pour l'ordinaire les temporelles, entre lesquelles comme les enfans sont estimez la principale , il benit le leur de cinq , dont les quatre qui restent, deux fils & deux filles , font esperer qu'ils se rendront selon leur capacité , dignes heritiers encore plus des vertus de leur pere , que de ses biens.

Il vécut dans son mariage iusques à vingt-sept ans avec la modestie , la sagesse & la conduite ordinaires aux personnes vertueuses de sa qualité qui sont engagées dans cet état, s'occupant en de pieux & louables exercices, faisant des visites autant que la ciuilité & la bien-seance le requeroient de luy , où sa grande prudence, son aimable douceur, sa rare modestie, meslée d'vne gayeté raisonnable, avec des rencontres gentils & pleins d'esprit le rendoient fort agreable, & le firent mesme considerer, aymer & caresser du feu Roy Louis le Iuste ; iusques au point de luy susciter des enuieux, qui apres l'auoir étudié de pres ne trouuerent autre chose à redire en luy sinon qu'il estoit ieune. Mais il preferoit toujours à toutes choses ce qui regardoit le seruice de Dieu &

son salut, fuyant avec grand soin toutes les occasions de peché, & évitant adretement les écueils où ceux de sa condition & de son âge ordinairement échoient, disant l'Office de nostre Dame & par fois celuy des Morts, & d'autres prieres vocales, & faisant toutes les choses necessaires pour se sauuer; Qui est aussi le sujet pour lequel Dieu nous a faits & nous tient sur la terre, & pourtant ce à quoy la pluspart des hommes pensent le moins.

Mais comme sa naissance luy faisoit porter vne épée, il faut pour l'instruction de la Noblesse, & pour donner aux Gentilhommes vn beau miroir, que le tirant de sa maison & des exercices de la paix, nous le voyons dans les armes & à la guerre, qui estoit desia allumée il y auoit plusieurs années, & qui continuë encore, quelques prieres que nous ayons faites à Dieu pour l'éteindre, parce que nous attirons toujours ce feu & soufflons dessus avec nos pechiez.

Premierement pour la connoissance, Monsieur de Renty entendoit parfaitement toutes les parties & toutes les fonctions du mestier de la guerre, à cause de son bon esprit & de l'étude particuliere qu'il en auoit faite, qui le faisoient admirer dans les conseils de guerre & d'as d'autres assemblées, mesme des plus vieux & des plus experimentez Capitaines, entre lesquels fut le Duc de Wimar, qui s'étonnoient qu'un ieune homme avec le peu d'experience que son âge luy donnoit pût parler si sçauamment de choses si difficiles.

Pour la conduite, comme Dieu luy auoit donné naturellement vne grande prudence, & nonobstant toute son activité, vn sens fort rassis, il l'auoit tres-bonne, preuoyant tout & pouruoyant à tout selon la necessité. Commandant en la guerre de Lorraine vne compagnie de caualerie composée de quelques six-vingts caualiers, & dont plus de soixante estoient de naissance, ils arriuerent à deux heures de nuit en vn village, où ils trouuerent les maisons toutes vuides, de sorte qu'estans contrains de loger chacun comme il pourroit, MONSIEUR DE RENTY rencontra par bonheur & par vne prouidence singuliere de Dieu sur luy, dans son logement vne pauvre vieille femme, qui estoit restée

seule dans tout le village & qui n'auoit pû s'enfuir avec les autres, parce qu'elle se mouroit tant de faim que de maladie. Il console cette pauvre femme & la secourt dans son extremité spirituellement & corporellement; dont elle se sentant obligée, luy demanda s'il estoit des troupes du Roy, ou de celles du Duc de Lorraine, à quoy luy par prudence n'répondit pas directement, mais luy demanda pourquoy elles'enqueroit de cela; lors elle luy dist, que s'il estoit des troupes du Roy, il eut à déloger bien tost, parce que les Crauates deuoient infailliblement venir dans peu d'heures, qui les tailleroient tous en pieces: ayant reçu cet auis, il le communiqua à ceux qui commandoient avec luy, qui tous ensemble iugerent à propos de monter à cheual, de déloger à la fourdine, & se retirer où estoit le corps de leur armée. L'auis se trouua veritable, d'autant que trois heures apres leur depart, les ennemis arriuerent à dessein de les charger, ce qu'ils eussent fait, sans qu'un seul eût pû se sauuer, à cause de leur grand nombre, & du temps fauorable, & qu'estans tous frais ils eussent attaquez des hommes harassés & recrûs du trauail d'une grande journée. C'est ainsi que Dieu veille sur ceux qui le craignent, & qu'il a soin de leur conseruation, & mesme en leur faueur, de celle de beaucoup d'autres: ce logement pouuoit tomber entre les mains de quelqu'un, qui n'eut pas merité cette grace de Dieu, & qui peut-estre n'en eust pas vsé si prudemment.

Pour l'execution il n'y manquoit pas, parce qu'il auoit le corps fort & robuste, & l'esprit actif, genereux & resolu, ne redoutant aucun peril.

Adioustez à cela, comme l'ame au corps & la lumiere à la beauté, la crainte de Dieu, la pieté & la iustice, sans quoy la Noblesse n'a qu'un faux éclat & vne puissance nuisible, & la guerre fait des maux horribles & sans nombre. MONSIEUR DE RENTY tout le temps qu'il fut dans les armées, y faisoit constamment ses prieres & ses autres exercices de deuotion; quand il arriuoit en son quartier, s'il y auoit vne Eglise, son premier soin estoit de la visiter & d'aller saluer nostre Seigneur; s'il y auoit quelque maison

Religieuse, il y prenoit tousiours son logement, & afin de ne point incommoder, pour soy seul quand l'armée arrestoit quelque part, plusieurs & bien plus vieux que luy passans le temps à iouïr, à boire, à dire des paroles sales, à iurer & à d'autres déreglemens, luy se contenant dans son ordinaire sagesse, fuyoit toutes ces actions basses & vicieuses, & s'occupoit en des exercices de vertu & d'honneur.

Par tout où il auoit pouuoir, il empêchoit de toute sa puissance les desordres; il défendoit absolument à ses gens de ne point mal-traiter leurs hostes & ne leur donner aucun sujet de plainte, & ne montoit jamais à cheual qu'il n'eust fait venir les siens, pour sçauoir de leur bouche si on leur auoit point fait tort en quelque chose, & s'il apprenoit que quelqu'un de tous ceux sur qui s'étendoit son pouuoir, l'eust fait, il y apportoit aussi-tost le remede & leur faisoit iustice. Vn iour comme il estoit déjà à cheual pour partir, ayant fait cette demande à son hostesse, & elle se plaignant qu'un deses domestiques luy auoit dérobé vne chemise, il les fit incontinent venir tous, afin qu'elle reconnût le larron: l'ayant reconu celuy-cy auoüa la verité, & dit qu'il l'auoit mesme vestüe & la portoit sur le dos: au mesme temps son maistre la luy fit dépouïiller deuant tout le monde & la rendre à cette femme, quoy que plusieurs personnes de condition trouuassent cela bien rude & mesme s'y opposassent; mais luy tint toujours ferme pour la Iustice, & dir qu'il ne vouloit point souffrir de voleurs. Si tous ceux qui ont commandement agissoient de la sorte comme ils le deuroient, on n'auroit pas peur de leurs soldats comme des plus cruels ennemis, & Dieu, qui est le Dieu des armées, donneroit plus de benediction & plus de succez à leurs armes.

Mais comme le passage le plus dangereux à la Noblesse pour faire naufrage de son salut, sont les querelles & le duel; Dieu a voulu que ce sien seruiteur se soit trouué dans cette perilleuse occasion, pour apprendre à tous les Gentils-hommes & à tous ceux qui portent l'épée, comme ils s'y doiuent comporter. Estant volontaire dans l'armée il:

est vn démeslé avec vn Gentilhomme pointilleux, lequel estant venu à la connoissance des Chefs, il leur fit voir que ce Gentilhomme n'auoit aucun suiet raisonnable de se plaindre de luy, ce qu'ils iugerent estre vray; mais sa partie n'acquiesçant pas à ce iugement, il en appella à celuy, que selon la malheureuse maxime du monde, son épée luy pouuoit rendre, & fit appeller MONSIEUR DE RENTY en duel, qui répondit à celuy qui luy apporta le cartel, que ce Gentilhomme auoit tort & qu'il luy auoit donné toutes les satisfactions qu'il pouuoit iustement desirer: mais cela ne suffisant pas à cet esprit mal-fair, il persiste dans son pernicieux dessein de luy faire tirer l'épée; dont se voyant pressé, il luy fit vne réponse; qui est d'autant plus considerable, qu'il estoit ieune, & qu'il n'auoit point encore de reputation mais se la deuoit faire & acquerir de l'estime par les armes; cette réponse fut, que resolumét il ne le feroit point, puisque Dieu & le Roy le luy defendoient; mais qu'au reste il vouloit bien qu'il sçût que toutes ses satisfactions ne venoient point d'aucune crainte qu'il eut de luy, mais de celle de Dieu & de son offense, & qu'il iroit tous les iours, comme à son ordinaire, où la necessité de ses affaires l'appelloient, & que s'il l'attaquoit, il le mettroit en état de s'en repentir. Ce quereleux voyant qu'il ne le pouuoit attirer à vn duel ouuert; trouue vn iour moyen de le rencontrer, & luy fait mettre la main à l'épée, dont par vniuste iugement de Dieu il luy prit bien mal, parce que luy & son second y furent blesez & defarmez, ne remportant de sa remerité que de la confusion & de la douleur; lors ce vray Gentilhomme Chrestien, au lieu de leur faire plus de mal, comme il le pouuoit, les mene à sa tente, leur fait donner du vin, fait panser leurs playes, & leur rendre leurs épées; & adioustant à la charité & à la generosité l'humilité & la modestie comme ses grands ornemens, il tint tousiours du depuis la chose secreta, & n'en ouurit la bouche à personne pour en tirer vanité; & mesme, ce qui est plus merueilleux, il n'en a iamais parlé à son homme qui fut present & qui luy seruit de second en cette rencontre; à qui encore au-

parauant, comme il se veit forcé de se defendre, il auoit recommandé de ne point tuer.

Cette querelle n'a pas esté l'vnique, il en a eu encore d'autres avec des voisins, ou pour le moins des fuiets de se plaindre d'eux, à quoy apportant tout ce que la prudence, la patience & la charité pouuoient contribüer, il en est tousiours heureusement fortý, & il auoit coûtume de dire à ses domestiques dans ses differens, & dans les leurs particuliers, qu'il y auoit bien plus de courage & de generosité de porter vne iniure pour l'amour de Dieu que de la rendre, & de souffrir que de se vanger, parce que la chose estoit beaucoup plus difficile; que les taureaux auoient bien du cœur, mais que c'estoit vn cœur brutal, au lieu que le nostre doit estre raisonnable & chrestien.

CHAPITRE III.

Son changement entier & son appel à vne haute perfection.

MONSIEUR DE RENTY ayant ainsi vescu dans son mariage iusques à l'âge de vingt-sept ans, il plût à Dieu de le toucher encore davantage, de l'éclairer de plus viues lumieres & de l'appeller à cette haute perfection, à laquelle par la cooperation fidele qu'il a renduë à son appel nous l'auons vû arriuer, & , comme vn grand flambeau, en répandre les rayons à Paris & en tous les lieux où il a esté. Ce fut en vne mission que firent les Peres de l'Oratoire à six ou sept lieüs de Paris, où il alla à pied, & où il fit sa confession generale avec tous les soins que prennent ceux qui la veulent faire tres-bonne; il receüt tant de graces en cette vocation nouuelle, qu'il marquoit ce temps comme le commencement de sa conuersion entiere à Dieu & de sa parfaite consecration à son seruice.

En suite de ce changement, comme il sçauoit que quelque bon desir que l'on ayt de s'auancer à la perfection, le chemin qui y mene, est mal aisé à tenir & plein de dangers, & qu'ainsi pour ne point s'égarer & se perdre, il falloit necessairement auoir vn bon guide; Dieu par la prouidence particuliere qu'il auoit pour sa sanctification luy en pourueut d'vn dans ce besoin, tel qu'il le luy falloit, & luy adressa le R. P. de Condren General de l'Oratoire personnage d'vn profond sçauoir, d'vne grande pieté, & d'vne haute capacité pour les choses interieures, qui le conduisit rousiours iusques à sa mort, c'est à dire quelques deux ans, avec vn tres-grand soin & avec vne affection extraordinaire, comme le meritoit vn si excellent suiet, à qui il fit faire de si notables progrès, qu'ils l'obligerent de dire à vne personne, que Monsieur de Renty seroit vn iour vn grand Saint:

En effet voicy comme quoy il en prit le chemin. Sans parler de ses penitèces & de ses austeritez, qui sont les premiers combats d'vne personne bien conuertie & appelée à de grandes choses, dont nous traiterons apres; Il se retira tout à fait de la Cour; il dit adieu à tous les emplois de vanité & d'ambition, pour ne plus s'occuper qu'à ceux qui pouuoient glorifier Dieu & secourir le prochain; il renonça à toutes les visites de pur compliment & inutiles; il prit à cœur l'exercice de l'oraison & disoit pour cela tous les iours le grand Office, se leuant mesme la nuit pour reciter matines, & apres il faisoit vne heure de meditation: de sorte qu'il demeuroit toutes les nuits en prieres deux ou trois heures, mesme dans la plus grande rigueur de l'hyuer; tous les iours il faisoit deux examens de sa conscience avec vne exacte recherche de ses plus petits defauts, vn au matin deuant disner, & l'autre au soir; il se confessoit deux fois la semaine & communioit trois ou quatre; il alloit vn iour la semaine visiter & instruire les pauvres malades de l'Hostel-Dieu; vn autre ceux de sa Parroisse; il en donnoit vn autre aux prisonniers, & en d'autres il se trouuoit à des assemblées de pieté.

Mais parce qu'il auoit encore plus de soin & plus de zele pour ses Enfans & pour ses domestiques, comme aussi il y estoit obligé, ayant tousiours bien sçû distinguer les commandemens des conseils, & les obligations des deuotions qui sont libres; il auoit ordonné que tous les soirs l'on sonnât vne cloche pour les assembler, afin de faire ensemble leur examen, dire les litanies de Nostre Dame & d'autres prieres; tous les Samedis il leur faisoit en presence de Madame la femme vn entretien sur l'Euangile du Dimanche suiuant, pour leur en imprimer les maximes & les instruire des choses de leur salut, d'où ils tiroient beaucoup d'edification & de profit.

Mais ce qui est de grand exemple, est l'ordre qu'il tenoit en ses voyages, que voicy. On y estoit aussi réglé, que dans vne Religion bien reformée: le matin deuant que de partir on entendoit la sainte Messe; aussi tôt qu'on estoit monté en carosse & que l'on commençoit à marcher, la premiere chose qui se faisoit, estoit de dire l'Itineraire, qu'il n'omettoit iamais, pour petit que fut le voyage qu'il fit hors la Ville; apres on chantoit les litanies de nostre Seigneur, en suite on faisoit la meditation; puis il disoit vne partie de l'office diuin, laquelle estant acheuée il entretenoit la compagnie de quelque bon discours, l'éleuant doucement à Dieu: s'il regardoit l'étenduë des campagnes, il parloit de l'immenfité de Dieu; s'il se presentoit quelque bel obiet à leurs yeux, comme quelque maison de plaisance, quelque prairie émaillée de fleurs, ou quelque riuere serpentant agreablement les terres, il discouroit de sa beauté, ou du Paradis, formant mesme des actes de vertu tout haut, qui touchoient extremement les cœurs. Quand on approchoit du lieu, où l'on deuoit disner, il faisoit l'examen: & y arriuant, comme aussi au soir où il falloit coucher, descendu qu'il estoit du carosse, deuant que d'entrer en l'hostellerie, il alloit à l'Eglise; que si la porte estoit fermée & qu'il ne se trouuât personne pour l'ouuir, il se mettoit à genoux à la porte pour y rendre ses devoirs au S. Sacrement; apres il s'enquetoit s'il y auoit vn hospital en ce lieu, afin d'y aller
& y

& y exercer la charité. Estant à l'hostellerie, auant toutes choses il se mettoit à genoux dans la chambre & adoroit Dieu, & le prioit avec grande affection pour toutes les personnes qui entreroient en ce lieu, & pour obtenir le pardon de tous les desordres qui s'y estoient commis. Quand il voyoit quelque chose écrite sur les murailles ou sur la cheminée qui bleffoit l'honesteté, il l'estrafoit, & en sa place mettoit quelques paroles qui portoient instruction de pieté & de salut, & il taschoit tousiours deuant que de partir, de donner quelque bon aduis aux seruiteurs du logis & aux pauvres du lieu qu'il pouuoit rencontrer, afin de ne passer en aucun lieu, à l'exemple de nostre Seigneur, sans y faire du bien.

Après le dîner; lors que l'on estoit remonté en carosse, il se recueilloit en soy-mesme & s'appliquoit à son interieur quelque peu de temps: suiuit apres celuy de la recreation qui estoit graue & modeste: puis il chantoit les vespres avec sa compagnie, & les vespres chantées il l'excitoit à se relâcher vn peu & à prendre quelque diuertissement innocent; dans lequel, pour le rendre chrestien & le sanctifier, il mesloit tousiours quelque trait de pieté; souuēt il faisoit chanter avec luy les articles de nostre creance en François, qu'il auoit à ce dessein fait mettre en musique; sur les quatre heures on chantoit Complies; aptes il faisoit l'oraison; & quand on estoit arriué à l'hostellerie, ses exercices estoient les mesmes que ceux du matin: c'est ainsi qu'il se gouuernoit en ses voyages. Si ce que disoient entre eux les Hebreux est vray, que l'on connoît vn homme en la maladie, à la table, au ieu & en voyage, nous pouuons iuger de ce que nous auons rapporté, quelle deuoit estre la vertu de ce grand Seruiteur de Dieu.

Comme la fin du Mariage est d'auoir des Enfans, & la fin du mariage Chrestien est de les rendre vertueux pour les faire arriuer à leur salut & à la beatitude que Dieu leur prepare; il prenoit vn tres-grád soin & par soy & par d'autres de faire que les siens le fussent, & de leur grauer profondément pour cet effet la crainte de Dieu, de les desabuser de l'e-

estime du monde, de leur faire connoistre, que ses maximes
 sont fort contraires à l'esprit de I E S U S - C H R I S T, & que
 la vraie Noblesse consiste en la vertu. Voicy les pensées
 « qu'il auoit là dessus, qu'il écriuit à vne Dame: Pour l'edu-
 « cation des Enfans, Dieu ayant distingué les conditions
 « semble nous enseigner, qu'il doit y auoir aussi de la diuer-
 « sité entre la nourriture d'un Roturier & celle d'un Gentil-
 « homme, qui estant nay pour porter l'épée ne doit pas sans
 « doute estre mis dans vn cloistre pour y estre dressé: mais la
 « corruption est maintenant si grande parmy nous, que tou-
 « tes les principales instructions que nous leur donnons &
 « que leur donnent ceux que nous mettons aupres d'eux, ne
 « vont qu'à allumer vn feu infernal de vanité dans des cœurs,
 « où il n'y en a desia que trop, poussant vne ieunesse par des
 « comparaisons payennes à ne rien souffrir, à aspirer tousiours
 « à ce qui est de plus haut, & pour y arriuer à se seruir des
 « moyens les plus approuuez du monde, encore qu'ils soient
 « defendus de Dieu. Que si on n'en vient point iusques-là,
 « au moins n'enfonce-t'on pas dans le cœur d'un ieune Gen-
 « til-homme les maximes Chrestiennes: par exemple vous
 « scauez que les duels infectent tous les ieunes gens; Or
 « dites-moy, combien y en a-t'il qui voudroient que leurs
 « enfans, estans grands & appelez ne se batissent point, &
 « encore moins s'ils estoient assurez qu'ils ne seroient point
 « blesez & remporteroient de l'auantage? mais qu'arriue-
 « t'il? que peut estre iamais nous ne ferons vn discours ex-
 « pres pour condamner les duels; ce que toutefois nous de-
 « urions faire d'autant plus souuent & à fond, & en montrer
 « les suites malheureuses, que l'inclination, que l'exemple,
 « l'estime & l'honneur du monde y engage & y porte. Si par
 « hazard il sort de la bouche de cette ieunesse quelque étin-
 « celle de ce brasier que nous auons naturel, on leur dira
 « peut-estre en riant, ou en passant, ô! cela n'est pas bien:
 « Dieu le defend, Ouy dea! mais remarquez, ie vous prie,
 « si c'est ainsi que vous empêchez que vostre fils n'ait les iam-
 « bes tortuës & le corps contrefait; si c'est ainsi qu'il apprend
 « à dancer & à faire des armes, voila ses sentimens là dessus.

Pour ses Domestiques & les Officiers qu'il auoit dans ses terres, il leur recomandoit singulierement la iustice, la charité & la douceur, & vouloit que l'on fist du bien à tous & du mal à personne autant qu'il se pouuoit. Vn d'entre eux s'estant emporté de cholere & ayant commis quelque excez dans vn cimetiere, il luy en manda cecy. P'ay appris avec douleur ce que vous auez fait, & quoy que ie ne vueille pas croire toutes les circonstances que l'on m'a rapportées, il y ena tousiours assez pour me faire connoistre que vostre passion a esté la maistresse. Si ie ne vous regardois que pour moy & pour mes interests, ie deurois souhaiter que vous exterminassiez tous ceux qui me veulent nuire; mais il est question de viure en Chrestien & pour vous & pour moy, ou bien d'estre damné; Si nous n'auons cette creance & ce desir, soyons Turcs & Barbares à decouvert. Si vous scauiez combien ces actions déplaisent à Dieu, quel scandale & quel dommage elles apportent aux hommes, vostre cœur seroit bien tost changé. Je prie Dieu d'y mettre la main, ie luy offre & biens, & sang, & vie pour vous obtenir cette grace, d'où dépend vostre salut: mais ie vous prie en frere, & vous commande en maistre de reparer le tort fait à Dieu au lieu saint, & au prochain. L'aymerois mieux que ma maison fût perduë pour moy, que vous en vinssiez vne autre fois à cette extremité. Je dois regler mes sentimens & le desir de conseruer mes biens par ma conscience & par l'amour de Dieu, qui me les a donnés: Je vous auouë que la conduite dans le monde est difficile, attendu les malices d'aujourd'hui, & qu'on peut quelquefois par voyes extraordinaires empêcher l'oppression des foibles & s'opposer aux iniustices; mais quand nostre interest y est meslé, il faut se reduire aux voyes ordinaires, premierement de la douceur; secondement de la iustice; & si cela ne reüssit, prendre patience: c'est là, où nous deuons pratiquer la vertu; Je ne fais pas grand état de certaines deuotions façonnées, mais ie respecte les maximes de l'Euangile, qui nous apprennent ce chemin.

CHAPITRE IV.

Des vertus de Monsieur de Renty en general.

EVANT que de parler des vertus de cet homme de Dieu en particulier, ie crois qu'il sera vtile d'en dire quelque chose en general, & d'en faire comme le plan : sur quoy i'ay à dire deux choses.

La premiere, qu'entre toutes les personnes de pieté que i'ay bien connuës, ie n'en ay point veu de qui les vertus ayent esté à mon aduis, apres auoir bien consideré toutes choses, plus solides, plus fortes & plus acheuées que les siennes. I'en parle de la sorte pour l'auoir connu intimement plusieurs années & iusques à sa mort, tellement que quand ie me le refigure en tout le détail de sa conduite & pour son interieur & pour son exterieur, ie ne puis que ie n'en forme vne tres-haute idée & que ie ne me le represente comme vn modele d'une perfection consommée, dequoy tous ceux qui ont eu quelque liaison avec luy, dont le nombre est tres-grand à cause des emplois qu'il auoit pour le prochain, tomberont aisément d'accord & témoigneront assurement, que ie ne dis rien de trop.

La seconde est, que nous ne pouuons pas mieux apprendre que de luy mesme ce que nous desirons de sçauoir icy : il nous l'enseigne dans vn recit qu'il donna à son second Directeur qui succeda au R. P. de Condren, & qui luy auoit dit estre necessaire qu'il scût ses dispositions & l'ordre qu'il tenoit. Voicy ce que porte son Original, duquel toutefois i'ay retranché quelques choses, parce qu'elles sont desia rapportées au chapitre precedent.

“ I'ay tardé quelques iours, apres le commandement qui
 “ m'a esté fait d'écrire l'employ de ma journée pour tascher
 “ d'y connoître quelque chose ; mais ie n'y remarque rien

d'ordonné ni quasi qui se puisse écrire , à cause que tout ,,
 consiste en abandon, & en vne suite apres l'ordre de Dieu, ,,
 ce qui cause quasi toujours choses diuerfes, quoy que sur ,,
 vn mesme fond. ,,

Pour l'exterieur & le materièl, ie me leue d'ordinaire à ,,
 cinq heures (il faut se souuenir de ce qui est cy-deuant, ,,
 que c'estoit apres auoir passé vne partie de la nuit en prie- ,,
 res) à mon réueil i'entre dans mon fond d'aneantissement ,,
 deuant la Majesté de Dieu , ie m'vnis à son Fils & à son ,,
 Esprit pour luy rendre mes hommages; estant leué ie prends ,,
 de l'eau beniste , ie me prosterne & adore le benefice de ,,
 l'Incarnation , qui nous donne accès & nous reconcilie à ,,
 Dieu; ie me liure au S. Enfant I E S V S pour entrer dans son ,,
 Esprit; ie saluè quelquefois mon bon Ange, sainct Iean Ba- ,,
 ptiste, saincte Therese, & quelques autres Saints, & puis ie ,,
 recite l'*Angelus*: il dit, quelquefois, non qu'il y manquat ,,
 par vn oubly imparfait ou par inconstance, estant extreme- ,,
 ment exact & fidele à continuer ses exercices de deuotion; ,,
 mais par la force de l'application actiue, & souuent passiue ,,
 qu'il auoit à Dieu, & qui l'empéchoit de se diuertir ail- ,,
 leurs.

Ie m'habille: ce qui dure fort peu, & puis ie passe dans ,,
 vne petite salle pour aller à la chappelle, où sur la cheminée ,,
 i'ay mis vne image de la sainte Vierge tenant son Fils ,,
 comme la Dame de la maison: ie baise la terre en sa pre- ,,
 sence, & luy dis, *Monstrate esse matrem, &c.* Ie me dedie & ,,
 me renouuelle entierement à son seruice, & luy offre toute ,,
 la famille, femme, enfans, domestiques; & ie suis porté il ,,
 y a long temps à la luy offrir, afin que par son moyen elle ,,
 soit toute consommée pour Dieu, & en me releuant, ie luy ,,
 dis, *Mater incomparabilis ora pro nobis.* ,,

Après, i'entre dans la chapelle, où ie me prosterne & ,,
 adore Dieu, ie m'abaisse deuant luy, me faisant le plus pe- ,,
 tit, le plus nû & le plus desemployé de moy que ie peux, & ,,
 me tiens là en foy, ayant recours à son Fils & à son diuin ,,
 Esprit pour faire tout ce qu'il luy plaira que ie fasse, & ie ,,
 demeure ainsi; si i'ay quelque penitence à faire, ie la fais ,,

« sur les six heures & demie, & puis ie lis deux chapitres du
 « Nouveau Testament teste nuë & à genoux : à sept heures
 « ie monte dans vn cabinet, où il y a trois stations, la premie-
 « re à la Vierge, la seconde à saint Ioseph, & la troisième à
 « sainte Therese, ausquels ie rends mes petits deuoirs, &
 « apres ie vaque aux affaires: que si ie n'ay rien de pressé, ie
 « me mets à genoux deuant Dieu iusques à ce que j'aille à la
 « Messe, & ie demeure à l'Eglise iusques à vnze heures &
 « demie, exceptés les iours, que nous donnons à dîner aux
 « paunres, que ie reuiens à vnze.

« Deuant dîner ie fais l'examen du matin & quelques
 « prieres pour l'Eglise & l'accroissement de la Foy, & pour
 « les ames de Purgatoire; puis ie dis l'*Angelus*; ie disne à
 « midy, & pendant le dîner ie fais lire; depuis midy & demy
 « ie parle l'espace d'une heure à ceux qui ont affaire à moy,
 « & c'est le temps que ie donne pour me trouuer. Apres, ie
 « fors pour aller où l'ordre de Dieu m'enuoye. Il y a certains
 « iours reglez, les autres sont tousiours retenus d'une semai-
 « ne à l'autre, s'il arriue que ie n'aye rien à faire ie prie dans
 « vne Eglise: mais quoy qu'il arriue ie tasche de ne point
 « manquer à visiter tous les apres dîner le saint Sacrement,
 « & de faire sur le soir vne heure d'oraison.

« Sur les sept heures, apres que j'ay fait quelque priere vo-
 « cale, on soupe: pendant le souper on lit le Martyrologe &
 « la vie du Sainct du lendemain; le souper acheué, ie parle à
 « mes Enfans, & leur dis quelque chose pour leur instruction;
 « à neuf heures on sonne la priere à laquelle tous les domesti-
 « ques assistent; apres laquelle chacun se retire, & moy ie me
 « tiens en la Chapelle en oraison iusques à dix que ie m'en vay
 « à ma chambre; m'estant donné & recommandé à mon Dieu
 « selon le fond que ie porte, à la sainte Vierge, à mon bon
 « Ange, & autres Saints ie prens de l'eau beniste & me cou-
 « che; estant couché ie dis le *Deprofundis* pour les morts &
 « quelques autres petites prieres, & puis ie tasche de reposer.
 « Voila à peu pres l'ordre du iour pour l'exterieur.

« Mais pour mon interieur ie n'en ay aucun, pour ainsi dire,
 « car en suite que j'ay quitté il y aura vn an la semaine sainte

Le Breuiaire, toutes mes formes & toutes mes pratiques m'ont abandonné, & maintenant au lieu de m'en seruir de moyens pour aller à Dieu, elles m'y feroient des empeschemens. Je porte pour l'ordinaire, mais avec beaucoup d'infidelités & si grandes en tout ce que ie dis icy, que ie ne l'écris qu'à regret, parce que ie ne suis que vice & que peché. Je porte, dis-je, pour l'ordinaire en moy vne verité experimentale & vne plenitude de la presence de la tres-sainte Trinité, ou bien d'un mystere qui m'éleue par vne simple veüe à Dieu, & avec cela ie fais tout ce que la diuine prouidence m'enjoint, regardant, non pas les choses ny pour leur grandeur ni pour leur petitesse en mon endroit, mais seulement l'ordre de Dieu & la gloire qu'elles luy peuuent rendre. Pour les examens & les choses de communauté, que j'ay marquées cy-dessus, ie ne puis souuent m'y arrester, j'en fais bien l'exterieur pour garder l'ordre, mais ie suys toujours mon interieur sans y apporter de changement, parce que quand on a Dieu, il n'est point besoin de le chercher par ailleurs, & lors qu'il nous tient dans vne maniere, ce n'est pas à nous d'en prendre vne autre; & l'ame connoist bien ce qui luy fait son fond plus net & qui l'vnit, ou ce qui la multiplie.

Pour l'interieur, ie suys donc l'attrait, & pour l'exterieur, ie vois la volonté diuine qui me le fait suiure, & qui me porte à m'y gouverner avec le discernement de son esprit en simplicité: ainsi ie possede par sa grace en toutes choses vn grand silence interieur, vn profond respect, & vne paix solide.

Je me confesse d'ordinaire les Ieudis selon l'ordre qui m'en a esté donné, & ie communie quasi tous les iours, m'y sentant attiré, & en auoir grand besoin.

En vn mot le fond qui m'est monstré est de me rendre à Dieu par I E S U S - C H R I S T, avec vn trait de pureté qui a pour son operation d'adorer Dieu en esprit & en verité d'une maniere toute nuë, & de l'aimer de tout mon cœur, de toute mon ame & de toute ma puissance, & en toutes choses voir & adorer la conduite de Dieu & la suiure: cela seul demeurant dans mon esprit, tout le reste s'efface de moy.

Je n'ay rien de sensible sinon par fois quelque trait passager,

" mais, si ie l'ose dire, quand ie fonde ma volonté, ie la trouue
 " quelquefois si viue, qu'elle me deuoreroit, si le mesme Sei-
 " gneur qui l'anime, quoy qu'indigne, ne la retenoit. l'entre
 " en chaleur & en feu, & iusques au bout des doigts ie sens que
 " tout parle pour son Dieu, & se répand au long & au large
 " dans son immensité, qu'il s'y dissout & s'y perd pour le glo-
 " rifier. Je ne puis exprimer cecy comme il est : Je ne m'arreste
 " point à tout ce qui se passe en moy, ie retombe tousiours
 " dans mon neant, où ie trouue mon acte de pureté vers Dieu
 " comme dessus. Il conclud' apres en ces termes.
 " Je vous demande pardon, mon Reuerend Pere, si cecy
 " est si mal ordonné, ie l'ay mis comme il m'est venu, ie serois
 " bien heureux si vous pouuiez connoître toutes mes miseres,
 " car vous en auriez grande pitié. Voila l'écrit qu'il donna à
 son Directeur.

Ceux qui le liront iugeront sans doute, s'ils le comprennent bien & penetrent iusques au fond le sens de ses paroles, que les vertus de cét excellent seruiteur de Dieu ont esté tres-grandes, & sa perfection tres-releuée: ce qu'il deurent faire d'autant plus, qu'ils peuuent s'asseurer qu'il n'a point excédé à rapporter les choses qui le touchent, mais plustost qu'il les a diminuées, estant par grace. & mesme par nature extremement reserué, & tres-consideré en tout ce qu'il disoit, & singulierement à parler de soy.

SECTION VNIQUE.

La source, d'où ces vertus sont decoulées.

SI maintenant nous voulons examiner le principe de ces vertus & de cette perfection, & la source d'où elles sont decoulées; nous trouuerons que ç'a esté de l'vnion intime qu'il a eüe avec nostre Seigneur IESVS-CHRIST, à laquelle il s'est tousiours adonné par dessus tout.

Son sage & illuminé Directeur le R. P. de Condren sçachant que l'vnion avec IESVS-CHRIST est le fondement de nostre predestination, de nostre iustification, de nostre sanctification,

sanctification, de toute la grace & de toute la gloire que nous pouuons iamais auoir. Que IESVS-CHRIST estant le Chemin, tout ce qui est hors de ce Chemin, ne peut estre qu'égarément; estant la Verité, ce qui n'est pas conforme à cette Verité, n'est que mensonge, & estant la Vie, tout ce qui ne vit pas de cette Vie & n'est point animé de l'esprit de IESVS-CHRIST, n'est point viuant: mais qu'il est necessairement mort. Il fit ce que deuroient faire touïjours & avec grand soin tous les Directeurs des ames, qui fut de luy faire connoître & bien comprendre l'importance & la necessité de cette vnion, de l'appliquer fortement & constamment à IESVS-CHRIST pour le reglement de son interieur & de son exterieur; de le mettre dans ce Chemin, de le lier à cette Verité & de l'vnir à cette Vie. Monsieur de Renty suiuit exactement cette conduite, & y fit de grands progresz, qu'il alla touïjours perfectionnant iusques à sa mort avec de merueilleux accroissemens, de sorte que comme les derniers traits, que le peintre donne à son tableau pour l'acheuer, sont bien differens de ceux qui ne l'ont qu'ébauché; ou bien encore comme le Soleil a beaucoup plus de lumiere & plus de chaleur, à mesure qu'il s'auance en sa carriere & qu'il approche du midy, que quand il se leue: de mesme les applications, les liaisons & les vnions que cet excellent homme auoit sur ses dernieres années avec IESVS-CHRIST, & les actions ou qu'il faisoit pour luy, ou qu'il receuoit de luy, estoient toutes autres que celles de ses commencemens; car il estoit pour lors tout consommé en IESVS-CHRIST, il auoit comme passé en luy, & il le portoit naïuemét representé en son corps, en son ame, en ses pensées, en ses affectiōs, en ses appetits, en ses paroles & en ses œuures; d'où venoit qu'il n'auoit autre objet deuant les yeux que luy, qu'il ne pēsoit qu'à luy, qu'il n'aimoit que luy, qu'il ne parloit que de luy, qu'il n'operoit que pour luy & touïjours sur son modele, qu'il ne lisoit que le nouveau testamēt, lequel il portoit touïjours sur foy, & qu'il s'efforçoit par tous les moyens possibles de grauer & sa connoissance & son amour dans tous les cœurs.

— Ecriuant à son Directeur l'an mil six cens quarante six sur

D

le ſuiet de ſes diſpoſitions, il luy manda ces paroles entr'au-
 tres. Pour vous parler de mon interieur, ie me ſens ne vou-
 loir que Dieu, & en vnion avec Noſtre Seigneur I E S V S-
 C H R I S T luy rendre tous mes hommages, c'eſt là la pleni-
 tude de mon cœur, & ie le ſens bien quand ie le fonde.

Il dit cecy au meſme en vne autre lettre. Ie ſuis en
 grande neceſſité de I E S V S- C H R I S T; mais ie vous dois dire
 par reconnoiſſance à la miſericorde de Dieu & par vne cer-
 titude de verité, que ie ſens qu'il eſt plus dominant en moy
 que moy-meſme : Ie ſçay pourtant que ie ne ſuis de moy que
 peché; mais avec cela i'experimente Noſtre Seigneur en
 moy, qui eſt ma Force, ma Vie, ma Paix, & mon Tout. Ie
 le ſupplie qu'il ſoit noſtre Plenitude.

Et en vne autre encore. Ie me trouue, dit-il, bien em-
 peſché que vous mander, parce que toutes choſes s'effacent
 de moy à meſure qu'elles ſe paſſent : ie ne puis rien retenir
 que Dieu, & cela dans vne maniere auetugle d'une foy nuë,
 laquelle me faiſant cōnoître le mauuais fond qui eſt en moy,
 me donne toutefois force & grande confiance par voie d'a-
 bandon à noſtre Seigneur Ieſus-Chriſt en Dieu. I'ay trouué
 ce matin vn paſſage dans Sainct Paul que ie crois que noſtre
 Seigneur m'a mis en main pour m'exprimer, puis que c'eſt la
 verité de ce que i'experimente. *Fiduciam autem talem habe-*
mus per Chriſtum, ad Deum: non quod ſufficientes ſimus cogitare
aliquid à nobis, quaſi ex nobis: ſed ſufficiencia noſtra ex Deo eſt. Il y
 a environ quinze iours que ces paroles me furent miſes en
 l'eſprit ſans aucune contribution de ma part, ni de choſes
 qui m'en pûſſent rafraîſchir les idées; *Quere venam aquarum*
viuentium, & comme elles me furent exprimées, mon eſprit,
 tout ainſi que ſi l'on rebrouſſoit le long d'une riuere iuſques
 à ſa ſource, fut trouuer Ieſus-Chriſt depuis le commence-
 ment de ſa vie voïagere iuſques au point de ſa gloire, qu'il
 fut aſſis dans ſon thrône à la dextre de ſon pere, d'où il en-
 uoie ſon eſprit pour animer ſon Eglife & viuifier les ſiens. Ie
 veis que c'eſtoit là la ſource, d'où les veines d'eaux viues nous
 découloient, & que c'eſtoit là où il nous falloir adreſſer.

Ie pourrois rapporter icy pluſieurs ſemblables traits, dont

ses lettres à son Directeur sont semées, mais ie crois qu'en voila assez à present pour prouuer sa disposition enuers nostre Seigneur, & son vnion avec luy.

Quand il escriuoit a d'autres personnes, il inferoit toujours quelque chose de nostre Seigneur pour les exciter à s'attacher à luy, & se le proposer en tout pour le modele de leurs actions. Tantost il mandoit; Oublions tout pour penser à cette foy qui fait alliance de Dieu & de nous par Iesus-Christ, lequel nous est venu annoncer cette verité, qu'il a scelée de son sang & qu'il consommera dans sa gloire, lors que nous aurons esté fideles à suiure son esprit: allons apres & avec Iesus-Christ à Dieu, car il est nostre Voie. Tantost, c'est chose admirable qu'il ayt plû à Dieu de nous enuoyer son Fils, afin que nous ne le regardassions plus comme nostre Createur seulement, mais encore par l'alliance que nous auons avec luy par ce cher Fils, nous l'appellassions nostre Pere: Il est donc nostre pere dès à present, & il est certain qu'il nous considere comme ses enfans en la personne de son Fils incarné; mais l'importance est de nous bien vnir à ce fils continuant sa vie sur la terre dans la nostre par la direction de son esprit. Et il dit cecy dans vne autre lettre: Que Iesus-Christ soit nostre Lien, nostre Ame & nostre Vie à tous, comme il est nostre Patron; regardons de près ce Saint Original, entrons dans ses maximes, prenons ses desirs, executons ses œuures, & que l'on sçache que nous sommes Chrestiens.

Ecriuant à vne autre il luy parle de cette sorte: J'adore & ie benis de tout mon cœur nostre Seigneur Iesus-Christ de ce qu'il vous ouure le sien pour posseder tout le vostre; il le fera mourir, & le reduira à vne sainte pauvreté qui vous fera goûter la vraye vie & toute richesse, & aduoüer que c'est vne grande misericorde d'estre à Iesus-Christ: Je le supplie de vous distribuer les plus sanctifiantes de ses graces, & que nous puissions & bien mourir & bien viure de son esprit. Entrons dans cét esprit, qui nous donnera les sentimens & l'energie des enfans de Dieu. Toure autre presence & application à la maiesté diuine, qui n'est point en liaison de l'ame de

“ Iesus-Christ , est de creature vers le Createur , qui porte
 “ bien respect , mais ne donne pas la vie & les mouuemens des
 “ Enfans de Dieu vers leur Pere; où nous liant aux operations
 “ interieures de Iesus-Christ , nous y trouuons les affections
 “ des enfans veritables , que nous ne pouuons auoir qu’estans
 “ vnis au veritable Fils.

Finissons par ce qu’une personne, à qui il s’ouuroit confi-
 demment , rapporte de luy sur ce suiet; voicy ce qu’elle dit:
 cét homme rare paroissoit touché d’un amour bien tendre
 & bien ardent enuers Nostre Seigneur Iesus-Christ : i’ay re-
 marqué que ses conuersations & ses discours tendoient tou-
 iours à ce but , d’imprimer dans les ames la connoissance &
 l’amour de nostre Seigneur avec vne veritable solidité:luy
 “ parlant , il m’a dit plusieurs fois : i’auotie que ie ne puis rien
 “ goûter , où ie ne trouue point Iesus-Christ : vne ame qui n’en
 “ parle pas , ou dans laquelle on ne sent point d’effet de la gra-
 “ ce emanante de son esprit , qui est le principe des operations
 “ tant interieures comme exterieures solidement chrestien-
 “ nes , ne m’en parlez point : ie pourrois y voir des miracles &
 “ des prodiges , pour ainsi dire , si ie n’y vois Iesus-Christ , &
 “ si l’on ne me parle de luy , i’estime tout amusement d’es-
 “ prit , perte de temps & vn tres-dangereux precipice. Et plu-
 “ sieurs autres fois il me disoit , aimons Iesus-Christ , vnissons
 “ nous à son esprit & à sa grace : moy miserable pecheur ne l’ai-
 “ mant pas , ie serois au moins bien aise de voir ce mien man-
 “ quement suppléé par d’autres qui l’aimassent ardemment.
 “ Mais ie suis trop indigne de procurer vne chose si grande , &
 “ où i’ay si peu de part.

Ce seruiteur fidele & ce parfait imitateur de Iesus-Christ
 aiant vne application si forte & vne vnion si intime à ce diuin
 Seigneur , comme il est aisé de recueillir de ce qui a esté dit,
 nous deuons en suite rapporter à cette application & à cette
 vnion toutes ses vertus , dont nous allons traiter en détail , &
 les regarder comme des effets de cette cause , des ruisseaux
 de cette fontaine , & des reietons de cette tige.



SECONDE PARTIE.

LES VERTVS, QUI L'ONT
perfectionné au regard de luy mesme.

CHAPITRE PREMIER.

Ses penitences & ses austeritez.



O MME nostre chair & nos sens sont de leur nature, & encore plus par leur corruption, fort opposez à la vie spirituelle, & entre les ennemis de nostre salut & de nostre perfection, ceux qui se rendent les plus importuns & les plus violens, Dieu a coûtume d'inspirer à ceux, qu'il veut éleuer au comble de la vertu & les faire saints, au commencement de leur conuersion vn esprit de penitence & de mortification de leur corps. Monsieur de Renty que Dieu destinoit à cette gloire, animé de cet esprit attaque le sien avec de rigoureuses austeritez pour le ranger à son deuoir, & l'empescher qu'il ne luy nuisist dans ses exercices interieurs. Ainsi il commence à ieûner tous les iours & ne faire qu'un repas, ce qu'il a continué quelques années, iusques à ce qu'on luy ordonna de faire autrement & se nourrir dauantage, pour pouuoir soutenir les grands trauaux qu'il prenoit pour le prochain: il portoit quelques iours de la semaine vne ceinture de fer, où il y

auoit double rang de pointes fort longues, & vn bracelet de mesme; en d'autres il se disciplinoit rudement: par fois il prenoit le cilice: il tenoit continuellement sur sa poitrine vn Crucifix de bronze, dont la longueur luy alloit iusques au bas de l'estomach, & les cloux, qui estoient tres pointus, luy entroient dans la chair.

Quand il alloit à la campagne & qu'il estoit arriué à l'hostellerie, il entroit dans la cuisine pour manger, s'il pouuoit, avec les valets & avec les autres personnes viles qui s'y arrestent, & ce à deux fins, pour y mortifier son corps, & pour dire quelque chose de bon à ces pauvres gens; & quand le soir il estoit contraint de prendre vne chambre, il se defaisoit adroitement de ses gens & les enuoyoit coucher ailleurs, & luy passoit la nuit dans vne chaire, ou se iettoit sur vn lit tout vestu & tout botté, ce qu'il a continué iusques à sa mort. Estant venu à Amiens où i'estois, & vne Damoiselle des premieres de la ville luy ayant préparé chez soy dans vne belle chambre vn lit magnifique, pour honorer sa vertu & sa qualité, il en fut bien marry & n'en voulut point vser; mais se coucha sur vn banc, & le lendemain tout honteux me fit des reproches de cette Damoiselle: de sorte que pour auoir la benediction de le loger chez elle, il fallut le changer de chambre & de lit, & luy en donner de faits & d'accommodés à sa façon, c'est à dire, où il ne fust pas si à son ayse.

Il estoit tres mortifié en sa nourriture, mangeant peu & tousiours du pire; aussi se souuenoit-il que nostre mal-heur n'est venu que pour auoir mangé d'vn fruit delicieux. Disnant en compagnie vn iour maigre, quelqu'vn des conuiez qui étudioit ses actions, remarqua qu'il n'auoit mangé que des pois, & encore avec vne si grande modestie & vn si grand recueillement, que l'on pouuoit aysement voir qu'il estoit attaché à Dieu & non au manger.

Comme vn de ses amis, homme de pieté, luy donna vne fois à disner à Caën avec vn peu de ceremonie, comme à vne personne de condition, il mangea fort peu & entra dans vn sentiment d'humiliation & de confusion, ainsi qu'il le de-

clara par apres , de ce que les Chrestiens faisoient des festins, adioustant que peu de choses suffisoient, & que c'estoit vn grand tourment de se trouuer en des repas où il y a tant de viandes , & vn procedé bien contraire à la pauureté de I E S V S- C H R I S T , qui toutefois nous deuroit seruir de regle. Il disoit à ses amis, vn peu de pain, vn peu de lard, & de beurre suffit.

Pour cette cause ses amis aiant reconnu sa grace, ne pensoient plus à luy pour son manger, ils croioient mesme le bien traiter, de luy faire mauuaise chere: La perfection de la vie Chrestienne & l'accomplissement de la volonté de Dieu estoient, à l'exemple de nostre Seigneur, sa viande plus exquise & son mets delicieux, & quand on luy donnoit occasion, ou qu'on le laissoit dans la liberté de la pratiquer, il estoit ravi. Souuent à Paris quelque action de Charité l'aiait mené bien loin, & ne pouuant retourner à son logis pour disner, il entroit tout seul & inconnu en vn petit cabaret, ou chez vn Boulanger, & là pour tout son disner mangeoit vn petit pain & beuvoit de l'eau, & apres alloit tout gay reprendre le cours de ses affaires.

Ce qu'il faisoit pour la mortification du goust, il le pratiquoit constamment pour tous les autres sens, pour la veüe, pour l'ouïe, pour l'odorat & pour le toucher. Estant allé à Pontoise vn iour d'hyuer qu'il faisoit grand froid, il pria instamment la Touriere des meres Carmelites, chez qui il logeoit, qu'on ne luy fit point de feu, & qu'on ne luy dressat point de liêt; apres auoir parlé à quelques Religieuses, prenant congé de la derniere, il luy dit, il faut aller faire nos petites visites; c'estoit de visiter les prisoniers, les pauvres honneux & s'employer à d'autres œuures de charité, dont il ne s'oubloit iamais, quelque temps qu'il fit & pour peu de loisir qu'il eut. Il reuint sur les neuf heures du soir que les Religieuses alloient dire matines, & sans vouloir rien prendre pour manger, il entre dans l'Eglise & se met en prieres, qu'il continua iusques à onze heures, & puis se retire en sa Chambre sans vouloir permettre qu'on luy fit du feu, encore que par sa propre confession le froid l'incommodât grandement.

Il auoit toujours les yeux attentifs dessus foy pour en tout temps, en tout lieu, en toutes occasions, & iufques aux plus petites choses, mortifier son corps, pour luy faire tousiours quelque mal, ou au moins l'empêcher de sentir du plaisir; il trouuoit pour cela des inuentions admirables, & se rendoit tres-ingenieux, portant ainsi toujours, comme dit S. Paul, la mortification de Iesus-Christ en son corps pour y faire viure & reluire sa vie, parce qu'il sçauoit, ce que le mesme dit autre part, que ceux qui appartiennent à Iesus-Christ, qui sont ses vrais Disciples & qui veulent estre bien assurément à luy, ont crucifié leur chair avec ses vices & ses concupiscences. A vray dire comme nous voyons que plus on s'emplit d'une chose, moins peut-on tenir de celle qui luy est contraire; plus on s'enfonce dans les tenebres, moins on est capable de lumiere; & que d'ailleurs il n'est rien, ainsi que nous auons dit cy-dessus, de si opposé à l'esprit que la chair, il faut necessairement inferer que plus vn homme mignarde sa chair, plus il s'applique à son corps, & en prend plus de soin, plus il s'éloigne de l'esprit, & moins il se dispose pour la vie spirituelle.

Cét homme illuminé regardoit & traitoit son corps comme son ennemi dans le dessein qu'il auoit de mener vne vie vrayemēt spirituelle; tout ce qui pouuoit contenter & flater ses sens luy estoit insupportable; d'où vient qu'il luy échappa vniour de dire à vne personne confidente, que Dieu luy auoit donné vne grande haine de foy-mesme; qui alla si auant par sa ferueur & par le desir insatiable qu'il auoit de se mortifier, qu'outre le temperament que son Directeur fut obligé d'y apporter, vne personne celebre de nos iours, Religieuse Carmelite du Couuent de Beaulne, Sœur Marguerite du S. Sacrement qui a vescu & qui est morte en grande odeur de sainteté, avec qui il auoit des liaisons intimes de grace, éclairée mesme de Dieu là dessus, luy en fit des reproches & luy en donna des auis, ausquels voulant deferrer pour la creance qu'il auoit en elle, & avec suiet, il se relascha en quelque petite chose, encore avec plainte, qu'il témoigna à vne personne luy écriuant: ie ne sçay pourquoy
l'on

l'on tient la bride si courte à vne beste si lasche , qui auroit bien plustot besoin d'éperon que de retenuë.

Avec toute cette retenuë ne laissant pas de continuër à faire la guerre à son corps en tout ce qu'il pouuoit , mais pourtant dans les ordres qu'il auoit reçûs , il en vint à ce point de mortification parfaite , que son corps estoit comme mort & insensible à toutes les choses qui ne faisoient quasi plus d'impression sur ses sens, mangeant sans gout, & disant luy mesme que toutes les viandes luy estoient egales; voiant sans voir, d'où il auoit qu'apres auoir esté, & lōg-temps, en des Eglises bien ornées, où il auoit eu ces ornemens deuant les yeux, comme on luy demandoit s'ils n'estoient pas beaux, il répondoit simplement, qu'il n'auoit rien veu.

A force de s'estre ainsi mortifié, il n'auoit plus de peine à rien de ce qui fait fremir les perones encore viuantes à elles mesmes & attachées à leurs corps; & non seulement il n'y auoit plus de peine, mais, ce qui est le plus haut point de la perfection d'une vertu, comme remarque Aristote, il y auoit vn tres-grand plaisir, qui luy venoit non d'une abondance de grace sensible, laquelle pourroit rendre à vn homme mesme immortalisé & sensuel les austeritez agreables, mais du fond de la vertu entierement acquise.

CHAPITRE II.

Sa Pauvreté d'esprit.



NE des plus grandes & des plus admirables vertus qui ait éclaté en Monsieur de Renty, est d'auoir esté dans la possession des richesses si dégagé de leur affection & possédé en vn si haut degré, que nous allons voir, la premiere des Beautés, qui declare bien-heureux les pauvres d'esprit, parce que le Royaume des Cieux, le Royaume de la grace en ce monde & le Royaume de la gloire en l'autre leur appartient.

Verité, qui luy a serui d'un puissant attrait pour tâcher d'acquiescer ce riche thresor, dont écriuant à vne persone de pieté, il luy dit : ie fus l'autre iour touché en lisant les huit Beatitudes, & ie connûs sur ce mot de Beatitude, qu'en effet il n'y en auoit point d'autres que celles-là, & que s'il y en eut eu, nostre Seigneur nous les eut enseignées, & qu'ainsi elles deuoient estre toute nostre étude. Mais quoy ? on les laisse là sans s'y établir & sans demander la grace de s'y fonder, & on court apres les Beatitudes du monde & de nostre conuoitise, quittant ce qui est clair & qui nous est donné de nostre Chef I E S V S - C H R I S T, pour estre dans des états d'embaras & de confusion, & en suite de trouble, de malheur & de danger.

Ce n'est pas à ces Beatitudes qu'il a couru, mais bien à celles de l'Euangile, & en particulier à la premiere, dont voycy comme parle vn témoin digne de foy & qui l'a connû intimement. Je n'ay iamais veu personne dans vne si parfaite pauureté d'esprit, ni dans vn si ardent desir d'en porter les effets que luy ; il me disoit dans l'ardeur de son desir. Faites que par vos prieres nous changions de forme de vie ; quand ferez vous aupres de Dieu que cela soit ? cet habit & ce bien m'est tres-penible.

I'ay parlé depuis sa mort à vn pere, à qui il auoit communiqué ses mouuemens pour tout laisser, qui me dit qu'un iour il luy demanda tout couuert de larmes & à genoux son auis là dessus, & que iamais il ne fut plus surpris que de voir Monsieur de Renty à ses pieds & dans ces sentimens de pauureté. Il m'a dit que le trait de Dieu pour le separer des creatures & luy faire quitter la maniere de viure conuenable à sa naissance, fut si puissant sur son ame, que si vn autre trait de la mesme main ne l'eut en mesme temps retenu, il eut abandonné tout & s'en fut allé à l'exemple de Saint Alexis pour mener vne vie pauvre comme la sienne, mais que Dieu luy imprimant ce desir de la pauureté en empechoit l'effet pour le tenir dans l'état où il l'auoit mis, qui ne luy estoit pas vne petite croix, parce que le desir tourmente & afflige l'ame à proportion qu'il est plus vehement, quand elle ne peut par

uenir à la possession de la chose désirée; mais parce qu'il estoit conforme absolument à la volonté de Dieu, comme il le faut estre aussi en tout, il portoit cette croix pour contraire qu'elle fut à son affection, avec vne grande paix & avec vne parfaite soumission à ses ordres.

Vn autre témoin de mesme autorité rend de luy ce témoignage. Il m'a dit souuent dans la confiance que nous auions ensemble, qu'il estoit honteux lors qu'il entroit en sa maison, se voyant si bien logé en ce monde, & que c'estoit vne de ses grandes peines d'auoir tant de biens & d'estre si à son aise; qu'il eust esté rai de se voir réduit à n'auoir que du pain & de l'eau, & encore à les gagner par son trauail & à la sueur de son visage. Luy ayant vn iour demandé comme il pouuoit estre si tranquille dans toutes les incommoditez qu'il souffroit, & en tous les euenemens fâcheux qui luy arriuoient, il me répondit à condition que ie luy gardasse le secret, que par la misericorde de Dieu il se trouuoit en vne disposition de paix & en vne assiete d'égalité dans les afflictions comme dans les ioyes, & qu'il n'auoit plus aucun sentiment pour rien craindre ny pour rien desirer: & i'en ay veu l'expérience en des rencontres, où la meilleure partie de son bien couroit risque, sans qu'il parut la moindre émotion en luy, & il me disoit, puis que Dieu m'a donné la conduite de ce bien, ie feray pour le conseruer ce qu'il faudra, mais apres auoir fait ce qu'il exige de mes soins, tout m'est égal, quelque succes qui arriue.

Vn autre rapporte encore cecy: il auoit la pauuereté Euāgelique en sa perfection, estāt entieremēt éloigné d'esprit & de pensée, de cœur & d'affectiō de tous les biens de la terre, & il m'a dit qu'il ne sentoit point vne plus grāde croix que d'auoir du bien, & qu'il auoit vne ioye extreme d'estre mendiant & inconnu, si ç'eut esté la volonté de Dieu. De là vient qu'il portoit vne sainte enuie aux pauures, qu'il les iugeoit bienheureux, & que les regardant il disoit par fois en soupirant, mais d'vn soupir qu'on voyoit partir du fōd de l'ame: ha! que ne suis-ie cōme eux! qu'il les honoroit, les aimoit, les caressoit & se mettoit à genoux deuant eux, non seulement par humilité,

mais encore par estime de leur état, pour la disposition qu'il donne à la perfection de la loy nouvelle, & pour la ressemblance qu'il a avec Iesus-Christ. Estant vn iour allé visiter les pauvres au grand Hospital en la ville de Caën, on le vit à genoux & la teste nuë sur le pauë de la grande Sale, pilant dans vn mortier quelques drogues pour l'vsage des pauvres malades; c'estoit le respect & l'honneur, qu'il portoit à ceux pour qui il trauailloit, qui le mettoit en cette posture.

Mais pour la fin écoutons le luy mesme raconter ses sentimens sur cette matiere, & encore qu'il parle de soy, ne faisons point de difficulté d'adiouster foy à ce qu'il nous dira, parce qu'il est tres-digne d'estre crû. Voicy donc ce qu'il écrit à la Sœur Marguerite du Saint Sacrement, de qui nous auons parlé au Chapitre precedent.

Ma tres-chere Sœur. I'ay dans le cœur que le
 “ Saint Enfant Iesus (l'Enfance de Iesus estoit vn des myste-
 “ res, auquel il estoit plus particulierement & plus vtilement
 “ appliqué, comme nous verrons en son lieu) veut quelque
 “ chose de moy, qu'il a enuie que ie luy demande & que ie me
 “ dispose à l'obtenir; & ie vous auoie que plus il me vient de
 “ biens de ce monde, ie connois plus clairement la malignité
 “ qui y est attachée, & qu'ils ne produisent qu'embarras, & ne
 “ donnent guere moyen de mieux faire. Mon cœur est tres-
 “ fort porté au denuëment effectif de tout cela pour le suiure
 “ seul, puis qu'il est mon Chemin, comme le plus pauvre & le
 “ plus abbaissé des siens. Que si ie ne sçauois que ce me seroit
 “ presumption de me croire capable de cet état, & vne tenta-
 “ tion de m'y arrester, à present lié comme ie suis, i'y souûpire-
 “ rois beaucoup. Ce que i'en veux tirer est, qu'ignorant les
 “ desseins de Dieu, ie ne sçay ce qu'il me prepare pour l'au-
 “ nir, & ie m'offre à tout ce qu'il luy plaira, sçachant qu'avec
 “ luy ie peus tout, comme sans luy ie ne peus rien, & ne veus
 “ rien. Ma tres-chere Sœur, i'ay bien besoin de faire penitence
 “ & d'estre humilié, i'ay grande honte de ma condition & de
 “ ce que ie suis, i'ay commodité & abondance de toutes les
 “ choses de ce siecle, mais ma famille & l'érat des choses ne
 “ permet pas qu'il en soit autrement: Et ie vois les Eglises & les

pauvres, où ie voudrois tout verser, au moins ce qui se peut en iustice, ou bien estre pauvre comme les pauvres, afin de n'auoir pas la honte d'estre mieux qu'eux. Voila ses sentimens, que Dieu a permis qu'il ait mis au iour pour nous faire voir ce que peut la grace dans vn cœur bien disposé, & iusques où va la parfaite pauureté d'esprit.

SECTION VNIQUE.

Sa Pauureté exterieure.

CETTE haute estime & cette affection sincere, que ce grand seruiteur de Dieu auoit pour la priuation des biens de ce monde, & cette excellente pauureté d'esprit où il estoit arriué, ne pouuant se contenir au dedans ny demeurer renfermée dans l'interieur de son ame, elle a paru au dehors visiblement en mille effets & l'a porté à la pauureté exterieure en toutes les manieres qui luy ont esté possibles: car sans parler des grandes aumosnes qu'il faisoit aux pauvres, vsant de ses biens exactement selon le dessein de Dieu, contre l'ordinaire des hommes, entre lesquels il y en a plusieurs qui ont beaucoup de biens, mais tres-peu qui s'en seruent comme Dieu veut, il s'est denué d'vn tres-grand nombre de choses & s'est appauuri en tout ce qu'il a pû: car il se deffit de quelques liures, dont il se seruoit, parce qu'ils estoient richement reliez; il ne portoit que des habits fort simples & tout vnis; il n'vsoit point de gands, quelque temps qu'il fit, ou au moins c'estoit vne chose tres-rare de luy en voir; effectiuement il auoit les mains si occupées aux actions de charité qu'il n'auoit pas le loisir de les ganter; Il n'auoit de l'argent que pour faire ses aumosnes & l'employer en de bonnes œuures; & il alloit croissant en cette pauureté exterieure & en ce retranchement effectif. Je l'ay veu au commencement aller en carosse avec vn Page & des Laquais; apres en carosse avec vn Laquais, mais sans Page; puis sans carosse à pied avec vn Laquais, & en fin seul sans Laquais, & ainsi sans soy-mesme.

Parlant vn iour à vne personne fort confidente de la Pauvreté Euangelique , il luy dit que Dieu luy auoit donné des desirs si ardens de la posséder , que ne pouuant à cause des liens qui le tenoient, abandonner ses biens, comme il eut souhaitté pour pouuoit suiure , non plus riche mais pauure , IESVS-CHRIST son Fils fait pauure pour nous, il tâchoit de se passer du moins qu'il pouuoit , & de retrancher pour sa personne , non seulement le superflu & le bien commode , mais encore tout ce qui n'estoit pas precisement necessaire : qu'allant seul par les champs , sa consolation estoit d'estre en liberté de pouuoit viure en cela comme il vouloit ; mais qu'après tout il n'auoit pû trouuer vn meilleur remède à l'ardeur de ses desirs , que de se dépouïller , autant qu'il auoit pû , de la propriété de tous ses biens , pour ne s'en plus tenir que le depositaire & le simple dispensateur enuers sa famille , ne se considerant dans leur possession que comme vn pauure , qui receuoit ses necessitez de Dieu par les mains de sa femme.

Cette personne parle d'vne action heroïque que cet excellent hōme fit en cette matiere , dont voicy l'explication plus au long dans vn memoire , que j'ay veu écrit de sa main.

« Je fais resolution en la presence de mon Dieu d'auoir soin
 « des reparations , des manufactures, des marchez & des baux
 « qui seront à faire dans le bien qu'il m'a donné en manîment,
 « & ce d'autant plus qu'il me fait la grace de me disposer à luy
 « en faire vne demission totale , & de tout ce que ie suis , à ce
 « grand iour de sa Natiuité prochaine , & me mettre en état
 « qu'il en fera le propriétaire , & moy le procureur & le serui-
 « teur pour le distribuer , & tout prest de le ceder à la moindre
 « marque de sa volonté. Je reconnois donc aujourd'hui par
 « sa diuine misericorde , que ma condition estant roturiere
 « dans le Christianisme , ie dois m'appliquer à ces soins autant
 « que le demanderont les besoins & que les rencontres le per-
 « mettront ; & mesme d'y trauailler , & aux choses les plus bas-
 « ses , comme à remuër la terre , à massonner & autres choses,
 « puis qu'il m'a donné par sa grace l'industrie de quelques arts ;
 « & ie dois faire autant de cas de ces emplois que de celuy du
 « secours des ames , regardant non les choses en ce qu'elles

font, mais la volonté de Dieu & ce qu'elle desire de moy. Je »
supplie ce Seigneur de mon cœur de me pardonner les man- »
quemens, que j'ay faits contre cela iusques à maintenant. »
Je fais ce present memoire apres la veuë qu'il m'en a donné, »
ce cinquième de Nouembre, mil six cens quarante trois, »
pour me seruir de memorial de mon obligation. »

Voyla sa resolution & sa promesse; Voyons comme il l'e-
xecuta. Il fit bastir à Citry, qui est l'vne des terres qu'il auoit
en Brie; considerons avec quelle pureté de conscience, avec
quelle sublimité de pensées, & quel degagement d'affec-
tion il s'y appliqua; voicy comme il m'en escriuit de là, le
huietième de May, l'an mil six cens quarante huit.

Nostre grand Dieu soit beni à iamais par nostre Seigneur »
IESVS-CHRIST, & par tous les iustes qui sont remplis de son »
esprit. Je crois que l'ordre de Dieu me veut dans le trauail »
exterieur parmi beaucoup d'ouuriers, puis que la necessité »
m'y oblige: elle m'y oblige comme pere de famille en vne »
maison considerable à mes Enfans, laquelle estoit en peril »
pour auoir esté abandonnée dés longtemps: Je vous auoüe »
que mon cœur souhaite bien vn autre edifice, que celuy qui »
se fait des pierres de ce Siecle; mais ie regarde cecy comme »
vne iustice de Dieu, qui a destiné le premier homme depuis »
son peché, & tous ses Enfans, au trauail: c'est pourquoy ie »
le reuere, & ie m'y donne de bon cœur, & avec courage, »
aneanti toutefois dans cette penitence qui n'a guere de rap- »
port à la vie de l'esprit. Nous auons veu de nos premiers Pa- »
pes, qui estoient de grands Saints, condamnés à seruir les »
mulets, & moy, qui suis vn tres-grand pecheur & qui meri- »
terois l'enfer, ie suis traité si misericordieusement, que ie ne »
suis enuoié qu'aux carrieres, non dans le bannissement & la »
disette de nos premiers Chrestiens, mais sur vne terre qui pa- »
roist mienne. Souuent le iour ie pense que ce trauail est in- »
grat & dis, de quoy seruent tant de maisons qu'il faut si tost »
quitter, & qui seront encore détruites? Je suis humilié de »
l'œuure, mais non de l'application à l'ouurage.

En celle du dix-neufième de Iuillet il me dit sur le mesme »
sujet: Ce m'est icy vn temps qui m'est bien cher, le regardant, »

« comme ordonné de Dieu pour faire vne petite partie de la
 « penitence deuë à mes grands pechez : si la grace ne me sou-
 « tenoit avec cette veuë, j'aurois grande peine à vn trauail si
 « ingrat & si limité comme de bastir en la maison d'un secu-
 « lier, & donner mon temps à cét ouurage qui veut assiduité :
 « mais ie ressens qu'il y a ordre de Dieu, & ie quitte par son
 « mouuemēt, ce me semble, l'état de Magdelaine pour prendre
 « celuy de Marthe, acceptant cette humiliation avec anean-
 « tissement & avec veuë de la iustice diuine. Ce qui me fait
 « plus connoître qu'il y a ordre de Dieu, c'est que de temps en
 « temps, & les Festes & les Dimanches, les misericordes de ce
 « Seigneur font si grandes sur moy, que ie ressens plus de re-
 « tribution en vn instant, que la patience & l'humiliation d'un
 « pecheur ne meriteroit en toute sa vie: il s'ouure tellement à
 « moy, que ma dureté est amollie, & il me faut fondre en lar-
 « mes; elles me font si fort sur le bord des yeux, que tres-sou-
 « uent elles voudroient paroître, penetré que ie suis d'amour,
 « de respect, & de reconnoissance des effets de sa bonté, qu'il
 « renouelle en moy par sa presence de lumieres; il me mani-
 « feste ses conduites inexplicables, que ie ne peux dire.

« Je connois par cecy comme il y a grace de suiure l'ordre de
 « Dieu, & non le sien par vn esprit propre & secret de superbe,
 « pretexté de la gloire de Dieu pour se dispenser souuent; sans
 « que l'on s'en aperçoie, du trauail des choses penibles &
 « basses dans nos conditions; que toutefois nostre Seigneur ne
 « benit point selon les elections que nous en faisons, mais qu'il
 « benit selon qu'il en ordonne; & nostre fidelité ne tire pas sa
 « valeur de faire cecy ou cela, mais de ce qu'elle est exacte à
 « faire ce qu'il exige de nous, abandonnés à tout ce qu'il luy
 « plaira. Je vois qu'il faut vne grande mort à soy-mesme & vn
 « grand fond d'aneantissement pour suiure ainsi purement la
 « grace, & n'estre pas à nos formes, mais à celles de Dieu.

« En celle du douziesme d'Aoult, voicy ses termes. Je suis
 « toujours dans montracas, qui me prend bien du temps &
 « presque tout; Mais ie n'oserois regarder ailleurs, ains seule-
 « ment m'abaisser & me soumettre à l'ordonnance diuine.
 « C'estoit vne chose bien grossiere à **IESVS-CHRIST** de con-
 uerfer

uerfer avec des hommes, qui auoient plus de rudesse que mes pierres, & plus d'opposition à sa pureté que mon ouurage n'en a à mes ouuriers: il souffroit pourtant tout, il portoit tout, & n'en a conuertit que tres-peu. Je vous supplie de m'obtenir part à son obeissance & à sa patience aux ordres de Dieu son pere.

Et écriuant à vn de ses amis, il lui parle de cette sorte. Je suis en ce pays au milieu de quatre ou cinq Ateliers d'Ouuriers pour rétablir vne demeure de la terre en ma famille, que la caducité faisoit deperir. Que peut faire l'esprit en ce traual, lequel suiuant l'esprit de la foy doit estre en terre pelerin & étranger ? sans doute il gemit beaucoup, non de l'ordre de Dieu, mais apres la patrie au milieu de ces occupations, comme opposées à sa liberté. Il faut faire penitence en traueillant: c'est l'arrest de Dieu apres le premier peché.

Voilà les sentimens, avec lesquels cet excellent homme bastissoit, & dont tous les Chrestiens, qui sont faits pour s'établir non en la terre, mais au Ciel & y auoir vne demeure eternelle, deuroient estre animez quand ils bastissent.

CHAPITRE III.

Son Humilité.

LA pauureté a fuiui l'austerité & la mortification du corps, comme aiant beaucoup de liaison avec elle; & l'humilité suit la pauureté, attendu mesmemét que selon Saint Augustin la pauureté d'esprit, dont parle nostre Seigneur en la premiere Beatitude, n'est autre chose que l'humilité. En effet, il n'y a Gens au monde plus pauvres d'esprit que les vrais Humbles, dautant qu'ils s'estiment n'estre rien, n'auoir rien, ne pouuoir rien & ne valoir rien, mais estre les rebuts & les balieures de la terre, auoir besoin de tout, & ne s'attribuent aucune louiange de quoy que ce soit. Monsieur de Renty en est venu

là, & il a possédé cette vertu au plus haut degré de son excellence.

A la verité si l'humilité, comme tous les Saints le disent, est le fondement des vertus, Dieu ayant dessein d'élever en luy vn magnifique palais à toutes les vertus, & de bastir l'edifice d'une perfection tres-sublime, il falloit par necessité que le fondement en fut ietté tres-bas & que son humilité fut tres-profonde. Il estoit étably en cette vertu si solidemēt, que cela estoit admirable, & il en a fait vn si grand nombre d'actions remarquables, que les personnes, qui ont demeuré plusieurs années avec luy & qui l'ont connu tres-particulièrement, assurent qu'il seroit impossible de les rapporter toutes.

Il faisoit vn état nō pareil de cette importante vertu; il l'aimoit de tout sō cœur; il la desiroit avec des ardeurs extremes; il prioit instamment & coniuoit ses amis de la demander à Dieu pour luy & de la luy obtenir; Et comme nous voyons la pierre descendre avec roideur, & les eaux couler en bas impetueusement, il faisoit le mesme vers l'humilité; c'estoit là sa pente. Il écriuoit dans ce sentiment à vne personne confidente, ayez pitié de moy, ie suis plus infidele que creature du monde, ie me mets à genoux deuant vous pour vous prier de le croire: Si nostre Seigneur ne me monstroit ce que ie suis, Lucifer ne seroit pas peu riche en ma personne; mais ce benin Seigneur me montre toujours par sa misericorde mon neant, c'est là où la grace me porte. Il mande à vn autre; toute ma resolution est en ces paroles de Dauid. *Elegi abiectus esse in domo Dei mei.* Mon choix est d'estre petit & abiect en la maison de mon Dieu. A vn autre encore; Ie suis porté à demander vne vie humiliée, souffrante & inconnue aux hommes, i'y ay grand attrait. Et i'ay vn papier écrit de sa propre main & tout de son sang, qui contient ces mots.

Ie vous donne ma liberté, ô mon Dieu, & vous demande le Neant, où il faut que le Chrestien arriue pour surgir purement vers vous.

GASTON IEAN BAPTISTE.

Dominus Iesus semetipsum exinanivit usque ad mortem crucis: pro-

per quod & Deus exaltauit illum. Ce troisieme Decembre, mil six cens quarante quatre. Amen.

Voila son inclination & son attrait, & avec raison; car comme d'une part il s'estoit proposé nostre Seigneur pour le patron de sa vie, & auoit pris vne resolution determinée de l'imiter en tout ce qu'il pourroit, & que de l'autre l'humilité est la vertu propre de *I E S V S - C H R I S T*, ainsi que l'appelle Saint Bernard apres S. Paul, il a embrassé pour ce suiet l'humilité de toute son affection, il s'y est addonné de toutes ses forces & la exercée dans toute son étendue, comme nous allons voir par la suite.

Mais deuant que nous le voyons dans les actions de cette vertu, écoutons ce qu'il nous en apprend & les lumieres qu'il nous en donne: l'humilité, disoit-il, est la base qui porte & qui soutient tout l'œuvre de Dieu en nous; Elle fait la creature si nuë & si separée d'elle mesme, qu'elle ne luy laisse point le pouuoir d'aucun regard sur soy, mais la rend si occupée de la grandeur de Dieu qui l'aneantit, qu'elle est toute perduë en respect & en abbaisement: c'est là la grace des Chrestiens voyageurs, qui nuds & depouillés de tout ne s'estiment qu'un neant & un souffle d'estre, lequel n'ayant que ce qu'il a reçu de Dieu, n'a instinct que pour Dieu. C'est vne belle humilité de ne voir en soy que le neant, & qui n'y voit que le neant, n'y voit rien; ainsi l'ame qui ne voit rien en soy, ne trouue rien en soy qui l'arreste, & par ce moyen elle est toujours pointée vers Dieu: c'est comme vne aiguille touchée de l'aimant, qui ayant esté enuelpée de toutes sortes de nipes, viendroit à en estre degagée; car aussi tost elle se tourneroit vers son nort, & y demeureroit touiours fixe, encore que la tempeste de la mer & les vens bouleuerfissent le vaisseau: voila sa disposition, & le regard de l'ame vraiment humble. regard du neant en soy, & regard de Dieu dans sa grandeur.

SECTION PREMIERE.

Son Humilité de cœur.

L'HUMILITE' peut-estre partagée en trois, en l'Humilité du cœur, en l'Humilité des paroles, & en celle des œuures; & commel'Humilité du cœur est la principale & la vraye, de laquelle seule aussi nostre Seigneur s'est donné pour exemplaire, & de qui les deux autres ne sont que les effets, si elles sont vrayes, ou autrement ce sont seulement des ombres & des phantômes d'humilité; c'est pourquoy nous commençons par elle.

Et nous disons qu'elle consiste en l'Humilité de l'entendement & des pensées, de la volonté & des affections, à se bien connoistre & sçauoir au vray ce que l'on est de foy, que l'on n'est que neant & peché; & en suite de ces connoissances prendre des opinions de foy tres-petites & tres-basses, se iuger indigne de toute estime & de toute loüange, se mépriser & aimer son abaissement. C'est ce qu'a fait excellemment ce parfait imitateur de I E S U S- C H R I S T.

Il auoit vn si bas sentiment de foy qu'il seroit malaisé de l'expliquer, & quoy qu'il eut de tres-rares qualitez naturelles & surnaturelles, il ne voioit pourtant rien en foy que ce que nous auons dit, le neant & le peché; & par vne persuasion veritable & sincere il se reputoit le plus indigne de tous les hommes, prenant ce titre en quelques vnes de ses lettres: mais le nom qu'il se donnoit plus ordinairement estoit celuy de pecheur & de grand pecheur, qu'il repetoit tres-souuent & avec vn esprit vrayement humilié. Ce que i'ay remarqué en luy en prés de six ans que i'ay eu l'honneur de sa connoissance, dit vne personne digne de foy, a esté vne humilité tres-profoide qui le tenoit dans vn aneantissement perpetuel deuant Dieu & deuant les creatures, mais d'vne maniere que i'en'ay iamais veü en qui que ce soit, encore que i'aye connu de tres-saintes ames. La grandeur de Dieu l'humilioit iusques aux abysses; Et y a t'il, me dit-il vn iour,

quelque chose de grand deuant cette Grandeur? ie m'y vois si »
petit, si petit & rien: & puis s'éleuât à Dieu dans ce sentimēt »
de petiteſſe, il diſoit, vn atome au Soleil eſt bien petit, mais »
ie ſuis encore bien plus petit en la preſence de Dieu, car ie »
ne ſuis rien. Puis s'humiliant dans vn autre ſens il diſoit, »
helas! ie ſuis trop, ie ſuis vn pecheur, vn infidele, vn ana- »
theme par mes crimes. Et il manda encore à la meſme »
perſonne: il me ſemble que ie m'écraſe deuant Dieu com- »
mē vn œuf, à qui ie donnerois vn coup de pied de toute ma »
force contre terre; auſſi vous faut-il parler de moy, & que »
l'aye ſeulement vn nom? c'eſt choſe étrange. »

Cette opinion tres-baſſe qu'il auoit de ſoy, luy fit dire
plus d'une fois, & tout preſt à en pleurer, qu'il étoit étonné
de la bonté que l'on auoit pour luy de le ſouffrir, & qu'il ne
pouuoit aſſez admirer comme on ne lui iettoit de la bouë
par tout, & comme toutes les creatures ne ſe bandoient con-
tre luy. Cette meſme opinion luy auoit perſuadé que c'eſtoit
beaucoup de hardieſſe à luy de parler, & qu'on vſoit d'une
grande miſericorde enuers luy de ſupporter ſa conuerſation,
qu'il croioit eſtre fort onereuſe: Ie l'ay vû tres ſouuēt, rappor-
te vne perſōne de pieté qui l'a fort connu, s'humilier iuſques
au centre de la terre, lors qu'il me parloit de Dieu, diſant que
ce n'eſtoit pas à vn homme de ſa condition d'en parler, mais
qu'il deuoit plutôſt ſe contenir dans le ſilence; auſſi n'en par-
loit il pas ſans mouuement particulier que noſtre Seigneur
luy en donnoit, ou pour la neceſſité du prochain, ou pour
quelque autre bien que Dieu en vouloit tirer pour ſa gloire,
demeurant hors de là par humilité, comme ſ'il n'ût ſçu en di-
re deux mots. D'as vne lettre qu'il écriſt à vne autre, il luy dit, »
Viuons de Verité, quelle place pouuons nous tenir deuant »
Dieu & deuant ſes Saints, que celle du Neant? avec éton- »
nement que l'on ſouffre ce neant de tout bien & ce compoſé, »
de tant de maux. »

Cette humilité de cœur eſtoit en luy generale, parce qu'il
la pratiqnoit en tout, & il n'y auoit point de choſe qui ne lui
ſeruit à ſ'abaiſſer. Il ſ'abaiſſoit grandement dans la con-
noiſſance de la foibleſſe de noſtre nature. Sur quoy il m'é-

“ criuit vn iour ce sentiment. Il faut que ie vous die auant que
 “ de finir, vne chose qui me tient dans vn merueilleux mépris
 “ de moy, & qui me fait ressentir combien il y a peu d’assû-
 “ rance en l’homme, c’est que quand S. Pierre & les Apostres
 “ rendent plus de témoignage de leur fidelité à nostre Sei-
 “ gneur; nostre Seigneur leur marque l’infidelité qu’ils doi-
 “ uent commettre: ayant dit à S. Pierre qu’il ne pouuoit le
 “ suiure pour lors, où il alloit, S. Pierre luy répondit, pour-
 “ quoy ne puis-ie pas vous suiure maintenant? ie suis prest de
 “ donner ma vie pour vous: tu donneras ta vie pour moy? re-
 “ plique nostre Seigneur; ie te dis en verité que le coq ne
 “ chantera pas, que tu ne me renies trois fois. S. Pierre ne
 “ comprenant pas ces paroles, continuë dans la protestation
 “ de sa fidelité, & dans l’occasion de la prise de nostre Sei-
 “ gneur il met la main à l’épée, qu’il ne remet point dans le
 “ fourreau que nostre Seigneur ne le luy ordonne; Il le suit &
 “ ne l’abandonne point estant pris, mais apres il le renie à la
 “ simple parole d’vne seruante. Les veuës de ces foibleses,
 “ qui me viennent non par recherche, ny par étude, mais par
 “ lumieres diuines & par l’impression qu’elles font en moy,
 “ me rienent tout aneanti & sans confiance aucune en moy-
 “ mesme, mais ie la mets toute en Dieu & en son fils nostre
 “ Seigneur. cet état me tiendrait dans vne merueilleuse pe-
 “ titesse, si i’y estois fidele; i’ay des instans qu’il me semble que
 “ mesme tout mon corps est écrasé, broyé & aneanti, & l’in-
 “ terieur encore bien plus.

“ Il mande à vne autre personne; c’est pitié que de l’hom-
 “ me & de son infirmité, il est par fois important qu’il ay
 “ experience de ce qu’il est, afin qu’il n’oublie pas ce qu’il
 “ est, ny la place qu’il doit tenir. *Vt non gloriatur omnis caro in con-*
 “ *spectu eius*, afin qu’estant auili, aneanti & rendu comme vne
 “ chose qui n’est point, Iesus-Christ soit en luy vie de grace &
 “ de saincteté, attendant le temps de nostre redemption, c’est
 “ à dire, l’entrée dans la gloire, & comme il est écrit, que ce-
 “ luy qui se glorifie, se glorifie au Seigneur.

“ Et à vne autre encore: L’état de nostre pauvreté & la veuë
 “ de nos miseres nous fait connoitre le besoin que nous auons

de la grâce, & fonde l'ame dans le neant de soy-mesme, & dans la persuasion de son impuissance à tout bien, & dans cette verité, qu'elle n'a iamais esté & qu'elle ne peut-estre, que retardement & que diminution aux operations de Dieu en foy.

La connoissance de ses fautes & de ses pechez l'humiliant étrangement, comme ce sont aussi les plus grands & les plus iustes sujets d'humiliation que nous puissions auoir, il m'écriuoit vn iour : ie vous assure que j'ay bien dequoy m'humilier & trauailler à bon escient à me corriger quoy qu'en patience, car j'experimente & ie vois clairement, que quoy que nous trauaillions, & que nous souhaitions de sortir de nos imperfections, nostre Seigneur nous y laisse quelquefois long-temps pour nous faire connoître nostre foiblesse, & nous humilier.

Il desiroit d'estre auerti & repris de ses fautes, & voicy ce qu'il y obserua au commencement de son appel à la haute perfection. Il fit qu'une personne, qui estoit beaucoup au dessous de luy, eut ordre de son Directeur de l'auertir, si elle voyoit quelque chose en luy qui fut contraire à la perfection; lors que cette personne l'auertissoit de quelque manquement, quoy que tres-leger, & mesme de l'ombre d'un defect, il l'écouloit avec respect & remerciement, & s'en humilioit comme s'il eut commis un crime : luy mesme s'accusoit quand il pensoit auoir failly se mettant à genoux, & disant qu'il estoit un pecheur miserable, & qu'il auoit fait une telle faute, qu'à peine pouuoit-on souuent discerner. Cet exercice, comme tres-salutaire & fort efficace, luy seruit beaucoup pour faire un grand progrès, car nostre nature a besoin dans sa foiblesse de semblables appuis pour marcher droit & ne pas tomber.

Si ses imperfections & ses pechez l'humilioient, ses qualitez excellentes & les graces qu'il receuoit de Dieu le faisoient aussi, & les mesmes choses, d'où la plus part des hommes tirent de la vanité, luy seruoient de motifs pour s'auilir. L'esprit de IESVS-CHRIST, dont il estoit animé, extrêmement éloigné des grandeurs de la terre les luy faisoit non seule-

ment mépriser, mais encore en auoir honte; ainsi il prenoit des suiets d'abaiffemens de sa condition releuée selon le monde & des auantages qu'elle luy donnoit: ce qui le portoit souuent à gemir deuant la maiesté de Dieu, & à dire, qu'il estoit dans vne condition bien humiliante & bien roturiere selon l'esprit de IESVS-CHRIST, & qu'il auoit grande confusion deuant luy de se voir en cet état.

Delà vint qu'estant nay Gentilhomme de si bon lieu comme nous auons dit, il renonça à sa Noblesse & s'en demit entre les mains de nostre Seigneur, qui aussi luy donna la sienne, comme il le fit connoître à vne sainte ame, c'est à sçauoir son amour, qui par sa propre force transformant l'homme en Dieu l'ancantit à soy-mesme, & ne laisse en luy que Dieu seul viuant & regnant, & par ce moyen l'éleue ainsi deifié au plus haut degré de noblesse où il peut monter: pour cela il portoit à peine qu'on l'appellât Monsieur, & disoit par fois de bonne grace entre ses familiers, ie suis vn
 « beau Monsieur, c'est bien à moy. Et dans ses lettres il leur
 a fait des plaintes de ce qu'ils le traitoient de cette qualité,
 mais dans l'vne donnant vn autre tour à son humilité il dit:
 « croyez, ie vous supplie, que c'est grande pitié que de moy,
 « Je reprens le monsieur que j'auois reietté, ma superbe doit
 « auoir tous ces appanages plutôt que de tromper vostre can-
 « deur, qui vous feroit peut-estre prendre en moy vn verre
 « luisant au lieu d'vn diamant.

Par humilité il ne voulut point porter le titre de Marquis qui luy estoit deu, comme propre de sa maison, attendu que Charles le Quint Empereur auoit erigé Renty en Marquisat, & il souffrit celuy de Baron de Renty, que le Commun luy donna.

Pour les graces & les dons de Dieu, comme ils estoient reçus dans vne ame disposée, ils produisoient aussi excellemment en elle leur vray effet, qui est d'abaïffer & d'éleuer l'ame tout ensemble, de l'éleuer à Dieu & de l'abaïffer à elle mesme. Premièrement son humilité luy faisoit cacher autant qu'il pouuoit les dons de Dieu, & elle nous a dérobé la connoissance de mille belles actions qui eussent bien serui à cette histoire. Secondement

Secondement quand il receuoit quelque grace de Dieu, ou qu'on luy rendoit quelque honneur, la clarté avec laquelle il voyoit le neant de la creature, & le discernement dont il estoit doié pour distinguer le precieux du vil, & ce que Dieu met de son costé en toutes les choses bonnes & ce que l'homme y apporte du sien, faisoit qu'il n'y prenoit aucune part, mais referoit le tout à Dieu comme à sa vraye source, & ainsi dans le maniment de ces grands biens dont Dieu l'enrichissoit, il auoit toujours les mains nettes sans faire tort à Dieu ni toucher à ce qui luy appartient; & pour soy il se mettoit à couuert de la vanité, qui se glisse tres-subtilement & tres-facilement dans vn esprit abondant en richesses du Ciel, aussi bien qu'en celles de la terre, s'il n'y prend garde de prés.

Il ne vouloit pas pour cela, qu'on le considerât en tout ce qu'il faisoit & disoit, mais qu'on y regardât Dieu tout seul. Il écriuit à vne personne qui desiroit fort qu'il luy donnât vne visite: Je ne puis porter qu'avec peine le cas que vous faites de mes visites & de mon entretien: voions beaucoup Dieu, lions nous sans cesse à IESVS-CHRIST, afin d'apprendre de luy l'aneantissement profond de nous mesmes: O mon Dieu, quand est-ce que nous n'aurons plus de veuë sur nous, que nous ne parlerons plus de nous, & que toute vanité sera détruite? Et il manda à vne autre: Je vous supplie de ne regarder en moy que mes infirmités, & vn fond de malice & de superbe épouventable qui y est. Voila de quoy i'aurois besoin que tout le monde me parlât, & me punit.

En troisieme lieu ils s'estimoit tres-indigne des graces de Dieu, & croioit qu'il ny en auoit pas vne pour petite qu'elle fut, qui ne fut bien au dessus de ses merites, & pour les grandes dont il estoit si rempli, elles le mettoient à non plus. Il écriuit à vne personne confidente: Les dons de Dieu sont quelquefois si grands, qu'ils nous mettent au delà de nous mesmes, pour ainsi dire, & si nous pouuions trouuer à nous reculer plus loin que par delà le neant, nous irions: Vous voyez parmi les hommes, quand on donne quelque chose de proportionné à quelqu'un, qu'il en rend graces & en dit.

« grand mercy ; Mais si vn Prince donnoit à vn pauvre selon
 « la grandeur de son pouuoir, ou vne somme d'argent, ou vne
 « charge, vous verriez ce pauvre reculer & dire, hélas, mon
 « Seigneur! Je pense que vous ne me connoissez pas, il ne m'en
 « faut pastant, ie suis indigne de cela : il y a de mesme des
 « biens qui vont au delà de nos attentes, & qui nous font voir
 « ce que nous sommes sans oser leuer les yeux, tant leur éclat
 « ébloüit & leur grandeur épouuante.

Enfin il s'humilioit toujours des graces de Dieu, parce
 qu'il pensoit, ou que par sa lâcheté il n'y correspondoit pas
 selon toute leur étendue, ou que par la seule misere de la
 Nature il en vsoit mal & leur faisoit perdre vne partie de
 leur force : comme il arriue aux plantes du Leuant, qui por-
 tées en vn pais étranger n'y conseruent pas toute leur vertu,
 mais y degenerent & se sentent du terroir ; & si les choses
 spirituelles de la nature se falsifient en nous passant par nos
 sens & s'y rendent grossieres, à combien plus forte raison cel-
 les de la grace & les diuines viendront-elles à s'y affoiblir &
 à s'y alterer ? ces veuës le rendoient tres-humble dans
 les plus grands dons de Dieu & dans les choses les plus su-
 blimes.

SECTION SECONDE.

*Suite de son Humilité de cœur, & son Humilité dans
 les paroles.*

COMME les affections, que nous portons aux choses,
 sont toujours fondées sur l'estime que nous en faisons,
 Monsieur de Renty s'estimant si peu & rien, & aiant vne
 opinion si basse de soy, il s'est en suite extremement abaissé
 & auily dans son cœur. Il se mesprisoit en tout, & vne des
 plus fortes pentes selon la grace, qui est vne grande marque
 del'esprit de Dieu dans vne ame, estoit de se condamner
 « toujourns. Il écrit à son Directeur; j'ay tout à la fois deux
 « veuës bien contraires, l'vne de vous auoir avec reconnois-

fance & sentiment de gratitude, que Dieu me remplit des effets de sa bonté & des impressions de son royaume; & l'autre que ie suis plus porté à me condamner qu'à me regarder, car avec tout c'est grande pitié que de mon fait. Et vne autre fois apres luy auoir parlé de beaucoup de grandes lumieres & d'excellens sentimens que Dieu luy auoit communiqué, il luy dit; Ie ne m'arreste point à tout cela, ie vous dis seulement ce qui s'est passé pour vous en rendre compte, ne me seruant de mon iugement que pour me condamner dans mes vices, le suspendant pour tout le reste, & le renuoiant à Dieu. Il manda à vne autre personne confidente. Ie ne sçay ce qui arriuera de nostre affaire: il ne faut dire mot en douceur & en patience, mais ie perdray mon credit quelque part; si ce pouuoit estre par tout ce seroit grande iustice. Helas! si personne ne me souffroit, & que tout le monde me condannât, peut-estre ma superbes'humilieroit.

Porté de cet esprit il auoit vn desir arde, quoy que toujours dans sa paix ordinaire & dans son abandon aux ordres de Dieu, de receuoir du mespris. Si i'auois, disoit-il, à souhaiter quelque chose, ce seroit d'estre beaucoup humilié & aneanti, & d'estre traité comme les balieures des autres, ce seroit là ma ioye; mais ie crois bien que ie ne meriteray pas vne si grande grace. Ce desir le portoit iusques à ce point, que s'il ne se fut retenu par la consideration de plus grands biens, il eut fait des choses étranges pour estre méprisé & pour receuoir de la confusion. Il dit dans ce sentiment & de l'abondance de son cœur à vne personne, i'auois grand plaisir, s'il m'estoit permis, de m'en aller tout nû en chemise courir par les ruës de Paris pour me faire mépriser & estimer vn fou. D'où nous deuons apprendre deux choses. La premiere, que Dieu donne par fois aux saintes ames des pensées, des affections & des desirs si élueuz au dessus du commun & de la raison humaine, qu'ils paroissent extrauagans, cōme celuy-cy qu'il auoit donné à Monsieur de Renty, & qu'auoit eu deuant luy nostre Fondateur S. Ignace. La seconde, qu'il ne faut point executer ces desirs, qu'ils n'aient esté auparauant bien examinez & peséz iustement dans la

balance de la charité & de l'edification du prochain.

Ce brûlant desir que Monsieur de Renty auoit du mépris le luy faisoit rechercher, & aimer sa propre abiection, & quãd elle arriuoit, la prendre non seulement avec patience, mais encore, qui est le plus haut degré où puisse monter l'humilité, avec ioye. Il en donna vn euident & illustre témoignage au premier voiage qu'il fit à Dijon, où vn proces, qu'il eut avec Madame sa mere, & qui luy fut par vne conduite tres-particuliere de Dieu vn des plus grands exercices de patience & d'humiliation qu'il porta en toute sa vie, duquel nous parlerons plus au long au Chapitre suiuant, l'auoit obligé d'aller: car voicy ce qu'il en écriuit à son Directeur le vingt-quatrième de Iuillet, mil six cens quarante trois.

« Je suis donc à Dijon, puis qu'il a plû à Dieu, où i'ay con-
 « nu par les opinions anticipées qu'on auoit prises de moy, ce
 « que Dieu vouloit tirer de mon voiage, qui est que ie menas-
 « se vne vie cachée & inconnuë aux hommes dans vn esprit de
 « penitence. Le bruit que l'on auoit semé de moy, que i'estois
 « vn bigot, qui n'auoit que des artifices & des apparences de
 « deuotion pour colorer mes malices, a fait que i'ay esté fort
 « retiré dans le cabinet, de peur de donner en me produisant
 « plutôt du scandale, que quelque exemple de vertu. I'ay
 « trouué vne Communauté qui sollicitoit contre moy, qui
 « toutefois est celle, de laquelle i'auois plus de suiet, ce me
 « semble pour plusieurs iustes raisons, d'esperer de l'appuy,
 « que d'aucune autre, & i'ay éprouué tout le contraire: mais
 « aussi Dieu par là m'a fait beaucoup de graces. Je les ay esté
 « voir, où i'ay reçû humiliation avec grande ioye: ie me suis
 « bien gardé de m'ouurir de ce qui m'eut pû rendre recom-
 « mandable aupres d'eux; i'ay seulement fait pour mon affai-
 « re ce que ie deuois à la verité, & après i'ay pris tout le reste à
 « ma confusion & à ma condamnation, ainsi que ie le dois: ie
 « crois estre icy cōme l'Excommunié & le Bouc de la loy an-
 « cienne, chassé au desert pour mes pechez enormes, dont il
 « m'a semblé que Dieu vouloit que ie fisse penitence, non par
 « des peines toutes pures, mais par des peines qui portassent
 « encore confusion. Je vous le dis pour vous en rendre com-

pte, & ne m'y arrestant pas apres dauantage, ma seule veüe ,,
estant d'aimer Dieu & me condamner. ,,

L'humilité de cœur, dans laquelle Monsieur de Renty estoit profondement établey, produisoit en luy celle des paroles, qui l'empéchoit d'en dire iamais aucune qui sentit tant soit peu la vanterie, & qui portât la moindre teinture d'arrogance, & d'estime de lui-mesme, ou qui fut proferée d'une façon altiere, & d'un ton imperieux ou suffisant: mais au contraire, elles estoient toutes trempées dans l'humilité & dans la modestie: comme il s'estimoit veritablement pecheur, lasche, ingrat, perfide, ignorant, aussi se donnoit il ces noms & se qualifioit de ces titres. Nous en auons desia vû quelque chose cy-dessus, à quoy nous adioûterons encore cecy qu'il manda à vne persone.

Je ne suis, à dire le vray, qu'un idiot, un pauvre laïque & ,,
un pecheur. Ecriuant à un Prestre il luy dit; Que fais-ie ,,
immonde & roturier en grace & en condicion dans l'Eglise ,,
de Dieu, qui porte un état que I E S U S-CHRIST à reproc- ,,
ué pour soy? Je parle à un Prestre & à l'Oint du Seigneur: ,,
Mon Dieu, si ie faisois retour sur moy, que serois-ie deuant ,,
mes yeux? Mais que suis-ie deuant les vostres & deuant ceux ,,
de vos seruiteurs? Il écrit à vne autre personne; Je vous re- ,,
mercie des deuoirs de deuotion que vous auez rendus ce ,,
vingt quatre & ce vingt cinquième iours derniers pour vne ,,
chose si basse que moy, qui ne merite point de nom qu'entre ,,
les enfans d'Adā qui trōpent tout le monde, & qui deuroient ,,
sentir l'ire de tous les enfans de Dieu, si la priere de son fils ,,
en croix n'imploroit grace pour ses persecuteurs. Et à vne ,,
autre encore; Puisque l'on me souffre si volontiers, & que ,,
vous perseuererez à desirer cela de moy, ie supplie mon Sei- ,,
gneur, en la main & en la disposition duquel ie veux estre ,,
tout, qu'il se serue, s'il luy plaist, de ce miserable festu pour ,,
vous donner quelque consolation en la vie de ses enfans, & ,,
dans les voyes qui vous menent à l'heritage. ,,

Il a écrit un tres-grand nombre de lettres: c'est vne chose merueilleuse qu'il n'y en a pas vne dans laquelle il ne s'aui-
uillisse, & qui ne porte quelque trait d'humilité; ce qu'il fai-

foit de mesme en sa conuersation : car encore qu'il eut dessein pour s'aneantir dauantage, & faire ce qu'vniuersellement parlant on croit estre le meilleur, si ce n'est en quelques rencontres où la vertu oblige à pratiquer le contraire, de ne parler de soy ni en bien ni en mal, neanmoins il luy estoit comme impossible de s'en empecher, à cause de cette opinion tres-basse qu'il auoit de soy & du mépris qu'il en faisoit; surquoy vne personne confidente, luy disant vn iour que cela n'estoit pas bien de tant parler mal de soy, il frapoit aussi tôt sa poitrine, auoüant qu'il faisoit mal. Il est vray que l'on peut parler mal de soy par orgueil à dessein d'écumer par cette fausse humilité vn peu de gloire, & d'acquérir quelque reputation d'une personne humble: mais apres tout nous ne voions pas que les orgueilleux soient beaucoup fuiets à ce defect, & a moins d'un grand fond d'humilité il est tres-difficile de parler de soy comme faisoit cet homme de Dieu. Qui a la verité parloit de soy tres-mal & en termes de grande confusion, & tres-souuent, mais neanmoins sans importunité & sans ennuy d'aucune personne, & d'une telle maniere que l'on voioit euidentement qu'il parloit du fond du cœur & selon sa pensée; & ce qui est encore plus merueilleux, il auoit vne telle grace de parler mal de soy & de se confondre, que plusieurs ont remarqué & experimenté que les paroles d'humilité & de confusion qu'il disoit de soy, imprimoiēt sa mesme disposition en ceux qui l'entendoient parler, & leur portoient dans l'ame des effets de petitesse & donnoient des sentimens d'humilité.

Quand par mouuement particulier du S. Esprit il parloit des graces & des misericordes que Dieu luy faisoit, c'estoit toujours avec vn esprit humilié & aneanti. Il escriuit à vne
 « personne : Je ne suis qu'un pecheur, ayez pitié de moy, ado-
 « rant pour moy la bonté de Dieu & de nostre Seigneur, qui,
 « pour parler selon les termes de l'Euangile, se diuertit quel-
 « quefois chez les pecheurs; i'en peus dire des nouvelles avec
 « Zachée; mais ie me confond de ne produire en toute ma
 « vie, ce que son amour & sa reconnoissance luy firent faire en
 « vn moment. Et à vne autre, Je supplie nostre Seigneur de

me tenir tres-petit deuant luy & deuant vous : car ie dois porter la confusion de mes crimes en tous lieux, puisque par tout ie suis miserable, sans toutefois cesser de m'vnir avec vous pour dire, *Misericordias Domini in aeternum cantabo.*

Quand il parloit des personnes pieuses vnies à ses exercices de charité, il vsoit souuent de ces termes; si i'ose ie vous prie ,, de les salier de ma part. Je m'estime bien-heureux d'estre le ,, dernier de cette Compagnie, j'en suis tout à fait incapable ,, & indigne (encore que pourtant il en fut l'auteur) ie seray ,, condamné par vous tous si vous n'avez pitié de moy, & ne ,, me rachetez de mes misetes. ,,

SECTION TROISIEME.

Son Humilité dans les actions.

A P R E S l'humilité du cœur & des paroles vient celle des actions, que Monsieur de Renty a pratiquée excellentement. Nous l'auons desia veu en plusieurs rencontres, nous le verrons encore en beaucoup d'autres, & particulièrement quand nous parlerons de sa patience & de sa charité enuers les pauvres & les malades; mais outre cela, nous disons qu'il estoit continuellement attentif à toutes les occasions d'humilité, & qu'il n'en laissoit échaper pas vne sans en vser.

Depuis sa vocation speciale au service de Dieu, il ne voulut plus qu'on luy portât de carreau à l'Eglise, & afin d'y estre caché & méprisé il se méloit parmy les gens de mestier & les personnes viles, où il estoit souuent poullé & incommodé pour n'estre pas connû; ce qu'il portoit avec grand plaisir. Il se mettoit touûjours, autant qu'il pouuoit, au bas de l'Eglise avec l'humble Publicain. Et à Dijon dans celle des Vrfulines, les Tourieres le virent prier tout en bas, & les bras étendus en croix, lors que le peuple fut retiré; & mesme souuent il faisoit sa priere deuant la porte fermée, pour ne pas, disoit-il, donner la peine d'ouuir à vn pauvre pecheur.

Entendant la grande Messe en sa Paroisse il alloit toujours à l'Offrande avec vn pauvre homme, & il s'est trouué quelquefois avec le mesme homme accompagner le S. Sacrement par les ruës, sans qu'il y eut personne de marque que luy seul.

Pendant la guerre de Paris, il alloit acheter luy mesme le pain pour les pauvres, & le portoit par les ruës, & autant que ses forces le luy pouuoient permettre. Comme en ce temps il fit la charité à vn Monastere de Religieuses de garder l'argenterie de leur Eglise, il pressa fort qu'on luy donnât à porter en son logis distant d'une grande demielieüe de là, & tout à pied qu'il estoit, vne piece fort grande & fort pesante; mais s'il eut l'humilité de la demander, on eut la discretion de la luy refuser. Quand on le prioit au mesme Monastere, que lors qu'il voudroit leur faire la grace de les visiter, il prit son carosse à cause de la distance & de l'incommodité qu'il en receuoit, il répondoit agreablement, qu'il n'aimoit pas de se seruir de carosse; parce que cela sentoit son Monsieur, & qu'il falloit tâcher de se faire en tout tres-petit. Il y alloit donc à pied, & retournant aux iours les plus courts à cinq & six heures du soir, tout seul, & quelquesfois par vn temps de degel, comme on luy témoignoit de la peine de celle qu'il receuoit qui ne pouuoit estre petite, il disoit que nostre Seignurs'estoit bien autrement humilié, qu'il auoit bien pris d'autres fatigues pour les ames, & qu'il estoit son Patron.

Deuant vn iour aller voir vne personne de tres-grande condition pour vne affaire qui regardoit la gloire de Dieu, il ne voulut point y aller en carosse, encore qu'il fallut trauffer quasi tout Paris, & qu'il plût à verse, mais y aller à pied: on luy proposa, qu'il se fit au moins porter vn manteau par vn laquay, afin de le prendre quand il seroit arriué là, & ne pas se presenter deuant cette personne avec vn manteau tout trempé & luy parler avec cette messeance, il ne le fit non plus, mais pour accommoder son humilité avec la bien-seance il mit ce manteau par dessus le sien, & alla par les ruës, & si loin, en cet equipage humiliant, & puis dans l'hostel mit

bas ce manteau mouillé, & parut avec le sien ordinaire.

Mais voicy vn autre effet de son humilité, dont il écriuit à son Directeur le vingtième de Decembre de l'an mil six cens quarante six: il faut maintenant, dit-il, que ie vous rende compte d'une affaire qui se passa auant-hier. Madame la Chanceliere m'enuoia vn paquet dans lequel ie trouuay des Lettres du Roy scellées en toutes leurs formes qui me faisoient Conseiller d'Etat, ie ne m'attendois point à cela. Je luy manday que i'aurois l'honneur de la voir pour la remercier de ce que Monsieur le Chancelier daignoit penser à moy, que i'honorois trop ce qui auoit la marque du Roy & qui venoit de leur part pour ne pas le recevoir avec respect, mais que ie la suppliois tres-humblement d'une chose, que viuant d'une maniere simple & commune comme ie faisois, elle trouuât bon qu'en me tenant tres-étroitement leur obligé, ie ne le fûsse point d'accepter ces Lettres, & que la chose s'assoupit sans bruit. On me represente qu'en de certains rencontres vn *Committimus* me pouuoit estre necessaire, & que deux mille liures de pension par an me donneroient moyen de faire encore plus d'aumônes. Je répondis au premier point, que par la grace de Dieu ie n'auois point d'affaires pour ainsi dire, & que souuent les *Committimus* sont de grandes vexations à ceux contre qui on en vse, que c'est à nous de porter nos petites croix dans les voies communes sans en donner d'extraordinaires à d'autres; & pour le second, que Dieu m'ayant donné des biens plus que ie n'en ay de besoin, ie ne croyois pas les deuoir augmenter, mais demeurer dans ma petite maniere. Voila où nous en sommes.

Surquoy ie vous diray que cecy ne peut auoir effet que ie ne prenne la qualité de Conseiller d'Etat & que ie ne sois couché sur l'Etat comme pensionnaire du Roy; l'ay, comme vous auez vû par le papier que ie vous enuoiaiy il y a quelque temps, donné ma noblesse terrestre à Dieu, & cecy y derogeroit, & de plus ce seroit vn pas pour m'engager ie ne sçay où, que ie ne vois point, & que ie ne veux point voir, ayant d'autres choses à enuifager. Ma disposition sur les affaires de telle nature est de n'y auoir aucune part, si elles se

« font par force & sans moy, ce me fera vne croix veritable,
 « que nostre Seigneur me donnera grace pour lors de porter.
 « Enfin: *Elegi abiectus esse in domo Dei mei; & absit mihi gloriari,*
 « *nisi in cruce Domini nostri Iesu Christi.* Voila ce que ie ressens en
 « moy. C'est-ce qu'il luy manda qu'il conclud par ces paro-
 « les, qui portent vn autre trait d'humilité, & beaucoup de sa-
 « gesse. I'ay voulu tenir l'affaire secreta pour éuiter l'ostenta-
 « tion, qui se trouue souuent dans les refus des choses qui ont
 « de l'éclair & qui font parler.

C'est ainsi qu'il se comporta dans cette conioncture, neant-
 moins quelque temps apres il fut contraint par bon conseil,
 pour vn sujet où il y alloit beaucoup de la gloire de Dieu &
 du soulagement des pauures, d'accepter ces Lettres & cette
 qualité, & de s'en seruir.

Ie trouue dans vn papier qu'il écriuit au mesme ce qui suit,
 « qui fait bien à nostre propos. Marchât vn des iours de ce Ca-
 « refme par les ruës de Paris fort crotté & bien bas d'exterieur,
 « ie portois en moy ce sentiment de l'Apostre, quand il dit
 « qu'il estoit comme l'ordure & la balieure du monde, & com-
 « me il me sembloit que i'estois dans ce rebut, ie donnois be-
 « nediction pour malediction, & le reste du passage qui me fut
 « mis en puissance passiuue, & en acte receuant lumiere pour
 « l'entendre & force pour l'executer. Ie connûs combien la
 « propreté, & les choses neuues iusques aux bottes, iusques à
 « vn regard & à vne contenance blessent, si l'on n'y prend bien
 « garde, la simplicité & la dignité de cet auilissement chre-
 « stien: & ie voyois que c'estoit vne grande tentation de pen-
 « ser conseruer son état de grandeur & de marque pour don-
 « ner plus d'exemple, & auoir plus de poids pour seruir Dieu.
 « C'est vn pretexte, dont se sert nostre infirmité au commen-
 « cement: mais la perfection nous tire enfin à IESVS-CHRIST
 « humilié & rendu le dernier des hommes dans la Croix. Quel
 « honneur de tenir compagnie à IESVS-CHRIST si seul & si
 « peu suiui en son ignominie & en son humiliation? c'est vne
 « de mes terreurs, que ie n'ay pas encore bien commencé.

Les grandes connoissances & les sentimens merueilleux
 qu'il auoit de ces verités & de la petitesse d'esprit, où doiuent

tendre & paruenir les vrais enfans de Dieu & les parfaits imitateurs de IESVS-CHRIST, luy faisoient souuent dire; soyons petits & tres-petits. O que la sainte petiteſſe est vne,, chose grande!

Il aimoit dans cet esprit les choses basses, & fuyoit tout ce qui exterieurement auoit de l'éclat en quoy que ce fût; où il ſçauoit que la nature par vn retour secret sur ſoy va toujours, meſme dans les choses les plus ſpirituellen & les plus saintes; comme au contraire la grace, pour eſtre grace de IESVS-CHRIST, porte continuellement aux choses viles, que IESVS-CHRIST a embrassées.

Il euitoit dans la meſme pensée tout ce qui tenoit de l'extraordinaire, & diſoit que dans les exercices, où il paroifſoit meſme plus de perfection, comme à faire des ieûnes & d'autres penitences plus que les autres, il n'y en auoit pas quelqueſoit tant que dans les communs, dont le moins est recompensé par la mort de la nature, qui bien souuent se recherche ſoy-meſme dans l'extraordinaire & le particulier, eſtant bien aiſe d'auoir quelque chose par deſſus les autres, pour se faire conſiderer, & donner ſuiet de parler de ſoy avec eſtime.

Il faisoit de meſme attention sur son parler pour ne point se ſeruir dans les diſcours des choses ſpirituellen & des myſteres les plus releuez, de termes magnifiques & pompeux, de mots nouueaux & hors d'vſage; & s'il luy arriuoit d'en dire quelqu'vn, il rémoignoit que c'eſtoit avec peine & pour ne pouuoir s'expliquer autrement: de ſorte que ni dans ſes actions ni dans ſes paroles, il ne vouloit rien qui portât apparence de grandeur & de ſingularité.

C'eſtoit encore vne actiõ d'humilité & de ſageſſe en luy de faire état & de parler auantageuſement des conduites des autres pour l'interieur, encore qu'elles fuſſent bien au deſſous de la ſienne, diſant qu'il falloir ſoigneuſement prendre garde de ne pas dire comme le Pharifien, ie ne ſuis pas comme les autres: & il m'écriuit vn iour sur ce ſuiet: à Dieu ne,, plaiſe que ie croye qu'il y ait quelque chose de ſingulier ou,, d'extraordinaire en moy, quoy que ie luy doie des recon-,,

« noiffances extremes de ses misericordes infinies.

Mais entre tous les effets & tous les témoignages de son humilité, la façon avec laquelle il se comportoit envers son Directeur, doit sans doute tenir vn des premiers rangs. Il ne faisoit rien qui fut tant soit peu de consequence de ce qui le touchoit, sans sa conduite: Il luy proposoit la chose ou de bouche s'il estoit present, ou s'il estoit absent par écrit, clairement & nettement, luy demandant son auis, sa volonté & la benediction de sa resolution, c'estoit ses termes, avec tant d'humilité, tant de respect, tant de dependance & de demission de son sens, que cela estoit admirable; & puis sans retour & sans discussion il suiuoit exactement & aveuglément son ordre, autant que pourroit faire dans vne religion bien reformée vn Nouice tres-obeissant & tres-simple.

Son Directeur luy ayant écrit quelque chose qui regardoit sa perfection, il luy répondit en ces termes: Je vous supplie de croire qu'encore que ie sois tres-imparfait & grand pecheur, si toutefois vous me faites l'honneur & la grace de me mander vn mot sur ce que vous connoissez m'estre necessaire, j'espere avec l'aide de Dieu que j'en profiteray. Je ne respire que de trouuer Dieu & IESVS-CHRIST avec autant de simplicité que de verité; ie ne pretend rien en ce monde que cela, & hors de cela ie ne desire rien. Voila sa soumission. Encore, qu'il eut, ce qui fait la merueille, vn esprit excellent & tres-éclairé, qu'il fut dotié d'vne haute prudence, & dans vne si grande capacité de tout, qu'il estoit consulté de bouche & par lettres de diuers lieux d'vn tres-grand nombre de personnes de tout aage, de tout sexe, & de toutes conditions Seculieres & Religieuses.

Pour pratiquer si hautement cette soumission, il enuisageoit nostre Seigneur, qui estoit en tout son modele & sa lumiere, dans celle qu'il a renduë à Saint Ioseph, dont il fut extraordinairement touché estant vn iour aux Carmelites de Pontoise priant dans leur Eglise, & dont s'ouurant à vne personne, à qui il le pouuoit avec prudence & avec charité, il luy dit; Il est vray que j'ay reçu ce matin vne grande

grace pensant à l'assuiettissement & à la dependance, que le Fils de Dieu a voulu auoir de S. Ioseph, à qui il s'estoit assuietti & soumis en toutes choses, comme vn Enfant a son Pere. Quelle grandeur & quelle grace de ce Saint ! mais quelle vertu & quel aneantissement à IESVS-CHRIST ! Le Fils de Dieu egal à son pere assuiectry à vne creature & soumis à vn pauvre Charpentier, comme s'il n'eust pas bien sçû comme il falloit se conduire ! On m'a fait connoître comme par cet exemple du Fils de Dieu nous sommes hautement instruits & d'une maniere digne d'un tel maistre, sur la dependance que les creatures doiuent auoir de Dieu, & sur l'obligation étroite qui nous engage de nous soumettre au souverain pouuoir qu'il a sur nous, & à la directiõ des hommes ; de sorte que nostre cœur n'ait de repos, que dans cet assuiettissement vni à celuy que rend IESVS-CHRIST à vne creature. O que ce mystere est profond & qu'il me touche ! Il fut ensuite vn peu de temps sans parler comme s'il eut esté tout occupé de la grandeur de cette grace, & la personne, à qui il parloit, luy ayant dit qu'elle sentoit quelque communication de cette grace, il se mit à genoux & cette personne aussi, & prièrent tous deux adorans IESVS-CHRIST en cet état de dependance & de soumission à vne creature, & se donnant à luy pour l'imiter.

SECTION QUATRIEME.

Son Amour pour la vie cachée.

Nous mettons encore comme vn effet de son humilité, l'amour qu'il auoit pour la vie cachée & inconnüe, parce qu'il ne l'aimoit pas seulement pour pouuoir vaquer dauantage à Dieu & communiquer plus à loisir avec nostre Seigneur, qui estoit le cher obiet de son cœur, mais de plus pour auoir le moyen de fuir l'estime, l'honneur & les louanges des hommes, & estre effacé de leurs esprits & dans vn oubly de tout le monde.

Pressé de cet amour il disoit, que si Dieu ne l'ût attaché à l'étrat où il estoit, il s'en fut allé en quelque pays étranger & lointain pour y viure caché le reste de ses iours; qu'il souhaitoit de n'estre connu de personne en terre; qu'il n'estoit pas expedient qu'on sçût seulement qu'il y fut, & que ce luy eut esté vn singulier plaisir d'estre banni du cœur de tous les hommes & ignoré de toutes les creatures; Aquoy il contribuoit de sa part tout ce qu'il pouuoit, ne faisant chose aucune qui eut pû donner des reconnoissances vers luy & luy acquerir les affections: & on a remarqué que plus il alloit s'auançant en lumieres & en graces, plus la pente pour cette vie cachée se rendoit forte & plus il auoit de desir d'estre inconnu, comme il le témoigna à vne personne cinq ou six mois deuant sa mort.

Il regardoit en cela nostre Seigneur & l'exemple qu'il nous a donné de cette vie, n'ayant point parû l'espace de trente ans, qu'une seule fois au temple; encore qu'il n'y eut point de peril pour luy de hanter les hommes, & qu'il semble qu'il y eut eu beaucoup de bien pour eux, parce qu'il les eut dressés, polis & sanctifiés par sa conuersation & par ses paroles, estant mesme venu en terre exprés pour les enseigner. Il iettoit encore les yeux sur Dieu, que le Prophete appelle vn Dieu caché, & qui effectiuement s'est tenu caché vne eternité toute entiere au dedans de soi-mesme, & qui par toutes les découuertes qu'il a faites de foy à l'ouerture & en la suite des temps, & par toutes les montres qu'il nous en a données, n'est pas à beaucoup pres hors de foy, ce qu'il est dedans foy. Ce seruiteur de Dieu & cét esprit illuminé se formoit sur ces modeles.

Dans vn memoire écrit le quinzième de Mars l'an mil six cens quarante cinq, qu'il donna à son Directeur, pour luy rendre compte de ce qui se passoit dans son interieur, il dit.

“ Il y a quelque temps que me trouuant dans vne ruë, où il
 “ passoit & repassoit des carosses, & ne sçachant si ie deuois
 “ regarder les passans ou non, parce que c'estoit en quartier
 “ de connoissance, & si cela ne donneroit point sujet de par-
 “ ler, de voir que ie ne détournasse point les yeux, mais. quo

i'allasse tout droit mon chemin; ces paroles me furent mises ,, en vn instant dans l'esprit, mais d'vne maniere que ie ne sçau- ,, rois douter que ce ne soit Dieu. *Ne te soucie point d'estre connu,* ,, *ny ne t'arreste point à connoître.* Ces deux mots me donnerent si ,, grande lumiere & si grande force, que ie fûs plus de huit ,, iours, que ie voyois consister en cela les plus grandes aides ,, de la vie spirituelle, & i'en porte tousiours le fond. ,,

Il est certain, que puisque la pluspart de nos maux & de ,, nos imperfections vient de vouloir estre veu, & de vouloir ,, voir, c'est vn amusement, qui porte vn grand venin pour ,, l'auancement d'vne ame, encore que souuent elle n'en ap- ,, perçoiue pas le dommage & n'en sente pas la blessure. Ce ,, qui met l'impureté dans nos actions de pieté, est que l'amour ,, propre est bien ayse qu'on les sçache, & qu'on nous remar- ,, que; on montre touiours le plus beau, on cache les defauts ,, & l'enuers, & tout l'exterieur est si composé que nostre inte- ,, rieur y est souuent plus occupé qu'à Dieu, & il y a peu de ,, personnes qui n'ayent grande part au regard vain, passif & ,, actif des creatures. ,,

Que ces paroles firent en moy vne grande separation de ,, ce siecle! quelle purgation & quelle pureté, d'estre en la ,, terre pour n'y voir que Dieu! ô certainement qui viuroit ,, comme s'il n'estoit point connu, sans auoir égard à ce que le ,, monde dit ou pense de nous, sans vouloir y prendre ny rece- ,, uoir de part, sans vouloir connoître ny estre connu de per- ,, sone, ny nom, ny liurée, ny visage, que selon que nostre ,, Seigneur le fait; que l'on marcheroit nu, pur & libre d'es- ,, prit. I'estois au milieu des ruës & du bruit, poussé & cho- ,, qué, aussi pacifique, aussi lié à Dieu & autant occupé de luy, ,, que si i'eusse esté dans vn desert; & depuis ce temps-là ie ,, vais ainsi par les ruës, avec liberté toutefois des yeux pour ,, voir ce qu'il faut voir, mais sans m'attacher; & ces paroles ,, me sont remises dans l'esprit aux occurrences necessaires, & ,, elles me protegent & me conseruent en Dieu. Je suis pour- ,, rant bien infidelle à cette grace, mais la verité & le fond ,, ne s'efface point de moy; ce qui me rend bien plus coupable. ,, Voila ce que porte son memoire.

Finissons parce qu'il écrit à une Dame l'an mil six cens quarante trois sur le sujet de cette vie secrète & retirée de la communication des creatures, à qui il dit. Animons-nous à mener cette vie inconnüe & toute cachée aux hommes, mais connue & tres-intime à Dieu, nous déviant & chassant de nostre esprit tant de choses superflües & tant d'amusemens, qui neanmoins nous causent vn si grand dommage, qu'elles l'occupent au lieu de Dieu; de sorte que quand ie considere ce qui traueuse & qui coupe en tant de morceaux cette sainte, cette douce & aimable vnion, que nous deurions auoir continuellement avec Dieu, il se trouue que c'est vn Monsieur, vne Madame, vn discours, en fin vne sottise pour nous, qui neanmoins nous rait vn temps si precieux & vne société si sainte & si desirable. Quittons cela, ie vous prie, & apprenons à bien faire la cour à nostre Maistre, entendons bien nostre monde, qui n'est pas celuy-cy auquel nous reconçoissons, mais celuy où les enfans de Dieu rendent leurs deuoirs à leur Pere.

CHAPITRE IV.

Le Mépris qu'il faisoit du monde.



ETTE grande affection, que Monsieur de Renty auoit pour la vie cachée, estoit vne marque euidente du mépris qu'il faisoit du monde, parce que s'il l'ût estimé il n'ût pas voulu le quitter: de dire maintenant iusques à quel point il le méprisoit, il seroit bien difficile. Ce nous est assés pour connoître qu'il l'a eu en vn mépris extrême, de sçauoir par ce que nous auons rapporté cy-dessus, comme il a renoncé, autant qu'il a esté en son pouuoir, à tout ce qu'il peut promettre & donner, & avec quoy il afferuit & captiue les hommes; comme il s'est dégradé luy mesme de sa noblesse, a fait cession de ses biens & s'est dépouruillé de leur propriété pour n'en plus vsfer qu'en qualité

qualité de pauvre, s'est sevré des plaisirs, a reietté les honneurs & les dignitez, aufquelles sa naissance & ses perfectiōs excellentes luy donnoient de tres-grandes ouuertures, s'est moqué de tous ses attraits & a foulé aux pieds toute sa gloire. Il regardoit pour cela son Patron nostre Seigneur, qui dès son entrée au monde & dès sa naissance a fait vne profession ouuerte de le mépriser absolument; aussi disoit-il, qu'il n'estoit pas de ce monde.

Je trouue au suiet de ce mépris dans vn memoire écrit de sa main, qu'il donna à son Directeur, cette belle & solide lumiere que nostre Seigneur luy communiqua; Estant au mois de Nouembre l'an mil six cens quarante quatre en vne Chapelle richement lambrissée & ornée de sculpture & de basse taille fort bien-faites, comme ie regardois avec attention ces ouurages, parce que i'ay eu quelque connoissance en ces choses, & que ie voyois des liasses de glageux & de fleurs en forme de festons fort nettement trauaillés, il me fut mis tout d'un coup dans l'esprit, *l'original de ce que tu vois ne t'arresteroit pas la veuë*, & ie connûs qu'en effet tous ces glageux & ces fleurs ne m'üssent pas occupé, & que tous les ornemens, que l'architecture & l'art inuentent, sont choses tres-basses, qui tirent quasi tout de feuilles, de fruits, de branches, de masques, de rouleaux, de harpies & de chimeres, dont vne partie sont en leur estre choses communes & viles, & l'autre imaginaire; & que cependant l'homme, qui s'accroche à tout, se rend amoureux & esclau, pour ainsi dire, de la maniere d'un bon ouurier, qui copie & contrefait des fadaïses. Je reconnûs par cette veuë comme l'homme estoit facile à piper, à amuser & à diuertir de son souuerain Bien: & depuis ce temps ie ne peus plus m'arrester à considerer aucune de ces choses, & si ie le faisois, i'en aurois reproche; quand i'en vois dans les Eglises & ailleurs, il est aussi tost mis en mon esprit: *l'original n'est rien, la copie & l'image est encore moins, tout est vain fors s'occuper de Dieu seul.*

A la verité le Chrestien nourri & élevé pour des choses si grandes, comme sont la possession de Dieu & la gloire eternelle, doit mépriser tout ce qui est ici bas, meisme de plus

éclatant, avec autant & plus de suiet, qu'un grand Roy méprisera vne botte de foin, à laquelle le Prophete aussi compare toute la gloire de ce monde, auprès de sa courone & de son royaume. C'est la raison, qu'emploia ce seruiteur de Dieu pour animer vne Dame au mépris du monde, à qui il écrit.

« Je vous diray, que comme nous ne sommes Chrestiens
 « que par la liaison, la dependance & la vie que nous auons de
 « IESVS-CHRIST, ie m'étonne & ne peus comprendre qu'une
 « chose si petite que l'homme, tiré du neant dans sa premiere
 « origine, infecté du peché de son premier pere & des siens,
 « éléué à vn si haut degré d'honneur, que luy donne l'alliance
 « du Christianisme, de n'estre qu'un seul Christ avec le fils de
 « Dieu, d'estre son frere & son coheritier dans le siecle futur;
 « ie m'étonne, dis-je, comme apres des prerogatiues si admi-
 « rables l'homme estime le monde & fait état de ses vanitez: y
 « faudroit-il auoir le cœur, & estre de cette vie apres ces con-
 « siderations? les choses de la terre, dont la mort aussi bien
 « nous depouillera, & pour iamais, seront-elles la plenitude
 « de nostre cœur dans le peu de temps que nous auons à y estre
 « pour faire nostre salut, pour aquerir les thresors qui nous
 « sont preparez & pour rendre graces à Dieu de ses misericor-
 « des? deurions-nous pas faire paroître à Dieu & aux hommes
 « vne foy toute viuante, quittant librement ce qui n'est que de
 « ce siecle, ses honneurs faux, ou pour le moins inutiles, ses
 « établissemens perissables, ses opinions extrauagantes, &
 « tout ce qui passera comme vn songe; ainsi que nous voyons,
 « que nos bisayeuls sont passez & desquels il n'est plus de me-
 « moire: leurs cadences & leurs decadences, leurs contente-
 « mens & leurs déplaisirs, qui leur tenoient si fort au cœur, &
 « qu'ils auoient tant de peine d'accommoder à la loy de IESVS-
 « CHRIST & aux esprits de leur temps, tout cela est euanoüy:
 « n'est-il pas vray qu'on a suiet de les estimer auoir manqué de
 « sens, s'ils ont consideré autre chose que Dieu dans leurs
 « voies? Il en sera de mesme de nous, tout passera, & Dieu
 « seul demeurera: ô qu'il est bon de s'attacher à luy seul!

Il encourage la mesme en vne autre lettre qu'il luy en-

uoya , & luy dit, ça tout de bon , il faut mourir au monde ,
& rechercher les obstacles qu'il apporte à nostre perfection ,
pour les condamner , & viure dans le siecle suiuant le sens
de l'Apostre , comme n'y viuant point , y possédant comme
n'y possédant pas : chassons hardiment de nos esprits la com-
plaisance & l'attache de nos belles maisons , ruinons les de-
lices de nos iardins , brûlons nos bocages , exterminons ces
vaines idées que nous auons sur nos enfans , qui cachent en
eux nostre amour propre , lequel semble mort en nous , &
nous fait desirer , estimer , & approuuer en leurs personnes
ce que nous condamnons en nous , à sçauoir le lustre & l'é-
clat du monde. Je sçay qu'il y a difference dans les condi-
tions , mais toutes doiuent reiecter les appennages , que l'on
dit estre de la grande naissance & de la noblesse de sang ,
i'entend ces maximes d'aspirer au plus haut & de ne souffrir
rien ; ce sont des maximes , que nos enfans apportent de la
naissance que nous leur donnons , mais il faut que la secon-
de , que nous leur procurons en IESVS-CHRIST , repare ces
desordres. Osons leur la vanité de l'esprit , & toutes ces
conduites politiques , & les exemples de ces Grands des hi-
stoires , dont les supplices sont aussi eminens dans les Enfers
que leur presumption a éclaté sur la terre ; car il se trouueroit
que nous les conduirions à vne pareille fin.

En vne autre lettre il luy explique ce qu'il luy auoit man-
dé de ses maisons & de ses iardins , & qui sans cette explica-
tion sembleroit trop crû. Mon dessein , dit il , n'a pas esté
que vous fissiez démolir vos murailles & laissassiez tomber
en friche vos iardins pour estre plus à Dieu ; i'entend parler
des détachemens & des ruines , qui se doiuent faire dans nos
esprits , & non pas estre executez sur des matieres insensibles
qui n'ont de prix que dans leur forme : quand i'ay dit qu'il
falloit mettre le feu par tout , i'ay pensé suiure cet esprit ad-
mirable de l'Apostre , qui veut que nous ayons la paureté
dans les richesses , & le denuement au milieu des possessions :
il veut que nos esprits soient veritablement purifiez & sepa-
rez des creatures desquelles nous iouïssons reellement , par-
ce que le Chrestien , qui tend à la perfection , se fait grand

« tort de s'arrester à ces amusemens , & de mettre dans son
 « cœur d'autres inclinations que celles de IESVS-CHRIST , qui
 « voioit tout le monde sans le détruire , mais aussi sans s'y ap-
 « pliquer ; le soin de son pere & le negoce de sa gloire estoient
 « sa vie ; les détours des fleuves & les ornemens des campa-
 « gnes luy estoient de foibles considerations , & non pas des
 « occupations. Voila où i'en voudrois venir , & ie n'en deman-
 « de pas dauantage.

C'est en effet ainsi que nous deuons mépriser le monde , à
 quoy Dieu nous porte , & pour nous y porter plus efficace-
 ment il permet par fois , & souuent , qu'on y reçoie des dif-
 graces & qu'on y rencontre des peines ; ne plus ne moins
 qu'on seme des épines dans vn chemin afin d'en faire pren-
 dre vn autre. Ce que Monsieur de Renty connoissant bien ,
 voicy ce qu'il en manda à vne personne. Dieu a son dessein
 « par toutes ces contrarietez , qui est que ceux qui sont à luy ,
 « soient encore plus à luy en recours , en confiance , en appuy ,
 « en vie , & en tout. Le bruit du monde & ses reuers sont auan-
 « tageux pour faire connoître son esprit , sa confusion & sa va-
 « nité , à ceux qui n'en sont pas , & qui y estans en esprit de mort
 « n'y attendent plus que la mort , produisant cependant les ef-
 « fets de la vie eternelle , qui est par auance en eux dès cette
 « vie mortelle.

CHAPITRE V.

Sa Patience.


L'HUMBLE est assurément patient , par ce qu'il
 s'estime digne du mal qu'il souffre , & de bien
 plus grands encore , & si nous voulons recher-
 cher la vraye cause de nos impatiences & mon-
 ter iusques à leur source , nous trouuerons que
 c'est nostre orgueil & l'estime de nous mesmes. Monsieur de
 Renty ayant esté tres-humble , ainsi que nous auons vû , il a

esté en suite tres-patient, comme ce Chapitre le va montrer.

Et d'abord quand ie me le represente, ie me souuiens de la description que Tertullien fait de la Patience, à qui il donne vn visage doux & tranquille, vn frent serain qui ne porte iamais aucune ride ni de tristesse ny de cholere, vn maintien toujours egal, peu de paroles, & la contenance telle qu'on la voit aux personnes innocentes & asseurées: ceux qui l'ont connû, diront que le voila dépeint de ses naïues couleurs, & que suiuant cela il estoit l'image animée de la Patience, parce qu'il auoit toutes ces qualitez en vn excellent degré. Il en auoit encore beaucoup d'autres interieures necessaires à cette vertu; car celles-là ne regardent que le dehors.

Les personnes qui ont demeuré avec luy fort long-temps, & qui ont étudié avec soin ses actions, ne l'ont iamais vû se plaindre pour quoy que ce soit, ni pour maladie, ni pour perte, ni en aucune autre occasion qu'il ait eu de souffrir; mais elles ont remarqué toujours en luy vne constance inbranlable & vne patience inuincible, qui passoit mesme souuent iusques à la ioye, avec vne egalité si grande & si merueilleuse, qu'il ne disoit pas vne parole plus haute que l'autre, ni ne faisoit pas mesme vn geste qui témoignât vn esprit plus prompt & plus ému.

En son second voyage de Dijon, qu'il fit avec Madame sa femme & feu Madame la Comtesse de la Chastre, au second ou troisiéme iour il fut ataqué d'vn rheumatisme violent qui le rendit entrepris de tout son corps; estant arriué à l'Hostellerie il le falloit mettre sur vn lit, il alloit tout courbé, appuyé sur vn bâton, & soutenu d'vne personne; Il souffrit des douleurs extremes en ce voyage, sans dire mot ny faire la moindre plainte. Ces Dames s'en apperceuoient le voyant deuenir passe & defait comme vn linge, & puis en vn moment tout enflammé; & encore qu'elles lui disent qu'il souffroit beaucoup, il ne répondoit rien à cela & ne cherchoit point de soulagement à parler de son mal, ce qui est si naturel à vn malade, mais les entretenoit des excessiues & inexplicables douleurs de IESUS-CHRIST, & de la grace que Dieu fait à vne ame de souf-

frir pour luy, mais dans des termes si pleins de suc & avec tant d'amour & tant de ferueur, que la compagnie estoit touchée d'une grande deuotion de l'entendre.

Ces deux Dames ne pouuans apprendre de sa bouche ce qu'il souffroit & desirans fort de le sçauoir, elles prièrent la mere Prieure des Carmelites de Dijon, qu'elles croyoient en pouuoir venir mieux about qu'elles, de le luy demander, « à qui il dit simplement, mes douleurs sont grandes à crier & « à euanouïr; mais encore que ie les sente dans toute leur rigueur, ie n'y suis point par la grace de Dieu appliqué, mais à luy. Il luy dit de plus que s'estant fait mener en sa Chapelle de Citry & que s'estant assis sur vn banc à cause de son mal, le banc se rompit sous luy sans aucune apparence que cet accident pût arriuer, & qu'il croyoit que le malin esprit l'auoit rompu pour l'émouuoir à impatience le faisant tomber rudement; mais par la misericorde de Dieu, ie n'en fus pas plus « ému, dit-il, que vous me voyez, quoy que les douleurs, qui « me surprisent, fussent tres aiguës. Il faut estre bien present à foy & bien patient, pour dans de semblables occasions ne point s'émouuoir & se conseruer dans la mesme assiette d'esprit, comme si rien n'estoit arriué.

I'eus la grace, poursuit cette bonne mere, d'estre avec luy enuiron deux heures pendant qu'il estoit trauaillé de ses grandes douleurs, que ie luy voiois porter avec tranquillité & modestie sans se remuër, & parler tout de mesme, comme si au sortir du parloir il n'ût pas esté tout courbé, marchant avec grande peine, vn bâton à la main, mais qu'il eut ioüi d'une parfaite santé.

Toute nostre communauté fut fort touchée de le sçauoir en cet état, & quelques-vnes eurent mouuement de faire vn vœu pour sa santé à nostre Dame de grace, dont on honore çeans l'Image, croiant que la mere de Dieu ne la leur denieroit pas, tant pour le culte que ce seruiteur de Dieu rendoit à cette image, que pour les grandes obligations que nostre maison luy auoit. Toute la communauté fit le vœu le iour de sa Natiuité apres la Messe, que Monsieur de Renty auoit entenduë, mais sans auoir pû en aucune façon plier les ge-

noux. Le vœu fut agréé, car dès le soir il vint sans baton au parloir, peu de iours apres il se mit à genoux, & fut gueri dans la neuuaine. L'on garde son bâton au Couuent par deuotion & pour memoire de cette grace: & luy en reconnoissance du benefice qu'il auoit receu, enuoya vn cœur de crystal enchassé dans de l'or pour mettre au col de la Vierge.

Ayant perdu vn fils qu'il aimoit beaucoup, il souffrit cette affliction cuisante sans dire mot, sinon pour témoigner sa parfaite soumission aux ordres de Dieu, & porta cette perte sensible avec toute la patience qui estoit necessaire pour rendre cette action heroïque.

Souuent il a eu grand exercice de patience dans ceux de charité qu'il rendoit au prochain, non seulement à endurer la faim, la soif, le chaud, le froid, la pluie, la lassitude du corps & les autres peines exterieures, qui accompagnent necessairement ces emplois, quand ils sont faits de la maniere qu'il y tenoit, mais encore les mépris & les opprobres. Faisant le Catechisme à certains iours reglez dans vn Hospital à des pauvres passans, Vn certain étably là dedans s'offensa de cette action d'humilité & de charité signalée en vne personne de cette condition, croyant que c'estoit entreprendre sur sa Charge & s'ingerer dans son Office, & le vint trouver comme il estoit au milieu des pauvres les instruisant, & luy dit deuant eux plusieurs paroles iniurieuses & offensiuces afin de luy faire perdre l'enuie d'y retourner. Monsieur de Renty voyant cet homme qui s'emportoit ainsi contre luy, l'écoute sans s'émouuoir & souffre avec patience ses mépris & ses outrages, & luy répond avec beaucoup d'humilité & de respect, que s'il desiroit enseigner ces pauvres gens, qu'il voyoit en auoir tant de besoin, il ne reuiendroit pas aux iours qu'il prendroit, mais puis qu'il ne vouloit pas s'en donner la peine, qu'il le prioit de ne point empescher ce bien: à quoy cet homme ne voulant point acquiescer, il vint quatre iours de suite dans l'Hospital chasser Monsieur de Renty aussi tost qu'il commençoit le Catechisme, le faisant au lieu de luy, ce que ce Seigneur tres-vertueux endura toujours avec vne patience admirable.

Il pratiquoit cette vertu avec vn grand soin & vne grande conduite dans toutes les choses de cette vie, parce qu'il n'y en a point où il n'y ait a souffrir : ainsi dans toutes les choses generales & particulieres qui arriuoient, dans toutes celles qui choquoient sa nature, son corps, son esprit, son iugement, sa volonté, ses inclinations, ses desirs, ses desseins mesme les meilleurs, & tout ce qui le regardoit en quelque façon que ce fût, il taschoit d'en faire usage de grace & de perfection, & de posséder la tranquillité de son cœur & la paix de son esprit par sa patience, receuant & souffrant tout sans s'alterer, & sans se hausser ni se baïsser.

« Priant Dieu deuant le S. Sacrement, dit-il dans vn de
 « ses memoires écrit de sa main, vn pauvre me vint demandes
 « l'aumône; ie m'appliquois pour lors à me recueillir, & on a
 « accoutumé de receuoir ces petites rencontres avec quelque
 « contradiction, comme le mot mesme le fait entendre, car
 « on dit l'importunité des pauvres : il me fut en ce moment
 « donné à entendre que si nous estions bien éclairés, nous ne
 « nous tiendrions iamais importunés de personne ni empes-
 « chés de rien, parce que nous regarderions l'ordre de Dieu
 « conduisant tout à nostre auantage: que cōme il nous faut bien
 « souffrir avec patience les distractions interieures, nous de-
 « uons endurer de mesme les exterieures, & que le tourment,
 « l'inquietude, & l'impatience, que nous causent ces petits
 « accidens, viennent de nostre ignorance & de nostre immor-
 « tification. Ce n'est pas toutefois que l'on ne doïue oster les
 « choses qui nous peuuent donner du trouble, mais quand
 « elles viennent, il faut les regarder comme ordonnées de
 « Dieu, les receuoir avec vn esprit de douceur, & les porter
 « avec humilité & respect; & ainsi, quoy qu'il nous arriue &
 « nous interrompe, l'ordre de Dieu n'est pas interrompu en
 « nous, mais nous le suiuous, qui est le thresor & le grand se-
 « cret de la vie spirituelle, & pour ainsi dire, le Paradis en terre.

Certe rien ne nous trouble iamais que par nostre faute, & toutes les fâcheries que nous ressentons au dedans de nous, & toutes les impatiences que nous faisons éclater au dehors, quand on nous trauerse, qu'on nous empêche absolument de
 faire

faire quelque chose, ou qu'on nous y diuertit, n'ont point d'autre source, que le dérèglement de nos esprits trop attachés. Nous deurions remarquer pour étouffer ces émotions & conseruer nos cœurs dans la paix, que si on nous oste le moyen de faire vne bonne œuure, on nous le donne d'en pratiquer vne autre: on vous retire de l'oraison ou de la lecture, on vous empêche d'executer vn bon dessein que vous auiez pour le prochain; il est vray, mais on vous met aussi en état d'exercer la patience, qui dans cette conioncture sera meilleure, plus agreable à Dieu, & plus efficace pour vous perfectionner que ces autres actions, parce qu'en celles-là vostre volonté s'y trouuoit, & en celle-cy son aneantissement s'y rencontre, où consiste vostre perfection; car la plenitude de Dieu n'est que dans l'euacuation de la creature.

SECTION PREMIERE.

Suite du mesme sujet.

CETTE grande patience, qu'auoit Monsieur de Renty, découloit de la haute estime qu'il faisoit des souffrances, sçachant qu'estans bien prises, ce sont des sources de vie eternelle, des mines d'or & de richesses celestes, & des participations de la croix de nostre Seigneur, que Dieu a renduë la cause de nostre salut & de tous les biens que nous possederons iamais; à laquelle par consequent doiuent auoir liaison tous ceux qui veulent estre sauuez. Il manda vn iour à vne personne qui souffroit, Dieu vous façonne pour luy,, vous vnissant icy bas à IESVS-CHRIST souffrant. Ha! que,, c'est vne grande grace, & plus grande que l'on ne pense. Et,, à vne autre; Quelle benediction! que Dieu vous fasse souffrir,, pendant que le monde rit; si ceux du party contraire auoient,, les yeux ouuerts comme vous, on verroit vne merueille ra,, uissante: car on vous verroit rire en souffrant & eux pleurer,, de ne pas souffrir: vous auez vne grace qu'ils méprisent par,, ce qu'ils ne la connoissent pas, & les miserables se tiennent,,

“ heureux de leur malheur.

Cette grande opinion qu’il auoit conceuë des souffrances, les luy faisoit desirer & en estre alteré, & dire dans l’ardeur de son souhait avec cette Sainte, pour qui il auoit tant de deuotion, *ou mourir, ou patir*. Il écriuoit à vne personne; Je vois quasi tout inutile en ceste vie sinon souffrir: toute consolation, toute douceur & ioye est vne anticipation de la recompense, qui n’est point deuë aux criminels, lesquels ne seiournent en cette terre que pour s’y purifier & y faire penitence; à quoy les consolations, les douceurs & les ioies apportent de la modification, & empêchent sans doute que la penitence, qu’il faut faire, ne soit si pleine, ou qu’on n’arriue pas à vn si haut degré de perfection. Ce n’est pas que ces choses ne soient par fois necessaires à nostre infirmité, qui a besoin d’estre étayée de toutes parts afin de la soutenir.

Et il écriuit l’an mil six cens quarante-sept, le trentième d’Avril à son Directeur ce qui suit, l’ay toujours la veuë de ma foiblesse & du peu que ie rends à Dieu pour ses graces, ce qui me tient en aneantissement, avec grande confiance toutefois, qui me porte à l’amour, à la docilité & à l’obeissance; mais amour & obeissance, qui m’enflamme beaucoup à souffrir avec nostre Seigneur: c’est ma plus grande langueur & mon plus grand attrait; parce qu’en toute autre chose l’on reçoit, mais en celle-cy, quoy que l’on reçoie toujours la grace de souffrir, la souffrance pourtant est ce que nous pouuons proprement donner à Dieu, & cōme le plus grand gage & la preuue la plus assurée de nostre amour. Ce n’est pas toutefois que ie choisisse par ce raisonnement de souffrir, mais ie m’y sens encliné interieurement, & ie suis conduit & arrêté là. Il ya enuiron quinze iours que i’eus vne telle reconnoissance & vn tel amour pour nostre Seigneur IESVS-CHRIST souffrant, & s’immolant à Dieu son pere, & nous alliant à soy pour n’estre qu’vn mesme amour & vn mesme sacrifice, que ie me sentis en vn instant, & pendant vn instant, collé à sa croix comme par vne alliance d’amour, laquelle est inexplicable, & l’effet me dure encore presentement.

Et en vn memoire qu’il luy donna l’an mil six cens qua-

ante huit, en Carefme, touchant ses dispositions, il luy dit : Il m'est venu en l'esprit que le moien de me faire passer le Carême tres-rudement, seroit de me mettre en vne bonne table & m'obliger à faire grande chere, de me ietter dans les belles compaignies du monde pour causer & pour rire, & me mener à la promenade & au Cours; car ce me seroit vn petit enfer, sans mesme parler du peché qui y pourroit estre, & la seule pensée me fait fremir d'horreur: car il est vray que la solitude, les ieûnes, & les autres choses, que l'on appelle penitence, sont mon attrait: & puis par vne conduite de sagesse il adioûte. Encore que ie sente cela, ie ne laisse pas de connoître ce que ie suis, & dans tout mon attrait & tous mes desirs ie me garde bien de demander la moindre chose à souffrir: quand ie l'ay fait par moy-mesme, ie l'ay reuouqué apres, comme aiant agy en fou. I'ay trop d'experience de ma foiblesse, ie me donne seulement à mon Dieu pour tout ce qu'il desire de moy depuis le plus haut du Ciel iusques au plus profond des Enfers: par son ordre ie veus tout, avec luy ie peus tout, & ce qu'il ordonne est tousiours accompagné de sa grace.

Ce grand seruiteur de Dieu éclairé de ces lumieres & touché de ces sentiments excitoit à la patience ceux avec qui il traittoit, & leur persuadoit de se lier & de s'vnir intimement à nostre Seigneur souffrant & crucifié. Il écrit à vn homme affligé: ie supplie nostre Seigneur de vous fortifier de plus en plus de ses graces, & d'autant plus, qu'il imprime en vous les caracteres de sa passion; qu'il vous faisc croistre aussi dans le saint vsage de vos souffrances pour accomplir parfaitement en vostre personne ce que dit S. Paul, *mibi absit gloriari nisi in cruce domini nostri Iesu Christi*. Ie vous assure que c'est vne grande honte à vn Chrestien de passer ses iours en ce monde plus à son aise, que IESVS-CHRIST n'y a passé les siens. Ha! si nous auions vn peu de foy, quel repos pourrions nous prendre hors de la croix? Mais si tous n'ont pas cette grace, combien ceux, à qui elle est donnée, la doiuent ils cherir, puisque c'est vne marque du grand degré de gloire, qu'ils doiuent vn iour posseder? car qui doute qu'à propor-

« tion, que nous ferons configurer à la mort du fils de Dieu &
 « à sa peine, nous ne le soyons au mesme degré dans sa gloi-
 « re, & n'en receuions la recompense dans la beatitude? Et
 « puis il luy enseigne la façon de bien endurer, & luy donne
 « cet auis, qui contient tout le secret : Mais la beauté de la
 « souffrance est à l'interieur, dans les dispositions saintes de
 « IESVS-CHRIST, qui est, ce que nous deuons beaucoup remar-
 « quer & touiours étudier, le Modele, aussi bien que le Chef,
 « de tous les souffrans.

« Et à vn autre il dit dans la mesme pensée. C'est vne gran-
 « de grace de souffrir, tout le monde se trompe croiant cette
 « grace fort commune, elle est tres-rare: il est vray que nous
 « pouuons dire que plusieurs souffrent, mais il y en a tres-peu
 « qui souffrent dans les dispositions de IESVS-CHRIST; tres-
 « peu qui souffrent avec vn consentement parfait à ce que
 « Dieu ordonne d'eux; tres-peu sans quelque inquietude &
 « quelque attachement d'esprit à leur mal; tres-peu qui dépo-
 « sent tous les euenemens à la conduite de Dieu sans y faire re-
 « flexion, pour s'occuper entierement à sa louange & luy don-
 « ner lieu par nos acquiescemens & nos soumissions de pren-
 « dre sur nous tous les droits qu'il y a.

Il forrifie & encourage de cete sorte à souffrir vne Dame
 « peinée. Peu entendent le secret du Christianisme; plusieurs
 « se disent Chrestiens, & peu en ont l'esprit: plusieurs dans les
 « prieres & les affaires ordinaires regardent le Ciel, mais dans
 « les actions importantes ils sont enfans de la nature pour ne
 « voir que la terre, ou s'ils leuent les yeux au Ciel, c'est pour
 « se plaindre & le prier de condescendre à leurs desirs, & non
 « pour accepter les siens: Ils donnent de petites choses à Dieu,
 « mais ils veulent retenir celles où leur amour les attache, &
 « s'il les en separe, c'est vne violence & vn demembrement
 « qu'il faut faire & auquel ils ne peuuent consentir, comme si
 « la vie des Chrestiens n'estoit pas vne vie de sacrifice & vne
 « imitation de IESVS-CHRIST crucifié. Dieu, qui connoit
 « nostre misere, nous oste pour nostre plus grand bien la cause
 « de nostre mal, vn parent, vn enfant, vn mary, pour par vn
 « autre mal, qui est l'affliction, nous attirer à soy, & nous faire

voir que tous les attachemens à quoy que ce soit, qui nous separent de luy, sont des obstacles de telle importance, qu'un iour à la face de routes les creatures nous confesserons que la plus grande misericorde, qu'il nous ait iamais faite, est de nous en auoir affranchis: c'est vn absynthe qui n'est amer qu'au sens & à la bouche, mais salutaire au cœur; Il tuë Adam pour faire viure IESVS-CHRIST; c'est comme vn grand hyuer qui est l'assurance de la beauté des autres saisons: mais il faut bien veiller, que ce qui nous est donné par grace, nous ne le prenions comme vne chose fortuite, ou comme vn malheur; car ce seroit conuertir le remede en poison, & receuoir la grace pour la chasser.

Entrons dans la sainte & adorable disposition, dans laquelle IESVS-CHRIST a touiours esté, de souffrir volontairement pour l'honneur de son pere & pour nostre salut. Est ce pas chose étrange que les hommes voient bien, que le chemin, qu'a tenu IESVS-CHRIST pour arriuer à la gloire, est l'ignominie, la douleur, & la croix, & qu'eux, qui se disent ses disciples & ses imitateurs, en attendent & en demandent pour eux vn autre? Le disciple est-il plus que le Maître? & si le chef a bien voulu passer par là, quelle consequence pour les membres? faut-il pas qu'ils le suiuent? allons donc apres luy & souffrons sur son modele; benite soit la maladie, benite soit la perte d'honneur, des biens, & des plus proches, & la separation des creatures, qui nous tenoient courbez vers la terre, laquelle nous redresse & nous fait leuer les yeux au Ciel, & rentrer dans les desseins que Dieu a sur nous, benite soit la peste, la guerre, & la famine, & generalement tous les fleaux de Dieu, qui produisent ces effets de grace & de salut en nous.

Il conclud par ces paroles, qu'il enuoia à vne autre personne. Nous sommes en cete vie dans le temps de la patience, où la foy & l'esperance nous seroient inutiles, si tout nous estoit clair & rien ne nous faisoit souffrir, c'est dans l'obscurité de ce delaissement & dans toutes les sortes d'épreuues tant du dedans comme du dehors, que ces vertus s'établissent en nos ames & qu'elles nous font bien esperer pour nostre salut.

SECTION SECONDE.

Ses Trauerses Domestiques.

LE plus grand exercice de patience, qu'a porté Monsieur de Renty en toute sa vie, a esté celuy que luy a donné Madame sa mere; qui, soit qu'elle se faschât que son fils fût si auant dans la deuotion, toujours dans les Prisons, dans les Hospitaux, & occupé à des actions basses & abiectes aux yeux du monde, indignes à son aduis de sa naissance, & qu'elle eut esté bien aise de le voir dans les emplois éclatans & glorieux, où ses ancestres auoient parû; soit qu'elle ait esté poussée par de mauuais conseils, ou autrement, elle luy a donné suiet de souffrir, & longtems; & on peut dire, si elle a contribué beaucoup à le faire homme, qu'elle a fort serui pour le rendre Chrestien parfait. Voicy la chose.

Cette Dame pretendant de grands droits sur les biens que feu son mary auoit laissez à son fils, les luy fait demander, qui luy donne avec grande soumission & grand respect ce qu'il croioit estre de raison, & au delà; mais elle ne se contentant pas de cela demande dauantage, ce que son fils trouuant par bon conseil ne pouuoir luy accorder sans faite tort à ses enfans, remit la chose à des arbitres, & agrea pour la satisfaction de Madame sa mere qu'elle les choisit tons comme il luy plairoit, personnes de capacité & de probité de sa connoissance & que luy ne connût pas, pour iuger ce qu'il pouuoit luy donner sans blesser sa conscience. Estans choisis, il les va trouuer & les prie de contenter Madame sa mere en tout ce qui se pourroit sans auoir égard à luy; qui fut vne priere à des Iuges toute extraordinaire à vne Partie & qui fait bien voir l'affection & l'honneur que Monsieur de Renty portoit à Madame sa mere, & combien il estoit éloigné de rechercher ses interests. Le iour venu, auquel ces Messieurs deuoient donner leur sentence, pendant qu'ils estoient occupez à la concerter, ladite Dame estoit dans vne chambre

de la maison, & son fils avec Madame sa femme & vne Damoyelle dans vne autre, où l'occupation de ce fils tres-vertueux fut de prier Dieu pour le succez de l'affaire à sa gloire & au bien de la paix, & à ce dessein il leur fit reciter avec luy quelques Hymnes, iusques à ce qu'on luy vint apporter la sentence pour la signer, dont on luy fit la lecture, qu'il ouïit avec grande tranquillité d'esprit, & encore qu'elle ne luy fut pas auantageuse, & qu'il y eut vne somme notable à qui des deux s'en dédiroit & en appelleroit, il la signa sans marchander.

Croiant là dessus que Madame sa mere seroit pleinement satisfaite de ce qui auoit esté arresté, comme il fut retourné en son logis il fit chanter le *Te Deum laudamus*, l'entonnant le premier, & de bon cœur, en action de graces de cette resolution, qu'il estimoit deuoir estre le lien de la paix entre Madame sa mere & luy & vn moyen de viure bien avec elle le reste de ses iours. Mais Dieu pour le purifier & l'affiner encore plus, & lui mettre vne croix sur les épaules qu'il a portée plusieurs années dans des dispositions tres-saintes, permit que la chose nereüssit pas selon son desir, parce que sa mere ne se tenant pas satisfaite de l'auantage que ces arbitres luy auoient donné, trouua moien d'appeller de leur sentence sans toutefois estre obligée de payer la somme du dédit, & d'aller poursuiure ses droits pretendus au Parlement de Dijon. Son fils fit tout son possible pour luy faire changer le dessein qu'elle auoit de le plaider & pour adoucir son cœur enuers luy: & afin d'en venir à bout, il eut recours aux remedes surnaturels, il fit de longues prieres, & ioignant la penitence à l'oraïson, il ieûna dans vne rigueur extraordinaire & macera son corps avec de grandes austeritez, esperant que Dieu auroit égard à ces actions & à la sincerité de ses intentions.

Après s'estre ainsi préparé durant quelque temps, il s'en va trouuer Madame sa mere, & se met à genoux deuant elle dans vne reuerence, dans vne humilité & vne soumission capable d'amollir les cœurs les plus endurcis, ce qu'il n'a pas fait vne seule fois, mais plusieurs, & avec abondance de larmes.

mes, & luy demande avec les paroles les plus efficaces, dont il pût se seruir, qu'il luy plût de le loger & toute sa famille chez elle, & l'entretenir comme elle iugeroit, & qu'après elle disposât de tout le bien que son pere luy auoit laissé. Elle ne voulut pas consentir à cette humble & touchante priere, mais persista dans la resolution qu'elle auoit prise d'aller à Dijon le plaider; ce que voyant son fils, encore qu'il pût par vn expedient qui se presenta, rompre ce coup & ne point sortir de Paris, il ne voulut point par respect & pour luy donner ce contentement en vser, mais il se determine d'y aller, & s'y en va.

Ce fut dans vne disposition de souffrir confusion & humiliation qu'il embrassa ce voyage, ce qui aussi effectiuellement ne luy manqua point, parce qu'il trouua les esprits preuenus contre luy, & dans vne persuasion qu'il auoit grand tort, pour vn homme qui faisoit profession d'une si haute pieté, d'agir ainsi avec sa mere; ce qu'il endura afin de prendre part aux opprobres du Fils de Dieu & honorer son aneantissement, par lequel il est venu pour nous en ce monde avec la ressemblance de la chair de peché, & y a paru comme criminel, estant toutefois la mesme Innocence; Il passoit ainsi pour coupable en cette affaire, encore qu'il ne fut point du tout en faute, mais au contraire qu'il y exerçât des actions de vertus heroïques. En voicy quelques-vnes.

Vne personne de pieté & Superieure d'une maison Religieuse luy ayāt rapporté tous les mauuais bruits, qu'on auoit femez de luy à Dijon, qui estoient étranges, & en vn lieu où il n'y auoit personne pour le iustifier, parce qu'il n'y estoit pas connu; il écouta tout cela sans en témoigner aucune émotion, mais avec vne tranquillité admirable il s'éleva à Dieu de cœur & de parole & s'humilia, dont elle fut tres-edifiée. Elle luy demanda en suite, si on auoit fait quelques écritures iniurieuses contre Madame sa mere comme on le publioit, il répondit que non, que par fois les Procureurs & les Aduocats en disent plus qu'on ne voudroit, mais qu'il auoit veu toutes les pieces d'écritures, & qu'elles estoient
toutes

routes dás le respect avec lequel on devoit parler de sa mere. Elle luy demanda de plus, s'il n'auoit pas peine du procedé qu'elle tenoit contre luy, qui sembloit bien rude & bien extraordinaire; il dit, non, parce que i'adore tellement l'ordre de Dieu sur moy que ie ne peux auoir peine de ce qu'il permet m'arriuer. Je suis vn grand pecheur, c'est pourquoy non seulement ma mere, mais tout le monde se deuroit bannir contre moy. En effet on ne l'a iamais entendu faire aucune plainte des mauuais traitemens de sa mere, mais il en rejettoit touiours la cause sur ses pechez.

Plusieurs cherchans des voies d'accord, ont eû toutes les peines du monde d'y faire ioindre cette Dame qui trouuoit touiours de nouvelles difficultez, lorsmesme qu'on croyoit luy auoir donné tout ce qu'elle desiroit. Dans ces delais de iour à autre cette mesme personne luy dit; Monsieur, ie diray volontiers le *Te Deum*, quand i'apprendray que vostre affaire sera terminée, & vn iour que l'on croyoit signer les articles sans remise, auquel pourtant tout fut rompu, il vint avec vn visage fort gay me prier de dire le *Te Deum*; c'est maintenant qu'il est temps de dire le *Te Deum*, me dit il, puis que vous auez eu la bonté de me le promettre; mais oserois- ie vous demander de le dire avec vous? ô que nous auons vn Dieu grand & sage, qui sçait bien faire toutes choses comme il faut, & au temps qu'il faut, non pas dans nos precipitations, mais dans son ordre, qui est nostre sanctification. Il dit là dessus le *Te Deum*, dans vn esprit si eleué à Dieu, qu'il faisoit bien connoître, qu'il estoit tout rempli de luy.

Et puis, il me dit, hé bien! il n'y a rien de fait; mais il estoit bien iuste de dire le *Te Deum*, pour rendre graces à Dieu de ce qu'il a fait sa volontré, & non pas celle d'un pecheur, indigne qu'il l'écoute & le regarde. Cette action me remplit d'admiration, & d'autant plus qu'on croyoit l'affaire rompuë sans ressource.

Ien'ay pas moins admiré son silence sur vne affaire qui le touchoit de si prés, parce qu'il ne m'en dit iamais mot, ny de Madame sa mere, que pour recommander l'un & l'autre à

Dieu, & d'abord que i'eus l'honneur de luy parler, commē ie luy fisçauoir les recommandations que plusieurs personnes nous auoient faites pour le seruir, il m'en remercia avec grande reconnoissance enuers ces personnes de la bonne volonté que ie luy témoignoys, & sans en dire dauantage il se mit à discourir de Dieu, & puis ne m'en a iamais ouuert la bouche: ce qui marque vn merueilleux detachement & vne grande mort à tout, puis qu'il l'auoit dans des intetests si sensibles.

Ils'est passé encore beaucoup d'autres choses à Dijon & du depuis à Paris dans ces demélez iusques à la mort, & encore apres la mort de Madame sa mere, où il a eu besoin d'vne extreme patience, & qu'il a pratiquée dans vne perfection heroïque, qui a donné del'étonnement à tous ceux qui en ont eu connoissance; mais c'est assez, nous en auons parlé suffisamment, & ie ne doute point que Monsieur de Renty, qui est maintenant, comme ses vertus eminentes nous donnent tout sujet de le croire, au lieu de la parfaite charité, n'approuue mon dessein de n'en pas dire dauantage, & d'vser de retenue enuers vne personne, à laquelle il a porté toute sa vie tant d'amour & tant de respect.

CH A P I T R E VI.

Sa Mortification.



E que nous auons dit iusques icy dans cette seconde Partie des austeritez, de la pauvreté, de l'humilité & de la patience de Monsieur de Renty, fait voir euidentement iusques à quel point il estoit mortifié, & qu'il a esté vn vray grain de ce froment mystereux dont parle nostre Seigneur, qui meurt, & qui par sa mort porte beaucoup de fruits. Mais outre cela nous toucherons encore icy quelques autres effets de sa mortification.

Tout le secret de la vie Chrestienne consiste à détruire ce que nostre nature a de vicieux, afin de donner place à la grace en nous, & y faire mourir le vieil homme pour y faire vivre IESVS-CHRIST; lequel nous a enseigné que cela ne s'aquiert que par la mortification continuelle, & pour ce suiet nous a dit; si quelqu'un ne porte sa croix, & tous les iours, ne peut-estre mon disciple.

Cet excellent disciple de ce grand Maistre ayant bien compris sa doctrine a dès le commencement de sa conuersion apporté tous ses soins pour se mortifier en tout, pour domter ses passions, pour regler ses mouuemens interieurs & exterieurs, pour aneantir ses desirs & mourir à toutes les inclinations de la nature gastée, avec tant de fidelité & tant de constance, que dès aussi-tost qu'il s'apperceuoit qu'elle se portoit à quelque chose avec imperfection, & que sa volonté naturelle enclinoit d'un costé, il faisoit tout le contraire, & il a dit à vne personne tres-confidente, qu'il auoit pris à tâche de resister à sa nature en tout, & qu'avec la grace de Dieu il s'estoit toujours surmonté: de façon qu'il procedoit en toutes choses avec vn esprit de mort & de sacrifice continuel, ne faisant plus aucun vsage de ses passions, de ses sens, ny de tout ce qui estoit en luy qu'avec vn œil toujours ouuert pour empêcher l'operation de la nature maligne & ce qu'elle y pouuoit mettre du sien suiuant la conduite de nostre Seigneur, disant qu'il falloit se dés-appliquer de soy & de tout objet créé, afin que Dieu seul fut nostre objet.

Ce qu'il executoit parfaitement, car quand il estoit malade & qu'il enduroit des douleurs fort cuisantes, il estoit tellement occupé de Dieu & desoccupé de ses maux, qu'il n'y pensoit pas. Il n'estoit point possible de trouuer vn homme plus reserué à parler de ses incommoditez que luy; car comme il sçauoit que la nature se recherche & se soulage en s'entretenant de ce qui la blesse, il luy estoit cette satisfaction & ce soulagement, éleuant cependant son cœur à Dieu & luy offrant sa peine sans s'y arrester autrement, bien aise que son œuure s'accomplit, que cette chair de peché fut détruite, & que son sacrifice s'auançât. Celuy qui est baptisé; ,,

“ disoit-il, doit estre mort en IESVS-CHRIST pour mener sa
 “ vie de souffrance & dans la souffrance d’application à Dieu;
 “ allons toujours à nostre fin, qui est sacrifice en tout dans la
 “ maniere que Dieu le veut sur le fond. d’obeissance à ses or-
 “ dres & d’aneantissement de nous mesmes, à l’imitation &
 “ par l’esprit de IESVS-CHRIST. Soyons des victimes dans les
 “ dispositions interieures & dans les sentimens qu’il a eus de-
 “ puis sa conception iusques à sa mort & iusques au dernier pe-
 “ riode de son immolation.

Il auoit pour cela fort souuent en la bouche ces mots,
mort, sacrifice, vnion, voulant dire, que nous deuions nous
 étudier & nous efforcer de mourir en tout à nous mesmes, &
 pour en venir là de sacrifier à Dieu nostre esprit, nostre iuge-
 ment, nostre volonté, nos pensées, nos affections, nos desirs,
 nos passions, & tout en l’vnion & à la façon de IESVS-CHRIST.
 Il écriuit dans ce sentiment à vne personne, qu’il auoit
 grande deuotion à ces paroles, que les vingt-quatre vieil-
 lards dans l’Apocalypse chantoient à l’Agneau, qui est no-
 stre Seigneur, prosternez deuant son thône; *Vous nous auer
 faits le Royaume de Dieu, & Prestres, & nous regnerons sur la terre.*
 Parce que ce diuin Agneau fait que Dieu établit son royau-
 me en nous, en ce qu’il regne en nos ames & en nos corps
 par sa grace; que nous sommes Prestres pour nous offrir à luy
 en sacrifice; & que par ce moien nous regnerons à iamais
 avec luy en la terre des viuans. De sorte que cet homme ex-
 cellent en toutes les occasions, où il falloit refuser quelque
 chose à sa nature & mourir à soy-mesme, iettoit les yeux sur
 cet état de sacrifice & de victime pour se sacrifier & s’immol-
 er à la gloire de Dieu sur le patron de son fils nostre Sei-
 gneur.

Ce grand soin & cette attention continuelle qu’il auoit à
 se mortifier en tout, fit qu’il auoit tellement domté ses pas-
 sions, tellement réglé les mouuemens de son ame & de son
 corps, tellement changé ses inclinations & détruit sa nature,
 & qu’à la longue il vint à vn tel point de mortification passi-
 ue & de mort, qu’il ne sentoit plus en l’esprit aucune oppo-
 sition à rien de penible & n’estoit mortifié de quoy que ce

fut: delà vient qu'écriuant à son Directeur de ses dispositions il lui manda, qu'il ne comprenoit pas ce que l'on appelle mortification, parce qu'ouï il n'y a plus de contradiction ni de résistance dans l'esprit, il n'y a plus de mortification, & quand il luy arriuoit quelque chose de fort mortifiant & qui estoit pour le toucher beaucoup, s'il eust esté encore viuant à soy-mesme, si quelque personne familiere luy en témoignoit de la peine, il disoit en se riant, que cela alloit fort bien, & qu'il falloit gagner sur nous que rien ne nous mortifiât plus, & que nous fussions comme insensibles à tout.

Il en estoit venu là non par la bonté de sa nature, ni par vne indifférence stupide qui se retrouue par fois en de certains esprits endormis, mais par son trauail & sa vertu qui auoient fait cette heureuse operation en luy & changé sa nature: car ceux qui l'ont connu en sa ieunesse, rapportent que naturellement il estoit bouillant, prompt, altier, & moqueur, ce qu'il auoit tellement corrigé, ou pour mieux dire aneanti, que cela estoit à la verité admirable, d'autant qu'il s'estoit rendu modéré, attrempé, patient, humble & respectueux dans vn degré de perfection consommée; de sorte qu'à le considerer, on eut dit qu'il estoit d'vn naturel tout contraire & diametralement opposé à celuy qu'il auoit apporté du ventre de sa mere, nous apprenant par vne experience si assurée & si illustre qu'on peut beaucoup emporter sur soy, si on le veut bien, & que quelque vice que l'on ait, on en vient en fin à bout, si on se contraint & si on accomplit cette parole de nostre Seigneur, Le Royaume des cieux veut estre forcé, & les Courageux qui se font violence, sont ceux qui le gagnent.

Aussi recommandoit-il singulierement ce courage & cette sainte generosité pour se faire force, comme celle qui est la mesure du profit qu'on fait en la vraye vertu, & le moyen absolument necessaire pour acquerir la perfection. Il écriuit à vne personne qui pratiquoit la deuotion: ô qu'il est à craindre que nous n'abusions du nom & des apparences de deuotion, nous confians en nos exercices de pieté peut estre lâchement executez, ne les faisant qu'en speculation & n'en venant point à la pratique & à la victoire de nous-mesmes:

« nous adorons IESVS-CHRIST aumatin comme nostre Mai-
 « stre & nostre Directeur, & nostre vie pendant le iour n'en
 « est pas mieux dirigée; nous le regardons comme nostre Pa-
 « tron, sans l'imiter; nous le prenons pour la Regle & la Con-
 « duite de nos sens, & pourtant nous ne luy sacrifions point
 « nos appetits; nous le faisons le Modele de nos conuerfations,
 « & toutefois elles n'en font pas plus saintes; nous luy promet-
 « tons de trauailler & de nous surmonter, mais ce n'est qu'en
 « idée. Certainemēt si nous ne connoissons nostre deuotiō plū-
 « tost par la violēce que nous nous faisons & par l'amendemēt
 « de nos mœurs, que par la multiplication & par le simple vsa-
 « ge de nos pratiques spirituelles, il est à craindre qu'elles ne
 « soient pratiques de condamnation & non de sanctifica-
 « tion: car apres tout, à quoy bon tout cela si l'œuure ne suit?
 « si nous ne nous changeons & ne détruisons ce qui est vicieux
 « en nostre nature? autrement c'est comme si vn Architec-
 « te auoit amassé quantité de materiaux pour faire vn bel edifice,
 « sans le commencer iamais. L'œuure de IESVS-CHRIST en
 « est pourtant quasi là reduit dans les personnes spirituelles de
 « ce temps.

Il a dit à vne autre, que l'amour qu'une ame Chrestienne
 estoit obligée de porter aux verrus, que IESVS-CHRIST nous
 a enseignées, ne se deuoit pas terminer à de simples senti-
 mens d'estime & de respect, par lesquels les ames du com-
 mun se persuadent facilement qu'elles satisfont à leur de-
 uoir; en quoy elles se trompent, parce que nostre Seigneur
 veut sans doute qu'elles entrent de plus dans la solidité de ses
 diuines pratiques, specialement dans la mortification, la
 patience, la pauvreté & le renoncement de foy-mesme, &
 que la cause pour laquelle il y auoit si peu d'ames vrayement
 Chrestiennes & solidement spirituelles, mesme par fois dans
 les Religions, estoit que l'on se contentoit d'en demeurer à
 ce premier pas.

Je finiray ce Chapitre & cette seconde Partie par vne let-
 tre qu'il écriuit à son Directeur, qui auoit trouué à propos
 qu'il visirât vne personne, laquelle auoit grand besoin de se-
 cours & d'éclaircissement pour quelque disposition spirituel-

le, ce qu'il fit avec beaucoup de succès & de benediction, cette lettre datée du quatorzième de May, de l'an mil six cens quarante sept, nous fera bien voir le grand degagement qu'il auoit de foy, & sa mortification parfaite suiuite de dons inestimables, & sa grande lumiere, avec laquelle il démêle & explique des choses fort subtiles. Voicy ce qu'elle contient. Pour ce qui est de la personne que vous sçavez & de la visite que ie luy ay renduë, c'est Dieu & vostre benediction qui a tout fait; ie crains tant d'y mêler du mien, qu' allant au lieu où elle est, ie sens que ie ne la redemanderay pas sans vn nouuel ordre de vous, ou qu'elle le desire. Ie ne luy ay pas fait seulement de recommandation depuis, sentant en moy qu'il faut faire vne grande reserue de l'homme & le tenir en grande sobrieté; i'ay crû que ie deuois mettre tout cela en vous comme ma conduite. Ha mon pere! la grande imperfection des ames est de ne pas assez attendre Dieu; le naturel agissant & qui n'est pas assuieti vient sous de beaux pretextes & pense faire merueille, & cependant c'est-ce qui ternit la netteté de l'ame, ce qui trouble son silence & détourne son regard de foy, de confiance, & d'amour: d'où il arriue que le Pere des Lumieres n'exprime point en nous sa Parole eternelle & n'y produit point son Esprit d'amour. »

L'Incarnation a tout meritè non seulement pour l'abolition de nos fautes, mais aussi pour toutes les dispositions de grace, où IESVS-CHRIST nous veut associer, dont la principale est, comme elle estoit en luy entant qu'Homme, de ne faire rien de nous mesmes, de parler & d'agir comme nous receuons, sçachans que nous ne sommes pas seuls à faire l'ouurage, mais que le S. Esprit, qui est l'Esprit de IESVS-CHRIST & qui l'a gouverné en toutes ses voyes, est au milieu de nous, qui ferait en nous ses impressions & nous donneroit la vie, vie reelle & experientale de nostre Foy, si nous attendions sous les poids de la Patience son operation. Voila en quoy ie sens mon infirmité, & où toute fois est mon attrait. »

Ie vois ce que ie ne peux dire, car ie possède ce que ie ne peux exprimer; & la cause, mon Pere, que ie suis si bref, vient & de l'imperfection de mon naturel, & de mon igno- »

« rance, & aussi d'une trop grande largesse de la bonté divine,
 « qui fait en moy ce que ie ne sçauois dire : l'effet de cela est
 « vne plenitude & vn rassasiement de verité & de clarté de la
 « magnificence de Dieu, de la grandeur de **IESVS-CHRIST**,
 « & des richesses que nous auons en luy, de la tres-sainte Vier-
 « ge & des Saints; on voit toute loüange & adoration, & on
 « est dedans.

« Je vous dis là bien des choses, ce semble, & neanmoins
 « tout cela est d'un trait si simple & si fort dans la partie supe-
 « rieure de l'esprit, que ie n'en suis diuertí en rien de mes oc-
 « cupations exterieures, Je vois tout, j'entend tout, & ie fais,
 « quoy que mal, tout ce que j'ay à faire. C'est-ce que ie vous
 « presente pour en receuoir instruction & correction.

Voila les biens admirables qu'apporte la mortification
 parfaite, & les fruits delicieux que produit ce grain myste-
 rieux de froment, quand il est mort.



TROISIEME PARTIE.

LES VERTVS, QUI L'ONT
bien disposé enuers le Prochain.

CHAPITRE PREMIER.

*Son application à nostre Seigneur IESVS-CHRIST
au regard du Prochain.*



Nous auons remarqué en la premiere Partie de cette Histoire, que le grand exercice de Monsieur de Renty estoit de s'appliquer & de s'vnir à nostre Seigneur IESVS-CHRIST, & de l'vnion qu'il auoit avec luy & de ses exemples faire decouler toutes ses vertus & toutes ses bonnes œuures. C'estoit là le procedé general qu'il renoit en tout, il se formoit dessus luy pour composer son interieur & son exterior, & ne leuoit iamais les yeux de dessus ce diuin Original, tâchant de tirer exactement sur soy ses traits, de prendre ses vrais lineamens & de se rendre sa naïue & parfaite Copie.

C'estoit là le but de tous ses desseins & de tous ses soins, & particulièrement en ce qui touche la charité du prochain; de laquelle il prenoit nostre Seigneur pour son grand Exemplaire; c'est pourquoy il regardoit ce qu'il a fait, & ce

M.

qu'il a enduré pour les hommes, il consideroit les affections & les tendresses qu'il auoit pour eux, comme il les cherchoit, comme il conuerfoit avec eux, comme il les instruisoit, comme il les consoloit & les encourageoit, comme il les reprenoit, comme il les souffroit dans leurs défauts, & comme il les tenoit tous cherement embrassez dans son esprit & ferrez amoureusement dans son cœur. Il pezoit ce qu'il a dit de la charité du prochain, que c'est elle qu'il a établie comme le fondement & la perfection de sa Loy nouvelle, qu'il en a fait vn commandement tres-expres, qu'il appelle sien par precipû, & duquel il a recommandé l'execution par dessus tous les autres; Il faisoit grande attention sur ce qu'il veut que nous aimions nostre prochain sur son modele, dans la mesure & de la façon qu'il nous a aimez, & enfin qu'il a mis en cette vertu & non en aucune autre chose la marque, qui doit distinguer ceux qui possederoient son vray esprit, d'avec ceux qui n'en auroient que l'apparence.

Monsieur de Renty considerant ces actions & cette doctrine de nostre Seigneur, comme il auoit absolument resolu de trauailler autant qu'il pourroit pour se rendre excellent Chrestien, & imitateur parfait de nostre Seigneur, il se determina en suite d'embrasser cette doctrine, d'imiter ses actions & d'aimer son prochain dans l'étendue & dans l'esprit de ce diuin Maistre.

Ecriuant à la sœur Marguerite du S. Sacrement Carmelite de Beaulne, il luy dit: Je souûpire apres nostre Seigneur IESVS-CHRIST, desirant de le suiure par où il luy plaira, & de l'imiter. Je vous supplie de m'obtenir son esprit pour estre ma Vie & toute ma Vie. Respirez & gemissez pour moy apresmon Dieu, afin que ie sois tout à luy en son Fils, que ie le suiue & ne viue que de son esprit. Et il manda à vne autre personne: J'ay vne si grande veuë de la bonré, de l'amour & de routes sortes d'effets d'amour de l'ame tres-sainte de nostre Seigneur, que cet interieur tout de clemence, de benignité & de charité me fait conceuoir bien autrement que iamais, comme nous deuons viure de ce diuin

amour & enuers Dieu & enuers les hommes, & comme en
effet c'est en luy que toute la loy s'accomplit en perfection. »
Et à la mesme encore: depuis que Dieu s'est manifesté à nous »
par son fils & qu'il nous a mis en son fils pour entrer dans sa »
grace & dans ses deuoirs tant au regard de Dieu que des »
hommes, comment peut-on quitter ce cher fils? qui a IESVS- »
CHRIST, a vne clef qui ouure bien des portes: elle mon- »
tre de larges espaces, elle enrichit de grands thresors, & »
rompt, pour ainsi dire, la captiuité du cœur humain, parce »
qu'il est trop petit pour ses immensitez. Et derechef à la »
mesme. ha! que le desert est bon, quand apres le baptesme »
on y est conduit avec nostre Seigneur par l'esprit de Dieu, »
c'est de là que nostre Seigneur sortit pour aller conuerser »
avec les hommes, pour les enseigner & operer leur salut; »
puis que nous ne faisons avec luy qu'un IESVS-CHRIST, »
ayans l'honneur d'estre ses membres, nous deuons viure de »
sa vie, prendre son esprit & marcher sur ses traces. »

C'est à quoy ce parfait disciple s'est appliqué de toute sa
puissance ien cette admirable charité, qu'il a eüe pour les
hommes, & que nous allons voir amplement. Il tâchoit
de s'vnir intimement à nostre Seigneur dans tout le commer-
ce qu'il auoit avec eux, & de se mettre comme vn excellent
instrument en sa main pour les aider; il le supplioit de l'ani-
mer de cet esprit de charité du prochain, qu'il nous a apprise
de parole, & encore plus d'effet, & de l'embrazer de ce feu
diuin qu'il a allumé au milieu de son Eglise pour nous en-
trebrûler tous; il le consultoit dans les doutes qu'il auoit là
dessus, le priant de luy inspirer ce qu'il deuoit dire, & ce qu'il
deuoit faire pour leur bien, & quand, & comment, & qu'en
luy & par luy il parlât, il fit & paracheuât son œuvre.

Il les regardoit tous, non selon les qualitez qu'ils auoient
de la nature, la beauté, la noblesse, les richesses, les digni-
tez, & les honneurs du monde, mais selon des conditions
beaucoup plus releuées & communes à tous, à scauoir
comme des creatures diuines, & les images viuantes de Dieu,
faites pour le louer & pour l'aimer à iamais, comme toutes
reintes & empourprées du sang de IESVS-CHRIST, comme

ses freres & ses coheritiers comme ses Acquisitions & son Bien, qu'il a acheté au prix de sa vie & de mille douleurs, & qui par consequent luy est extremement cher, & pour lequel il ne peut qu'il n'ait vn tres grand amour.

C'est dans ces iours qu'il regardoit les hommes, qu'il les aimoit, & qu'il s'appliquoit à leurs besoins; d'où il arriuoit par la pureté de cette conduite, que d'un costé il leur estoit extremement profitable & qu'il y receuoit de merueilleuses benedictions de Dieu; & que de l'autre, la communication qu'il auoit avec eux ne le dissipoit point, & ne luy faisoit aucun mal, mais beaucoup de bien. On a quelque fois donné conseil à ceux qui traitent avec le prochain pour son salut, particulierement quand ce sont personnes, de qui la conuersation est dangereuse pour leurs attrait, de les regarder ou comme des corps sans ames, ou comme des ames sans corps & des esprits tout purs; le conseil est bon & dont quelques-vns se seruent vtilement: mais la veuë de Monsieur de Renty estoit de regarder Dieu & IESVS-CHRIST en chaque homme, & de considerer ce qu'ils demandoient de luy pour son secours, & apres dans cette veuë de luy parler & de faire tout ce qui estoit necessaire pour le bien de son corps & de son ame, croiant que c'estoit veritablement à eux qu'il rendoit ces assistances & ces seruices.

Il en faut vser ainsi pour faire du bien & ne recevoir point de mal; qui ne le fait, se met en peril & de recevoir beaucoup de mal & de faire fort peu de bien; si on y procede par mouuement & par motif de nature, les effets se ressentiront de leur cause & ne seront que naturels, ou vicieux, ou au plus indifferens, pertes de temps, discours legers, amusemẽs, attachés d'esprits, affections qui tiennent beaucoup des sens pour degenerer apres en chose pire; de sorte que voulant purifier vne persone, on se souille; & pensant la sauuer, souuent on se damne. Qui veut conduire les ames à IESVS-CHRIST & à Dieu, doit necessairement les conduire par les voies qui y menent.

C H A P I T R E II.

Sa Charité du prochain prise en general.

I A N T dessein de parler de la charité que cet homme de Dieu a eüe pour son prochain , nous la considererons premiere-ment en general, & nous dirons qu'elle a esté si grande & si étenduë , qu'il semble qu'elle n'ait point eu de bornes, parce qu'il n'aimoit pas seulement tous les Chrestiens & tous les Fideles , mais encore tous les hommes sans en excepter vn seul; dautant que comme il voioit en tous les motifs d'une veritable charité & d'un amour sincere , les regardant cōme creatures de Dieu & les chefs-d'œuvres de ses mains , pour qui nostre Seigneur s'est fait homme & a donné sa vie, qu'il aimoit & qu'il veut sauuer, il les aimoit aussi tous & desiroit de leur bien faire: vostre commandement, dit Dauid, est extremement large , il estoit dans cette latitude, & dans la longitude & toutes les dimensions de la charité, parce qu'il aimoit les presens & les absens, les domestiques & les étrangers, les bons & les mechans; il les estimoit tous selon leur degré, il les honoroit tous , il parloit bien de tous , il faisoit du bien à tous & du mal à per-
sone.

Il n'y auoit aucune bonne œure publique d'importance dans Paris, & bien loïn, à laquelle il n'ût part & grande part; Il n'y auoit point d'entreprise qui regardât l'honneur de dieu & le bien du prochain, dōt il ne fût ou l'auteur, ou le promoteur, ou l'executeur , & bien souuent tout cela ensemble; Il estoit de toutes les Assemblées de pieté , & en plusieurs commel'ame & le premier mobile; Il auoit des correspondances par tout le Royaume pour toutes les œures de charité , qui y estoient à faire; Il receuoit de tous costez des depesches pour auoir son auis sur les difficultez qui se presen-

toient en l'établissement ou à l'auancement des Hospitaux, des Seminaires, des lieux de deuotion, des compagnies de personnes vertueuses qui vouloient se ioindre pour vaquer avec plus de soin à leur salut & à celui du prochain, & pour la conduite de toutes sortes de bonnes œuures.

Vn rémoin digne de foy écrit à ce propos de la ville de Caën : Monsieur de Renty estoit nostre appuy & nostre vraye refuge pour l'exécution des desseins qui regardoient le seruice de Dieu, le salut des ames, & le soulagement des pauures & de toutes sortes de miserables : c'est dequoy nous luy écriuions continuellement tant pour l'établissement de nos Hospitaux & pour la maison des Filles Penitentes, comme aussi pour reprimer l'insolence de quelques heretiques qui faisoient mépris du S. Sacrement trop à découuert. En fin nous tirions secours & conseil de luy en toutes les occasions semblables, où il témoignoit vn grand zele pour maintenir la gloire de Dieu & extirper le vice. Apres sa mort nous n'auons pû trouuer personne, à qui nous eussions recours de cette sorte pour les affaires de Dieu. Vn autre mande de Dijon : il faut auoier que Monsieur de Renty a fait vn tres-grand profit en cette Prouince par tout où il a esté, & qu'il a extremement auancé toutes les œuures de pieté. On peut dire que ses iours estoient remplis de la plenitude de Dieu, & nous ne croyons pas qu'il perdit vn seul moment de temps, ny qu'il fit aucune action, ou dit aucune parole, qui ne seruit.

Il s'appliquoit aux besoins des Anglois, des Hibernois, des Captifs en Barbarie, & des Missions du Leuant. Il a grandement trauaillé au bien de l'Hospital des Forçats qui est à Marseille, & il a extremement contribué à l'auancement des affaires de la Nouvelle France. Son dessein estoit de l'annir les abus qui se sont glissez dans les Arts & les Mestiers, & les rectifier & les sanctifier tous, faisant que ceux, qui les exercent, y vecussent dans le vray esprit du Christianisme; ce qu'il auoit avec quelques autres personnes heureusement commencé, & mesme executé en deux, comme nous dirons autrepert.

De plus comme vn des grands effets de la Charité est la concorde & l'vnion, il auoit vn soin merueilleux de la conseruer, de l'accroistre, & de la perfectionner en soy & en tous; pour cette cause il viuoit en parfaite intelligence avec tout le monde, avec les seculiers, avec les Ecclesiastiques, & les Religieux; il faisoit état de tous, il les respectoit tous, & parloit de tous avec honneur, & quand quelque diuision & quelque démelé s'éleuoit entre eux, il s'en affligeoit amèrement & tâchoit par tous moiens de pacifier leurs cœurs, de réunir leurs esprits & d'accorder leurs differens: parce qu'il sçauoit que le Dieu, que nous adorons, est vn Dieu de paix, qui veut que nous viuions en paix, & que iamais la discorde ne vient de luy, mais du diable semeur de zizanies; qu'il n'y a rien de plus contraire à l'esprit du Christianisme, qui est vn esprit d'vnion & d'amour du prochain, que la diuision & ces schismes de charité, qui font que l'on ne vit pas en freres, mais en étrangers & comme ennemis, & qu'au lieu de profiter en la vertu, on multiplie ses pechez & on augmente ses vices.

L'esprit de la Loy nouvelle est vn esprit d'vne charité si parfaite & d'vne vnion si intime, que comme dit S. Paul, il n'y a plus de distinction, pour le cœur, de Iuif ny de Gentil, de Barbare ny de Scythe, d'esclaue ny de libre, mais IESVS-CHRIST est tout à tous pour les lier, les serrer & les unir tous en soy: suiuant cela ce vray Chrestien disoit en l'vne de ses lettres: les paroles qui nous doiuent demeurer les plus empreintes dans le cœur, sont celles de l'amour reciproque, que nostre Seigneur nous a laissées à la fin de son Testament, cet amour doit animer tous les Chrestiens, les consumer en vn, & les faire viure & conuerser entre eux en freres, & en enfans, & mesme comme vn seul enfant de Dieu.

Et parceque la meilleure & la plus necessaire disposition, que doiuent auoir ceux qui s'emploient au bien du prochain, est l'vnion avec IESVS-CHRIST nostre Sauueur, à qui les hommes appartiennent, pour prendre de luy la lumiere & la force de les aider selon son dessein, & pour receuoir l'esprit de salut qu'il faut leur inspirer, & qu'ils soient bien fon-

dés dans les vertus , spécialement dans quelques vnes; qui rendent vne persone plus capable de traiter vtilement avec eux, il a pour cela fait tous ses efforts , comme nous auons veu, pour s'vnir intimement à IESVS-CHRIST, & operer en tout par son esprit , & pour acquerir ces vertus & s'y rendre parfait.

Ces vertus ont esté marquées par saint Paul en la premiere Epistre aux Corinthiens, sur lesquelles il faisoit souuent des reflexions & de longues meditations, il les escriuit mesme de sa main en vn papier, & encore qu'il portât toujours le nouveau Testament en sa poche, il voulut porter de plus ce papier separément sur soy pour pouuoir le lire & le considerer souuent: voicy ce qu'il contenoit.

Charitas patiens est; benigna est;

Charitas non amulatur; non agit perperam;

non inflatur; non est ambitiosa;

non querit quæ sua sunt; non irritatur; non cogitat malum;

non gaudet super iniquitate; congaudet autem veritati;

omnia suffert; omnia credit; omnia sperat; omnia sustinet.

La Charité est patiente; elle est plëine de douceur; elle ne porte point d'enuie; elle n'est ny malicieuse ny mal-faisante; elle n'est point vaine ny ambitieuse; elle ne cherche pas ses interets; rien ne l'aigrit & ne la met en cholere; elle ne pense point à mal, mais elle interprete tout en bonne part, elle ne se reioiit point de la faute d'autruy, mais au contraire elle a vn grand plaisir lors qu'elle le voit bien faire; elle supporte de grandes fatigues; elle croit tout, non par foiblesse d'esprit, mais par bonté & par vne sainte simplicité; si son prochain ne se corrige, elle espere toujours qu'il le fera, & cependant il n'est rien qu'elle n'endure de luy.

C'est en ces vertus que doit particulièrement s'exercer & se rompre celuy qui veut agir vtilement avec le prochain; autrement c'est en vain qu'il en prend le dessein, & son experience luy fera voir, s'il veut ouvrir les yeux, qu'apres y auoir employé & bien du temps & bien de la peine, il y auancera peu. Plus vne personne est pleine de Dieu & d'auantage animée de l'esprit de IESVS-CHRIST, plus elle est
sainte.

fainte pour foy, & plus profitable aux autres en tous ses emplois, mesme avec peu de paroles bien communes; parce que ny les emplois ne tirent pas tant leur force de la main qui les fait, ny les paroles la leur de la bouche qui les prononce, comme de la disposition du cœur & de l'esprit qui l'anime.

Mais comme pour servir beaucoup au prochain, il ne suffit pas d'auoir de la vertu, & qu'il est encore besoin de capacité, cet homme parfaitement charitable outre la capacité, que Dieu luy auoit abondamment départie, tant de l'esprit qui estoit grand, subtil, solide, porté au bien, resolu, laborieux & constant, comme du corps qu'il auoit bien fait & d'un fort honneste & agreable rencontre, & les sciences & les belles connoissances qu'il auoit apprises en sa ieunesse, il voulut par son propre trauail, & tout homme fait qu'il estoit, en acquerir d'autres, & non seulement pour en vser luy mesme, mais encore pour les enseigner à ceux qui le voudroient, afin qu'ils s'en pussent aider en leurs besoins, ou en faire autrement leur profit: comme de saigner, de faire des medicamens pour guerir les plaies, de composer des remedes pour toutes sortes de maladies & de maux, dont il auoit des liures écrits de sa main qu'il communiquoit, & choses semblables, s'abbaissant iusques aux connoissances les plus viles pour pouuoir profiter à tous.

Ainsi il mena vn iour a Paris l'un de ses amis chez vn pauvre homme qui gaignoit sa vie à faire des hottes & des paniers d'osier dans vne caue, où il descendit & en presence de ce sien amy il acheua vne hotte qu'il auoit commencée quelques iours auparauant, avec dessein, l'ayant appris, de l'apprendre apres aux pauvres de la campagne & leur donner ce moien de gagner leur vie; & il laissa à ce bon homme sa hotte, qui meritoit d'estre mise dans vn cabinet parmy les plus rares pieces, ou mieux encore dans vn lieu de pieté, comme vn glorieux trophée d'une charité heroïque, & luy donna de l'argent pour luy auoir monstré.

Aiant sçû, comme il estoit à Diion, que les Religieuses Ursulines qu'il aimoit beaucoup, bailloient par charité des

drogues & des medicamens aux pauures, il en reçût vne grande ioye; & pour leur en donner encore plus de moien, il enseigna aux Seurs infirmieres à faire des compositions excellentes, qui ont grande vertu pour soulager assurément & en peu de temps les malades; & il les preparoit luy mesme, il les accommodoit, les mettoit sur le feu & les faisoit cuire, s'abbaissant à tout ce qui estoit de plus humiliant & de plus penible, autant qu'eut pû faire vn valet. Il se tenoit long temps à la fumée, le visage sur des vaisseaux qui exhaloient vne tres-mauuaise odeur, aupres d'vn grand feu, d'où il ne se retiroit que tout en eau, sans dire vne seule parole, ny monstrier aucun signe de ce qu'il souffroit. Les Religieuses s'efforçoient bien de luy faire trouuer bon que les Filles du tour, qui sont au dehors, luy rendissent quelque seruice & le soulageassent en quelque chose, mais il auoit tant de persuasion & tant d'adresse, qu'elles estoient forcées de le laisser faire, & de donner lieu au feu de sa charité qui le mettoit interieurement tout en flammes, & qui luy adoucissoit, ou mesme confumoit toutes les peines, que le feu materiel luy pouuoit causer; il les contraignit mesme par vne grande prudence de luy dire les heures de leur office & de leur communauté, afin de ne les en point diuertir, & il se rendoit si ponctuel au temps, qui estoit assigné, qu'il n'y manquoit pas d'vn moment, encore que ce ne fut pas sans difficulté, à cause des autres occupations, où il se trouuoit ailleurs engagé.

Il faisoit ainsi dans les autres choses; tellement qu'il prenoit toutes sortes de formes, il empruntoit toutes sortes de figures & se mettoit en tout sens, pour pouuoir secourir le prochain, estant mesme par la force de ce feu diuin, qui l'embrazoit, comme passé & tout fondu en charité: ses pensées, ses sentimens, ses paroles, ses œuures, & tout en luy estoient charité: ce qui luy fit dire vn iour dans vne lettre,

« qu'il écriuit à vne personne tres-confidente. Il me semble
 « que mon ame est toute charité, & ie ne vous peux dire avec
 « quelle cordialité & avec quelle ouerture ie sens mon cœur
 « se renoueller en la vie diuine de nostre Seigneur nouueau-
 « nay brûlant d'amour pour les hommes.

SECTION PREMIERE.

Sa Charité enuers les Pauures.

PREMIEREMENT j'ay à dire touchant l'affection, que Monsieur de Renty a porté aux pauures & la charité qu'il a exercée enuers eux, que IESVS-CHRIST estoit non seulement la source pour luy en donner la grace, mais encore le motif & l'obiet, parce qu'il le regardoit en eux, & s'est luy qu'il pensoit assister & seruir en leurs personnes; de sorte qu'il ne s'arrestoit pas à leurs habits rompus & rapieçez, ny à tout leur exterior vil & méprisable, qui naturellement déplaist aux yeux & offence l'odorat & les autres sens; mais passant tout outre, il voioit là dedans & là dessous avec les yeux de la foy, nostre Seigneur IESVS-CHRIST present & resident en eux, & les consideroit comme ses naïues images, qu'il aime & qu'il estime. Et comme il brûloit d'un ardent amour enuers nostre Seigneur, il aimoit aussi tendrement les pauures, il les secouroit de toute sa puissance, & il n'est rien qu'il ne fit pour eux. C'est avec ces yeux, & non point avec ceux de la nature que doit regarder les pauures celuy, qui veur bien les aimer, & auoir des entrailles pitoiables enuers eux & acquerir vne vraie, forte & constante charité pour eux.

En second lieu ayant à traiter icy de cette charité en detail, nous cōmencerons par celle qu'il exerçoit dans sa maison, où dès l'an mil six cens quarante & vn, il donna à dîner à des pauures, à des hommes, deux en nombre, & au commencement deux iours la semaine, le Mardy & le Vendredy, mais cinq ou six ans apres se trouuant accablé d'affaires pour le seruice de Dieu & du prochain, il reduisit ces deux iours à vn, ordinairement au leudy, & pour deux pauures il en prit trois; mais voicy l'ordre qu'il y tenoit.

Youlant ioindre l'aumône spirituelle à la corporelle, qui

est vn secret important, que doiuent apprendre & pratiquer les perſones charitables, chacune ſelon ſa capacité, il cherchoit les pauures qui luy ſembloient auoir plus de beſoin d'inſtruction; & pour ce ſuiet, lors qu'il eſtoit à Paris, apres auoir entendu la Meſſe, il alloit à la porte de S. Antoine prendre ceux qui ne faiſoient que d'arriuer, leſquels ayant amiablemēt ſaliuez, il les amenoit avec ſoy dans ſon logis, & ſi c'eſtoit en hyuer, il les faiſoit auſſi-toſt chauffer, & en tout temps aſſeoir, puis avec vne affection cordiale, qui reluifoit en ſon viſage & en tout ſon maintien, & avec vne grace merueilleuſe il leur enſeignoit ce qu'il faut ſçauoir des myſteres de la tres-Sainte Trinité, de l'Incarnation de noſtre Seigneur & du S. Sacrement.

Il les inſtruiſoit en ſuite briuement à ſe bien confeſſer, à bien communier, en vn mot à bien viure, & apres l'inſtruction il leur donnoit à lauer & les faiſoit mettre à table, où il les ſeruoit luy meſme, teſte nuë, & dans vn reſpect qui ne ſe peut dire, & mettoit ſur la table les plats qu'il ſe faiſoit apporter par ſes Domestiques & par ſes Enfans, à quoy Madame ſa femme mettoit beaucoup la main: il impoſoit ſilence pendant qu'ils diſnoient & vouloit qu'on les laiſſât manger à leur aiſe, & apres le diſner il leur donnoit encore l'aumône, & les reconduiſoit iuſques à la porte de ſon logis avec des reuerences profondes & de ſalutaires aduis.

Il faut eſtre bien chreſtien pour agir de la ſorte, & vn Seigneur de ſon âge & de ſa condition deuoit tenir les yeux fortement attachez ſur IESVS-CHRIST pour rendre ces ſeruices à des hommes ainſi faits: ſans ce regard vne telle action luy eut eſté difficile, & meſme comme impoſſible, où elle luy eſtoit aiſée. En eſſet vn gentilhomme ne fera point de difficulté, mais plutôt tiendra à honneur & à ioye de ſeruir le Roy, encore qu'il le voie tout craſſeux & couuert d'vn mechant haillon, mais il faut quil ſçache & qu'il ſoit bien perſuadé que c'eſt le Roy. Quelques perſonnes de qualité de Paris & d'ailleurs ſe trouuans preſentes à cette action ſi chreſtienne & ſi ſainte, en eſtoient extremement touchées, edifiées, & de plus animées à l'imiter, au moins en partie.

Il a cōtinüé cette louïable pratique iusques à sa mort, & quãd ses occupations ne luy permettoient pas de la pouuoir exercer par luy mesme, Madame sa femme ne laissoit pas de la continüer, mais à des femmes. Il auoit en outre coutume tous les iours de l'année ausquels la Natiuité de nostre Seigneur estoit écheüe, de donner à disner à vn pauure âgé de dix ou douze ans; au iour des Roys de faire le mesme à vne pauure femme ayant vn petit enfant à la mamelle pour honorer le mystere; au iour de S. Jean Baptiste son patron à douze pauures & de les seruir; autant, & de la mesme façon, le Leudy saint, apres leur auoir laué les pieds.

Outre cette charité, & beaucoup d'autres soit en aumônes, soit en d'autres assistances de toutes sortes que Monsieur de Renty faisoit en sa maison, il trouuilloit au secours de tous les Pauures de Paris & d'ailleurs bien loin en toutes les manieres qui luy estoient possibles: ils s'occupoit à apprendre leurs besoins, il pensoit aux moyens d'y apporter remede, & y appliquoit en suite ses soins, & ne pouuant tout faire, il y employoit d'autres personnes, il parloit pour eux, il demandoit pour eux, il achetoit luy mesme leurs necessitez, & apres les leur portoit: Il cherchoit des établissemens & des conditions à des hommes, à des enfans & à des filles qui en manquoient, & ne pouuant quelquefois en rencontrer si tost, il en a tenu & nourry quelques-vns en sa maison long-temps, iusques à ce qu'il les eut bien placez.

Il a esté le premier qui a eu pensée & mouuement d'assister les pauures Anglois refugiez pour la Foy en France, & de lier dans ce dessein des personnes de pieté pour donner des fons à leur subsistance; Il en vint à bout, & pour la distribution il se chargeoit d'vne partie, qu'il alloit porter tous les mois à pied ordinairement seul, & aux quartiers les plus éloignez qu'il auoit luy mesme choisis, & entrant en leur chambre, il les saluoit avec tendresse & compassion, & puis leur donnoit avec beaucoup de ciuilité & de respect dans vn rouleau leur petit fait. Comme vne fois il se trouua accompagné d'vn de ses amis, il luy dit au retour ce mot remarquable: voila de bons Chrestiens, parce qu'ils ont tout quitté pour »

« Dieu ; mais nous autres, nous auons abondance de biens &
 « rien ne nous manque ; Ils se contentent de deux écus par
 « mois, apres auoir quitté les quinze & les vingt mille liures de
 « rente, & souffrent ces grandes pertes avec patience, où nous
 « sommes riches. Ha Monsieur ! le Christianisme ne consiste
 « pas en paroles ny en apparence, mais en effets.

Dauantage cet homme sage & charitable pratiqouit dans le soin, qu'il prenoit des pauures vne chose fort considerable & pleine de grande prudence, à scauoir que quand il les visitoit apres auoir veu en gros leurs necessitez, il les examinait dans le detail, tant les spirituelles comme les corporelles ; il tâchoit d'abord de remarquer leurs inclinations, leurs passions, leurs mauuaises habitudes, les vices qui predominoient en eux & où estoit leur foible, pour selon la qualité des maux & la disposition des perſones y apporter les remedes & donner les instructions conuenables, les exhortant toujours à viure chrestienement & à faire bon vsage de leur paureté. Pour les necessitez temporelles, il consideroit la capacité, l'industrie, le mestier & l'employ de chacun : s'ils estoient artisans, il regardoit ce qui leur manquoit pour leur trauail & pour pouuoir gagner leur vie, si c'estoit des outils, ou de la matiere & des étoffes, ou de la besongne, à quoy il pouruoit, parce qu'il leur donnoit moien d'auoir de nouveaux outils, ou il degageoit les leurs, il leur fournisſoit de la matiere ou leur achetoit des étoffes en espece leur baillant cependant du pain pour deux ou trois iours, il leur procuroit de la besongne, & non seulement à eux, mais encore à leurs femmes & à leurs enfans, afin qu'ils pûssent tous viure : apres il achetoit de leurs ourages dont il faisoit d'autres aumônes, il leur en facilitoit le debit, & les encourageoit à trauailler & à fuir l'oïſuete, retournant de temps en temps les visiter pour voir si tout alloit bien chez eux.

Adioutons à cela sa charité enuers les pauures prisonniers, qu'il visitoit, qu'il consolait, à qui il donnoit des aumônes, il en procuroit, & moiennoit la liberté, avec discernement toutefois, s'il estoit expedient pour leur salut : car il dit vn iour qu'on le prioit pour faire deliurer celuy, de qui nous

allons parler, que souuent on mettoit hors de prison des personnes, qui apres ne se seruoient de leur liberté que pour offenser Dieu & se damner, & que pour leur bien il valoit mieux les y laisser; à cela près, il s'emploioit pour eux avec grande affection, dont voicy vn exemple signalé.

Il y auoit en la basse Normandie vn prisonnier de plusieurs années, & innocent, & reduit à de grandes necessitez: beaucoup de personnes auoient trauaillé pour son élargissement, mais sans effet, parce qu'il auoit affaire à forte partie; on en donna connoissance à Monsieur de Renty, qui bien informé du fait, entreprend de secourir ce pauvre prisonnier, & luy fait donner pour rapporteur au conseil, où son proces estoit pendant; vn Maistre des Requestes fort homme de bien, il recommande la chose à son Aduocat, il le va voir & le solliciter plusieurs fois, & promet de fournir à tous les frais necessaires. Mais comme ces poursuites tiroient en longueur, & que le prisonnier trempoit toujours dans sa misere, Monsieur de Renty changeât de resolution écrit à sa partie pour luy & le prie de luy remettre cette affaire, qu'il iroit bien tost en Normandie, & que là il trouueroit moien d'accomoder la chose à son contentement. Il s'y en va, & comme il y fut arriué, il fit commencer la Mission dans sa Paroisse du Beny, & de là à quelques iours prenant avec soy vn des Peres Missionnaires, il se transporte à la Ville, où estoit le prisonnier & sa partie.

Quand on sçeut dans la Ville que Monsieur de Renty venoit, toutes les rues se remplirent de peuple qui benissoit Dieu de sa venüe, & comme il en sçauoit le suiet, il disoit qu'il n'y auoit que luy qui pût acheuer cette affaire & mettre fin à la misere de ce pauvre homme, & tous louoient Dieu de ce qu'il auoit choisy pour cela vn homme si saint & faisoient mille prieres pour luy. Il s'en va en suite à la prison, où le Pere fit vne exhortation aux prisonniers pour les consoler & les fortifier, & Monsieur de Renty soulagea leurs necessitez avec ses aumônes, & après parla à son prisonnier & luy dit, qu'il iroit voir sa partie pour l'induire par raisons, & le gagner mesme par prieres, de consentir à son élargisse-

ment, que cependant il priât Dieu de benir son entreprise, & que toujours il se tint pour assuré qu'en quelque façon que ce fût, il le tireroit avec la grace de Dieu de prison. De là il va trouver cette partie dans sa Maison, il entre en conference avec luy, il le prie, il le coniuere, & sur quelques difficultés qu'il luy fit, il retourne seul à la prison pour en estre éclairci, où trouuant que les prisonniers faisoient ensemble leurs prieres accoustumées, il attendit, encore qu'il fût sept heures du soir & qu'il luy fallût faire deux lieues de chemin pour retourner à sa Maison, où il n'arriua qu'à dix heures. Son prisonnier l'ayant instruit, il va retrouver sa partie, avec laquelle il tomba en fin d'accord, tellement que cet homme apres neuf ans de prison & beaucoup de maux, en sortit par les sollicitations & par la charité de Monsieur de Renty, qui l'obligea de venir se confesser & communier en la Mission pour rendre graces à Dieu de sa deliurance; & afin de luy en donner plus de moien adioustant continuellement charité sur charité, il le retint & le nourrit huit iours en sa Maison, luy parlant tous les soirs & l'exhortant à bien vivre: au sortir de chez luy il voulut qu'il allât voir sa partie, & il trouua cet homme aussi doux & aussi traitable, qu'il auoit esté auparauant animé contre luy, & du depuis s'estant fait Prestre, il fut en l'Eglise de Beny celebrer la sainte Messe à l'intention de son Libérateur.

SECTION SECONDE.

Sa Charité enuers les Pauvres Malades.

SI Monsieur de Renty a eu beaucoup de charité pour les pauvres, il en a eu encore dauantage pour les pauvres qui estoient malades, parce qu'aussi il voioit en eux deux obiets de cette excellente vertu, la pauvreté & la maladie, de sorte qu'elle estoit plus grande de moitié en luy, & son feu redoubloit sa flamme dans son cœur misericordieux enuers eux. Il ne se lit quasi rien dans les vies des plus grands Saints sur ce

sur ce suiet, qu'il n'ait pratiqué. Sa charité estoit si étendue, & les soins qu'il prenoit d'eux, alloient si auãt, que ne se contentant pas d'assister les pauvres malades en vne ou deux manieres, ils trouuoient en luy, & souuent dans vne seule visite vn Bienfaiteur, vn Medecin, vn Apothicaire, vn Chirurgien, vn Pasteur, vn Pere, vn Frere, vn Amy, & vn Seruiteur, les soulageant en toutes façons, dont plusieurs iusqu'alors n'auoient pas esté conuës ny exercées, specialement par des personnes de cette condition.

Dés l'an mil six cens quarante & vn il apprit à saigner & à faire d'autres operations de la Chirurgie: il voulut sçauoir faire des medicamens & toutes sortes de remedes, & conferant avec vn Medecin il se fit instruire des choses principales de la medecine, & comme son but n'estoit pas la simple connoissance, mais la pratique, il portoit sur soy toujours, soit qu'il allât par la Ville ou à la campagne, des poudres medicinales pour les maux ordinaires, & vn etuy, où estoient ses instrumens de chirurgie pour saigner & faire des incisions, qu'il faisoit avec vn adresse & vne assurance admirable, sans toutefois s'auancer, comme il estoit fort prudent, au delà de sa science.

Visitant les pauvres malades en quelque lieu que ce fût, il n'omettoit rien de tous les seruices qu'il voioit leur estre necessaires & qu'il pouuoit leur rendre, comme de faire luy mesme leurs lits, les y mettre & accomoder, leur faire du feu, nettoier leur vaisselle, arranger leurs petits meubles, dresser tout, voulant par là s'insinüer dans les cœurs de ces pauvres gens, pour apres les cõsoler, les exhorter à la patience, & les porter à Dieu avec plus de force. On le veit vn iour à Diion, qui a esté vn grand & éclatant theatre de ses vertus en plusieurs mois qu'il y a demeuré, sans manteau, avec vne pierre dans la main, demandant du feu à vne porte pour chauffer vn pauvre malade qui estoit delaißé. Apres auoit en cette mesme Ville visité vne ou deux fois des pauvres malades accompagné de quelques personnes, qui luy enseignoient leurs demeures, il retournoit les voir souuent seul & exerçoit enuers eux des actions de charité plus grandes &

plus viles qu'il n'en auoit pratiqué en compagnie, & les secouroit de iour & de nuit.

Allant voir l'an mil six cens quarante quelques pauvres malades à Paris de la paroisse S. Paul, il trouua la Sœur qui en auoit le soin fortant d'une maison, à qui il demanda ce qu'elle cherchoit dans ce logis là; elle luy répondit qu'elle y cherchoit IESVS-CHRIST, & qu'elle venoit d'une chambre où il y auoit grande charité à faire; cette réponse le toucha & en temoigna beaucoup de ioye, luy disant qu'il le cherchoit aussi, & là dessus ils vont tous deux dans cette chambre où il y auoit plusieurs malades, qu'il auoit dés-jà le iour mesme visitez, & leur auoit fait du bouillon, donné à déieuner & fait leurs lits. De là cette bonne Fille le mena en plusieurs autres lieux, où il instruisit les malades & donna l'aumône, & du depuis il a toujours continué ce sainct exercice avec elle, prenant pour cela vn iour la semaine, qui estoit ordinairement le Vendredy, auquel il les alloit visiter, les faigner, s'essuiant après les mains non à vne seruiete blanche, mais à quelque torchon s'il en trouuoit, leur donner les remedes propres à leurs maux, les assister & les seruir dans leurs necessitez: de plus pour le spirituel, les consoler, les encourager, les preparer à faire vne bonne Confession & à bien receuoir les Sacremens, & il s'informoit toujours en toutes les maisons où il entroit, si Dieu y estoit bien seruy, & s'il n'y auoit point de diuision ni de querelle, qu'il tâchoit avec grand soin d'accomoder, & singulieremēt parmy les pauvres, ne s'en presentant iamais d'occasion, mesme lors qu'il alloit par les ruës, qu'il ne leur dit quelque chose pour leur faire cōnoître leur faute là dessus & les acorder. En fin il ne sortoit iamais de ces lieux, qu'il n'ût pourueu à tous les besoins qu'il y remarquoit avec vne charité, avec vne douceur & vn respect incroyable, se donnant le temps, quoy qu'il eut tant d'autres affaires, de les entendre en tout ce qu'ils vouloient luy dire avec vne patience inuincible.

Dans ses voïages apres qu'il auoit mis pied à terre, il s'en alloit à l'Eglise adorer le S. Sacrement, comme nous auons dit ailleurs, il s'enquestoit s'il y auoit vn Hospital, où, si le

temps le luy permettoit, il ne manquoit pas d'aller & de voir les malades, demandant s'ils estoient secourus, & apportant à leurs necessitez tous les remedes qu'il pouuoit, de la main par saignées & par medicamens, de parole adoucissant leurs peines avec de bonnes raisons & leur donnant courage, & avec ses aumônes.

Le memoire qu'on a donné du grand-Hostel Dieu de Paris porte ce qui suit; Nous auons veu Monsieur de Renty venir icy l'espace de douze ans & plus avec vne grande assiduité. Entrant & sortant il s'en alloit droit à l'Eglise deuant le S. Sacrement, & demouroit longtemps en sa presence, ce qui donnoit de la deuotion à tous ceux qui le voioient: c'estoit à son entrée pour offrir son action à nostre Seigneur & luy demander les graces qui luy estoient necessaires, & à sa sortie pour le supplier de la benir & de la rendre efficace. Apres il venoit dans les Sales, où il exerçoit sa charité enuers les pauvres malades depuis deux heures iusques à cinq du soir, les enseignant & les soulageant dans tous leurs besoins. Nous l'auons veu panser, medicamenter & essuier les plaies & les vlcères. Nous l'auons veu plusieurs fois baiser les pieds des malades & ayder à enseuelir les morts. De plus il a eu la charité de monstrier aux Religieuses à faire de l'onguent qui leur estoit inconnu, & de le faire luy mesme deuant elles. Quelquefois & le plus souuent il venoit seul, & quelquefois aussi il estoit accompagné de quelques Seigneurs de grande condition, qui animez d'un tel exemple le vouloient aucunement imiter & auoir part à des œuvres si saintes.

Il ne visitoit pas seulement les pauvres malades pour leur faire la charité; mais ils l'alloient eux mesmes trouuer, s'ils pouuoient marcher, quand il estoit en quelque lieu, pour la receuoir. Estant à Dijon ils le cherchoient en troupes; & pour toutes sortes d'infirmités & de maladies. Comme il alla l'an mil six cens quarante deux en ses terres de Normandie, il s'employa sans cesse, l'espace d'environ quatre mois qu'il y fut, à ces actions de misericorde, & seruit de medecin & de Chirurgien à tous les pauvres malades du pays, de sorte que de tous costez ils venoient à luy pour trouuer les re-

medes de leurs maux; & il y en auoit presque toujours vn si grand nombre autour de luy, qu'on ne le pouuoit approcher.

Le me souuiens à ce propos de ce qui se lit de nostre Seigneur, que de toutes parts les malades de toutes sortes de maladies & les affligez accouroient à luy pour estre soulagez & gueris, & il me semble voir avec quelque proportion le mesme en ce sien seruiteur fidele & vray disciple, lors que les malades, les infirmes, les languissans, les impotens ou autrement indisposez vont à luy de tous les enuiron, & qu'on le voit entouré d'une multitude de miserables, qui pour estre saigné, qui pour auoir de l'onguent, qui des poudres medicinales, qui d'autres medicamens, qui vn conseil, qui vne consolation, qui l'aumône, qui vn autre leniment à son mal: & que luy avec cette grande & étendue charité chrestienne, avec ces entrailles de misericorde prises sur celles de Dieu, avec cet esprit d'amour, avec lequel le fils de Dieu a eu pitié de nous, & avec vne singuliere bonté & vne patience infatigable est au milieu d'eux tâchant de les secourir tous & d'apporter du soulagement à leurs maux.

SECTION TROISIEME.

Suite de la mesme Charité, avec le succes.

SA charité que nous allons voir est encore plus grande que la precedente, parce qu'elle s'employe au soin & à la cure des maladies plus fâcheuses, dont la nature a plus d'horreur, & où il faut qu'elle se surmonte dauantage.

Cet homme de Dieu estant en son chasteau du Beny, y receuoit les pauures teigneux & les logeoit dans vne chambre bien accommodée & bien parée, où il les alloit voir & leur oster luy mesme leur teigne avec ses remedes, les gardant & les nourrissant iusques à ce qu'ils fussent gueris. A Paris il les visitoit de mesme au faux-bourg S. Germain, où ils ont leur demeure, & leur portoit des distributions, & ioignant l'humilité à la charité, on l'a veu au milieu de ces tei-

gneux tout debout & teste nuë entendre vne exhortation qu'il leur auoit procurée.

Comme i'entray vn iour dans la salle de Beny, dit vn témoin oculaire digne de foy, ie le trouuay maniant vn chancre, qu'on ne pouuoit regarder mesme de loin sans auersion & sans horreur, & luy, étouffant tous ces sentimens de nature, l'accommodoit avec ioye & avec respect.

Dans son sejour à Dijon il s'y rencontra vne pauure fille qui auoit esté prise des soldats, des mains desquels elle s'estoit échappée, apres auoir esté quelque temps leur proye & auoir gagné vne maladie tres-vilaine. Quelques perſones charitables en donnerent aduis aux Religieuses Ursulines afin qu'elles eussent la bonté de la secourir en ce qu'elles pourroient, qui la firent mettre chez de pauures gens dans le voisinage; son corps estoit en vn état si pitoiable que ce n'estoit que pourriture, & il rendoit vne infection si puante, que perſonen'en vouloit approcher, son hoste mesme ne la pouuoit souffrir, tellement qu'elle estoit en danger d'estre abandonnée de tous. La Superieure, qui estoit pour lors & qui est à present defuncte, Religieuse de grande vertu, & avec qui Monsieur de Renty auoit beaucoup de liaison, eut la pensée de luy en parler, elle le fit & conféra avec luy des moyens d'assister cette pauure creature. La charité de ce saint homme touiours agissante ne luy donna pas vn moment de trefue, mais le porta aussi tost à la visiter & à la pourvoir de tous ses besoins. Il gagea vne femme pour la seruir & fit resoûdre son hoste à la garder; il luy faisoit faire les dietes & luy donnoit les medicamens necessaires à cette maladie, il luy portoit les consommés & les autres choses qui regardoient sa nourriture demeurant long-temps aupres d'elle; quand il la voyoit toute en eau il luy essuioit le visage avec son mouchoir, & apres, par vne action plus admirable qu'imitable, il s'en seruoit ainsi tout trempé sans vouloir qu'on le luy changeât: & comme il auoit bien plus de soin de son ame que de son corps, il l'instruisoit, il la consoloit & prenoit la peine tous les iours de luy faire quelque lecture dans vn liure de deuotion, souffrant au reste avec force &

gayeté toutes les impressions de peine que cette horrible maladie faisoit sur ses sens, & receuant la mauuaise odeur qui sorroit de ce corps pourri, & qui faisoit bondir le cœur, comme si ç'eut esté quelque parfum delicieux. C'estoit sans doute la bonne odeur de IESVS-CHRIST, lequel il regardoit dans les pauvres, comme nous auons dit, qui luy parfumoit les infections, & luy faisoit trouuer des suauitez dans les plus grandes puanteurs.

Enfin par ses soins il retira cette pauvre fille de la misere & de la mort, & l'établit dans les devoirs d'une vraye Chrestienne, si bien que depuis elle s'exerce en beaucoup de bonnes œuvres, & quand elle va aux Ursulines, elle ne peut se tenir qu'elle ne parle & avec grand sentiment des excellentes vertus & sur tout de l'incomparable charité de Monsieur de Renty, & des obligations extremes qu'elle luy a, qu'elle publie par tout, & en témoigne de grandes reconnoissances.

Cette action de charité genereuse n'a pas esté seule dans Dijon, il en a fait beaucoup d'autres semblables dans les Hospitaux & les autres lieux où il alloit, à ce qu'on nous raporte, & nous auons sujet de le croire. I'adiouste à cela l'ardent desir qu'il auoit qu'on fit vn Hospital pour les écrouëlés, n'y en ayant point ny à Paris ny en toute la France.

C'est ainsi que ce grand Seruiteur de Dieu s'emploioit au soin des malades, & des malades les plus dégourans. Voions maintenant quel succès & quelle benediction Dieu donnoit à ses soins & à ses remedes, & comme par fois il rendoit par ses mains, comme miraculeusement, la guerison aux malades. Estant en la basse Normandie fort occupé autour de ses malades, on s'etonnoit comme il donnoit des remedes pour toutes les maladies, mesme extraordinaires & incurables, & qu'avec ces remedes, qui n'estoient quelquefois presque rien, les malades en estoient gueris promptement: ce qui fit croire à ceux, qui éclairoient ses actions, qu'il guerissoit souvent non tant par la vertu naturelle de ses medicamens, comme par grace & par miracle.

On a fait la mesme remarque a Diion dans des guerisons operées de la mesme sorte, & on y a pris la mesme creance

qu'il rendoit la santé par voie furnaturelle. Sur quoy ie ne dois pas omettre vn entretien qu'il eut avec la Mere Prieure des Carmelites de là, qu'il voioit souuent & avec beaucoup de confiance à qui il raconta, qu'il y auoit peu de iours qu'une femme estant malade à la mort pour vne mauuaise couche & abandonnée des medecins, on le vint querir pour voir si dans cette extremité il pourroit avec ses remedes luy donner quelque soulagement; il s'y en va. Et ie luy en fis vn, ,, dit il, que ie scauois bien n'auoir pas la force de guerir vne ,, telle maladie, mais quoy? ie n'auois rien de meilleur, ie priay ,, Dieu d'y donner sa benediction, si cestoit sa gloire & le bien ,, de la patiente, il le fit: car ie viens de la voir qui se porte bien. ,, La Mere luy demanda, s'il faisoit souuent ainsi, il luy répondit qu'ouïy, quand on l'en prioit; car ce sont, adiousta t'il, de ,, pauures gens qui n'ont rien pour se soulager, ny moy aussi: ,, nostre Seigneur n'est pas attaché aux remedes, il faut auoir ,, de la foy où nous ne pouuons rien; Dieu par sa bonté me la ,, donnée. Elle luy repliqua, mais c'est donc miracle. Et quoy, ,, repart il, n'en fait il pas tous les iours pour nous? Vous en faites donc pour les pauures? luy dit elle; il répondit à cela avec humilité & de fort bonne grace: ma Mere appelle miracle ce que nostre Seigneur fait, pour moy ie n'y ay point de part si ce n'est de donner aux pauures ce que i'ay, prenez le comme vous voudrez, ie n'y fais point de reflexion que pour remercier nostre seigneur, quand ils sont gueris. ,,

Si les saintes Lettres recommandent de rendre de l'honneur au Medecin à cause du besoin qu'on a de luy, on doit sans doute honorer & estimer dauantage les Medecins, qui traitent & guerissent leurs malades non tant dans la methode de Galien ou de Paracelse, que dans celle de Dieu.

SECTION QUATRIEME.

Son zele pour le salut du Prochain.

CETTE Charité a esté encore beaucoup plus grande & beaucoup plus ardente en feu Monsieur de Renty que celles dont nous auons parlé, parce qu'aussi, cōme dit S. Thomas, elle est bien plus releuée & bien plus noble. Premièrement à raison du suiet, qui est l'ame, que cette charité regarde, laquelle est incomparablement plus excellente que le corps, au soin duquel seulemēt celles là s'appliquent. Secondement à cause de l'objet & des choses qui se donnent, qui sont d'une valeur tres-inégale, parce qu'ou la charité corporelle ne donne que du pain, de l'argent & la santé, la spirituelles s'emploie à rendre l'ame capable de la grace, de la gloire, & de la possession eternelle de Dieu, qui sont des biens infiniment plus grands que ceux-là. C'est pourquoy cēt homme sage & illuminé sçachant bien faire ce discernement important, auoit des affections encore toutes autres pour aider les ames que pour secourir les corps. Dauantage, comme il estoit embrazé de l'amour de Dieu & de celuy de IESVS-CHRIST son Fils, il cherchoit continuellement tous les moyens & faisoit tous ses efforts pour les faire connoître & aimer en cette vie & en l'autre, & empêcher qu'ils n'y fussent offencez ny haïs. Joint que connoissant qu'ils ont des bontez & des tendresses inexplicables pour les ames, qui leur ont esté si cheres & qui leur ont tant cousté, il entroit dans leurs affections, il les aimoit sur leur modele, & desiroit avec zele leur salut.

Or ce zele a esté admirable, & il a eu toutes les qualitez necessaires pour estre tres-parfait. Premièrement il a esté vniuersel, s'étendant sur tous les hommes en general & sur chacun en particulier, en France, hors de France, & par tout: de sorte qu'il dit à vne persone familiere, qu'il estoit prest de seruir tous les hommes sans en excepter vn seul, & de

de donner sa vie pour chacun d'eux, s'il en estoit besoin.

Il eut voulu conuertir, éclairer de la connoissance de Dieu, bruler de son amour, sanctifier & sauuer tout le monde s'il eut pû; & comme Paris en est vn abregé, il alloit cherchant par tous les quartiers & par toutes les ruës de cette grande & puissante ville tout ce qu'il y auoit à oster ou à mettre pour la gloire de Dieu & le salut des ames. L'esprit de Dieu le conduisant en cette recherche benissoit son trauail & luy donnoit grace pour regler les choses deregées, pour affermir les branlantes & maintenir celles qui estoient en bon ordre, pour détruire le mal & établir le bien: ce qu'il a fait en tant de manieres, qu'il seroit impossible de le dire. Mais que ne peut vn homme zelé, desinteressé, & remply de Dieu?

Il faisoit par soy mesme tout ce qu'il pouuoit sans s'épargner en rien & sans perdre vn seul moment de remps, mais comme il ne pouuoit pas tout faire, & que ses forces tant de l'esprit que du corps n'estoient pas à beaucoup pres egales à ses desirs, il le faisoit par d'autres: de là sont venuës tant de missions qu'il a fait faire à ses frais, premierement en ses terres de Normandie & de Brie, & puis qu'il a procurées contribuant encore à la depense en beaucoup d'autres Prouince où il n'auoit rien, en Bourgogne, en Picardie, au Chartrain, & en plusieurs autres lieux.

Mais il fera bon de l'entendre parler là dessus; il m'ecriuit touchant la Mission de Citry en Brie. On a commencé icy la Mission le iour de la Pentecoste, qui a vne benediction toute extraordinaire, les cœurs sont tellement touchez des sentimens de penitence que les larmes coulent en abondance; il se fait quantité de restitutions & de reconciliations, les prieres communes & publiques se font dans les familles, les iuremens & les blasphemes ne s'entendent plus, & tout y accourt de trois à quatre lieues. D'où est venuë entre autres vne Fille de mauuaise vie qui s'en est retournée avec vn changement veritable, declarant hautement sa conuersion, & rompant tout son commerce. Je connois bien maintenant que c'est là le suier pour lequel nostre Seigneur m'a fait venir icy & m'a obligé d'y sejourner.

Toutes ces operations de grace le combloient d'une ioye inexplicable & le faisoient fondre en larmes pour la grande part, qu'il prenoit à la gloire qui en reuenoit à Dieu & au bien que les ames en receuoient. Nous l'auons vû, dit vn témoin oculaire, les larmes aux yeux, & comme ie luy en demandois la cause, il m'auoia qu'elles procedoient de la ioye excessiue qu'il auoit de voir tant de personnes touchées & qui donnoient des marques certaines de leur conuersion, restituant le bien d'autrui, se reconciliant avec leurs ennemis, brûlant les mauuais livres, quittant les occasions du peché, & commenceant vne vie toute nouvelle. Nous l'auons vû dans l'Eglise de Citry transporté de zele & de ferueur, la balaier, oster les ordures avec les mains, & sonner les cloches pour faire venir le peuple.

Il se seruoit ordinairement pour les missions, des Prestres seculiers de sa connoissance, viuans en communauté & établis à Caën pour ces emplois, dont ils se font toujours acquitté avec grande benediction, & vn fruit fort notable; au Supérieur desquels il a écrit plusieurs lettres sur ce suiet, le priant & le coniuant d'entreprendre ces missions d'un grand cœur, luy donnant auis de celles qui estoient assurées, & de celles que l'on pouuoit esperer, ce qu'il auoit fait, à qui il auoit parlé, & de quels moiens il falloit se seruir pour les faire reüssir.

En l'une de ses lettres écrite l'année de sa mort, apres luy auoir parlé d'une missiõ qu'il projettoit en la ville de Dreux au diocese de Chartres, il luy mãde; l'ay vû quelques personnes pour
 » se ioindre à procurer tous les ans vne missiõ, & nous mesmes
 » nous irons, autant que nous pourrons, pour vous y seruir &
 » obeir pour les visites des malades & les charités des pauures,
 » & pour assembler dans ce mesme dessein des compagnies de
 » personnes, que la parole de Dieu aura gagnées. Nous auons
 » déjà touché tous à la main depuis que nostre Seigneur nous
 » a touché au cœur: & ma femme & deux autres avec elle se-
 » ront de la partie, pour imiter Sainte Magdelaine, Sainte
 » Ianne, & Sainte Susanne, dont il est dit en S. Luc qu'elles
 » suiuoient nostre Seigneur & ses disciples, & qu'elles contri-

büioient de leurs facultez pour la predication du Roiaume »
de Dieu : nous tâcherons de faire cela sans éclat & sans que »
l'on nous connoisse , prenant vn petit logis à part. Voiez, mon »
tres-cher Pere, si vous voulez estre nostre Pere, & si cette an- »
née en l'automne vous pouuez donner le pain de vie eternal- »
le à ceux qui vous le demandent avec grand respect. Je vous »
supplie les larmes aux yeux de nous écouter & exaucez tou- »
chez du besoin de nos pauures freres, & de la charité de »
IESVS-CHRIST, qui nous veut tous vnir en vn cœur, qui est »
le sien, pour y viure deuant Dieu. Mon tres-cher Pere, ie mets »
ce depost entre vos mains, c'est à l'esprit de Dieu de le rendre »
fecund en vous & en mes tres-chers peres vos freres. I'ay »
confiance que nous ferons, exaucez & que nous verrons vne »
abondance de misericordes. J'attend vostre sentiment la »
dessus & pour la chose, & pour le temps, & que cependant »
vous tiendrez s'il vous plaist, l'affaire secreete parmy vous. »

SECTION CINQUIEME.

Suite du mesme Zele.

VOICY encore d'autres effets de son Zele vniuersel,
qui luy faisoit desirer le salut de tous, & en chercher
les moyens.

Nous auons remarqué cy dessus comme il auoit des corres-
pondances par toute la France & ailleurs pour les grandes en-
treprises & les affaires importantes, qui regardoient la gloire
de Dieu & le bien du prochain.

Il lioit par tout, où il pouuoit, des perones pour s'entraï-
der à leur salut & à celuy des autres, & faisoit des Assemblées
de pieté pour diuers suiets. Me voicy de retour de Bourgo- »
gne, puis qu'il plait à nostre Seigneur, m'écriuit il le vingtié- »
me de Septembre de l'an mil six cens quarante huit : nostre »
voiage a esté assés plein d'emplois pour aider à former diuer- »
ses Compagnies d'hommes & aussi de femmes, qui ont grand »
desir de bien seruir Dieu. »

Le memoire venu de Caën porte ces mots. Monsieur de Renty a étably ici plusieurs Assemblées de personnes, auxquelles il conseilloit de traiter ensemble toutes les semaines des moiens de secourir les pauvres & d'empescher que Dieu ne fut offensé. Ce qui reüissoit à merueilles. Il conseilloit aussi à des gentilhommes de la campagne de s'assembler de temps en temps pour s'animer les vns les autres à estre parfaits Chrestiens, & à faire profession de ne se battre iamais en duel.

« Il manda au Superieur d'une Mission; ie me suis bien vny
 « à vous Dimanche dernier, que ie crois auoir esté l'ouuerture
 « de vostre Mission. Je vous supplie tres-humblement de croire,
 « que si vous m'y iugiez vtile sur la fin pour y former quel-
 « que petit Corps de gentil-hommes, & des Societez dans la
 « ville, comme nous le faisons aux petites villes & aux gros
 « bourgs, ie ferois mon possible pour m'y trouuer, mais i'y fe-
 « rois plus de mal que de bien.

Estant venu à Amiens, où i'estois, il y a répandu vne si bonne odeur de sa vertu & de sa sainteté, qu'elle a embaumé toute la ville. En moins de quinze iours il y a fait tant de choses, & si grandes, en la visite des Hospitiaux, des Prisons & des Pauvres honteux, & en toute autre sorte d'actions de pieté, qu'elles sont admirables; Il a dressé & établi, en deux voyages qu'il y a faits, tant par son exemple que par sa conuersation & par ses auis, quantité de notables bourgeois en ces exercices de charité, qui les ont embrassés avec courage, & les ont du depuis continués inuiolablement avec beaucoup de fruit.

Il auoit dessein & grand desir de porter l'esprit du Christianisme dans toutes les familles, & de faire que tous dans leurs conditions serussent Dieu de bonne sorte, & s'appliquassent serieusement au soin de leur conscience; il eut voulu pouuoir instruire de leur deuoir les peres, les meres & les enfans, les maistres & les maistresses, les seruiteurs & les seruantes; visant mesme en cela à leur bien mutuel, parce qu'on a touiours sujet de se desier d'une persone, soit homme soit femme, quand elle ne craint point Dieu, d'autant que ve-

nant à offencer son Seigneur souuerain & luy faûser la foy, elle donne lieu de croire, qu'ou elle verra son interet, vn attrait d'honneur, de plaisir ou de profit, elle pourra bien en faire autant à celuy qui n'est que son valet; ainsi & pour la gloire de Dieu, & pour le salut de chacun, & pour le bien commun de tous il souhaitoit que tous fussent vertueux, & le procuroit par tous les moyens possibles.

Il dressa quelques reglemens pour les Gentil-hommes & les personnes de qualité, comme aussi pour les Dames & les Damoiselles, sçachant que comme ces personnes sont releuées par dessus les autres, on les voit aussi de plus loin, & que leur exemple fait plus d'impression pour le bien ou pour le mal, que celuy des personnes du commun. J'ay ces memoires écrits de sa main & composez de son style, qui meritent d'estre icy rapportez pour montrer son zele, & pour seruir à l'vtilité publique. Les voicy :

Quelques articles pour faire resouuenir vne personne de qualité de l'obligation qu'elle a dans sa famille, dans ses terres, & sur ses suiets.

LA premiere & la plus importante obligation pour la conduite de la famille est le bon exemple, sans lequel la benediction de Dieu n'y sçauroit estre. Que donc toute la maison & la famille, depuis les plus grands iusques aux moindres domestiques, donnent exemple de modestie, soit en l'Eglise, soit dans les offices & les devoirs particuliers d'vn chacun, soit dans les commissions, & les conuersations du dehors; de sorte que l'on connoisse par l'harmonie du dehors, que Dieu est le premier mobile du mouuement du dedans, & que l'on n'y souffre rien de reprehensible.

Pour les Officiers.

Ça. Il faut s'informer si les Officiers en détail, comme les

Juges, les Procureurs Fiscaux, les Greffiers, les Sergens & autres, se gouvernent bien en leurs charges; & prendre vne persone capable & de confiance pour en connoître, & pour donner ouerture aux remedes.

2. Il faut examiner avec prudence & sans éclat, si les peuples ne se plaignent point avec raison de quelques iniustices & de quelques concussions.

3. S'ils font garder la police suiuant les ordonnances.

4. Si on va au tauernes durant l'Office diuin les iours de Festes & de Dimanches.

5. Si on ne transgresse point les Festes trauaillant & chariant hors de la veritable necessité.

6. Si on reprime & punit les crimes publics, les blasphemateurs, les vsuriers; si on tient la main contre les yurongnes, les fornicateurs, & les chicaneurs qui oppriment les pauures; & si on bannit les filles qui seruent de pierres d'achoppement & font commettre tant de maux.

7. S'il n'y a point de ces Libertins, qui se moquent de la Religion & des Prestres, & qui mangent de la chair en tout temps.

8. Il est bon, s'il se rencontre quelque notable vicieux, de commencer par luy, si on peut, à faire paroître que l'on ne fait point de quartier au vice, ce qui apprendra à tout le monde avec quelle fermeté on agit, & on retiendra les Libertins. Il faut zele & fermeté, & quelquefois aussi clemence pour ceux qui promettent changement avec apparence de touche de cœur.

9. Vn haut Iusticier peut de son autorité, entendant vn blasphemateur, ou le sçachant, & qui que ce soit qui se trouuera souillé d'vn autre vice notable, l'enuoier sur le champ pour vingt-quatre heures en prison avec vn morceau de pain & de l'eau sans autre forme de proces, ni sans estre obligé de luy en rendre raison, & l'auertir, que s'il continuë, on luy fera faire son procez.

10. Il y a de certaines persones qui craignent plus la perte du bien que la peine du corps; il est bon à ceux-là pour le châtiment de leurs fautes, de les condamner sans remission à des amendes.

11. Comme aussi à tous les notables vicieux, lors qu'ils se rencontrent enveloppez avec les autres en quelque affaire, ou pour la taille, de ne les point protéger, & dire nettement & hautement que c'est à cause de leur mauuaise vie qu'on leur en veut & qu'on leur sera toujours à dos: Mais au contraire témoigner estime des gens de bien & des simples qui craignent Dieu, & leur faire en cette considération quelque faueur publique, & se rendre leur protecteur.

12. Les offices se doiuent donner *gratis*, afin de pouuoir choisir des personnes propres pour exercer la Iustice, & auoir droit de les y obliger.

13. Il faut donner exemple, ne receuant point de present de ses suiets pour l'exemption des gens de guerre, ni de ceux qui ont des affaires deuant vous, ni des pauures, mais montrer que vous estes desinteressé, genereux & incorruptible; ce qui vous donnera plus d'autorité & plus de pouuoir pour vous faire rendre du respect, & tenir en bride tant les Officiers que la Noblesse qui releue de vous.

Pour la Chasse.

1. On doit recommander aux Gentils-hommes voisins qui demandent la permission de chasser, de ne prendre que les faisons, aufquelles on ne gaste point les bleds.

2. Que l'on ne prenne point la coûtume de faire nourrir des chiens aux payfans.

3. Que les garennes, qui ne sont point d'ancienneté, n'incommodent point les voisins.

Pour la Taille.

1. Il faut prendre garde que les puissans n'oppriment pas les foibles.

2. Que l'on ne fasse point de courses inutiles de Sergens, lesquelles coûtent beaucoup, & ne déchargent pas le peuple.

3. Il ne faut pas donner ses Fermes à plus haut prix, à cause que l'on empêche par autorité que les Fermiers ne payent point la Taille; ils peuvent bien estre considerez, à cause de la protection journaliere du Seigneur qui est vtile à tout le peuple, mais l'excès va à l'injustice.

4. Il faut recommander & tenir la main que l'on fasse l'imposition des Tailles dans la iustice distributiue & selon que chacun la peut porter. Ceux qui l'assoient, prennent en quelques lieux de l'argent des pautres gens pour les mettre en non vateur & en rejet, auxquels, pour couper pied à ce mal, il faudra dire qu'ils imposent si bien & si iustement la Taille, que s'il y a des non-vateurs, elles tomberont sur eux.

Pour les Eglises.

1. Il sera bon d'aller visiter Messieurs les Curez pour apprendre au peuple le cas qu'on fait d'eux, & en suite celuy qu'il en doit faire, & sçavoir d'eux s'il n'y a point d'abus, où l'autorité temporelle doit interuenir. L'article des Officiers en contient plusieurs: de plus quelle reuerence ou irreuerence on apporte dans l'Eglise. Si le peuple entend le Prône, s'il est soigneux d'enuoier la Jeunesse au Catechisme, & s'il y vient luy mesme, à quoy vous aussi & vos domestiques assisterez.

2. S'il y a du reuenu au thresor ou à l'œuure de la paroisse. Si les Marguilliers rendent bien leurs comptes & vuident leurs mains au profit de l'Eglise tous les ans. Si l'on n'emploie point le bien de l'Eglise pour la Taille, ou pour les affaires publiques; & si cela est, il en faut non seulement arrester le cours, mais en auertir l'Euesque, car les Thresoriers, qui sont responsables de cét argent, n'ont pû consentir à cette distraction.

3. Il faut faire reuoir les comptes du passé, & du renenant-bon faire acheter ce qui est plus necessaire à l'Eglise; voir si les vases sacrez sont d'argent; s'il y a vn Tabernacle honeste & decent, & les Ornemens requis.

4. Il faut s'enquêter de Monsieur le Curé, quels sont les plus pauvres de la paroisse, en prendre les noms & les faire assister par preference aux autres.

5. Je ne voudrois jamais marcher deuant les Prestres, particulièrement en la presence du peuple.

Voilà à mon auis le plus gros de ce à quoy l'on est obligé: du surplus vne Mission est excellente pour donner l'esprit Chrestien au peuple, en laquelle chacun apprendra son de- uoir & les moiens de s'en bien aquiter. Ces Gentils-hommes se peuuent allier pour se voir vne fois le mois, conférer de leurs obligations & s'animer à en faire les œuures: on peut aussi lier dans les villes de petites Societez de personnes de pieté pour veiller aux abus, oster les occasions de peché, & consoler les pauvres honteux.

Il y aura encore moien d'établir parmy les femmes des Confrairies de charité pour l'instruction, pour la consolation & le secours temporel des pauvres malades; & par dessus tout vne compagnie de quelques bons Ecclesiastiques, qui pourront s'assembler vne fois le mois pour penser aux moiens de bien faire les fonctions de leur état, d'où depend tout le bien des peuples. Voilà le memoire qui contient les instructions pour les hommes, voicy celuy des femmes.

Quelques Reglemens pour les Dames & les Damoiselles.

1. L'ordinaire de Dieu est de faire surabonder la grace où le peché a abondé. La premiere femme a mis la mort au monde, & la saincte Vierge fait chanter à l'Eglise, que ç'a esté vne faute heureuse, puis qu'elle nous donne l'alliance de son Fils, & son Fils celle de la Diuinité. Mais ce n'est pas tout, si la premiere femme est la cause de tous les maux qui sont au monde, il semble aussi que Dieu veut se seruir des femmes pour en faire la reparation, ayant disposé par sa sagesse que ce sont elles qui ont l'education des Enfans, & pour l'ordinaire le soin de leurs familles, les hommes comme plus robustes s'appliquans aux affaires du dehors, où les femmes sont sedentaires pour celles du dedans, tellement

qu'elles voient tout , qu'elles connoissent tout & conduisent tout: d'où vient que comme tous les Ordres , soit de l'Eglise , soit de la Noblesse, soit des Magistrats & des Peuples s'éleuent des familles qui en sont les pepinieres, on peut dire que Dieu a commis aux femmes le soin de la plus grande consequence qui peut estre , à sçauoir , de luy éleuer & nourrir des ames dans l'esprit de leur Baptesme , les disposans comme des miroirs sans tache à receuoir les impressions de sa volonté & la vocation de l'état, où il les appelle pour sa gloire & pour leur salut. Il est donc tres-important qu'elles fassent reflexion que le plus grand bien & le plus grand mal, qui est parmi les hommes, dépend en partie d'elles , & que Dieu leur en demandera compte.

2. Pour cela qu'elles prennent grand soin de l'instruction des Enfans dès leur plus tendre ieunesse, reprimant par vertu & par douceur ce que la nature montre en eux de reprehensible, & se souuenant que la plus-part des vices viennent de ce que l'on estime petit, & mesme plaisant tout ce qu'on voit faire aux enfans , qui se trouuans en vn âge plus auancé & en la chaleur de leur sang immortalisez & indomtez, sont apres incapables de correction.

3. Qu'elles veillent aussi sur l'instruction de leurs domestiques fermant la porte de la maison aux blasphemés, à l'impureté , aux ieux insolens, & aux autres vices.

4. Qu'elles empechent que les valets ne frequentent les tauerne, & n'excedent le peuple.

5. Qu'elles ayent soin qu'ils soient charitablement traitez en leurs maladies, & qu'elles mesmes les visitent comme estans nos freres & seruiteurs avec nous de Dieu nostre pere & nostre Seigneur commun , & qu'en tout temps on les pouruoie de ce qui est necessaire pour leur oster toute occasion de larcin & de murmure.

6. Qu'elles tâchent d'introduire chez elles & en leur voisinage par tout où elles pourront, mesme parmi le peuple, que l'on fasse les prieres en commun au soir; & si les maistres ne peuuent s'y trouuer, qu'elles fassent assembler les domestiques & prient avec eux.

7. Qu'elles soient continuellement occupées pendant le iour afin de rendre leur vie vtile, & empecher en elles & en leurs domestiques l'oisiueté, pensans à cette parole de l'Apostre, que celuy qui ne trauaille point, ne mange point. Cette pratique prise avec discretion remédie à plusieurs inconueniens, & détourne beaucoup de maux.

8. Qu'elles visitent par fois les pauures familles pour les consoler & les encourager à bien viure.

9. Qu'elles aient soin de faire raccommoder les ornemens & le linge de leurs Eglises, qui faute d'vn peu d'affection deshonnorent nostre foy vers les Saints mysteres, & coûtent apres beaucoup plus à l'Eglise.

10. Qu'elles fassent grand cas des Prestres, ne regardant plus en eux leur naissance tēporelle, mais la dignité où IESVS-CHRIST les a éleuez, & qu'elles traitent avec eux dans cette veuë, à quoy elles sont obligées tant pour faire penser aux Prestres à ce qu'ils font, que pour apprendre aux peuples par leur exemple ce qu'ils leur doiuent.

11. Qu'elles reçoient les visites en esprit d'hospitalité avec grande charité, & avec toute l'honesteté Chrestienne, & qu'elles se gardent d'en perdre le fruit les receuant par coûtume, ou dans les sentimens du monde, & qu'elles eui- tent les superfluitez paiennes.

12. Qu'elles ne souffrent point dans leurs maisons des tableaux qui montrent des nuditez deshonestes, & beaucoup moins qu'elles n'en fassent point paroître en leurs personnes: qu'elles détruisent le plus adretement qu'elles pourront les affeteries & les curiositez vaines, qui marquent l'impenitence du cœur & ne peuuent produire autre effet, que de nourrir les ames dans leur corruption & les détourner de Dieu.

Voila les auis salutaires qu'il donnoit aux Dames pour la bonne conduite de leurs familles.

Il roula longtems dans son esprit la pensée de reformer tous les mestiers, d'en oster les abus, qui à la longue s'y sont coulez & de les sanctifier, & il souhaitoit qu'en rous il y eut des gens qui véussent comme les premiers Chrestiens, en

forte que tout le gain de leur traavail fut commun , & apres auoir pris pour eux le necessaire, le reste allât aux pauvres. Dieu a accompli son souhait ayant mesme trouué quelques Artisans qui en auoient l'inspiration & estoient dans le mesme dessein, tellement qu'il y a maintenant à Paris deux communautez de ces mestiers, l'vne de Tailleurs, & l'autre de Cordonniers . & de ceux cy en deux quartiers de la ville , & encore à Tolose , où ils vivent & font tout en commun : ils se leuent , ils se couchent, ils mangent, ils traouillent ensemble; le matin & le soir ils font coniointement leurs prieres, & au commencement de chaque heure ils pratiquent quelque exercice de pieté, tantost de chanter des Hymnes, tantost de reciter le Chapelet, puis de lire quelque Liure de deuotion , apres de s'entretenir des matieres du Catechisme : Ils s'appellent freres & viuent en grande vnion & con corde. Monsieur de Renty a plus qu'aucun autre contribué à leur établissement temporel , & pour le spirituel il a dressé de concert avec d'autres personnes de pieté les reglemens qu'ils obseruent & a esté leur premier Superieur. Dans cette fonction il auoit vn tres-grand soin d'eux & les visitoit souuent, & s'il les trouuoit à genoux en quelqu'vn de leurs exercices spirituels, il se mettoit à genoux ne voulant pas permettre qu'ils se leuassent pour le salüer , ou qu'ils interrompissent tant soit peu leur action pour luy, se tenant avec eux comme vn d'entre eux.

Outre ces Artisans viuans en communauté , il y en auoit vn grand nombre d'autres & de toutes sortes de mestier , qui le venoient trouuer chez luy pour auoir conseil , instruction, & assistance en tout, lesquels il receuoit avec grande charité & leur parloit avec vne affection cordiale , répondant à leurs demandes, les éclaircissant dans leurs doutes, & leur enseignant ce qu'ils deuoient & faire & fuir dans leur vacation pour s'y sauuer.

SECTION SIXIEME.

Continuation du mesme sujet.

LE zele de Monsieur de Renty le portoit a toutes sortes de personnes. Il auoit vne inclination particuliere pour retenir les pauures filles qui estoient sur le panchant de tomber dans le mal, ou pour les releuer si elles y estoient tombées. Il seroit impossible de raconter toutes les actions qu'il a faites de cette nature, & le nombre de ces filles qu'il a placées par ses soins, & mesme y contribuant de son bien, les vnes aux Filles Penitentes, les autres à la Magdelaine, & d'autres chez des Damoiselles de vertu, lesquelles s'emploient à cette espece de charité, qui est d'autant plus grande & plus importante, qu'elle ne fauue pas seulement vne pauure fille, qui est en peril de faire naufrage de son honneur & de son salut, ou qui effectiuement dé-ja l'a fait & se damne, mais qui empêche encore la damnation de plusieurs hommes, & vn grand nombre de pechez & mille desordres.

J'ay dit en la Section seconde ce que son zele luy faisoit faire au grand-Hostel-Dieu pour l'instruction des pauures, voicy l'exercice qu'il luy donna dans l'Hospital S. Geruais. Comme il passoit vn iour de l'année mil six cens quarante-vn par deuant cet Hospital, il demanda à quoy il seruoit, & quelles œures de charité on y pratiquoit, on luy répondit qu'on y retiroit & couchoit les pauures passans; considerant cette institution il l'approuua beaucoup, mais voyant que les pauures, qui s'y rangeoient tous les soirs en grand nombre, manquoient d'instruction, il se sentit poussé de Dieu de la leur donner, & pour cela peu de iours apres il vint demander auec grande humilité & beaucoup de soumission à la Superieure du lieu, la permission de leur venir faire le Caréchisme le soir quand ils seroient tous assemblés, ce qu'elle luy accorda fort volontiers sans le connoître autrement, parce qu'il n'auoit pas dit son nom, & mesme le céla l'espace de

fix mois. Avec ce pouuoir il entreprit cet employ , qu'il tenoit fort cher, parce qu'il y a tous les soirs de nouveaux passans, & vint catechiser & instruire ces pauvres gens, & il y venoit souuent tout seul & à pied, en Esté & en Hyuer, par la pluie & par la neige, sans flambeau encore qu'il fit fort noir; à la fin du Catechisme il les faisoit mettre à genoux avec luy pour faire l'Examen de leur conscience, en suite les Prieres, & apres il chantoit avec eux les Commandemens de Dieu, & puis leur donnoit l'aumône, ce qu'il a continué plusieurs années, iusques à ce que quelques bons Ecclesiastiques émus de son exemple ont pris ce soin, qui se continué avec grand fruit.

Monsieur de Renty auoit des charités & des tendresses accompagnées d'humilité pour ces pauvres qu'il n'auoit iamais veus, qui malaisément se pourroient dire, s'il en rencontroit quelqu'un à la porte de l'Hospital il le saluoit respectueusement & le faisoit passer le premier; il leur parloit avec grande reuerence & teste nuë, s'ils se mettoient à genoux deuant luy, il s'y mettoit deuant eux, & s'y tenoit iusques à ce que les pauvres se fussent leuez. Vn d'entre-eux l'ayant attentiuement considéré & reconu pour le Seigneur du lieu d'où il estoit, fut extremement touché de le voir dans cet employ & s'alla aussi-tost ietter à ses pieds, Monsieur de Renty luy fit le mesme, & furent long temps tous deux en cete posture, ne voulant point se releuer auant le pauvre; il leur témoignoit vne ouuerture de cœur & les embrassoit souuent avec grand amour.

Toutes ces actions en vne persone de cette naissance & produites avec vn esprit de Dieu si pur opererent de tres-grands effets; Premièrement en ces pauvres passans, qui étonnez d'vne si ardente charité, & d'vne humilité si profonde en estoient merueilleusement émus & attendris, on leur voioit couler des yeux les grosses larmes de deuotion & ils se iettoient à ses pieds avec beaucoup de repentance de leurs pechez & avec dessein de changer sa vie, dont ils luy demandoient & conseil & assistance, pour commencement dequoy plusieurs se confessoient & se communioient le len-

demain. Secondement, aux Religieuses qui ont soin de cet Hospital, lesquelles prirent feu à la flamme d'un exemple si illustre & si touchant pour se resoudre d'aller elles mesmes, & tous les iours, servir les pauvres, leur faire dire les Prieres & reciter les Commandemens de Dieu. Ce qu'elles n'avoient jamais fait, non plus que beaucoup d'autres choses qui regardoient leur propre perfection & le reglement interieur de leur maison, qu'il leur a inspirées & qu'elles pratiquent à present avec beaucoup de vertu, leur ayant mesme dit & plus d'une fois, qu'il eseroit qu'avec le temps Dieu y seroit grandement servi & glorifié. De sorte qu'on peut assurer qu'il a grandement contribué à tout le bien qui s'y fait tant au dedans comme au dehors, si que ie ne doute pas qu'il n'en recoive maintenant au Ciel vne grande recompense.

Voyons d'autres effets de son zele. Estant allé accompagné d'un de ses amis visiter le saint lieu de Montmartre, auquel il avoit grande deuotion, au sortir de l'Eglise sur le Midy, il se retira au lieu le plus écarté de la monagne, pres d'une petite Fontaine qu'on dit avoir servi autrefois à saint Denys, où il se mit en oraison à genoux & y passa quelque temps, puis il prit un morceau de pain & bût de l'eau de la Fontaine, qui fut tout son disner, & apres avoir rendu graces à Dieu, il se remit à genoux & ouvrit son nouveau Testament qu'il portoit toujours sur soy, & qu'il ne lisoit que teste nuë & avec des respects extraordinaires. Dans cette conioncture voila qu'un pauvre homme tenant son Chapelet en la main & le recitant arrive qui s'approche de luy; Monsieur de Renty se leue pour le saluer, & en suite luy parle de Dieu, mais avec tant de force, que ce bon homme frappant sa poitrine se jette par terre pour adorer Dieu, faisant paroître de si grands sentimens de l'impression qu'il avoit receuë, & produisant ses affections avec tant d'ardeur, qu'en se retirant il laissa Monsieur de Renty & son amy fort étonnés. Incontinent apres vint vne pauvre fille pour puiser de l'eau dans la Fontaine, à laquelle il demanda de quelle condition elle estoit, qui luy répondit qu'elle estoit seruante; mais sçavez.

vous bien, luy repliqua t'il, que vous estes Chrestienne, & pourquoy Dieu vous a creé? & puis l'instruisit & luy dit si à propos ce qui luy estoit necessaire, que cette fille apres luy auoir auoué son ignorance, luy declare ingenûment que iusques alors elle n'auoit point pensé à son salut, mais qu'elle alloit y penser à bon escient & en prendre vn grand soin, & luy promit de se confesser.

Mais voicy des actions d'vn zele fort soigneux. Retournant de Dijon au premier voyage qu'il y fit, deux personnes de condition & de pieté voulurent l'accompagner iusques à quelques quatre lieuës, pendant le chemin il s'arresta trois ou quatre fois pour catechiser de pauures passans, & vne fois il s'éloigna du chemin pour en faire autant à des Labou-reurs & leur apprendre le moien de sanctifier leur trauail.

Vne fille à Paris ayant esté tres-mal traitée & outragée avec des excés horribles par vn sien oncle, tomba dans vn tel desordre d'esprit & vn si grand desespoir, que toute furieuse elle s'en prenoit à nostre Seigneur, comme s'il eut esté la cause de son mal-heur & l'ût abandonnée à la rage de son oncle sans la secourir; dans cette haine de nostre Seigneur & avec cette conscience criminelle elle communioit plusieurs fois le iour, & en diuerfes Eglises, pour n'estre pas reconnuë, à dessein d'offencer nostre Seigneur, de luy faire du dépit, de l'irriter & d'attirer sa cholere sur elle, afin qu'il acheuât de la perdre, comme il auoit commencé, la laissant tomber dans l'abyfme des miseres où elle se voyoit, & la precipitant dans les Enfers pour iamais. Monsieur de Renty en fut auerti, qui considerant & l'offence de nostre Seigneur & le mal de certe pauure creature, transporté de son zele ne perd point de temps, mais se met aussi tost à la chercher, & la cherche si bien, qu'apres huit iours de recherches & de poursuites en diuerfes Eglises, il la trouue qui communioit, il prend des témoins & la fait mettre dans les petites maisons, où il a eu soin d'elle & pour l'ame & pour le corps, en sorte qu'elle s'est reconnuë & tres-bien conuertie avec de grandes marques de repentance de ses crimes.

Mais son zele ne s'appliquoit pas seulement à ceux qui estoient

estoyent près de luy, il se portoit encore aux absens, & bien éloignez, avec qui de plus il n'auoit autre liaison, que celle qui luy donnoit l'alliance en IESVS-CHRIST & sa charité. Ainsi en ce bruit qui courut il y a quelques années, que le grand Turc auoit resolu de faire la guerre aux Cheualiers de S. Iean de Hierusalem, appelez maintenant les Cheualiers de Malthe, & alloit fondre avec sa puissante armée sur leur Isle, s'interessant en leur danger il en écriuit par deux fois à la bonne sœur Marguerite du S. Sacrement Carmelite de Beaulne pour les recommander à ses prières, qu'il croyoit auoir beaucoup de pouuoir aupres de Dieu. Voicy ce qu'il luy manda en la premiere lettre. Je vous recommande & à la sainte famille l'Ordre des Cheualiers de S. Iean de Hierusalem; car l'Ordre est en grand besoin presentement & toute là Chrestienté, & iene sçay ce que les ennemis de la Foy, qui sont bien puissans, veulent faire. Le petit IESVS, qui est tout amour & force, sçaura bien en tirer sa gloire, vous luy recommanderez s'il vous plaist. En la seconde il luy dit: Je supplie la puissance du saint Enfant IESVS de proteger les siens dans les croix & de les purifier en leur faisant faire son œuvre, c'est-ce que ie demande pour nos Freres de l'Ordre de S. Iean de Hierusalem,

SECTION SEPTIEME.

Quelques autres qualitez de son Zele.

COMME il y a dans le dessein de procurer le salut du prochain beaucoup de choses à faire & beaucoup à souffrir, il faut necessairement que le zele de celuy, qui s'y emploie, soit & courageux & patient. Celuy de Monsieur de Renty a eu ces deux qualitez par excellence: car premiere-ment il estoit plein de courage, resolu & laborieux, faisant des affaires comme s'il eut eu trois corps, & plus en vne demie-heure que d'autres n'en eussent fait en plusieurs iours, parce qu'il estoit fort pour prendre toutes les fatigues neces-

faïres, & de plus il estoit expeditif & decifif.

Vne Dame de grande qualité l'ayant constitué executeur de son testament par lequel elle faisoit plusieurs legs pieux, on luy donna auis que les parens, perſones puiſſantes, n'en estoient pas trop contens, Mais il répondit avec vne generoſité vraiment chreſtienne; Je n'ay ni porté ni ſollicité
 « cette Dame de faire aucun leg pieux, mais puis qu'elle a eu
 « cette deuotion, ie n'y épargneray point mes peines, j'auray
 « ſoin que ſon testament ſoit executé, & ſi de plus ie ne crains
 « rien; s'il faut ſolliciter les Iuges, ie les ſolliciteray, afin que
 « les pauures & ceux; au profit deſquels elle a legué, ſoient
 « ſecourus, & elle meſme dans ſon état de ſouffrance, ſi elle y
 « eſt encore detenuë.

Son zele estoit entreprenant & hardy ſans rien redouter, où il s'agiſſoit de la gloire de Dieu & du ſalut du prochain. Rencontrant vn iour des hommes qui ſe querelloient & en estoient venus aux épées & ſe battoient à s'entretuër, il ſe ietta au milieu d'eux & faiſit les plus transportez, qui d'abord ſe mirent en état de le mal-traiter, mais voians ſa reſolution à les ſeparer & à faire & à ſouffrir tout plûtôt que de les voir ſe couper la gorge, ils s'appaierent & écouterent ce qu'il leur dit, & les accommoda ſur la place.

Aiant trouué vn homme, que les heretiques auoient ſuborné & gagné pour aller à Charenton, & qui y estoit ſi déterminé, qu'il vouloit meſme y mener ſa femme par force quelque reſiſtance qu'elle y fit, il luy parla pour le deſabuſer & pour empêcher la violence dont il vſoit enuers ſa femme, qui entra en indignation contre luy ne voulant point l'écouter, & luy dit de groſſes iniures: Mais ce S. homme, apres luy auoir laiſſé ietter ſon feu & décharger ſa cholere, le ramena avec ſa douceur ordinaire à vn état plus tranquille, luy fit connoître ſon aucueglement, & l'erreur, où il ſe precipitoit; & en pluſieurs fois qu'il le viſita le rétablit & l'aſſermit entierement dans la Religion Catholique, & apres fut trouuer l'heretique qui l'auoit ſeduit, & le menaça de la Juſtice, s'il continuoit ſes menées à l'égard de pluſieurs autres, qu'il auoit taſché de peruertir. Ainſi avec ſon zele,

courageux il rompit tous les mauuais desseins de cet heretique, & assûra cette famille qui s'alloit perdre.

En second lieu son zele estoit accompagné d'une grande patience; qui aussi est tres-necessaire à qui veut se rendre capable d'agir vtilement avec les hommes & de les aider pour leur salut; parce qu'il faut pour leur gagner le cœur, qui est la premiere chose qu'il doit aquerir afin d'auoir entrée & creance dans leurs esprits, qu'il s'accommode & s'ajuste à leurs inclinations & à leurs humeurs, qui encore souuent sont difficiles, fâcheuses & choquantes, & ainsi qu'il ne suiue pas les siennes, qu'il domte ses passions, qu'il renonce à ses volontez, qu'il entre d'une certaine façon dans leurs dispositions & se change & se metamorphose en eux, comme S. Paul dit de soy; de plus il doit souuent patienter beaucoup & long-temps pour ce qui est de leur conuersion & de leur auancement en la vertu, & attendre sans s'abatre & se décourager, quoy qu'ils voye qu'avec tous ses traueux ils gagne peu, les temps & les momens qu'ils soient touchez & qu'ils profitent: ce qui ne peut estre sans se faire beaucoup de force, sans beaucoup souffrir & se mortifier grandement. D'où vient que c'est à luy proprement que nostre Seigneur adresse ces paroles: si le grain de froment tombant en terre ne meurt, il demeure seul sans rien produire, mais s'il vient à mourir, il porte beaucoup de fruit.

Il faut donc pour fructifier beaucoup parmy les hommes, mourir à soy-mesme & auoir vn zele tres-patient, comme estoit sans doute celuy de Monsieur de Renty, qui supportoit avec vne patience & vne douceur admirable tous les traueux de l'esprit & du corps attachez à ces emplois de charité, qui enduroit sans se fâcher, & mesme sans s'émouoir, les importunitéz, les plaintes, les choleres, les rebuts, les mépris, & les iniures des pauures gens, qui souuent les accompagnent. Il fut vn iour voir vn homme, qui par ialousie & par mauuais soupçon qu'il auoit conçu contre sa femme, l'auoit cruellement traitée iusques à luy donner vn coup de couteau, qui le reçût tres-mal comme il luy remontroit sa faute, & leua mesme la main pour le fraper vomissant quan-

rité d'injures contre luy, & le voulant faire sortir avec violence. Monsieur de Renty souffrit tout cela sans dire mot, & apres'approche & l'embrasse, & luy parle avec des termes si adoucis & si touchans, qu'il l'appaisa & le disposa en plusieurs fois qu'il le veit, pour se confesser: ce qu'il n'auoit fait depuis douze ans, le remit bien avec sa femme, & depuis il a vescu & il est mort en bon Chrestien.

Visitant vne autrefois vn pauvre vieillard malade il voulut l'entretenir à son ordinaire des choses de son salut, mais cet homme, que la maladie avec la vieillesse & la pauvreté rendoit chagrin, au lieu de l'écouter se mit en cholere contre luy, & dit qu'il en sçauoit plus que luy, & que s'il vouloit l'entendre il l'instrueroit luy mesme. Monsieur de Renty répond que tres-volontiers, & en effet il l'entendit parler, & comme il auoit eu de la patience à l'entendre, il vfa apres de sagesse pour se seruir de ses mesmes paroles, quoy que fort impertinentes & remplies d'ignorance, pour le conuaincre, pour l'instruire & le porter au bien; ce qui reüssit si heureusement que cet homme se resolut de se confesser, & le reste de ses iours a toujourns eu grand soin de son salut.

Il faut rapporter à cecy la conduite qu'il tenoit dans les fautes du prochain, où il exerçoit & la patience & la force; la patience pour les souffrir; la force pour les corriger.

Quelque personne Ecclesiastique & zelée, luy demandant par lettres auis & secours pour retrancher certains pechez infames qui se commettoient & qui demeuroient impunis, il luy répondit qu'il falloit auoir recours à Dieu & vser de la priere pour obtenir de sa bonté à cés pecheurs la lumiere & la force de se corriger, & puis il adioûte: Il est
 « tres-difficile d'empêcher ces maux; nostre Seigneur n'a pas
 « osté tout le mal de dessus la terre comme il y viuoit, nous se-
 « rons aussi contrains d'y en laisser beaucoup, & Dieu le per-
 « met quelquefois autant pour exercer & purifier les bons,
 « comme pour punir les méchans.

La mesme persone l'auertissant de deux choses; la premiere, de quelques défauts qui luy sembloient de consequence en vn Prestre qui se méloit d'aider les ames; & l'au-

re, de ce qu'un Chanoine auoit donné vn soufflet à vn Prestre Missionaire qui l'auoit iustement repris. Il luy récriuit cecy: Je vous remercie tres-humblement de la peine que vous prenez pour m'informer de ce qui s'est passé d'important touchant les Missionaires. Vous estes tous seruiteurs de Dieu, qui sçauz reuerer les graces les vns des autres, & qui connoissez que S. Pierre, quoy qu'Apostre & plein de graces, s'est trouué reprehensible, comme nous apprend S. Paul. Il faut excuser les defauts de son prochain & mettre tout sous le pied: l'œuure de Dieu, qui s'opere dans les cœurs, prend son témoignage de l'aneantissement veritable, que l'on connoit par la patience & par la charité des Saints, laquelle paroît aux effets exterieurs; demandez en l'accroissement pour ceux qui en ont besoin. C'est vn grand scandale de voir vn Prestre battre vn Prestre; mais les Prestres ont fait mourir IESVS-CHRIST, & il y en a beaucoup encore aujourd'huy qui tiennent plus de la Loy ancienne que de la nouuelle, qui n'est qu'alliance & vnion de charité en IESVS-CHRIST.

Ainsi il auoit patience pour souffrir les fautes du prochain, il les amoindrissoit avec quelque parole d'adoucisement, il les excusoit, & sa charité les luy faisoit courir autant qu'il luy estoit possible. Quelqu'un luy ayant dit qu'il auoit fait vne fourbe contre luy, en chose toutefois petite qui concernoit son procez de Dijon, il cacha adrétement ce defaut & par vn détour d'humilité, il dit: ha! c'est moy qui suis vn faiseur de fourbes, c'est moy qui fais des fourbes à mon Dieu; puis changea de discours. Il regardoit en cecy l'exemple de Dieu & de son Fils nostre Seigneur, qui haïssant infiniment le peché, & nostre Seigneur estant mesme mort pour le détruire, en souffrent toutefois vne multitude innombrable & de tres-enormes avec tant de patience & tant de dissimulation.

Mais si Monsieur de Renty auoit de la patience pour les fautes, c'estoit neanmoins toujours dans le dessein de les corriger autant qu'il pouuoit; à quoy il s'emploioit avec force & avec grande prudence.

Quand il vouloit reprendre quelqu'un, il s'acusoit ordi-

nairement le premier pour disposer son esprit par cette humilité & par cette ressemblance de foiblesse à tomber, à bien recevoir ce qu'il auoit à luy dire : ou bien apres il le prioit qu'il luy rendit la pareille ; ce qu'il faisoit avec tant de grace, qu'il y en a à qui cela fait encore du bien, & qui en conseruent vn perpetuel souuenir. Vne fois ayant dessein d'a-uertir quelqu'un, il se mit à discourir de l'vnion des esprits & de l'ouuerture des cœurs, qu'il falloit auoir les vns enuers les autres pour se dire leurs veritez ; qu'à moins de cela on ne les connoissoit pas, & qu'ainsi on blanchissoit dans ses vices & on les portoit au tombeau ; que pour ce sujet on l'obligeoit extremement de luy faire cette charité. L'autre sentant son esprit s'ouurer par ces paroles, le supplie de luy dire s'il voioit quelque chose en luy qu'il dût sçauoir, ce qu'il fit.

Il parloit à vn pecheur fermement & avec des paroles capables de le terrasser, où il le voyoit necessaire ; & sçauoit bien distinguer quand il falloit souffrir, & quand il falloit resister. Il dit vn iour à vn de ses amis luy parlant d'un certain homme, gardez vous bien de vous humilier deuant cet homme là, l'abaissement luy nuiroit & à la cause de Dieu, parlez luy fortement. Il mettoit vne grande difference entre la patience que doit auoir vn Chrestien pour son particulier, & la force dont il doit vser pour les affaires de Dieu & le bien du prochain, & pour soutenir dignement son autorité.

SECTION HVITIEME.

Deux autres qualitez de son zele.

CES deux qualitez sont la Franchise & la Prudence. Il est vray que son humilité, comme nous l'auons déja remarqué autre-part, nous a dérobé la connoissance de beaucoup de choses tres-vtiles qu'il a executées, & luy a fait cacher quantité de ses sentimens interieurs & de ses actions exterieures. Son zele pourtant luy en a arraché plusieurs &

les luy a fait declarer avec vne charité sincere & vne sainte simplicité, où il a vû qu'il estoit necessaire pour la gloire de Dieu & le salut du prochain, comme le témoignent les memoires que nous auons.

Dans cette necessité & dans cet esprit il parloit parfois directement de foy, par fois en troisiéme persone, comme Saint Paul de ses reuelations, & voicy les belles & bonnes choses qu'il écrit à ce propos l'an mil six cens quarante à vne Dame de vertu. Vous me permettez, Madame, de vous declarer vne pensée que j'ay sur la liberté que nous deuõs auoir de communiquer librement les dons, que Dieu nous fait, aux personnes à qui cela peut apporter quelque fruit, sans tenir, ce qui vient d'en haut, étouffé en nous mesmes, parce qu'autrement ce seroit étouffer le second effet que Dieu demande de ses graces, qui est qu'apres nous auoir fait du bien, elles en fassent encore aux autres, voulant que nous les communiquions charitablement & discrettement pour les rendre profitables au prochain, & qu'elles soient comme vne semence iettée dans vne bonne terre, qui produit beaucoup de fruits.

Je voudrois que nous nous considerassions dans le monde comme vn crystal, lequel posé au milieu de cet Vniuers donneroient passage à toutes les lumieres qui luy viendroient d'en haut, & que par le bon exemple, par l'estime de la vertu, le blâme du vice, les consolations, les conuersations & les autres actions de pieré, nous fissions part des talens, que nous receuons du Ciel, à toutes les creatures sans affectation, sans deguisement & sans aucune chose de propre, mais leur donnant obeissance & passage, tout ainsi que le crystal fait à la lumiere. Dauantage que tous les honneurs & toutes les loüanges, que nous receuons d'en bas, passassent de nous à Dieu sans les arrester en nous mesmes, comme le crystal donneroient passage aux lumieres de plusieurs flambeaux qui seroient sous luy, pour en les purifiant les enuoyer plus brillantes vers le Ciel. Car c'est ainsi que nous deuons rendre à Dieu les honneurs & les loüanges qu'on nous donne, qui seul merite honneur & loüange, & qui a mis en nous ce dequoy on

“ nous louë , non afin que la loüange demeure en nous , mais
 “ afin que de nous elle passe à luy , & qu’il soit louë & beny.
 “ De plus il faut remarquer que si on n’oppose rien au crystal
 “ pour recevoir la lumiere qui passe par luy , elle ne paroît
 “ point : le Soleil a beau éclater d’un costé & les flambeaux
 “ de l’autre , ne mettez rien qui puisse faire reiallir cet éclat,
 “ il ne fera que dans le crystal; de mesme nous pouons bien re-
 “ cevoir la lumiere celeste & vne abondance de graces, mais si
 “ nous ne nous approchons de Dieu & du prochain pour don-
 “ ner à l’un ce qui est de droit, & à l’autre ce qui est de charité,
 “ il est vray que nous aurons la lumiere, mais seulement en
 “ nous mesmes & comme cachée sous le boisseau, où aiant des
 “ bornes trop étroites elle ne pourra produire son effet, qui est
 “ de se communiquer, & se trouuera peut estre en danger avec
 “ le temps d’estre étouffée & éteinte.
 “ Considérez encore que quand le Soleil éclaire un beau
 “ crystal, il n’y a point de corps qui fasse si bien voir sa lumie-
 “ re ny qui donne tant d’éclat à ses rayons que luy: de plus
 “ qu’entre le Soleil & luy on ne voit aucune lumiere; mais
 “ lors que le Soleil l’a penetré, c’est un éclat si net & si vif;
 “ qu’il éblouit & qui mesme brûle selon la figure, dont il est
 “ disposé: pour nous apprendre que ce qui se passe entre Dieu
 “ & nous, est oufrage de cabinet; qui ne doit point paroître
 “ qu’après auoir passé par nous. Ainsi laissons nous penetrer
 “ aux graces de Dieu, pour après de l’éclat, qui en sorte;
 “ éclairer, échauffer & brûler tout ce qui se rencontrera dans
 “ nostre portée. Imitons ce beau crystal, qui est de matiere
 “ solide & qui donne seulement penetration à la lumiere;
 “ soions comme luy impenetrables à tout, sinon à ce qui vient
 “ de Dieu & à ce qui retourne à Dieu; & éuitons, ce qui n’est
 “ que trop ordinaire, de nous laisser aller à nos sens & de con-
 “ uoiter dereglement les choses de la terre, qui est comme si
 “ nous iettions de la bouë sur ce crystal; lequel, quoy que beau
 “ de luy mesme, neanmoins à cause de la saleté qui l’environ-
 “ ne, n’est plus capable de lumiere, & la lumiere ne l’éclaire
 “ plus autrement que la bouë mesme, tellement que pour le
 “ remettre en sa capacité de penetration & en sa premiere
 splendeur,

splendeur, il le faut bien lauer ; ce que nous devons faire à ,,
nos ames souillées, les lauuant souuent avec les belles eaux de ,,
la penitence. ,,

Ainsi offrons-nous à nostre Seigneur, afin que nous ne ,,
manquions pas dans l'usage des graces, qu'il nous donne, ny ,,
pour nous ny pour les autres, & que nous n'enseuelissions ,,
point ses talens. Enfin imitons ce crystal qui se laisse seule- ,,
ment penetrer à la lumiere, & puis la distribuë. Leuons le ,,
masque deuant tous les hommes, leur disant hautement par ,,
la bouche de nos actions, comme l'Epouse dans le Canti- ,,
que, Mon bien-aimé est à moy, & moy ie suis à luy, & par ,,
nos exemples & nos soins augmentons le nombre des ames ,,
aimantes leur ouurant & facilitant la voye d'amour. O beni ,,
soit le Dieu d'amour, en qui ie suis, &c. ,,

Cette lettre nous fait voir que quelque dessein qu'eût son
humilité de cacher ses bons sentimens & les graces qu'il re-
ceuoit, son zele toutefois les luy faisoit mettre au iour, où il
iugeoit qu'il y alloit de la gloire de Dieu & du bien du pro-
chain : mais pourrant c'estoit toujourns avec grande pruden-
ce, car son zele pour estre franc, n'estoit pas inconsideré
pour dire les choses à la moindre apparence de bien, il estoit
tres-circonspect pesant toutes les circonstances du temps, du
lieu, des personnes, & de la necessité : c'est pourquoy il don-
ne dans la mesme lettre ce sage auis à cette Dame touchant
l'ordre & la mesure qu'il est necessaire de garder dans cette
communication. Il faut auoir le cœur ouuert aux vns & leur
donner l'exquis, aux autres le temperé venant de loin & ,,
barrant à froid, & se tenir serré pour les autres & leur cacher ,,
son secret, ne voyant point de disposition en eux d'en faire ,,
bon usage. ,,

Vne des qualitez plus necessaires au zele, afin de le rendre
utile & l'empêcher de faire beaucoup de fautes, est qu'il soit
assaisonné de la sagesse & accompagné de prudence pour
bien considerer les choses, & pour les executer en leur meil-
leure maniere, pour preuoir les maux & aller au deuant,
pour les guerir s'ils sont arriuez, & y apporter des remedes
efficaces, mais qui soient aussi les plus doux & les moins dou-

loureux qui se pourront, & s'il y en a d'incurables, ou de qui la cure soit pire que le mal mesme, pour les souffrir & les dissimuler, se souvenant que tout ainsi que nous voyons des défauts dans les corps qui ne peuvent estre gueris, comme d'estre borgne, bossu, boiteux, les ames de mesme ont parfois de certains manquemens qui sont comme incorrigibles, & que Dieu permet souuent pour sauuer & perfectionner par cette humiliation ceux qui en sont atteints, & ceux qui traitent avec eux, par leur patience & par leur charité.

Comme Monsieur de Renty estoit par grace & mesme par nature fort prudent & fort aisé, son zele auoit toutes ces perfections & se conduisoit en tout avec ces lumieres. Quelqu'un luy ayant écrit pour le porter à obtenir des lettres d'abolition d'un homicide commis par un ieune homme, sur ce que sa mere promettoit, moyenant cette grace, huit mille liures pour employer en œuvres de piété & en aumônes. Dans la premiere réponse qu'il fit il demanda si le criminel estoit vraiment repentant de sa faute, mais voicy ce qu'il récriuit en la seconde. Je n'ay pas crû deuoir penser à obtenir ces lettres, parce qu'il sembleroit que sous ombre d'argent on chercheroit l'impunité, & on souilleroit ses mains du prix du sang épanché. En un mot encore que d'autres l'entreprennent sans hesiter, & que ie voye des aumônes considerables qui en reuiendroient, neanmoins ie ne peux m'y appliquer. La Prouidence diuine n'oubliera iamais ses saints pauures.

Vn des grands traits de prudence en un homme zelé, est de ne point abbatre son corps de trauaux excessifs, ny surcharger son esprit d'affaires, qui par leur multitude ou par leur pesanteur étouffent la deuotion, & pour auoir soin du salut d'autrui ne pas negliger le sien, mais aiuster tout à ses forces, & apporter un iuste temperament à l'un & à l'autre. Monsieur de Renty écriuit à un Ecclesiastique pour le premier au sujet de quelque incommodité qu'il eut apres auoir trop trauaillé en mission: Permettez que ie vous die tout simplement qu'une de mes plus grandes appréhensions à vostre égard est, que vous n'entrepreniez trop sur vous mes-

mes, & que n'estant point assez retenu vous vous rendiez ,
inutile. L'ennemi trouue quelquefois , & pour l'ordinaire ,
ses auantages de cette sorte dans les sujets les mieux dispo-
sez; vous n'estes plus à vous, mais vn homme à tout le mon-
de, & qui est redevable avec S. Paul à tous les hommes.
Conseruez-vous donc, non en vous conseruant, mais en
ne vous accablant pas de trauaux & de fatigues. L'on me
mande combien Dieu vous benit; souffrez que pour l'inte-
rest que i'y prens, ie vous aye dit cecy en tout respect & hu-
milité.

Pour le second qui touche son propre salut, il y prenoit
garde de tres-prés, & à cette cause, quelque affaire qu'il eut
peur le prochain, il preferoit toujourns, selon la regle de la
charité bien ordonnée, ce qu'il deuoit à foy-mesme; il s'a-
quitoit inuiolablement de ses exercices de deuotion, il
emploioit beaucoup de temps, & de iour & de nuit, à con-
uerfer avec Dieu & à le prier; & mesme lors que pendant le
iour il alloit & venoit par les ruës, il entroit souuent dans les
Eglises & demouroit les heures entieres, & autant que ses
occupations le luy pouuoient permettre, en oraison deuant
le S. Sacrement. Ioint qu'il estoit, principalement sur ses der-
nieres années qu'il auoit plus d'employ, appliqué continuel-
lement à Dieu, & ny les affaires, ny les objets exterieurs ne
l'en diuertissoient plus. Sur quoy vne persone confidente luy
ayant demandé, si dans vne telle multitude d'occupations il
faisoit toujourns réglément ses deux heures d'oraison, il luy
répondit, quand ie peux i'en fais trois, i'en fais quatre &
cinq, mais lors qu'il se presente quelque occasion de seruir le
prochain, ie la quitte facilement, car Dieu par sa misericor-
de me fait la grace d'estre à luy, & de n'en estre point sépa-
ré, quoy que ie fasse.

SECTION NEUVIEME.

Les succès que Dieu donnoit à son zele.

DIEU avoit mis vne vertu si puissante en ce sien Seruiteur pour aider le prochain, que non seulement ses œuures & ses paroles, mais encore sa seule presence faisoit impression de salut; & quelque persone, qui le connoissoit tres-bien, a dit avec raison, qu'il l'auoit doué de la grace Apostolique, parce que comme les Apostres auoient grace pour porter le flambeau de la Foy & le feu de la Charité, & établir le royaume de Dieu en tous les païs & tous les lieux, où la diuine Majesté les enuoioit: luy de mesme, en sa maniere, mais maniere qui passoit bien au delà des bornes de sa condition, estoit rempli d'une grace & reuestu d'une force diuine, pour dans les villes, dans les bourgs, dans les villages & dans les maisons particulieres, seculieres & mesme religieuses, où la diuine prouidence là conduit, éclairer les hommes de la connoissance de Dieu & de celle de son Fils nostre Seigneur, les échauffer de leur amour & les faire viure selon leur loy: en quoy il luy donnoit vn grand succès & vne benediction toute particuliere, comme nous allons voir.

Estant à Paris vn iour de Carefme-prenant dans la maison d'un pauvre pour exercer enuers luy ses actions ordinaires de charité, il entendit vn grand bruit de gens qui chantoient & dansoient dans le logis voisin, laissant son pauvre il s'y en va & regarde ces gens, qui furent si surpris & si étonnés de sa seule presence, qu'ils quitterent aussi tost & leurs chansons & leur danse, & Monsieur de Renty leur parla en suite avec tant de ferueur contre les desordres & les dissolutions qui se commettoient spécialement ces iours là, qu'il les fit tous pleurer, & plusieurs en furent si touchés qu'ils se confesserent dès le lendemain.

Comme il alloit vne autrefois visiter vne pauvre fille, qu'un ieune homme auoit débauchée & laissée grosse dans

vne extreme necessité, il la trouua plongée dans vne si profonde melancholie qu'elle estoit en resolution de se mal-faire; il luy parla, & parla grace & la force que Dieu mit en ses paroles, il releua son esprit abbatu & le remit en telle affiete, qu'il la fit confesser; & puis alla trouuer ce ieune homme, qui d'abord fit le mauuais & méprisa ce qu'il luy dit, mais apres plusieurs remontrances de la perte de son ame, & plusieurs menaces de la iustice de Dieu, il l'émût si fort qu'il le fit venir aux larmes, & à s'offrir à faire tout ce qu'il luy diroit, de sorte que par ses bons auis il se mit en tous les deuoirs d'un homme vraiment repentant, & épousa la fille, & ont tous deux du depuis vécu bien ensemble.

Lors qu'il fut à Amiens il s'y trouua vne pauvre femme ruinée pour auoir esté surprise dans le commerce defendu de vendre du sel, dont elle tomba en vn tel excés de tristesse & d'ennuy qu'elle estoit au desespoir, & avec vne telle haine contre ceux qui l'auoient reduite à cette misere, que, quoy qu'on luy dit, il n'y auoit aucun moien de la disposer à leur pardonner, ny en suite à receuoir les Sacremens, encore qu'elle fut fort malade. On luy méne Monsieur de Renty accompagné de trois autres persones, lequel luy parla assez long-temps, mais sans rien gagner sur son esprit; de sorte que voyant que toutes ses paroles estoient sans effet il semit à genoux au milieu de la chambre, & inuita ceux qui estoient avec luy, à faire le mesme, & apres auoir prié quelque peu de temps il s'adressa à cette femme & luy dit: Ne voulez vous pas bien vous ioindre avec nous pour demander misericorde à Dieu? A quoy elle se laissant aller, il luy fit repeter mot à mot certains actes, par lesquelles elle se trouua tellement changée, qu'elle parût toute autre, protestant deuant tous qu'elle leur pardonnoit de bon cœur, & receuant avec calme d'esprit toutes les instructions qu'il luy donna, d'où en suite elle se prepara à la digne participation des Sacremens.

Comme il estoit vn iour à l'Hostel Dieu de Paris instruisant les malades pour les disposer à faire des Confessions generales, vne Religieuse le vint prier de vouloir parler à vn homme que l'on venoit de leur amener, qui auoit reçu & sans

sujet, vn coup d'épée au trauers du corps, dont il estoit tellement outré contre celuy qui le luy auoit donné, qu'il ne pouuoit souffrir qu'on luy parlât de luy pardonner: mais aussi tost que Monsieur de Renty luy eut remontré ce qu'un Chrestien est obligé de faire en ces occasions, & luy eut dit ce qui pouuoit adoucir son esprit, ils s'appaîsa & dit qu'il luy pardonnoit de bon cœur, adioûtant qu'il estoit tout prêt de le voir & de l'embrasser, & faisant paroître beaucoup de bons sentimens de Dieu.

Quelques Abbés & quelques Ecclesiastiques de condition & de vertu faisans vne Mission à Pontoise, Monsieur de Renty, qui auoit des liaisons fort particulieres avec la plupart fut les visiter, & allant selon sa coûtume, & sans en rien dire à persone, à la prison; il y rencontra vn prisonnier, pecheur obstiné & de long-temps, qui n'auoit point voulu ny par prieres, ny par menaces, ny par douceur, ny par rigueur, ny par aucun autre moien que ces Messieurs eussent employé, se disposer à la Confession; & comme ils enuoierent chercher Monsieur de Renty pour venir dîner, on s'auisa, apres l'auoir cherché inutilement en diuers lieux, d'aller à la prison où on le trouua assis à table avec les prisonniers, à qui il donnoit à dîner, les entretenant amiablement, les consolant, & les excitant à bien viure, & particulièrement celuy cy, pour qui il auoit plus de dessein, & à qui il parla avec tant de force, & scût si bien, si adroitement, où plutôt si diuinement le gouverner & le manier, qu'il le rangea à son deuoir & luy fit prendre la resolution de changer effectiuement de vie & de faire vne bonne cōfession de tous ses pechez; ce qui obligea l'un de ces Messieurs de dire à quelque persone, que Monsieur de Renty auoit fait en trois iours, ce que d'autres eussent eu bien de la peine de faire en trois ans.

Il laisse beaucoup d'autres effets semblables pour finir par celuy cy, que j'estime fort remarquable. Il fut prié de visiter vne persone de pieté qui souffroit des peines interieures & exterieures horribles, & auoit grand besoin de lumiere & de force, laquelle reçût tant de secours de ce qu'il luy dit, qu'elle escriuit quelques iours apres cecy. L'ope-

ration que j'ay ressentie de l'entretien que j'ay eu avec ce seruiteur de Dieu a esté telle, que dés aussi-tost que ie commençay de me surmonter pour luy parler & de m'ouvrir, nostre Seigneur se communiqua à moy si puissamment, que j'estois toute penetrée des effects de sa presence. Je ressentis vne assistance tres-particuliere de la sainte Vierge, que ce saint homme auoit eu inspiration d'inuoyer dés le commencement de nostre conuersation, & ie puis assûrer avec verité que dés l'instant ie reçûs vn grand aide dans mes besoins, de sorte que toutes ses paroles faisoient impression sur mon esprit & operoient grand effect, qui m'a toujours depuis continué & me continuë encore à present, que j'écris cecy. Et bien que mes peines ne soient pas changées, ie le suis neantmoins tellement dans ma disposition qu'il me semble n'estre plus moy mesme, & que tout ce qu'il y a en moy ne respire plus que l'execution de la volonté de Dieu & l'accomplissement de ses desseins à quelque prix que ce soit, & quoy qu'il en coûte à la nature, à laquelle il faut apprendre à ceder à la grace, à luy seruir & non pas a luy resister. Mes peines ne sont pas changées, il faut pourtant que j'auouë que ie ne souffre plus rien depuis que ie suis contente de souffrir: il est vray que le foible souffre, que le sensible souffre & que tout ce qu'il y a d'inférieur souffre, mais la partie superieure ne peut, & n'est pas mesme, ce semble, capable de souffrir, à cause de la conformité qu'elle a au vouloir de Dieu: mon seul desir est dans ce contentement que j'ay de souffrir, de faire bon vsage de mes souffrances, de trauailler à la vertu solide, & m'abandonner absolument à la disposition de Dieu.

Voila la benediction avec laquelle Monsieur de Renty s'emploioit pour le prochain; & cette benediction & cette grace de faire impression sur les cœurs pour les porter à Dieu, l'accompagnoit comme par tout; dont il ne faut pas autrement s'étonner, parce que c'étoit vn instrument conioint & vny au Seigneur des cœurs & au Sauueur des ames, qui cherchoit tres-purement la gloire de Dieu & le salut du prochain, & ne s'épargnoit en rien de tout ce qui y estoit necessaire. Il auoit pour cela coûtume deuât que de traiter avec

quelqu'un de se donner à nostre Seigneur (c'estoient sermes) pour parler en son esprit & en sa puissance; & ce Seigneur qui desire infiniment le salut des hommes, le trouuant ainsi bien disposé & si bien auenant à sa main, s'en seruoit pour faire de grandes choses & luy fournissoit de puissantes graces pour operer des merueilles : qui doiuent & instruire & confondre ceux, lesquels par leur profession & par leur office sont appellés à procurer le salut des hommes, & qui neanmoins par leur faute y profitent si peu.

Il trouue de plus que nostre Seigneur luy donnoit par fois des connoissances & des présentimens des affaires qu'il luy vouloit mettre entre les mains, pour le preparer par ce moien à les entreprendre sans crainte & à s'en bien aquiter. Estant en son Chasteau de Citry sur la fin de l'an mil six cens quarante deux, il luy fit voir qu'à son retour à Paris on luy donneroient vn nouuel employ pour les pauures, & qu'il y auoit bien à trauailler pour luy, ce qui ne manqua point, parce que deux iours apres son retour on vint luy donner auis qu'il y auoit vn fond pour assister les pauures honteux de cette grande Ville, & le prier d'en vouloir prendre le soin, ce qu'il fit; & il se chargea pour sa part de visiter la quatrieme partie de ces pauures, & de leur distribuer des aumônes selon leurs besoins; qui estoit vn trauail pour l'occuper tout entier, quand il n'en eut point eu d'autre, dont pourtant il auoit vn tres-grand nombre; de sorte qu'on peut dire, qu'humainement parlant & sans vn secours tres-particulier de Dieu, il n'ût pû faire ce qu'il faisoit, ny suffire à tant de choses: mais Dieu, qui nous a donné les forces du corps & de l'esprit dans les bornes que nous les auons, les peut aisement étendre quand il luy plaist.

Il dit vn iour avec beaucoup d'humilité & de deuotion à vne persone fort confidente. J'ay esté cette nuit tout baigné de larmes pour la veüe que nostre Seigneur m'a donnée. Puis ayant demeuré quelque temps sans rien dire tout pénétré & transporté de la grace qu'il auoit receüe, il adiousta, que faisant son oraison il auoit connu qu'il auoit vn grand employ pour la nouvelle France, que l'on sçait luy estre arriué,

princi-

principalement en la fondation de l'Eglise dans l'Isle de Montreal, à laquelle se ioignant à d'autres personnes de piété, que Dieu auoit encore choisies pour ce noble dessein, il a par ses soins, par ses conseils, par son credit, par ses liberalitez & par celles qu'on luy a élargies, extrêmement seruy.

Quelquefois sa lumiere n'alloit pas si auant, mais il auoit seulement connoissance & mouuement de faire quelque chose sans decourir rien dauantage: comme quand il fut viuement pressé d'aller à Pontoise, encore qu'il ne sçût pourquoy, & qu'il eut beaucoup d'affaires à Paris, qui l'y deuoient arrester; obeissant neanmoins en aueugle à l'inspiration, il s'y en va en diligence, & trouue là vn Seigneur de grande qualité, & d'vne prouince bien éloignée, qui s'y étoit rendu & que nostre Seigneur y auoit amené, pour demander à Monsieur de Renty & apprendre de sa bouche la façon de se sauuer & de seruir Dieu parfaitement, qu'il n'auoit guere bien sceüe, & encore moins bien pratiquée iusques alors. Monsieur de Renty la luy apprit & dit estant de retour à Paris, qu'il ne sçauoit comme ce Seigneur estoit apres disparu.

SECTION DIXIEME.

Sa grace pour aider en particulier quelques ames choisies.

EN C O R E que ce digne seruiteur de Dieu ait eu grande grace pour aider en sa maniere tous les hommes vniuersellement, il l'a eu encore plus abondante pour quelques-vns en particulier, & nostre Seigneur l'a appliqué à de certaines ames d'élite, pour les tirer de leurs defauts, & les faire marcher à grands pas dans le chemin de la vertu, & mesme dans le sentier étroit de la perfection; dont il y en a plusieurs qui viuent encore entre nous, de qui pour ce suiet ie ne puis rien dire, & d'autres qui sont desia decedées, dont ie diray quelque peu de chose, & encore d'vne seule qui seruira de témoignage pour les autres.

C'est de Madame la Comtesse de la Chastre, laquelle

estant engagée dans les affections du monde selon l'ordinaire des ieunes Dames de sa condition, & Dieu par vn amour particulier qu'il luy portoit, aiant dessein de l'en dégager & de la conduire par des chemins fort épineux à vne excellente vertu & à cette haute perfection, où apres quelque peu d'années elle est morte, il voulut se seruir de son fidele seruiteur pour vn si grand ouurage & en bailla pour cela mouuement à l'vn & à l'autre, à elle de luy demander ses conseils, & à luy de les luy donner, ce qu'il fit & avec tant de succes, qu'en moins d'vn an elle auança si notablement, que luy-mesme en estoit étonné, & paruint à vn si grand dégagement de tous les petits accommodemens dont se flattent les Dames, & qu'elles se persuadent facilement leur estre necessaires, qu'vne persone luy en ayant présenté vn, qu'elle auoit auparauant accoutumé de prendre, elle luy fit cette réponse, qui peut seruir d'instruction, attendu principalement qu'elle estoit d'vne complexion tres-delicat, & avec cela fort maladiue: ô que l'on se fait accroire de besoins! i'ay quité tout cela pour l'amour de Dieu, & encore bien d'autres choses, & ie n'en ay pourtant eu aucune incommodité. il est vray que la nature se choie en tout ce qu'elle peut, & s'abuse aisement au suiet de ses necessitez, qu'elle croit bien plus grandes, qu'effectiuement elles ne sont pas, & ne sont mesme bien souuent qu'imaginaires.

Il auoit beaucoup de grace & beaucoup de lumiere pour elle, pour connoître sa voie & la luy faire suiure, pour l'auancer en la vertu solide, & la faire mourir peu à peu à elle mesme, pour la soutenir dans ses grandes peines interieures, & pour luy dire avec energie ce qui luy estoit propre: Ce que doit auoir vn Directeur pour bien conduire vne persone. Et elle de son costé luy rendoit vne parfaite docilité, pour croire ce qu'il luy disoit, & se faisoit force pour l'executer, ce qui est aussi necessaire à la persone, qui prend conduite pour faire du progres.

Elle receuoit ses auis avec toute la deference qui se peut, & estimoit que nostre Seigneur luy parloit par sa bouche, ce qui n'estoit pas sans suiet; car elle a rendu vn temoignage fi-

dele à la merueille qui fuit, que luy parlant vn jour pour auoir secours dans vne pressante & excessiue peine, dont son esprit estoit battu, & ne sentant point de secours pour tout ce qu'il luy disoit, elle eut mouuement de se mettre à genoux pour liurer sa volonté à nostre Seigneur & entrer dans tous les desseins qu'il auoit sur elle: Elle le fit, & puis se releuant elle ne vit plus Monsieur de Renty, mais en luy nostre Seigneur IESVS-CHRIST éclatant d'une grande lumiere, qui luy dit, fai ce que mon seruiteur te dira: ces paroles opererent au mesme moment cet effet salutaire & diuin dans son esprit, que toute sa peine en fut effacée, & qu'elle demoura remplie de Dieu & d'une douce paix accompagnée d'une viue douleur de ses pechez, & du veritable mépris du monde & de soy-mesme.

Quelle benediction que Dieu donna à cette conduite, & quelque liaison qu'il eut faite de ces deux esprits, Monsieur de Renty traitoit toujours avec cette Dame dans vne grande sagesse, dans vne grãde prudence & vne grande retenue, ne la voyant qu'autant qu'il le falloit pour auancer l'œuvre de Dieu en elle, & ne luy disant precisement que le necessaire; ce que cette Dame trouuant vn peu rude & s'en ourrant à vne persone, qu'elle croyoit auoir quelque pouuoir aupres de ce saint homme, elle luy dit: Monsieur de Renty me mortifie extremement avec ses ciuilitéz & ses retenuës, j'ay besoin de le voir souuent, & si pourtant ie ne puis l'obtenir, & mesme quand nous sommes ensemble, il ne veut point s'asseoir, si ie ne suis malade, ou que ie ne puisse plus me tenir debout, & toujours le chapeau au poing; ie vous prie de luy dire ce que ie n'ose par respect, que j'en ay grande peine, & que ie sens de l'inquietude de le voir en cet état, moy qui deurois estre sous ses pieds. Cette persone le luy dit, à qui ce fidele seruiteur de Dieu répondit cecy. Ie me tiens en cet état parce que c'est mon deuoir selon Dieu, & que ie le dois à Madame de la Chastre: de plus puis que nostre Seigneur m'oblige de luy parler; ie ne le dois faire que pour son besoin & pour le necessaire, rien que cela & puis nous retirer, cette posture & ce maintien nous le mar-

“ quent: si i'estois assis il se pourroit dire plus que le necessaire,
 “ & peut-estre passeroit-on aux choses inutiles: c'est dequoy
 “ nous devons nous garder & elle & moy. Je suis homme lai-
 “ que & vn pecheur, ie ne luy parle qu'avec grande confu-
 “ sion, encore que Dieu vueille que ie luy parle, & que des
 “ personnes de sçauoir & de pieté m'aient dit, que i'estois tenu
 “ de le faire.

Tous ceux qui se meslent d'aider & de conduire les ames,
 doiuent considerer cette sage réponse, & s'assurer, que la
 bonne conduite d'une ame ne consiste pas à luy parler beau-
 coup, mais à la bien disposer pour parler beaucoup à Dieu,
 & plus encore à la rendre digne que Dieu luy parle & pro-
 duise en son fond sa Parole substantielle & son Fils, & apres
 luy auoir donné les auis qui luy sont propres selon sa disposi-
 tion, la mettre en état de les executer avec courage; car on
 doit sçauoir que la vertue ne consiste point en paroles, mais
 en œuures.

Voilà l'ordre qu'il a tenu en la direction de cette Dame,
 qui par sa fidelle correspondance s'est renduë tres-vertueu-
 se, a fait vn excellent vsage de toutes ses souffrances corpo-
 relles & spirituelles qui ont esté tres-grandes, & est venuë à
 vn tel mépris du monde, qu'elle est decedée dans le dessein,
 nonobstant toutes ses infirmitéz, de se faire Carmelite au
 Couuent de Beaune.

Voicy ce qui touche la conduite de quelques autres per-
 sonnes de grande vertu; qui sont des Regles d'une haute
 perfection qu'il leur donna, & que sans doute il prit de ce
 qu'il obseruoit luy mesme.

*J'ay protesté deuant le S. Sacrement de vouloir viure selon
 les Maximes & les Conseils de IESVS-CHRIST:
 Et pour cet effet,*

1. De ne rien desirer ny rechercher directement ou indi-
 rectement pour augmenter ma fortune, soit pour les richesses,
 soit pour les honneurs, ny mesme consentir aux auanta-

ges, que mes amis me voudroient procurer, sinon par obeyssance & par l'avis du Pere spirituel & du Directeur de ma conscience.

2. De m'étudier au mépris & à la haine des richesses du monde & des honneurs, & de n'en plus parler selon l'esprit de la chair, mais selon l'esprit du Christianisme, & afin d'établir ses maximes dans mon esprit, fuir tant que ie pourray la conuersation des personnes, qui suiuent les maximes contraires.

3. De n'auoir iamais de procez soit en demandant, soit en defendant, qu'apres auoir tenré toutes les voies possibles d'accommodement, sans respect humain, en quoy ie me conduiray par auis.

4. De retrancher toutes choses superfluës tât en ma persone qu'en ma maison, afin d'en assister les pauures, pour l'execution de quoy i'en feray tous les mois vn examen exact apres la sainte Communion, comme si i'estois prêt de rendre compte à Dieu.

5. De ne contester iamais, ains ceder tant que ie pourray à tout le monde, soit pour l'honneur & la preference, soit pour les opinions, soit pour les volontez d'autruy qu'il faut preferer aux miennes.

6. De fuir toutes les choses delicieuses, mesme de ne rien faire ny rien desirer par le motif du plaisir, n'en admettant aucun s'il n'est conioint iustement à la necessité ou à la condescendance au prochain, ou à la santé du corps, ou au relâche & délassement de l'esprit.

7. De souffrir avec patience les mépris, les iniures, les contradictions, les pertes, les oppressions, & les affronts.

8. De faire ce que ie pourray avec vn zele discret pour empêcher que Dieu ne soit offensé, son saint nom blasphémé, ny le prochain déchiré par medisance ou par calomnie.

9. De fuir & reietter toute sorte de delicatesse pour les aisés du corps, mesme de diminüer tant que ie pourray mes commoditez, sans interest de ma santé.

10. De receuoir avec charité & facilité les prieres de mon prochain, & pouruoir à ses besoins, autant qu'il me sera pos-

fible, soit par moy, soit par autruy.

11. De faire avec charité & humilité la correction fraternelle en la maniere la plus prudente qu'il se pourra, & la recevoir volontiers.

12. Tous les mois, pour le moins vne fois, ie feray l'examen des manquemens que j'auray faits contre les presentes resolutions, & tous les ans l'on pourra s'assembler pour renouveler la presente protestation, & auiser aux moiens de l'accomplir.

SECTION VNZIEME.

La grande connoissance qu'il auoit des choses interieures.

L faut auoir que la connoissance des choses interieures est tres-difficile, & que la science de l'esprit est sans contredit la plus obscure de toutes les sciences, & qu'à moins d'auoir vne grande grace de Dieu & d'être bien éclairé du Soleil de iustice, il est impossible d'y entendre beaucoup & y deuenir habile. Si la science de traiter & de guerir les corps est mal-aisée & seulement coniecturale, parce qu'elle ne se conduit en ses cures que par des signes exterieurs, qui encore souuent sont ambigus & equiuoques: ce qui fait que les plus sçauans Medecins s'y trompent par fois & ordonnent des remedes tout contraires; à combië plus forte raison le sera la science de gouverner les esprits dans les choses du salut, qui sont spirituelles, éloignées de nos sens, & de plus surnaturelles, & en suite remplies pour nous de grandes difficultez & enuelpées de profondes tenebres?

Monsieur de Renty y estoit toutcefois tres-intelligent & auoit reçu de Dieu des lumieres admirables pour en entendre tous les secrets & en connoître les voies les plus cachées, à quoy encore sa propre experience luy seruoit de beaucoup. Ses plus grandes lumieres alloient à discerner le vray du faux, le seur du perilleux, & les mouuements du bon esprit d'avec ceux du mauuais, à calmer les ames, à les forti-

fier toujours & leur donner du courage, à les détacher de tout pour les attacher & les vnit à nostre Seigneur I E S U S-CHRIST, & par luy à la Diuinité, & à les faire agir en tout par son esprit & sur son modele. Voicy quelques-vnes de ses connoissances & quelques rayons de ses lumieres sur ces matieres, que ie trouue dans des papiers écrits de sa main, & qui nous donneront vn grand iour pour voir beaucoup de mysteres de la vie spirituelle.

Il y a trois sortes d'eleuations & de gemissemens de l'ame „ à Dieu. dans lesquels elle doit continuellement estre pour „ pouuoir accomplir ce que nostre Seigneur nous enioint, à „ sçauoir, de prier toujours & ne se relâcher iamais en ce sanct „ exercice, afin de ne point tomber dans l'oubly de Dieu, & „ apres dans quelque peché. Le premier est l'eleuation & le „ gemissement des Penitens, qui commencent & sont dans „ la vie purgatiue; le second des Fideles, qui font progres „ & pratiquent la vie illuminatiue; & le troisieme des Parfaits, „ qui sont en l'vnitie. „

Les premiers renonçans au peché & aux vanitez du monde „ deplorent leur vie passée & cherchent Dieu, élançans leurs „ gemissemens & leurs soupirs vers luy d'vn fond de crainte „ & de reuerence; & voilà le commencement de la vie eter- „ nelle. „

Les Fideles cherchent de connoître ses volontez par sa „ Parole, qui est son Fils, & desirent de les executer sur son „ exemple, puis qu'elle est nostre Voie & nostre Verité; c'est „ icy le progres de cette vie. „

Les Parfaits gemissent deuant Dieu pour obtenir l'vnion „ avec luy, à la façon de nostre Seigneur, & la pratiquent avec „ les actes de charité & avec l'accomplissement du premier & „ du plus grand de tous les commandemens, où consiste la „ perfection de la vie en ce monde. „

Il y a des ames dans le premier état, qui renonçans au pe- „ ché & quittans les vanitez reçoient de grandes consolations „ sensibles de Dieu, & goûtent des suauitez qui les rauif- „ sent: si elles ne s'étudient de vouloir passer au second pour „ apprendre les volontez de Dieu par son Fils & les executer „ „

“ sur son patron , le diable les trompera sous cet appas , & les
 “ arrestera en la recherche & en la complaisance de ces dou-
 “ ceurs , de sorte que ne marchans point en IESVS-CHRIST
 “ qui est leur Voie , elles s'égareront , & iront donner dans des
 “ precipices : leur état sera vn certain abandon vague de vou-
 “ loir estre à Dieu , de faire sa volonté & de l'aimer , avec vn
 “ calme interieur trompeur , où elles se tiendront assurées , &
 “ d'où neantmoins elles degenereront dans vne disposition
 “ fort dangereuse , parce qu'elles ne s'établissent point en
 “ IESVS-CHRIST , que Dieu nous donne pour estre nostre
 “ vnique Conduite .

“ Que si apres s'estre purifiées des affections plus grossieres
 “ du monde , elles ne se purifient encore d'elles mesmes , se
 “ donnant à IESVS-CHRIST , se determinant de l'imiter
 “ & d'entrer dans son sacrifice d'aneantissement ; au lieu
 “ de receuoir l'esprit de Dieu , elles se confirmeront dans le
 “ leur propre , & se formant de fausses illuminations elles ne sui-
 “ uront que leurs sens , & ce que la nature gastée leur suggerera
 “ d'éclatant & de mol , avec grand danger de tomber dans l'er-
 “ reur des Illuminez , qui se persuadent que tout ce qui leur
 “ vient en la phantaisie , leur vient de Dieu , parce qu'il leur
 “ semble qu'ils ne veulent , qu'ils ne cherchent & qu'ils n'ai-
 “ ment que Dieu , & ne sentent plus ou fort peu de reproches
 “ de leur conscience .

“ Si vous prenez garde à tous ceux qui commencent de cét-
 “ air leur vie eternelle , vous trouuerez qu'ils ont peu de foy &
 “ peu de liaison à IESVS-CHRIST ; & si on leur demande ce
 “ qu'ils desirent & ce qu'ils pretendent , ils vous diront en ge-
 “ neral , tout ce que Dieu veut . Il faudra les redresser , s'ils en
 “ sont encore capables , & si la complaisance à leurs douceurs &
 “ l'attache à leurs sens n'a pas gagné trop auant , les portant à
 “ vouloir bien ce que Dieu veut , mais à le vouloir sur le mode-
 “ le de nostre Seigneur & selon les maximes de son Euangile ,
 “ qu'il nous a laissé comme vne bonne Nouvelle & comme son
 “ Testament pour estre nostre Lumiere & la mesure de nos lu-
 “ mieres .

“ Plusieurs s'arrestent en ce premier pas , & sont toutefois
 estimez

estimez & admirez des perſones meſme qui paſſent pour »
ſpirituelles, & par fois de leurs Directeurs, & on appelle cela »
vie myſtique, où pouttant l'eſprit trompeur de la nature & »
du demon ſe iouë dans ces illuminations tenebreuſes, dans »
ces fauſſes paix, dans ces beaux termes & ces paroles ſubli- »
mes, dans ce nombre d'écrits de deuotion, dont tout le fruit »
pour l'ordinaire n'eſt que dans le papier: d'où vient qu'on re- »
marque ſi ſouuent que ceux qui ont commencé avec pureté, »
tombent à la fin en de lourdes fautes, quand la propriété »
ſ'eſt gliffée en l'ame au lieu de IESVS-CHRIST. »

Il y en a d'autres qui ne s'attachent qu'à la predication de »
S. Iean pour les auſteritez & les penitences, mettans en cela »
leur appuy, ſans s'appliquer dauantage à IESVS-CHRIST ny »
prendre ſon eſprit, mais bien vne ſatisfaction interieure »
& vne certaine confiance en leurs mortifications, & de- »
meurent là. »

D'autres s'arreſtent à IESVS-CHRIST ſeul, comme ſ'il n'a- »
uoit point de Pere, & ont des deuotions de tendreſſe à ſon »
Humanité, ils ſe touchent du ſenſible, & ne vont pas plus »
auant; ils connoiſſent IESVS-CHRIST, mais non IESVS- »
CHRIST Homme-Dieu, qui eſt noſtre Voie, noſtre Verité, »
& noſtre Vie. »

D'autres établiffent toute leur eſperance en la Sainte »
Vierge, aux Saints, & en des deuotions particulieres, leſquel- »
les ſont fort bonnes quand elles ſont fondées ſur la repen- »
tance de ſes pechez & ſur la vraie conuerſion du cœur: »
mais ils ſ'abusent lourdement d'eſperer du ſecours de la »
Sainte Vierge & des Saints, & d'auoir part à la commu- »
nion de leurs merites, ſ'ils ne veulent quitter leurs vices. »

Ces trois états ainſi diſtinguez donnent vne grande lumie- »
re ſur la conduite des ames pour voir leur commencement, »
leur progres & leur perfection avec les égaremens, où elles »
peuuent tomber. Or chaque état a ſon œuure, ſa ſouffrance, »
& ſon oraifon. »

L'œuure du premier état des Commenceés & des Penitens »
eſt, de rechercher tout ce qui pouſſe au peché, & qui nuit »
au ſalut, & qui retire de Dieu pour ſ'en éloigner. Leur ſouf- »

France est de pleurer leurs pechez, de mortifier leurs passions & mâter leurs corps en ce qui porte rebellion à la raison & dommage à l'esprit, comme aussi pour le punir des mouemens dereglez de ses concupiscences, & de ses échappées. Leur oraison est de demander grace & force pour cela.

« L'œuure du second des Fideles est d'étudier I E S V S-
 « C H R I S T , sa vie & sa doctrine. Leur souffrance, de suppor-
 « ter les peines qu'il y a de l'imiter & de souffrir les mépris &
 « les persecutions qui accompagnent tous ceux qui marchent
 « apres luy. Leur oraison, de demander sa vie, son esprit & ses
 « dispositions pour agir interieurement & exterieurement sur
 « son modele.

« L'œuure du troisieme & des Parfaits est de faire tout par
 « mouuement de l'esprit de I E S V S- C H R I S T dans l'vniion
 « avec Dieu. La souffrance, d'endurer comme il faut la cor-
 « ruption, la grossiereté & les tenebres de ce siecle, & les per-
 « secutions pour la Iustice, qui ne leur manqueront jamais. Et
 « leur oraison, de demander vne participation toujours plus
 « abondante de l'esprit de I E S V S- C H R I S T, vne vniion plus
 « intime avec Dieu, vne plus grande mort de soy, vn vsage
 « plus fidele de la grace & des talens reçûz, & la perseueran-
 « ce finale.

« L'adiouste qu'il nous faut trauailler dans le premier état
 « pour resister au peché, pour vaincre nos passions & renoncer
 « à la vanité, ce que ne peuuent les Commenceans sans se ser-
 « uir de plusieurs pratiques & se faire beaucoup de violence:
 « mais ceux, à qui Dieu a donné entrée aux deux états suiuaus,
 « le font ordinairement avec vn simple détour d'esprit, qui
 « n'amoindrisant pas l'humiliation, empeche l'empressement
 « & le trouble.

« Il faut dans le second vne forte correspondance de nostre
 « costé pour suiure I E S V S- C H R I S T, pour n'agir plus selon
 « nous, mais selon luy, pour nous simplifier & porter avec pa-
 « tience & longanimité la production de nostre pureté en
 « I E S V S- C H R I S T. Il faut souffrir nos tempestes seceres &
 « nos tumultes interieurs qui nous viennent de nos habitudes
 « anciennes, & d'un esprit qui agissant par le mouuement de

sa nature, quoy que raisonnement, est tout plein d'ima-
ges & de formes. Il faut perdre son ame avec beaucoup de
patience, pour la trouver reuestuë de IESVS-CHRIST.

Dans le troisieme, c'est vne action de passion, c'est vne orai-
son, où la liberalité de Dieu fait quasi tout, & où l'ame goûte
vn certain rassasiment experimental de la-presence & de la
verité de Dieu, & de sa charité en IESVS-CHRIST, en qui elle
demeure. Elle se trouue parfois noyée dans la ioye des gran-
deurs de Dieu, de sa puissance, de sa bonté, & de ses infinies
perfectiōs, de l'alliance avec son fils, de son amour, de ses ma-
nieres d'agir, & des effets admirables que produit la parti-
cipation de son esprit, & elle iouit en la possession de ces biens
d'vne paix, d'vne allegresse & d'vne force, qui surpasse les
sens & l'expression de toutes les paroles.

La fidelité des deux premiers états dispose l'ame pour le
troisieme; mais il faut nous souuenir, que comme nous som-
mes dans le temps & par nostre infirmité toujourns muables,
nous auons toujours besoin de travail pour pouuoir faire
progrès en ces états, & de renouvellement pour nous y réta-
blir & pour y reparer nos pertes. Voila ces connoissances
des choses spirituelles, qui montrent assez iusques où al-
loient les lumieres de cet esprit éclairé.

Que Dieu éclairoit non seulement d'vne façon commune,
mais encore souuent d'vne extraordinaire, luy declarant le
dessein qu'il auoit sur les ames, le faisant lire dans le
fond des consciences & decouurer ce qui y estoit de plus
caché, & parler avec des paroles non pas étudiées ny pre-
meditées, mais qu'il luy inspiroit sur l'heure & luy mettoit
dans la bouche, qui estoient aussi des paroles puissantes; par
proportion comme les siennes, pour produire leur effet.

L'an mil six cens quarante quatre, vne Damoiselle, pour
laquelle Dieu luy auoit donné beaucoup de charité, aiant
mouuement de se rendre Carmelite, elle le luy communi-
qua pour en auoir son auis, qui fut qu'il trouuoit la chose
difficile, & iugeoit pour quelques raisons qu'elle ne deuoit
pas y penser; neanmoins après Dieu luy fit connoître avec
vne tres-grande certitude dans l'vne de ses oraisons, qu'il:

vouloit que passant par dessus toutes les difficultez, elle embrasât cet institut, & luy marqua mesme le lieu où cela devoit estre: ce qu'il luy declara, & ce qu'elle reçût avec le respect qu'elle devoit à sa grace, & comme si IESVS-CHRIST mesme luy eut commandé d'entrer en ce Monastere, où elle est encore à present, que j'écris cecy.

Ayant visité l'an mil six cens quarante sept vne persone qui souffroit de grandes peines & qui auoit besoin d'un homme fait comme luy, voicy ce qu'il en manda à son Directeur. J'ay donc parlé à la persone que vous sçavez, & luy ay dit ce que j'ay crû à propos sur son besoin. Nostre Seigneur m'a donné lumiere pour luy decouvrir sa conduite sur elle, & comme cet abyssme de tenebres & de misereres où elle se trouuoit, ne luy est pas enuoïé pour s'y arrester ny pour s'en troubler, mais pour en faire vsage de perfection, & s'en seruir pour aller sans amusement à nostre Seigneur IESVS-CHRIST qui est nostre sanctification. Je luy monstray comme il nous faut faire vn fond de certitude, que nous ne sommes qu'infirmite & la misere mesme; de sorte que lors qu'on nous en touchera quelque chose, on ne nous apprenne rien de nouueau, & que Dieu de ce fond veut en tirer vn autre tres-excellent d'humilité & de deffiance de nous mesmes fondé sur nostre impuissance à tout bien, & nous obliger d'aller à son Fils nostre Seigneur, pour trouuer en luy de la force & le remede de tous nos maux. J'eus beaucoup d'estenduë sur tout ce qu'elle me communiqua, & Dieu luy donna vne si grande plenitude de lumiere & de grace, qu'elle me dit des merueilles sur l'operation de la sainte Trinité en elle, & quantité de choses qui faisoient bien paroître vne assistance diuine tres-particuliere: Je la laissay en cet état, & puis il ajoûte de foy.

Pour ce qui me regarde, ie n'ay pas grand' chose à dire, Je porte par la misericorde de Dieu vn fond de paix deuant luy en l'esprit de IESVS-CHRIST dans vne experience si intime de la vie eternelle, que ie ne la puis declarer: & voilà où ie suis le plus tiré. Mais ie suis si nû & si sterile, que j'admire la maniere où ie suis, & en laquelle ie parle. Je m'éton-

nois comme parlant à la persone susdite, ie commençois vn discours sans sçauoir comme ie le deuois poursuiure, & disant la seconde parole, ie n'auois point de veüe de la troisième, & ainsi des suiuanes. Ce n'est pas que ie n'aye la connoissance entiere des choses en la maniere que i'en suis capable, mais pour produire quelque chose au dehors cela m'est donné, & comme on me le donne, ie le donne à vn autre, & après il neme reste rien que le fond dessusdit.

Ces grandes lumieres & cette haute capacité qu'auoit Monsieur de Renty pour les choses interieures, iointe souuent à des graces extraordinaires, faisoient qu'on le consultoit de tous costés sur ces matieres. Plusieurs Religieux, & mesme Superieurs de Religions & de Cōmunautés bien réglées tenoient à grand bon-heur de le pouuoir communiquer, & suiuoient ses conseils en des choses tres-importantes, parce qu'ils connoissoient par des marques, dont on ne pouuoit douter, qu'il estoit rempli de l'esprit de Dieu. Vn grand nombre de personnes Ecclesiastiques & Seculieres de tout sexe, & de toute qualité, mesme des plus releuées le voioient pour receuoir instruction & secours de luy en leur conduite.

Ce fut l'an mil six cens quarante & vn qu'il commença proprement de s'appliquer à cét employ, mais de tous les emplois que nostre Seigneur luy a donnez pour son seruice, il n'y en a point où il ay eu plus de peine ny plus de contrariété d'esprit, qu'à celuy-cy, s'en estimant tres-indigne & tres-incapable, & ne voulant point passer outre, quelque mouuement qu'il en eut, sans en prendre conseil : qui fut, apres que la chose eut esté bien examinée, qu'il deuoit l'entreprendre & que c'estoit la volonté de Dieu ; à quoy il se soumit avec vne extreme confusion de soy-mesme, que son maintien, ses paroles, & toute sa maniere d'agir témoignoient euidentement après dans la communication de ceux qui luy demandoient ses auis, obeïssant à leurs desirs avec vne grande humilité & vne grande reuerence, comme sçauent tous ceux qui l'ont connu ; & eux aussi de leur part connoissans que Dieu residoit, parloit, & agissoit en luy & par luy, se tenoient en sa presence avec beaucoup de respect, & pre-

noient vne tres-grande confiance en sa conduite.

Et Dieu a bien montré par la benediction & le succes admirable qu'il a donné à ses soins, que c'estoit en effet sa volonté qu'il s'employât dans ce miniftere: nous apprenant qu'il n'a que faire de nous pour l'execution de ses desseins & qu'il se sert de celuy qu'il luy plaist, & souuent de celuy qui luy plaist, & qu'il trouue bien disposé, laissant ceux, que leurs vices en rend incapables. La meilleure preparation pour estre employé de Dieu à faire de grandes choses, est d'estre abandonné absolument à ses ordres, & fort petit en sa propre estime, comme a esté ce saint homme.

CHAPITRE II.

De sa Composition exterieure & sa Conuersation.



OMME la composition exterieure de l'homme & toute l'œconomie de sa conuersation est d'une tres grande consequence pour beaucoup seruir ou pour beaucoup nuire au dessein de procurer le salut du prochain, parce qu'on ne voit en l'homme que son exterieur, qui fait en suite, selon qu'il est bien ou mal réglé, la premiere & la plus forte impression sur les esprits & les gagne ou les aliene. De là vient, que Monsieur de Renty qui auoit vn desir ardent d'aider le prochain, & d'aquerir pour cela, quoy qu'il luy en coûtât, tout ce qui y seroit necessaire, a fait aussi tout son possible pour biẽ dresser son exterieur, son maintien, ses gestes, ses mouuemẽts, ses regards, ses paroles, son silence, & toutes les parties de sa conuersation, & les mettre dans l'harmonie & en l'état qu'il croyoit deuoir estre plus utiles au prochain, & plus propres pour le porter à Dieu. Ce qu'il a executé avec tant d'auantage, que l'on peut dire avec verité & avec l'approbation de tous ceux qui l'ont veu, qu'il a esté admirable en ce point, & qu'il a eu l'exterieur aussi bien composé,

qu'aucun homme qui ait parû il y a long-temps.

Il estoit tres-moderste, toujours tranquille & inuiolemment egal. Entre toutes les choses que j'ay remarquées en feu M^r de Renty, dit de luy vn bon témoin qui l'a connu fort priuément, sa rare moderstie & la grande egalité de son port & de son maintien m'ont donné les premières & les plus hautes idées de sa sainteté : il auoit quelque chose de si respectueux en sa contenance, qu'on iugeoit aisément qu'il estoit toujours dans vne actuelle presence de Dieu. En quelque lieu, en quelque état, & en quelque occupation qu'il fut, il estoit toujours le mesme en son visage, le mesme en ses gestes, en ses paroles, en ses mouuemens & en toutes ses actions, soit qu'il fut en son particulier ou en cōpagnie, qu'il fut avec ses amis ou avec des personnes inconnuës, avec des riches ou des pauvres, deuant ses enfans, deuant ses domestiques & deuant vn laquay, aux champs, à la ville, en table, au sortir de table, & par tout.

Auoions franchement qu'il faut estre bien maistre de soy pour posseder vne telle immutabilité, & qu'à moins d'estre continuellement appliqué à la presence de Dieu, & d'auoir assuieti absolument toutes ses passions & tous ses mouuemens interieurs, on ne pourroit en venir là; Il est trop aisé en tant de rencontres differens qui se presentent tous les iours, que nostre esprit s'émeuue, qu'il perde son assiete & s'emporte, & en suite que son émotion & son emportement paroisse au dehors, ou à la couleur, ou à la parole, ou au geste, ou par quelque autre signe. C'est pourquoy cette constante moderstie & cet état immuable en rout temps & en toutes occasions, ne peut estre sans vne vertu tres-grande; principalement quand on y arriue, comme Monsieur de Renty, avec vne cōplexion, non point flegmatique mais bilieuse, & avec vn esprit ardent & actif: mais le soin exact qu'il prenoit, la force qu'il se faisoit, & la veille perpetuelle qu'il auoit sur soy sans se perdre iamais de veüe, le tenoit en cet état & formoit son exterieur de cette belle & diuine façon, si capable de profiter au prochain.

Vn autre témoin tres-digne de foy dit de luy en son me-

moire : ce qui me plaisoit extrêmement en luy estoit son grand recueillement & son intime vnion avec Dieu , accompagnée d'une paix profonde & d'une tranquillité d'esprit merueilleuse qui éclatoit sur son visage , lequel ne pouuoit estre regardé sans deuotion. Cette vnion estoit continuelle, ce me semble, & il ne paroissoit iamais distrait; aussi ne faisoit il rien de leger, ny ne disoit aucune parole qui ne fut necessaire. La complaisance parmy les compagnies ne l'obligeoit point à se répandre au dehors , il vaquoit à Dieu dans son interieur & demeuoit vny à luy au preiudice de toutes choses sans aucun respect humain , non qu'il ne fut tres-ciuil, mais l'on voioit bien qu'il s'appliquoit plus au dedans, qu'à tout le reste.

Cette continuelle presence de Dieu , poursuit le premier témoin , le tenoit si fort occupé en son interieur, qu'il ne s'épanchoit iamais au dehors pour quelque accident qui arriuât, ny pour quelque obiet, quoy qu'extraordinaire & rare, qui se presentât à luy. Je ne luy ay iamais rien veu admirer de ce que le monde estime & trouue rauissant , ny arrester tant soit peu ses yeux par curiosité sur quoy que ce fût: il alloit par les ruës recueilly, modeste, marchant d'un pas égal & mesuré, regardant deuant soy sans tourner la teste ny çà ny là; aussi IESVS-CHRIST estoit si absolument son occupation & son Tout en toutes choses, que hors de luy & ce qui concernoit sa gloire, rien ne le touchoit & ne l'arrestoit pour y faire attention. Côme vni iour vne persone poussée de quelque curiosité l'inuita avec beaucoup d'instance d'aller voir vn grand personnage, que l'on tenoit pour saint & que l'on croyoit auoir le don de miracles, Monsieur de Renty répondit avec sa douceur ordinaire; nostre Seigneur est en toutes
 ,, les Eglises dans le S. Sacrement, que nous pouuons visiter.

Mais d'autant que la parole & le silence font vne des parties plus notables de la bonne ou de la mauuaise conuersation, il faut maintenant voir comme quoy cet homme de Dieu zelé pour le salut du prochain se conduisoit en l'un & en l'autre. Il parloit peu, & par mouuement de grace & mesme par inclination de nature: aussi n'ût il pû estre si sage &
 parler

parler beaucoup, puisque les saintes Lettres nous apprenent, que le propre caractere de la sagesse est de peu parler, & qu'il est difficile, & comme impossible, de ne point faillir dans vne multitude de paroles. Quand il visitoit ou qu'il estoit visité, & lors qu'il se trouuoit en quelque assemblée de deuotion où il falloit parler, il parloit en son rang avec vn esprit toujours present à soy & vn maintien recueilly, en termes concis, mais pleins de suc. On ne l'a iamais vû pressé ny pour parler, ny en parlant, ny d'vn ton de voix plus élevé, quelque haste qu'il eut: s'il rapportoit quelque chose, ou s'il racontoit quelque fait, c'estoit briuement, sans y mettre vne parole qui ne fut necessaire, & qui ne portât: de sorte que quelqu'un a dit de luy, qu'il seroit malaisé de trouuer vn homme, qui parlât mieux & moins que luy.

Dans la conuersation il ne parloit iamais de choses vaines, inutiles, ny des nouvelles du temps, mais toujours de choses bonnes & du Royaume de Dieu, à l'exemple de nostre Seigneur, & dès lors qu'il voyoit qu'on changeoit de discours & qu'on se iettoit sur les affaires du monde ou sur des bagatelles, il prenoit congé de la compagnie, ou disparoissoit sans rien dire; encore parloit-il des choses bonnes avec moderation, disant qu'il falloit mesme sobrieté à parler de Dieu & des meilleures choses, & que cestoit vn des amusemens qu'il portoit avec plus de peine parmy les personnes spirituelles, lesquelles passent souuent de bonnes heures à s'entretenir de la vertu dans le vague & sans fruit, sortans de leurs entretiens avec des esprits vuidés secs, & dissipés. Le secret de la morale Chrestienne n'est pas à dire, mais à faire, & la Parole substantielle de Dieu le Pere est seulement vne, & infiniment efficace pour produire le S. Esprit, & operer de tres-grandes choses.

De plus cet homme de Dieu estoit en sa conuersation veritablement & grandement humble, respectueux, affable, gracieux, officieux, bienfaisant, & cordial: Il estoit patient pour souffrir les ignorances, les lourdises, les importunités, les mauvaises humeurs & les autres défauts du prochain, prudent pour s'accommoder aux esprits; & couler par dessus beau-

coup de petites choses, sans faire semblant de les voir & de les entendre.

Toutes ces qualitez excellentes rendoient sa conuersation tres-profitable au prochain, & faisoient que par tout elle produisoit de grands biens. Il répandoit avec sa modestie, avec ses regards, avec ses paroles, avec son silence, avec tout son extérieur si bien composé & si harmonique en tous les lieux où il alloit, vn certain air de vertu & vn baume de deuotion, & il imprimoit la pieté dans les esprits. Sa seule presence donnoit du recueillement, & il ne falloit que le voir pour se retenir, iusques là, que la creance qu'il estoit dans vne Eglise, tenoit les personnes de sa connoissance plus attentives à leurs prieres, & quelques-vnes ont ressenti de sa compagnie, encore huit iours après, des effets de grace par vn attrait & vne occupation extraordinaire en Dieu.

Aussi par tout où il se rencontroit, c'estoit à l'environner de toutes parts par mouuement d'estime & par desir de consolation qu'on goûtoit en sa presence: mais quand il s'aperceuoit qu'on faisoit état de luy, & qu'on parloit avec approbation de ce qu'il auoit fait, ou de ce qu'il auoit dit, il s'humilioit profondement en son esprit, lequel portoit le témoignage de son mécontentement sur son corps, qui par fois en estoit tout courbé, & il demouroit, tandis qu'on parloit de luy, les yeux baïssés dans vn profond silence, avec vn maintien graue & posé qui marquoit sa peine, & qui donnoit du respect, & edifioit extremement.

Pour finir, il faut rapporter icy vne chose tres-remarquable, qui monstre euidentement combien il estoit parfait & acheué en sa conuersation, & en tous ses procedés enuers le prochain: c'est que sa façon de conuerser, sa maniere d'agir avec le prochain, & sa deuotion ne choquoit persone, & n'a esté blamée ny condamnée d'aucun, mais approuuée, prisee & louée de tous, de sorte que generalement tous auoient de l'estime, de la reuerence & de l'amour pour luy, & disoient par proportion comme de son maistre, qu'il faisoit bien tout. Certainement pour en venir là & meriter cette approbation vniuerselle, particulièrement en vne telle multitude d'affai-

res, si différentes, & si malaisées, & dans vn si grand debit, ce qui est fort rare, il faut auoir vne conduite tres-prudente & tres-auisée.

Ioint que son humilité, son honesteté, la deference qu'il rendoit à rous iusques aux plus petits, son affabilité, sa charité, sa patience, & ses autres verrus, luy gaignoient le cœur de tous; mais comme il y a beaucoup de peril d'estre tant estimé, tant loüé, & tant approuué de tous, Dieu pour assûrer par vn sage & diuin contrepoid sa vertu, & empcher que sa sainteté ne fist quelque faux pas en vn lieu si glissant, permit, que d'où principalement l'estime, l'approbation & la satisfaction luy deuoient venir, à sçauoir de Madame sa Mere, le blâme, la condamnation & le mépris luy vinssent d'vne façon fort inopinée & tres-affligeante, comme nous Pauons vû.

CHAPITRE III.

Sa Conduite dans les affaires.



L faut dire d'abord sur ce suiet, que Monsieur de Renty estoit sans contredit vn des hommes de Paris & du Royaume des plus occupez pour ce qui regarde le seruice de Dieu, & qu'il faisoit des affaires de cette nature comme sans nombre. Dieu luy auoit donné pour cela vne grande force de corps & d'esprit & vne haute capacité pour y pouoir fournir, de sorte que sans s'empreser, sans se péner, avec vn esprit rassis & vne application toujours tranquille, sans perdre vn moment de temps, il faisoit vne chose, & puis vne autre, & quelques fois plusieurs ensemble. On l'a veu en faire trois à la fois sans se troubler ny se méprendre, on la veu estant pressé de plusieurs affaires, qui luy suruenoient tout à coup, & qu'il falloit expedier sur l'heure, lire des lettres, donner audience, & répondre à

differētes personnes en mesme temps, & sur diuers suiets clairement & nettement. Il dit dans vne de ses lettres; Il est vray que de tous costez les affaires me viennent trouuer & accourent; il faut lire, il faut écrire, il faut agir, vn petit second en auroit encore bien sa charge, quoy que i'en fasse part à plusieurs; mais ne vous mettez pas en soin pour cela, i'en fais sur le champ ce que i'en peux faire, & le reste en son temps, sans m'en empresse. Nostre Seigneur me fait la grace de me donner sa paix dans tout cela, & de n'en estre point embarassé. Mais voicy l'ordre qu'il tenoit dans les affaires.

Il pezoit & consideroit beaucoup vne chose deuant que de la resoudre, sans tenir pourtant après si fort à son sens qu'il ne s'en démit facilement, où il voyoit que les raisons d'vn autre estoient meilleures que les siennes, ce qui est necessaire à tous ceux qui delibèrent d'vne affaire, mais assez rare; parce que chacun idolatre, s'il n'y prend garde, de son esprit & amoureux de ses lumieres, est bien aise de l'emporter & que ses opinions soient coronées. Aiant fait quelques reglements pour vne compagnie de pieté qu'il auoit digerez avec soin, & aiant supplié quelques personnes de vertu de les examiner, il en souffrit avec vne grande humilité la correction, & en fit luy mesme la rature, priant qu'on y employât d'autres paroles plus propres que les siennes.

Vne affaire estoit-elle resoluë, il se montroit prompt, ferme & constant à l'exécuter, & ne la quittoit pas qu'il ne l'eût mise au point qu'il la falloit. Il y en a plusieurs qui commencent beaucoup d'affaires, mais ils ne les acheuent iamais; ils ont bien chaleur & force au commencement, mais cette chaleur dans la poursuite vient à se refroidir & cette force à s'abbatre. La nature sage & parfaicte ouriere ne demeure pas ainsi en la production de ses ourages au milieu de sa besogne, elle leur donne leur accomplissement & leur perfection: l'Enfant ne sort point du ventre de sa mere qu'il ne soit entierement organisé, & qu'il n'ait tous ses membres. Monsieur de Renty concertoit vne affaire prudemment, il la commençoit promptement, il la poursuioit vigouteuse-

ment, & ne l'abandonnoit point, autant qu'elle dependoit de luy, qu'il ne l'ût mise à chef.

Il arriuoit pourtant quelquefois par vne autre conduite, que voiant vne affaire bien établie & bien liée, ou déjà en bon train & dans son courant, il la laissoit à vn de ses amis capable de la finir, non par inconstance d'esprit, mais pour en commencer vne autre; & ainsi pour en faire dauantage. Ioint aussi que par vne adresse d'humilité il vouloit euitter la louange, laquelle se donne bien plus à celuy qui termine heureusement vne affaire, qu'à celuy qui la commence.

Ce saint homme auoit dans les affaires, qui regardoient le seruice de Dieu, vne fermeté d'esprit inbranlable, qui ne se relâchoit, ny ne se rendoit iamais, & outre la force, dont ses paroles estoient animées, il faisoit prendre à son visage vne asûrance toute extraordinaire, encore qu'il fût toujours dans vn maintien doux & tranquille: & c'estoit particulièrement dans les assemblées, où paroissoit cette fermeté, où Dieu le reuestoit d'vne telle force, que ceux, qui le regardoient, se sentoient touchez de reuerence pour demeurer deuant luy dans la retenue & dans le respect. Quand il y parloit & opinoit, il auoit tant de lumiere en ses pensées, tant de solidité en ses iugemens, tant de force en ses raisons, & il prenoit d'vne si belle maniere vne affaire & scauoit si iustement en trouuer la iointure, que tous estoient contraints d'acquiescer & de se rendre.

Que si quelqu'un n'approuuoit pas autrement son auis & vouloit renuerser ses raisons, il scauoit les soutenir avec tant de puissance, particulièrement lors qu'il auoit quelque autorité dans l'assemblée, qu'il le faisoit reuenir; que s'il insistoit à les combattre, il ne disoit plus mot, mais son silence & la fermeté de son visage & de son maintien l'arrestoit sans oser passer outre, & apres l'assemblée il alloit luy demander pardon avec grande humilité, & luy faisoit connoître doucement que ce qu'il pretendoit, n'estoit pas le soutien de son opinion, mais de la cause de Dieu, à laquelle seule il s'arrestoit par le deuoir de sa charge, & qu'au reste il se

estoit disposé & estoit prest de ceder de bon-cœur à tous.

Il y a des esprits qui n'ont point de tenuë ny de fermeté dans les affaires, toujours chancelans & douteux, indecis & indeterminez, & apres la determination miiables & changeans, de sorte qu'on ne peut prendre pied sur eux. Mr de Renty estoit clairuoyant pour penetrer dans vne affaire, decisif pour la resoudre, & constant pour ne point varier dans vne resolution bien prise: on estoit assuré que, pour luy, il n'y auroit point de changement dans la chose: on pouuoit s'appuier sur ce qu'il disoit & il gardoit inuiolablement sa parole.

Quand on le prioit de se trouuer à quelque deliberation, pour y donner son auis, il s'y rendoit à point-nommé, sans faire attendre apres luy, il y prenoit sa place, & la derniere s'il pouuoit, & y paroissoit avec cette rare modestie & cet exterieur si bien composé qui edifioit tout le monde, dont nous auons parlé. Il écoutoit avec autant d'attention & avec vn esprit aussi present, commes'il n'ût point eu d'autres affaires, & puis disoit son opinion en peu de paroles fort energiques: La chose, dont il s'agissoit, estant decidée & nerequerant plus sa presence, il se retiroit aussi-tost, sans qu'on l'ût pû arrester vne minute dauantage, parce qu'il estoit auaricieux menager du temps, & qu'vne autre affaire pour le seruice de Dieu l'appelloit ailleurs.

Si Monsieur de Renty traitoit dignement & dans toutes les plus belles manieres, qui se peuuent, les affaires pour l'exterieur, ils'y prenoit encore pour l'interieur plus excellemment & dans des dispositions de grace tres-parfaites.

Quelque multitude d'affaires qu'il eut, & pour importantes qu'elles pûssent estre, il ne quittoit iamais ses exercices de pieté, & ne perdoit point le soin de sa perfection, mais le preferoit toujours à tout autre employ: il sçauoit que comme les viandes, mesme les meilleures, prises avec excès nuisent, & au lieu de fortifier l'estomach, l'affoiblissent & étouffent sa chaleur; de mesme les occupations exterieures les plus saintes, si vn homme s'en surcharge, luy apportent de grands preiudices, & éteignent les ardeurs de sa deuotion: pour cette cause, encore qu'il en eut vn tres-grand

nombre, il n'en prenoit toutesfois qu'autant qu'il en pouuoit porter, & veilloit singulierement à ce qu'elles ne le dissipassent point, qu'elles n'amortissent ses bons sentimens & ne secularisassent son esprit, mais plûtôt qu'elles luy seruissent à l'éleuer & à l'vnir encore plus à Dieu.

En effet il estoit en toutes sortes d'affaires & en toutes ses occupations exterieures toujours recueilly, & autant solitaire dans les plus grandes assemblées, que le sont les Ermites dans le profond de leurs deserts: sa modestie & sa contenance faisoit euidentement iuger qu'il estoit appliqué à son interieur & vny à Dieu, de qui il tiroit lumiere & force pour agir, & pour agir dauantage, & bien. Le n'agis pas moins pour mon recueillement, écriuit il vn iour à son Directeur, i'agis encore plus; car iaurois vn desir de tout faire, & i'agis d'vne maniere claire où ie n'ay point de part, car c'est nostre Seigneur qui fait tout.

Et vne autrefois il luy manda; l'usage à l'égard du monde est à l'ordinaire en moy; quand il faut écrire ou parler à ceux qui demandent auis, il semble que l'on possède route connoissance, & on se sent estre dans tout ce que l'on dit, & après, celas'efface de l'esprit, toutes les portes sont fermées, il n'en reste plus rien.

Et encore dans vne autre lettre: me trouuant vn iour fort chargé de diuerses affaires à écrire & à agir, i'eus mouuement d'en separer entierement mon esprit, & au mesme instant ie le sentis déchargé, & depuis rien ne m'a cousté, & si i'en fais plus sans y penser: cette grace m'a esté renouellée souuent, quoy qu'en diuerses manieres, & ie reconnois bien qu'elle est grande, & que i'en dois estre bien reconnoissant, parce qu'elle me sert pour me conseruer en simplicité au milieu de la multiplicité.

Dauantage encore qu'il n'oubliât rien de ce qui estoit de l'exterieur d'vne affaire, & qu'il y apportât tout ce que la prudence & le soin pouuoit afin de la faire reüssir, neanmoins il attendoit bien plus le succes de la benediction de Dieu, que de son industrie & de tous les moiens humains; c'est pourquoy il auoit grand recours à la priere, recomman-

tant instamment à Dieu toutes les choses qu'il entreprenoit, & dans les emplois & le chois des personnes qu'il y occupoit, il faisoit bien plus d'attention sur la grace que sur la nature & sur toutes les qualitez exterieures, puis qu'aussi l'effet qu'il pretendoit, regardant la gloire de Dieu & le salut du prochain, devoit principalement provenir de la grace.

Et comme il connoissoit que les affaires de Dieu ne se font pas sans peine, & que souuent elles sont combatuës de grandes oppositions iusques à estre renuersées, il estoit patient en leur negotiation pour souffrir tout sans perdre iamais courage ny se rendre pour aucune difficulté, esperant toujours d'en venir à bout; que si elle estoit empechée, il demeuroit en paix apres y auoir fait ce qu'il auoit pû. Il écri-
 uit à vne persone: c'est pitié que de nostre nature quand elle est applaudie, mesme dans la grace: c'est pourquoy i'estime à grande misericorde d'executer vne entreprise bien fondée, bien approuuée & reconnuë estre de l'esprit de Dieu par ceux qu'il a mis en son Eglise pour en iuger, mais que l'execution s'en fasse dans les contradictions & les
 croix.

Et à vne autre, nous pouuons bien auoir de bons & saints desseins, & Dieu nous les inspire, toutefois quand il permet qu'ils succedent au contraire, il faut adorer ses secrets, qui nous font plus de misericorde en nous rompant, que s'ils reüssissent avec grande consolation; nous deuons toujours craindre que nostre propre esprit ne s'arreste à quelque chose. Et à vne autre encore: Le bon Iesus à ses desseins, qu'il conduit par des moyens que nous ne choisirions iamais: & sa raison est qu'il se plait à rompre nos volontez, & empêcher que nous ne prenions nos appuis en la terre; c'est pourquoy il trauersé mesme les choses les plus iustes, estant plus ialoux du sacrifice de nos cœurs, que de toutes autres choses pour specieuses qu'ellès puissent estre.

Mais la principale regle que ce saint Homme obseruoit dās les affaires, estoit de ne les point regarder en elles mesmes, mais dans la volonté & le dessein de Dieu, & de s'y porter dans

dans cette veüe & dans cét esprit, d'où il arriuoit qu'il ne s'appliquoit pas aux affaires parce qu'elles estoient éclatantes, agreables, ou vtils, mais parce que Dieu vouloit qu'il s'y appliquât & y donnât ses soins; que les choses petites & les occupations basses luy estoient également considerables, & mesme souuent preferables; qu'il alloit aux œuures delaisées, aux emplois de charité inconnûs, & aux pauvres abandonnés, parce qu'il croyoit qu'il y auoit moins de nature & plus de volonté de Dieu; qu'il ne s'auançoit point ny ne s'ingeroit pour faire vne chose si Dieu ne le vouloit; s'il le vouloit, qu'il ne la pressoit & ne la precipitoit point, mais la laissoit venir doucement aux pas de sa prouidence & selon le cours de son vouloir.

C'est le témoignage que rendent de luy les memoires qu'on a enuoyés de diuers lieux. Il n'agissoit point, disent-ils, pour entreprendre aucune chose ny pour la mettre à chef par son propre esprit, ny par le mouuement de sa volonté, mais par celuy de l'esprit de Dieu, à mesure qu'il connoissoit son vouloir, de sorte que si apres l'auoir commécée, il sentoit ce mouuement interieur s'arrester, il s'arrestoit aussi sans la poursuiure: il ne faisoit iamais aucun proiet particulier, quoy qu'il veit les choses qu'il auoit à faire, mais il attendoit les ordres exprés de Dieu qui luy estoient declarez, ou par lumiere en l'entendement, ou par impression en la volonté, ou par quelque autre moyen qui luy en donnoit la certitude, que l'on en peut auoir en ces occurrences: D'où vient qu'une persone confidente luy demandant vn iour, s'il feroit vne certaine chose en tel temps, il luy répondit, sçavez vous pas que ie n'ay point de demain? & vne autre fois il luy dit; Je vois cinq ou six choses à faire par necessité, mais ie ne sçauois dire laquelle ie voudrois la premiere, ny quand, ny comment, car par la misericorde de Dieu ie suis tout à fait indifferent pour tout.

Il écriuit à son Directeur. I'espere d'estre à Paris à la fin de Septembre, ie receuray là vos ordres pour aller où vous estes, lors que ie vous incommoderay le moins, quand i'y seray, i'y feray ce qu'il plaira à nostre Seigneur par vous; le ne

« premediteray rien sinon de luy aller obeir & suiure sa con-
 « duite par vous, & en tout le mieux qu'il me sera possible. l'ay
 « experience que lors que ie pensois faire le plus en quelques
 « lieux, ie n'y faisois rien; Cela m'a appris à aller nû, & quand
 « i'y pense le moins, m'abandonnant à Dieu, c'est lors qu'il s'en
 « fait dauantage: c'est pourquoy ie le laisseray faire, & vous en
 « luy.

Vn de ses amis l'accompagnant vn iour de la semaine-
 sainte à Paris pour aller prendre à l'épargne vne grande som-
 me d'argent, que la Reyne auoit donnée avec vne bonté &
 vne liberalité vrayement Royale pour aider l'Eglise naissan-
 te de Canada; Monsieur de Renty luy dit, ayant passé par
 « deuant vne Eglise, où l'on chantoit le seruice diuin: Faisons
 « ce que Dieu veut, & n'ayons attache qu'à sa sainte volonté:
 « c'est vne grande consolation d'estre dans l'Eglise à ouïr les
 « louïanges de Dieu, mais demeurons maintenant icy, puis-
 « que c'est son bon-plaisir. Cet amy rapportant cecy adiouste
 dans son memoire, que plusieurs personnes admiroient ce
 grand recueillement & cette vnion intime avec Dieu en vn
 homme, qui auoit tant d'affaires comme luy, mais qu'il estoit
 au dessus des affaires, attaché vniquement à Dieu & à l'e-
 xecution de sa volonté.

Il a dit à vne autre persone qui auoit de grands desseins pour
 le seruice de Dieu, mais qui n'estoient pas encore de saison:
 « Ne nous appliquons qu'au iour la journée; les pensées, que
 « vous auez font saintes, mais il faut s'abandonner à Dieu pour
 « l'auenir, & employer le temps, qu'il nous donne, à l'aimer &
 « à suiure ce qu'il nous fait connoître estre de sa volonté, &
 « se tenir toujours deuant luy en esprit de sacrifice avec nostre
 « Seigneur I E S V S - C H R I S T.

Mais pour la fin il faut que ie rapporte vne lettre qu'il écri-
 uit à son Directeur l'an mil six cens quarante six, qui preuue
 bien la Verité de cestrois points, & est pleine de beaucoup de
 « lumeres. Je vous diray quelque chose, luy mande t'il, de ce
 « qui se passa hier en moy, qui vous fera connoître mon état
 « present: Entendant l'Euangile de l'Assomption de la sainte
 « Vierge qui parle de Marthe & de Marie, la plus part des

sentimens, que cet Euangile m'auoit autresfois donnez , me reuinrent en l'esprit, à sçauoir, que l'oraïson & la pure occupation en Dieu est beaucoup preferable à tous les exercices exterieurs, quoy que saints, puis que Marthe faisant le plus saint & le meilleur, estoit reprise de troubles, & Marielouïée pour son repos. Ce mot, *Turbaris erga plurima*, m'a serui long-temps pour me separer des choses exterieures, & mesme des interieures, quoy que bonnes, qui n'estoient pas absolument necessaires, cōme d'aller visiter & instruire les pauvres, lire ou écrire quelque chose de deuotion, & autres semblables. Je connoissois qu'il estoit expedient pour lors de les quitter, afin de se former & de s'afermir dans l'inaction de nostre propre, & arriuer au denuëment de nostre volonté & de nostre viuacité, pour attendre l'ordonnance diuine & la suiure en sage simplicité par l'esprit de IESVS-CHRIST qui viuifie, & qui vit en ceux qui l'écoutent avec respect.

Mais il faut noter, que depuis trois ou quatre mois que ie me tien icy en la basse Normandie, ie suis quasi continuellement occupé en choses exterieures, à parler à tout le monde, à traiter les malades qui me viennent trouuer, à voyager, à accorder des differens, à bastir, & vne grande Eglise, qu'il est necessaire de démolir & d'accroistre, & pour laquelle il faut beaucoup de desseins, & mesme faire des modes, à cause qu'il n'y a persone en ce pays qui entende l'architecture, dont j'ay eu autresfois connoissance: il m'a donc fallu rappeler mes anciennes idées. & m'y remettre tout de bon.

Hier apres y auoir trauaillé tout le matin oyant l'Euangile susdit, & particulierement ces paroles, *Turbaris erga plurima*, il me vint vne lumiere interieure, & me fut dit, *non turbaris erga plurima*. Je connûs lors, mais d'vne maniere euidente, que les choses que l'on fait par l'ordre de Dieu, quelles qu'elles soient, ne troublent point, & ie vis nettement, au moins ce me semble, que sainte Marthe est reprise non de faire vne bonne œuvre, mais de la faire avec empressement, & nostre Seigneur par ces mots, *Turbaris erga plurima*, luy monstre qu'elle faisoit son action en trouble & dans vne agi-

" tation d'esprit inordonnée , quoy que pretextée d'une tres-
 " loüable fin : que la chose principalement necessaire estoit
 " d'écouter la Parole eterneile; de sorte que comme son Hu-
 " manité, soit pour agir , soit pour prêcher, ou pour faire tou-
 " te autre chose , receuoit les mouuemens de la Diuinité, &
 " *meipso facio nihil: sicut audio, hæc loquor*, disoit il, de mesme nous
 " deurons prendre nostre direction de I E S V S - C H R I S T,
 " qui est cette Parole de vie eterneile : c'est pourquoy il ne
 " faut rien faire en trouble, mais faire tout en paix dans cet
 " esprit.

" Je reçûs donc alors grand appuy pour tous les petits of-
 " fices exterieurs, auxquels mon deuoir m'attachoit, & ie n'ay
 " point fait de difficulté de m'abandonner à cet ordre sainte-
 " ment desordonné, dans lequel ie sens que Dieu me veut,
 " pour faire ce qui sans moy ne pourroit estre fait: depuis trois
 " mois ie n'ay pas peut-estre fait trois ou quatre heures d'orai-
 " son à genoux de suite hors de l'Eglise, & s'il ne s'en faisoit
 " qu'en cette façon, i'aurois bien mal fait mon deuoir. Il est
 " certain que ie l'ay bien mal fait, mais ie ne laisse pas de sça-
 " uoir que Dieu dans les emplois, qu'il donne, fait bien sentir
 " sa presence & sa force pour lier l'ame à foy par des manieres
 " bien intimes, & que l'ouurage exterieur se peut faire du bout
 " des doigts, pendant que le cœur ioüit d'une alliance reelle
 " des Enfans avec leur Pere par l'esprit du Fils, qui nous met
 " en sa communion & en celle de la saincte Vierge, des An-
 " ges, & des saints, & de tout vn ciel, si vous voulez : tant
 " ce Seigneur donne d'ouerture à l'ame, quand il luy plaist,
 " & comme il luy plaist.

" J'auois pour lors vne impression si sensible de Dieu, &
 " neanmoins si au dessus des sens, parce que cela se passe dans
 " la partie la plus noble de l'ame qui est l'esprit, que l'on m'eut
 " roulé comme vne boule, sans perdre mon Dieu de veüë.
 " Tout pourtant est icy passager, car nostre Seigneur roule la
 " boule d'une étrange façon quand il veut, & ces diuerses fa-
 " çons sont faites pour aider l'ame, & la façonner à tout, &
 " faire qu'elle n'ait rien vers foy ny selon foy, mais tout pour
 " son Dieu & selon son Dieu.

De plus ie voiois euidentement qu'une persone, que Dieu „
emploie en des choses basses, laquelle s'y applique avec au- „
tant de fidelité que si elles estoient bien releuées, & se tient „
à son ordre par obeissance & par aneantissement de soy, ne „
luy est pas moins agreable, que celle qui est occupée en des „
fonctions éclatantes. Il n'est pas question des œuvres, mais „
de la fidelité à s'abandonner à Dieu, & à faire ce qu'il veut. „
Qui n'aimeroit à conuertir mille mondes, & porter toutes les „
ames à Dieu ? toutesfois tu ne porteras que des pierres, ou „
mesme tu ne feras rien. Il y a beaucoup à sacrifier dans la „
patience, & beaucoup de consolation en l'autre party, & ie „
crois qu'il est sans comparaison plus rare de trouuer vne ame „
fidele à la patience, & à ne vouloir pas faire plus que Dieu „
ne veut d'elle, que des fideles dans les actions qui pa- „
roissent. „

Ie sçay bien qu'en tout Dieu fait le tout, mais le sacrifice „
de patience & de cessation est plus grand à vn cœur, qui a l'a- „
mour & le zele de son honneur, & qui en suite est porté à l'o- „
peration, & a besoin de plus de force pour se retenir, que „
pour agir. Le Rien ne peut seruir de nourriture, & la faim, qui „
deuoreroit les quatre coings du monde, est contrainte de „
circuler en ie ne sçay combien de manieres d'offrandes „
dans son feu de reuerbere, iusques à ce qu'elle ait trouué „
issuë par ce regard, que Dieu est suffisant à soy mesme, qu'il „
n'a nullement besoin de nous pour sa gloire, & que c'est plus „
nous faire honneur de nous employer, que ce n'est pas son „
seruice, parce que nous ne sommes iamais si purs que nous „
ne ternissions touïjours quelque chose & ne luy fassions per- „
dre vne partie de son éclat ; de sorte que nous ne som- „
mes pas seulement des seruiteurs inutiles, mais encore „
nuisibles. „

Ie vous diray de plus ce mot pour vous faire connoître „
ce que vous deuez sçauoir, afin de me radresser; Que i'ay vne „
honte veritable & sensible de ne rien faire pour Dieu, i'en „
porte par fois vne angoisse si forte, considerant sa dignité, son „
amour, ses dons & ses communications par l'alliance de „
I E S V S- C H R I S T, & de son Esprit, qu'elle seroit extrême „

“ & insupportable ne voiant en moy qu'impuissance à tout
 “ bien, que miseres & pechiez, si ie ne m'accoisois par ce que
 “ ie viens de dire, de la suffisance que Dieu a en soy mesme, &
 “ qu'il fait de nous ce qu'il luy plaist, en nous tenant dans l'o-
 “ beissance & l'aneantissement. Voyla sa lettre, où il y a bien
 “ à apprendre.

CHAPITRE IV.

L'usage qu'il faisoit des choses, & l'application qu'il auoit pour cela à l'Enfance de nostre Seigneur.



Il faut necessairement que Monsieur de Renty ayt fait vn excellent usage des choses qui luy arriuoient, & generalement de toutes les creatures, pour estre monté à vn si haut degré de perfection, dont cet usage, pour ce que l'homme y met du sien, est sans doute le moien principal, auquel tous les autres sont subordonnez, & duquel ils dependent avec tant de sujection, que sans luy ils sont inutiles, & deuiennent mesme des empéchemens.

Il est vray que Dieu a mis dans le sein de chaque chose, dans les richesses & la pauureté, dans les honneurs & les opprobres, dans la fanté & les maladies, dans les biens & dans les maux vne force secrete & vne capacité morale pour nous aider à faire nostre salut, pour nous estre des instrumens de perfection, & des liens à nous lier & nous vnir à luy; mais pourtant c'est selon qu'on s'en sert: car si vous vous en seruez bien, elles produiront ce bon effet en vous, sinon elles en feront vn fort mauuais, & au lieu de vous vnir à Dieu, elles vous en éloigneront dauantage, elles vous rendront plus imparfait & plus vicieux, & pouuant vous sauuer estans bien prises, les prenant mal & de trauers elles feront cause de vostre ruine. Cet homme illuminé, qui sçauoit ce secret tres-important de la vie spirituelle, a employé tous ses soins

pour le mettre parfaitement en pratique , mais pour mieux entendre cecy, il faut monter iusques à la source.

Ce saint homme a eu toujours extrêmement à cœur & a pris pour le capital de sa conduite & de toutes ses deuotions, comme nous l'auons dé-jà remarqué & qu'il est aisé de le voir en toute cette histoire, de s'vnir à nostre Seigneur **IESVS-CHRIST** : & avec tres-grand sujet, parce qu'il n'y a point de salut, comme dit S. Pierre, hors de **IESVS-CHRIST**, & Dieu n'a choisi que luy seul pour estre le mediateur de redemption entre luy & nous, & le reparateur de nos miseres; parceque Dieu le pere n'aime d'vn amour de vraie amitié dans tout l'vniuers que luy seul; c'est pourquoy S. Paul l'appelle le fils de son amour & de ses complaisances: de sorte que, comme le mesme Apôstre dit, il nous rend agreables à ses yeux en luy & par luy, il nous trouue beaux & rout éclatans de gloire quand nous sommes liés à luy, cette liaison nous communiquant cette beauté & cette gloire, où, s'il nous voit seuls & sans luy, nous luy paroissions difformes, hideux & abominables, parce qu'en effet sans luy nous le sommes, n'estans remplis que de pechez & ses ennemis; tellement qu'une persone luy est d'autant plus chere & plus aimable, qu'elle est plus iointe à son fils, comme il paroît en nostre-Dame & aux Apostres, & nos actions ne luy plaisent & ne sont point bonnes, si elles ne luy sont vnies, non plus que la partie de nostre corps n'est viuante, si nostre ame ne l'anime.

Monsieur de Renty ayant parfaitement compris cette verité fondamentale du Christianisme, s'est étudié toujours & en tout de s'attacher & de s'vnir à nostre Seigneur **IESVS-CHRIST**; il s'est formé dessus luy pour regler son interieur & son exterior; il le regardoit incessamment comme sa Loy & sa Regle, & l'adoroit tous les iours sous ce titre; il s'appliquoit avec grande reflexion à ses paroles, à ses actions, à ses desseins, à ses mysteres, & il en receuoit de grandes lumieres. Voicy ce qu'il m'écriuit vn iour de celuy de l'Incarnation.

L'ay eu la grace par diuerfes fois d'auoir des connoissances »

« tres-intimes du mystere ineffable caché en Dieu depuis tous
 « les siecles, & manifesté maintenant à ses Saints, comme par-
 « le S. Paul, qui est l'alliance qu'il a contractée avec nous en
 « I E S V S - C H R I S T. Ces connoissances causent autant d'é-
 « tonnement que d'amour, & à dire selon mon sentiment,
 « l'homme éclairé & penetré de ces veritez ne demeure plus
 « homme, mais il est aneanti, & tout son desir est de se perdre
 « & se liquéfier afin de changer de nature, & entrer en l'esprit
 « de I E S V S - C H R I S T, pour en luy n'agir plus que par luy.
 « J'ay conçu de si grandes choses de l'Humanité de I E S V S -
 « C H R I S T vnies à la Diuinité, qu'il est certain que les paro-
 « les n'ont point d'expression pour les declarer. Combien cet-
 « te alliance diuine a-t'elle approfondi cette sainte Humanité
 « dans l'aneantissement de foy mesme & dans le sacrifice d'a-
 « mour, sur la veüe de la grandeur de Dieu ! quel honneur à
 « la nature humaine d'auoir vn tel Predestiné, & à nous quel-
 « le gloire d'estre appellés & choisis pour entrer en sa faueur
 « & monter à Dieu & à sa iouïssance par luy ! Il me faudroit
 « tout auioird'huy si j'auois à écrire la veüe que j'ay euë de la
 « sagesse & de la bonté de Dieu touchant le mystere d'a-
 « mour, qu'il nous a ouuert en son Fils. Voyla vne partie de
 « ce qu'il m'écriuit sur ce sujet.

Or encore qu'il eut application & ouverture à tous les
 mysteres de nostre Seigneur, la plus grande pourtant a esté
 à celuy de son Enfance, à laquelle nostre Seigneur l'a lié
 d'vne façon tres-speciale; Et voicy comme la chose arriua.

Estant contraint de faire vn voyage à Dijon pour le pro-
 cés que nous auons rapporté, il y entendit parler de Sœur
 Marguerite du S. Sacrement Religieuse Carmelite au Con-
 uent de Beaulne, à qui nostre Seigneur faisoit des faueurs
 tres-particulieres, & qui menoit vne vie fort extraordinaire
 fondée sur vne veritable & solide vertu. Comme nostre Sei-
 gneur a diuerses voies pour fantifier les ames & conduire
 à chef ses desseins, il occupoit absolument cette ame choi-
 sie dans le mystere de son Enfance, & par ce canal faisoit
 couler en son cœur vn torrent de graces & vne abondance
 de grands dons, non seulement pour elle, mais encore pour
 d'autres,

d'autres, comme il se pourra voir dans la vie, qu'en fait vne persone tres-digne d'un tel ouurage.

Monsieur de Renty eut mouuement d'aller à Beaulne, qui n'est éloignée de Diion que de sept lieues, pour se recommander aux prieres de cette sainte Fille; il y alla, & encore qu'il ne la veit & ne luy parla point, y ayant deja treize ans que par vne conduite particuliere de nostre Seigneur elle n'auoit parlé à aucune persone seculiere, il retira neanmoins vn grãd fruit de ce voyage, cōme il le manda, estãt de retour à Dijō, à la Mere Prieure du lieu, à qui il escriuit. *Je n'ay point de paroles pour vous dire les misericordes, que j'ay receuës du voiage que j'ay fait à Beaulne; Ma sœur Marguerite me marque dans le saint Enfant Iesus vn denuēmēt de ce siecle si parfait, qu'il me semble que c'est mon rēdez-vous pour me vider de tout. L'année d'apres, il y fit vn secōd voiage, & nostre Seigneur disposant autrement & les langues & les esprits, il eut la consolation de parler à cette bonne Religieuse, avec laquelle il contracta vne alliance de grace tres-étroite & recūt par son moyen de grands dons; le principal desquels & comme la source des autres, fut que nostre Seigneur l'attacha, comme elle, d'une façon tres-speciale au mystere de son Enfance, luy en imprima les traits & luy en communiqua l'esprit & la grace.*

Ce saint Homme, de qui le iugement doit auoir beaucoup de poids, pour auoir esté si prudent & si sage, & pour auoir possédé vn si profond discernement des choses spirituelles, a toujourns eu vne haute estime de cette sainte Fille, a approuué sa conduite, & rémoigné qu'il tenoit à grande benediction la connoissance que nostre Seigneur luy en auoit donnée, & qu'elle l'auoit beaucoup aidé, mesme apres sa mort.

Il m'escriuit à ce propos le dix-huictieme de Iuin de l'an mil six cens quarante-huict, qui fut celuy de sa mort. Le saint Enfant Iesus a tiré nostre bonne sœur Marguerite du S. Sacrement à foy, dans des dispositions toutes rapportantes à sa vie & à sa grace miraculeuse. J'ay reçū grande presence, liaison & secours d'elle depuis sa mort: la grace m'a

« esté toute renouellée pour y entrer , selon que le permet
 « mon état & mon infirmité, i'en ay connû la solidité. Et vn
 « mois apres il me manda : hier par vne bonté singuliere de
 « Dieu i'eus la veuë de sa Maiesté, de S. Iean Baptiste , & de
 « ma sœur Marguerite, qui me furent representez si viuement
 « en l'esprit , que ie ne peux douter de cette verité! ô quels ef-
 « fets produisent ces presences , & quel amour allument ces
 « regards! Je suis tout renouellé de respect vers ce grand
 « Saint mon patron, & vers cette digne seruante de Dieu qui
 « l'honoreit beaucoup estant en terre, & qui sans doute l'aura
 « prié de me proteger. Il est vray que l'œuure de Dieu en elle
 « est vn continuel prodige de grace, & vn chef-d'œuure de sa
 « main.

Maintenant pour reuenir à son application à l'Enfance
 de nostre Seigneur faite principalement en son second voia-
 ge à Beaulne, voicy ce qu'il en écriuit à vn Pere de l'Oratoire
 Confesseur des Carmelites de là. Il faut que ie vous die que
 « dés le premier voyage que ie fis il y a plus d'vn an vers vous,
 « i'en remportay bien l'estime & le respect de la deuotion à
 « l'enfance de nostre Seigneur; mais mon établissement ny
 « mon fond ne se trouuoit pas là , ie m'y mettois de temps en
 « tēps, mais ce n'estoit pas ma principale nourriture, où main-
 « tenant le saint Enfant Iesus m'a fait la tres-grande grace
 « de se donner à connoître à moy & de s'ouuir , & ie trouue
 « en luy tout, & i'y suis renuoié pour tout. Et il manda à la Me-
 « re Prieure: le vous diray que le saint Enfant Iesus me veut
 « faire la misericorde de m'appliquer particulièrement à l'hō-
 « norer , & à me donner à luy pour entrer dans ses dispositions
 « saintes, pour faire vsage de ma vie & de mon sacrifice par la
 « conduite de son Esprit.

En suite de cela il se consacra à nostre Seigneur Enfant
 en ces termes, dont il fit deux copies de sa propre main, & en
 enuoia l'vne à sœur Marguerite , toute écrite de son sang, &
 que l'ongarde au conuent par deuotion , & l'autre vn peu
 plus étenduë à son Directeur, mais où il a seulement signé
 son nom de son sang, en voicy la teneur.

En l'honneur de mon Roy , le saint Enfant Iesus.

IE me suis consacré ce iour de Noël de l'an mil six cens »
quarante trois au saint Enfant Iesus, luy referant tout mon »
estre, mon ame, mon corps, mon franc-arbitre, ma femme, »
mes enfans, ma famille, les biens qu'il m'a donnés, enfin »
tout ce qui me peut concerner, l'ayant supplié d'entrer en »
possession & en propriété totale & fonciere de tout ce que »
ie suis pour ne plus iamais viure qu'en luy & pour luy en qua- »
lité de sa victime, separée de tout ce qui est de ce siecle, n'y »
prenant plus de part, que selon les applications qu'il m'en »
donnera & me permettra. Tellement que dorenavant ie me »
dois regarder comme vn instrument en la main du saint En- »
fant Iesus pour faire tout ce qu'il luy plaira dans vne grande »
innocence, pureté & simplicité, sans reflexion, ny retour »
sur quoy que ce soit, sans prendre part à aucun œeuve, sans »
auoir ioye ny tristesse de ce qui arriue, ne regardant point les »
choses en elles mesmes, mais dans sa volonté & sa conduite, »
laquelle nous tâcherons de suiure par la presence que nous »
rendrons à sa creche & aux états diuins de son Enfance. Ie »
perds donc auourd'hui mon estre propre pour deuenir tota- »
lemènt l'esclau subsistant sur le S. Enfant Iesus à la gloire »
du Pere & du S. Esprit. »

Ie signe entre les mains de la tres-saincte Vierge ma mere, »
ma patronne & ma protectrice, & en la presence de saint »
Ioseph. »

GASTON JEAN BAPTISTE. »

Comme Monsieur de Renty se consacra de tout son cœur
au saint Enfant Iesus, aussi cet aimable Enfant se donna li-
beralement à luy, faisant connoître à sœur Marguerite du
S. Sacrement qu'il seroit conduit & animé de l'esprit de son
Enfance, & qu'il se bailloit à luy pour estre son maistre, sa
lumiere & son intelligence; & luy montrant vn iour son
cœur, il luy dit, voila la demeure de mon seruiteur; à qui
elle écriuit comme nostre Seigneur Enfant se donnoit à luy.

pour luy tenir lieu d'air spirituel & diuin , & que comme il respiroit incessamment l'air materiel pour la vie de son corps , il vouloit de mesme qu'il le respirât en tout & par tout pour celle de son ame, & que son Innocence, sa Pureté, & sa Simplicité subsistassent en luy au lieu de luy mesme, destruisant tout ce que sa nature auoit de corrompu & de gasté.

En quoy il fit vn si grand progrès, qu'elle le voyoit souuent dans vn rayon de lumiere si penetré & si rempli de la grace de cette sainte Enfance que cela est inexplicable , & pour en quelque façon l'expliquer, elle disoit, il est dans la grace de l'Enfance de Iesus comme vne éponge dans la Mer: il est encore sans comparaison plus perdu en cette mer inépuisable des richesses infinies de cette diuine Enfance. Et luy
 « mesme écrit à vne persone. Le diuin Roy de la Creche le
 « saint Enfant Iesus me fait tant de faueur que ie vous supplie
 « de l'en remercier, elles sont inexplicables.

Depuis ce temps toutes les veilles des vingt-cinquiemes iours des moys, il entroit dans sa Chapelle sur les dix-heures du soir, & demouroit en oraison iusques à minuit qu'il adoroit le moment precieux de la naissance de nostre Seigneur & son entrée dans le monde, faisant quelques actes extérieurs de deuotion deuant l'image du saint Enfant Iesus; lequel il honoroit encore en vn pauvre enfant qu'il faisoit dîner à sa table, & luy rendoit des respects qui ne se peuuent dire. Pendant tout le temps qu'il celebroit le voyage de l'Enfant Iesus en Egypte & son retour en Nazaret, il donnoit tous les iours à dîner à trois pauvres en l'honneur de Iesus, de Marie & de Ioseph, & n'alloit point en carosse, quoy que ses affaires l'obligeassent d'aller bien loing avec tres-grande peine, & qu'il n'ût pas encore quitté tout à fait son catosse, comme il fit du depuis.

SECTION VNIQUE.

Suite du mesme sujet.

A Ppliqué donc ainsi au mystere de l'Enfance de nostre Seigneur remply de sa grace & animé de son esprit , à mesure qu'il y faisoit progrès , il y receuoit plus de lumiere & des impressions plus parfaites. Son Directeur ayant desiré qu'il mît par écrit ce qu'il pensoit de ce mystere , & en quoy consistoit sa grace, Voicy ce qu'il luy répondit dans vne lettre qu'il luy enuoya le cinquième de Nouembre de l'an mil six cens quarante-cinq.

Vous m'avez commandé d'écrire en quoy consiste la ,,
grace de l'Enfance de nostre Seigneur , selon que ie la peux ,,
reconnoistre ; cét adorable Seigneur m'a renouellé ce ma ,,
tin deux connoissances qu'il m'en auoit données depuis vn ,,
mois à trois iours l'vn de l'autre , par lesquelles ie vous expri ,,
meray ce que i'en conçois. ,,

Il y a donc enuiron vn mois qu'estant à l'Eglise ie me ,,
trouuay interieurement inquieté sur la deuotion de l'En ,,
fance de nostre Seigneur , parce que mon esprit fut frappé ,,
de cette pensée , que le Chrestien doit regarder I E S V S ,,
C H R I S T tout entier depuis son Incarnation iusques à l'é ,,
tat de sa gloire , où il est assis à la dextre de son Pere , & d'où ,,
auec luy il nous enuoye son S. Esprit ; qu'il falloit s'adresser ,,
à tous ses mysteres selon nos besoins , & que de se lier à vn ,,
particulier estoit se faire des deuotions tronçonnées qui li ,,
mitoient l'étenduë de la verité & de la grace ; ie m'en allay ,,
après communier m'estant abandonné à Dieu, comme c'est ,,
mon fond ordinaire ; quelque temps apres la communion, ,,
ie veis dans vne lumiere, qui me fut communiquée, nostre ,,
Seigneur tout entier , c'est à dire, tous ses mysteres depuis ,,
son Incarnation iusques à l'état de sa gloire où il est à present ,,
nous gouernant , & en particulier la grandeur & la dignité ,,
de celuy de son Enfance ; & on me fit connoître comme ce ,,

“ mystere est nostre porte & nostre adresse pour nostre con-
 “ sommation iusques à la gloire; que c'est luy où nous devons
 “ tendre & toujournous y tenir, & que ce seroit temerité
 “ d'aller aux autres de mesme.

“ Je voyois temerité de vouloir & de demander des croix
 “ par nous mesmes, parce que c'est à la grace de nous y con-
 “ duire & de nous y soutenir; Je voyois temerité de demander
 “ le Thabor, c'est à dire, des lumieres: En fin qu'il ne falloit
 “ point d'abord nous adresser aux autres mysteres de nostre
 “ Seigneur, mais seulement à celuy de son Enfance, qui nous
 “ met dans l'ignorance, dans la separation & l'inapplication
 “ des choses de cette vie pour n'en user que dans ses besoins
 “ & selon que l'on les donne, qui nous tient dans vn grand
 “ silence, & qui enfin produit vne vie de mort pour l'exte-
 “ rieur, mais où pour l'interieur la tres-sainte Ame de nostre
 “ Seigneur s'occupoit continuellement dans le regard vers
 “ son Pere, dans son amour, dans le zele de sa gloire, dans l'of-
 “ fre de soy-mesme, & dans l'obeissance pour aller en Inno-
 “ cence, en Pureté & en Simplicité à tous les états, par les-
 “ quels il auoit arresté qu'il passât.

“ Je voyois donc que pour nous bien conduire en toutes
 “ nos dispositions, soit de lumiere, ou de tenebres, de Thabor
 “ ou de la croix, nous deuions toujournous pour y recevoir, con-
 “ seruer & accroistre la grace, commencer par l'Enfance de
 “ nostre Seigneur, qui nous enseigne l'aneantissement de nous
 “ mesmes, la docilité à Dieu, le silence, & l'innocence sans re-
 “ gard ny pretension sur nous, mais avec l'abandon d'un En-
 “ fant de grace, & d'un Enfant de l'Enfant I E S U S. Cette con-
 “ noissance m'établit plus que iamais dans la liaison à ce my-
 “ stere: ie sentis là mon fond, & i'y demeure en attente & en
 “ respect pour faire ce que demanderont de moy les momens
 “ consecutifs; car l'ame ne s'éleue à rien par soy-mesme, mais
 “ au contraire elle s'aneantit & se laisse mener en petitesse avec
 “ grande reconnoissance de ce qui se passe, & simplicité d'un
 “ regard pur & abandonné. Ha! mon Pere que ie seray coupable
 “ deuant Dieu, de correspondre si peu à la grandeur de ses
 “ dons; c'est ma douleur, & bien sensible, comme il le sçait!

Quelques trois iours après, ces paroles de S. Paul me furent mises tout d'un coup dans l'esprit. *Hoc sentite in vobis quod & in Christo Iesu: &* le reste, mais l'effet principal fut sur celles-cy. *Semetipsum exinanivit formam serui accipiens, &* puis sur ces autres, *factus obediens usque ad mortem, &* la lumiere me fut donnée pour connoître, que ces paroles portoient la preuve de ce que i'auois veu il y auoit trois iours, & le vray procédé de IESVS-CHRIST, qui dans son Enfance s'estoit aneanty soy mesme iusques à la forme de seruiteur, & pour le reste de sa vie iusques à sa mort dans la Croix s'estoit rendu obeïssant, suiuant les ordres de son Pere non en éléction, mais en soumission & en patience: cette seconde veüe m'affermir encore plus & d'une autre façon dans ce mystere.

L'Enfance donc de nostre Seigneur est vn état où il faut mourir à tout, & où l'ame en foy, en silence, en respect, en innocence, pureté & simplicité, attend & reçoit les ordres de Dieu & vit au iour la iournée en abandon, ne regardant d'une certaine maniere ny deuant soy ny derriere soy, mais s'unissant au Saint Enfant IESVS, qui aneanty à soy-mesme reçoit rous les ordres de son Pere pour estre visité des Pasteurs & des Mages, pour estre circoncis, pour estre porté en Ierusalem, pour aller & demeurer en Egypte, pour en venir, pour se transporter au Iordain à estre baptisé, au desert à estre tenté, pour prêcher, pour apres mourir en Croix, & puis estre releué & consommé dans la gloire. Il nous faur, mon Pere, suiure, ce me semble, sur ces traces IESVS-CHRIST nostre modele, par la grace de son Enfance.

Voila ce qu'il écrit à son Directeur de ce mystere, que pour cela il preferoit aux autres, comme il le témoigna à vne personne luy mandant. Il faut pour vne raison aller plus tost à l'Enfance de nostre Seigneur qu'à sa croix & à ses autres mysteres, parce qu'il s'est aneanty luy-mesme, comme dit le grand Apostre, de son propre mouuement, & a choisy la creche, & non la Croix, mais il a esté conduit à la Croix par obeïssance, pour nous apprendre de choisir de nous mesmes l'aneantissement, & puis nous laisser mener comme en-

“ fans dociles en Egypte, au defert, à la Croix, & à la gloire.

Outre ces solides lumieres & ces belles connoissances qui regardent l'Enfance de nostre Seigneur, Il en eut encore d'autres touchant ces trois vertus de Pureté, d'Innocence & de Simplicité, où consiste principalement l'esprit de ce mystere, & qu'il produit dans vne ame qui luy est liée.

“ Il en fit vn petit écrit qui commence : J'ay veu mon ame
 “ dans vn rempart d'Innocence & sur le fondement de la
 “ mort, du neant & de la nudité pour viure en pureté diuine
 “ avec le Saint Enfant I E S V S, mais parce qu'il n'est pas si in-
 telligible, voicy l'éclaircissement qu'il en donna à son Di-
 recteur.

“ J'ay veu mon ame sur la situation de la mort, du neant, &
 “ de la nudité, c'est à dire, dans la purgation & dans le vuide
 “ d'elle-mesme, & de tout ce qui est créé. Quand l'ame est
 “ suspenduë en vn desert, où elle n'a plus ny veuë de quoy que
 “ ce soit, ny aucun appuy à rien, il me fut monstré que Dieu
 “ la tire hautement à soy par vn bout de corde du pur amour,
 “ qu'il luy iette du Ciel, comme disoit sainte Catherine de
 “ Genes, & que cette corde estoit l'Enfant I E S V S, en l'v-
 “ nion duquel nous deuous rendre à Dieu tous les vsages
 “ d'vne victime, qui en Pureté, en Innocence & en Simplicité
 “ se sacrifie & se consume pour sa gloire.

“ Il m'est donc monstré tres-souuent, & c'est mon fond se-
 “ lon que ie le peux dire avec toutes mes infidelitez, que ie ne
 “ deuois plus agir que par la conduite de l'Enfant I E S V S, &
 “ ses operations saintes & diuines m'estoient proposées, son
 “ pur amour vers son Pere, son sacrifice pour sa gloire & pour
 “ la destruction du peché, sa soumission à tous ses ordres qu'il
 “ voyoit distinctement, qu'il attendoit en patience, & qu'il
 “ executoit selon que venoit leur temps, en la Creche, en son
 “ seiour d'Egypte, en sa vie cachée, en ses trauaux iusques à
 “ sa mort, ne faisant rien par son mouuement, mais tout par
 “ celuy de Dieu. On me fait voir que c'est ainsi qu'il faut que
 “ j'agisse avec cette Pureté d'esprit, pour la conseruation de
 “ laquelle l'Innocence & la Simplicité m'ont esté donnés,
 “ comme deux remparts qui la defendent.

L'Innocence

L'Innocence m'est comme vn rempart de la Pureté, ou ,,
comme vn crystal lumineux, au trauers duquel on me dit ,,
que ie deuois voir les choses innocemment, c'est à dire, sans ,,
m'appliquer au mal, & sans que les vices & les desordres des ,,
hommes m'arrestassent & me fissent impression, ny qu'il en ,,
demeurât rien dans mon esprit. Cette Innocence porte à vne ,,
grande benignité & à vne grande douceur enuers le pro- ,,
chain, & elle m'est d'un secours incroyable dans mes occupa- ,,
tions, à cause de tant de sortes de maux & de pechez, dont ,,
i'ay iournellemēt la connoissance, & où il semble que nostre ,,
Seigneur vueille que ie m'employe pour y apporter quelque ,,
remede. L'Innocence donc s'applique à tout ce qui est de- ,,
uant moy, afin que la Pureté ne soit point troublée en son ,,
operation, c'est à dire, en son regard vers Dieu. ,,

La Simplicité est l'autre rempart de la Pureté & agit sur le ,,
passé, separant l'ame de toute duplicité, & multiplicité, & ,,
luy ostant toutes les veuës de ce que l'on a fait & de ce que ,,
l'on a veu: ainsi l'ame est comme enclose entre deux remparts ,,
& entre deux murailles, dont l'une la protege contre le ,,
present & l'auenir à sçauoir l'Innocence, & l'autre, qui est la ,,
Simplicité, contre le passé. ,,

Bienheureux sont ceux qui sont appelez au mystere de ,,
l'Enfance de nostre Seigneur, & à connoître & goûter Dieu ,,
fait homme dans vne creche; ils y reçoient sans doute de ,,
grands dons & y trouuent vne grace inexplicable avec la pe- ,,
netration & la possession de la Pureté, de l'Innocence, & de ,,
la Simplicité de ce diuin Enfant; ne plus ne moins que le ,,
temps de la naissance d'un Roy, ou de son auenement à la ,,
couronne, est le plus fauorable pour demander & pour ,,
obtenir. ,,

C'est ainsi que cet homme de Dieu & cet Enfant de gra-
ce expliquoit ses sentimens touchant ces trois vertus de la
Pureté, de l'Innocence & de la Simplicité; de sorte que la
Pureté regarde les intentions & regne en toutes les actions
interieures & exterieures pour n'y voir & n'y chercher que
la seule gloire & les seuls interests de Dieu. Tout ainsi qu'un
Enfant n'opere que par nature, tellement que s'il regarde,

s'il begaie, s'il écoute, s'il mange, s'il dort, il fait tout cela par principe de nature pure, comme cause operante ces actions, & comme cause finale de ces actions. Ainsi vn *Enfant de grace & de grace de IESVS CHRIST* produit toutes ses œuures par mouuement de grace, & pour vne fin de grace, à sçauoir pour la pure gloire de Dieu, sur le modele de nostre Seigneur *Enfant*, qui dans sa creche se comportoit de cette maniere enuers Dieu son pere.

L'*Innocence & la Simplicité* sont deux puissans secours donnez à la *Pureté* pour la faire agir sans empêchement, l'*Innocence* la couure contre toutes les choses qui se presentent & luy tient lieu de bouleuart & d'vn crystal tres-net, au trauers duquel l'ame regarde innocemment toutes les choses, les vices, les mechancetez, les impuretez, les pompes, les vanitez, les beautés & tous les autres obiets exterieurs: comme vn *Enfant* qui voit toutes les choses qui s'offrent à ses yeux, d'vn œil pur & innocent, d'vne veuë degagée, & d'vn regard superficial qui n'entre point dans la malice des choses & n'en conserue aucune espece, apres qu'il les a veuës. Vn *Enfant de grace* regarde & opere de mesme, s'appliquant à toutes les choses innocemment sans receuoir leurs impressions malignes; ce qui luy est vn tres-grand & tres-necessaire secours, pour dans la conuersation qu'il a avec les hommes, voir, examiner & traiter leurs maux sans en rien prendre, & pour toucher les ordures aussi nettement, que les rayons du Soleil font vn fumier.

La *Simplicité* bānit toutes les multiplicités embarassantes, imparfaites & vicieuses pour ne faire aucun retour de propre recherche, de vanité, de complaisance, de déplaisir, ny de tristesse sur ce que l'on a fait, sur ce que l'on a dit, sur ce que l'on a negocié, sur les loüanges ny sur les blâmes qu'on a reçûs, ny aussi sur les pechez que l'on a veüs ou appris, pour regrater apres & remüer ces saletés: tout ainsi qu'vn *Enfant* ne fait aucune reflexion sur les pompes qui ont passé deuant ses yeux, ny sur les maux qu'il a veus, mais tout cela s'efface de son esprit & rien n'y demeure.

Ainsi la *Pureté* regarde Dieu en droite ligne, ne preten-

dant en tout ce que l'homme fait purement que sa gloire. L'Innocence arme & protege la Pureté contre toutes les choses presentes, & la Simplicité contre les passées, & luy seruent comme de deux grands remparts & deux fortes murailles, qui l'enferment au milieu d'elles, afin que rien ne la souille, & quelle puisse operer librement en tout.

C'est ainsi que Monsieur de Renty agissoit dans cette Pureté, cette Innocence, & cette Simplicité, & c'est le noble & diuin vsage qu'il faisoit de toutes les choses, que nous auions entrepris de montrer & que nous auons esté contraints, pour le faire mieux entendre, d'expliquer vn peu plus au long. Tous doiuent imiter ce procedé s'ils desirent de faire progrès en la vertu, & arriuer à la perfection, & singulierement ceux qui traitent avec le prochain & procurent son salut, afin de le procurer excellemment, & n'en point recevoir de dommage.





QVATRIEME PARTIE.

LES VERTVS QVI L'ONT ELEVE.
& vni à Dieu.

CHAPITRE I.

*Son Interieur & son application à la Tres-
Sainte Trinité.*



N C O R E que ce que nous auons dit iusques ici des vertus heroïques & des actions illustres de Monsieur de Renty, qui regardent ou sa perfection propre ou le bien du prochain, soit fort remarquable, comme il est aisé de le iuger à qui voudra y faire tant soit peu de reflexion; le principal pourtant & le plus admirable est ce qui reste, à scauoir l'état de son interieur & sa communication avec Dieu: aussi Dauid dit, que toute la gloire de la fille du Roy est au dedans; & le S. Esprit louë bien avec de magnifiques paroles l'épouse dans le Cantique de la beauté de son visage & de tout son corps, mais il adiuste que c'estoit sans parler de ce qui est caché dans son interieur & dans son ame, qui a bien d'autres attraits & d'autres charmes. Comme la plus grande excellence de nostre Seigneur ne consistoit pas en son exterior, ny en tout ce qu'il faisoit ou pour soy ou pour les hommes, mais en l'vnion intime qu'il auoit avec

Dieu, & aux actions qu'il produisoit dans son fond enuers luy: nostre perfection de mesme n'est point aux bonnes œures qui paroissent, ny aux exercices de charité, d'humilité, de pauvreté, ny des autres vertus qui donnent dans les yeux; mais à s'appliquer à Dieu dans son inrierieur & à s'vnir à luy par les actes des vertus, & singulierement des trois Theologales: Elle git à l'honorer & l'adorer dans le temple de son ame, à luy faire des sacrifices d'une viue foy sur l'aurel de son entendement & à luy offrir sur celuy de sa volonté des holocaustes d'une parfaite esperance & d'un amour embrasé: Elle se trouue en l'assuietissement total de son esprit au sien, & en l'vnion de ses facultez avec luy, qui par cette vnion vient à les purifier, à les sanctifier, & à les deifier; comme par proportion il fait au ciel dans les esprits bien-heureux, où la perfection est consommée.

C'est ainsi qu'en vsoit Monsieur de Renty, qui pour cela goûtoit beaucoup ces paroles que S. Paul écrit aux Romains: vostre vie est cachée en Dieu avec I E S V S - C H R I S T, sur le modele duquel vous vous occupez bien dauantage & bien plus excellemment en l'interieur qu'à l'exterieur; & qui écrit vn iour à l'un de ses amis dans cette pensée: Il n'y a rien au monde si separé du monde que Dieu, & plus les Saints, sont saints, plus ils sont retirez en luy. C'est ce que I E S V S - C H R I S T nous a appris viuant dessus la terre parmi les hommes, qui dans toutes ses occupations visibles estoit toujours appliqué à Dieu, & retiré dans le sein de son pere.

Son soin principal estoit de cultiuer, & de polir incessamment son ame, de l'vnir intimement à Dieu par les operations de son entendement & de sa volonté, de s'adonner de route sa force à cette vie secrete & diuine de foy, d'esperance, de charité, de Religion, de mort mystique, & d'un entier aneantissement de foy-mesme.

Son attrait special, quelques années deuant sa mort, fut d'estre appliqué au mystere adorable de la tres-Sainte Trinité, où tout doit enfin aboutir. Il porte pour l'ordinaire en moy, dit-il en la declaracion qu'il donna de son érar à son Directeur l'an mil six cens quarante-cinq, vne verité experi-

“ mentale & vne plenitude de la presence de la tres-Sainte
 “ Trinité. Il luy manda en vne autre lettre, Toutes choses
 “ s’effacent de mon esprit à mesure qu’elles sont faites, rien n’y
 “ demeure que Dieu par vne foy nuë, laquelle me faisant m’a-
 “ bandonner à nostre Seigneur IESVS-CHRIST, me donne
 “ force & grande confiance en Dieu Trinité. Je dis en Dieu
 “ Trinité, parce que l’operation des trois personnes diuines
 “ m’y est monstrée avec distinction: L’amour du Pere qui nous
 “ reconcilie par son Fils, & le Pere & le Fils qui nous donnent
 “ vie par le S. Esprit, lequel nous fait viure en communion
 “ avec IESVS-CHRIST, ce qui opere en nous vne alliance mer-
 “ ueilleuse avec la tres-Sainte Trinité, & produit par fois
 “ dans les cœurs des sentimens qui sont inexplicables.

Il écriuit à vne autre persone confidante & fort liée à ce
 “ mystere, que le propre & particulier effet de la grace Chre-
 “ stienne estoit de nous faire connoître Dieu en Trinité, nous
 “ vnissant au Fils, qui nous fait operer par son Esprit. A dire le
 “ vray nous sommes par le Baptême dediez au culte de la tres-
 “ Sainte Trinité; nous sommes consacrez à sa gloire; nous re-
 “ ceuons son impression & nous portons sa marque, pour faire
 “ sçauoir & à nous & à toutes les creatures que nous sommes à
 “ elle. Il écriuit à la mesme persone l’an mil six cens quarante-
 “ huit sur le mesme sujet. La feste de la tres-Sainte Trinité
 “ me donne mouuement de vous écrire pour nous renouueller
 “ en l’honneur & en l’appartenance que nous auons vers cet
 “ incomparable mystere. Je ioins mon cœur au vostre pour re-
 “ uerer ce que ie ne peux exprimer: amollissons nous de recon-
 “ noissance & nous fortifions en la veru de la foy, pour estre par
 “ IESVS-CHRIST consommez en ce mystere adorable; choses
 “ infinies à dire, que nostre cœur ressent de la latitude de la
 “ grace, mais qui ne se peuent dire. Adorons Dieu, adorons
 “ IESVS-CHRIST, adorons le S. Esprit, qui nous fait connoître
 “ l’œuvre d’amour & de misericorde des diuines personnes en
 “ nous, & faisons en vsage.

Il declarala mesme année nettement que son état & son ap-
 plication vnique pour lors estoit à la tres-Sainte Trinité; que

son ame estoit tres-intimement liée aux trois personnes diuines, de qui il receuoit des clartez qui surpassoient l'intelligence humaine; qu'il viuoit perpetuellement retiré & renfermé avec le fils de Dieu dans le sein du Pere, où ce fils diuin estoit sa vie, sa lumiere & son amour; & le S. Esprit sa conduite, sa sanctification & sa perfection; qu'il portoit en soy le Royaume de Dieu, qu'il expliquoit par le rapport à celuy dont iouïssent les Esprits bien-heureux au Ciel, à cause de la veüe & de la connoissance surnaturelle de la tres-Sainte Trinité qui luy estoit communiquée, & du pur amour dont il se sentoit bruler & qui le transformoit en Dieu, en qui il possedoit vne ioye & vne paix qui alloit au delà de tout sentiment. Qu'en cet état il auoit conformité au fils de Dieu, dans la liaison & le mélange de beatitude & de souffrance qu'il auoit porté icy bas, & qu'il accomplissoit par son diuin esprit en luy tous les mysteres de sa vie voyagere, le rendant continuellement vne hostie à la tres-Sainte Trinité, qui aspiroit à la Resurrection & à la consommation entiere dans la gloire. Telle estoit la disposition de ce saint Homme vers la tres-Sainte Trinité, dans laquelle il passa ses dernieres années & y mourut, acheuant ainsi son sacrifice: aussi disoit il, que quand on y estoit appelé, il y falloit demeurer & ne plus changer.

Estant conduit de cette façon & marchant par ce chemin il fit de tres-grands progres à la plus haute perfection où l'on peut atteindre en cette vie, & chaque persone diuine fit en luy des impressions admirables de grace le marquant de son propre caractere, qui le sanctifierent d'une tres-excellente maniere; le Pere le tenoit retiré & recueilly dans son sein, où il luy fit grande part de cette inclination infinie qu'il a de se communiquer, & de sa fecondité diuine pour engendrer des Enfans, non pas selon la chair & le sang, mais selon l'esprit, & alluma dans son cœur vn amour de Pere & de Mere enuers tous les hommes, d'où a découlé cette charité extraordinaire pour eux que nous auons veüe.

Le fils le rendit vne naïue image de Dieu par l'expression & la ressemblance de ses perfections; il luy donna vn esprit.

filial pour s'aquiter enuers luy de tous les devoirs de reuerence, de croiance, de confiance, d'amour & d'obeissance, qu'un bon fils peut enuers son pere, & le mit en état que Dieu luy parlât interieurement, & produisit en luy son Verbe accompagné de cette puissante force, dont parle S. Paul, pour toucher les ames, & pour operer de grands effets de salut en elles.

Le S. Esprit, l'Amour infiniment pur du Pere au Fils & du Fils au Pere, le nettoia des impuretés de l'amour propre & de toutes les recherches de soy mesme, & l'embrasa d'un amour parfait enuers Dieu; il luy apprit à spiritualiser toutes les choses materielles, à sanctifier les indifferentes, à tirer du bien des mauuaises & à mener vne vie d'esprit sur le patron de nostre Seigneur; Ainsi il manda l'an mil six cens quarante sept à son Directeur; La bonté diuine fait en moy ce
 « que ie ne sçauois dire, ie possède la tres-Sainte Trinité,
 « & ie sens distinctement les operations des trois diuines
 « personnes.

CHAPITRE II.

Sa Foy.



OV R venir au détail de cette vie d'esprit, nous commencerons par la Foy, qui est la premiere des vertus Theologales, la premiere vie de l'ame, comme Guillaume de Paris la nomme, & le premier pas selon S. Paul, que doit faire celuy qui veut aller à Dieu.

Ce saint Homme s'estoit étudié avec vn soin tres-particulier de faire vn grand fond de cette vertu, sçachant qu'elle estoit d'une consequence incroyable en la vie spirituelle, & que routes les autres vertus dépendent d'elle, comme de
 « leur racine, de leur regle & de leur mesure: ha! qu'il fait
 « bon viure de la foy, écriuoit il à vne persone, i'en connois
 « la grace de iour en iour. Ceux qui sont établis dans cette
 vic,

vie, qui est la vie du Iuste, ainsi que dit l'Apôstre, s'affermis-
sent d'une admirable maniere en toutes les vertus, & par-
viennent en fin au comble de leur perfection, & ressentent
les premisses de la gloire.

Il possédoit cette vertu en vn si haut degré, qu'il estoit plus persuadé de la presence de Dieu & de la verité de nos mysteres, que de la lumiere du Soleil; il viuoit de la foy, c'estoit la voye par laquelle il marchoit, & en suite il operoit tout par son esprit; il regardoit toutes choses avec ses yeux, qui ne s'arrestent point à l'exterieur comme ceux du corps, mais qui penetrent iusques au dedans, & ne considerent pas vne chose selon son estre present, passager, & dans l'ordre de la nature, mais selon son estre futur & eternal, & par rapport à la grace & à la gloire, puis qu'elle ne regarde rien que comme des moiens de nostre salut. Il faisoit de mesme toutes ses œuvres avec les mains de la foy, qui sont fortes, robustes, bien-faisantes, & qui touchent autant & plus volontiers les ordures & les vlcères des pauvres, que les plus delicates ne manient le satin & le velours. La foy pure & vigou-
reuse de nos premiers Chrétiens, disoit il, leur faisoit faire
sans toute nostre habileté, qui vient souuent du déchet de
nostre foy, les actions heroïques qui nous tiennent mainte-
nant en admiration: ils viuoient certainement de foy, sans
forme & sans composition de leur propre esprit, en grande
simplicité, efficacité, & verité.

Estant fortifié de cette foy; il disoit, qu'il n'auoit point de
peine quand nostre Seigneur le delaissoit sensiblement &
luy enuoioit des secheresses; attribuant au défaut de cette
vertu les inquietudes & les impatiences, qu'on ressent dans
ces états de priuations. Je remarque dans l'une de ses lettres
ce qui suit à ce propos. On trouue rarement des personnes
d'oraison, qui portent bien les abandonnemens interieurs,
& qui demeurent quelque temps à attendre à la porte du
sensible & de la lumiere, sans y entrer, qui ne se fatiguent,
qui ne regardent deçà & delà, & n'agissent d'eux mesmes
pour les procurer, cherchant quelque appuy outre la foy,
qui seule deuroit suffire à l'homme spirituel. Le sensible de

“ Dieu est vn supplement à nostre peu de foy ; mais le Iuste
 “ doit viure de foy & se soustenir sur ce fondement stable en
 “ l’attente de son Seigneur, sans s’impatier. Nostre mal pro-
 “ cede de ce que nous sommes gens de peu de foy pour con-
 “ nôitre les choses dans sa lumiere, encore que nous ne fassions
 “ que trop les connoissans.
 “ Il écriuit à vne autre persone dans le mesme sentiment,
 “ au suiet de la foy du Centenier: Qui se trouuera auoir de la
 “ foy comme ce Centenier? hélas! qu’il confondra de Spiri-
 “ tuels d’auourd’huy, qui assez habituez à parler de la foy,
 “ n’en ont que le bruit, mais tres-peu qui en ayent la verité &
 “ les effets. O qu’il y a peu de personnes qui vneillent porter des
 “ peines ou de l’esprit ou du corps dans la nudité de la foy, &
 “ qui en simplicité cherchent les remedes deuant Dieu, pre-
 “ nant patience si le soulagement ne vient pas si tost qu’ils le
 “ desirent. Quasi tous voudroient que IESVS-CHRIST
 “ leur fût sensible & qu’il descendit en leurs maisons pour
 “ guerir leurs inquietudes: à moins de quelque signe sensible
 “ l’esprit court & va de tous costés cherchant son repos qu’il ne
 “ trouue pas, parce qu’il ne peut estre en son action, mais seu-
 “ lement en son sacrifice en foy, qui attire l’esprit de IESVS-
 “ CHRIST, lequel nous est force & vie au milieu des troubles
 “ & de la mort. Le Centenier est confus d’entendre que IESVS-
 “ CHRIST veut descendre en sa maison, sa foy preuaur par
 “ dessus ces signes sensibles, d’où il est qualifié homme de foy;
 “ on nous le propose pour modele.

Animé de cet esprit parfaitement fidele, il ne faisoit au-
 cun fond & ne prenoit aucun appuy sur tout ce qui luy ve-
 noit par les voyes extraordinaires, & ne s’arrestoit ny à vi-
 sions, ny à reuelations, ny à paroles interieures, ny à miracles,
 mais vniquement à la foy pure & nuë, ne voulant qu’elle
 seule pour aller à Dieu. Il manda ce qui suit à son Directeur
 “ touchant vn suiet qui estoit de consequence pour luy: Je
 “ vous enuoie vn papier, que cette persone de haute vertu que
 “ vous sçaez, me donna lors que ie la veis il y a enuiron trois
 “ mois, & qu’elle me gardoit nel’ayant osé fier à persone. Ce
 “ qui me fait autant experimenter Dieu en elle, est qu’elle ne

m'a jamais rien dit que ie n'y aye esté disposé auparauant en mon interieur, & c'est comme le sceau qui confirme les premiers établissemens de la chose, sans toutefois que l'on fasse fond de certitude sur telles choses: car il faut l'aneantissement à leur regard & à toute reflexion pour suiure sans recherche, en simplicité & en foy, ce que nostre Seigneur fait à l'ame dans le temps present, soit sur cecy, soit sur cela.

Allant à Beaulne, où estoit la sœur Marguerite du saint Sacrement, de qui nous auons fait mention cy dessus, tres-digne d'estre veüe pour les merueilles que Dieu operoit en elle, il dit qu'il ne demanderoit pas de la voir ny de luy parler, que si nostre Seigneur luy faisoit connoître que ce fût sa volonté, il luy parleroit, autrement qu'il n'en chercheroit pas l'occasion. Comme il estoit à Diion au temps qu'on montroit la sainte Hostie, il ne s'approcha point pour la voir, disant à ceux qui l'en pressoient, qu'il n'auoit pas besoin de voir pour croire, & qu'il en croioit dauantage, que ce que ses yeux luy en pouuoient monstrier.

Voilà la foy de cet homme de Dieu, c'est avec ces yeux qu'il regardoit toutes les choses, & avec ces mains qu'il faisoit toutes ses actions, & qu'en suite il est monté au comble des vertus, nous apprenant par son exemple le chemin que nous deuous tenir pour y arriuer. En effet le chemin assuré & le plus court pour deuenir tres-vertueux, & atteindre au sommet de la perfection, est de croire tres-fermement les verités de nostre Religion, & d'en estre parfaitement persuadé: comme au contraire la source d'où decoulent tous nos pechez, & tous nos vices, & vniuersellement tous les maux du Christianisme, c'est la foiblesse de nostre Foy, c'est que nous ne sommes point conuaincus de nos mysteres, & que nous ne nous conduisons pas en nos actions par les regles de la Foy: Nostre Seigneur disoit pour cela, *Noli timere, tantummodo crede*. Ne crain point, croy seulement: si tu crois viuement, tu seras deliuré de tous tes maux & comblé de tous biens.

CHAPITRE III.

Son Esperance.



NE grande foy produit par vne certaine necessité morale vne grande esperance & vne grande charité. Il ne faut que bien croire ce que Dieu est & en foy & à nous, pour nous confier parfaitement en luy & l'aimer ardemment. Comme Monsieur de Renty estoit établi dans vne foy tres-ferme en Dieu, ainsi que nous venons de dire, il auoit aussi vne confiance inébranlable en luy, & vn amour embrazé pour luy.

Sa confiance estoit appuyée sur la connoissance qu'il auoit de la puissance, de la bonté, de la misericorde & de la liberalité de Dieu & des merites infinis de nostre Seigneur. S'affermissant sur ces bases, il esperoit tout, & pensoit pouuoir tout. Se considerant il disoit qu'il ne pouuoit chose aucune pour petite qu'elle fut; iettant sa veuë sur Dieu il assûroit que rien ne luy estoit impossible; & ainsi la deffiance qu'il auoit de foy & son humilité n'estoit point lasche ny abatuë, mais courageuse & magnanime, comme aussi elle le doit estre pour entreprendre avec vn degagement entier de foy tout ce qui est necessaire.

Il écriuit à vne persone touchant ces deux points, qui
 “ doiuent tenir nostre balance en iustesse deuant Dieu; la def-
 “ fiance, que vous portez de vous, me fait faire attention sur
 “ le bien de cet état, & sur le fond que l'Eglise veut que nous
 “ en conseruions, mettant au commencement de toutes les
 “ heures del'Office diuin ce verset, *Deus, in adiutorium meum in-*
 “ *tende: Domine, ad adiuuandum me festina*; il semble par là, que
 “ l'ame soit toujourns sur le bord du precipice, sans sôutien, &
 “ que l'on crie misericorde pour estre preserué de sa chûte. En
 “ effet cela est, & nous y tomberions sans cesse, si sans cesse

nous n'estions secourus: & comme l'Office est diuisé pour les » sept parties du iour, & que le nombre de sept comprend » tous les temps, parce qu'il comprend les semaines, & que le » monde a esté fait sous ce nombre, l'Eglise nous apprend par » là, que nous deuons auoir ce fond de deffiance de nous » mesmes, & attendre en confiance tout nostre secours de » Dieu.

Il auoit vne si haute esperance, qu'en toutes ses affaires il ne s'appuioit ny sur sa prudence, ny sur sa conduite, ny sur son credit, ny sur ses soins, ny sur toute la preuoiance & toutes les inuentions humaines, mais vniquement sur Dieu disant qu'il falloit, apres auoir fait de nostre costé avec deffiance de nous mesmes, ce que nous deuions, attendre tout de luy, & l'attendre en son temps, sans presser les choses ny empesser son esprit. Il manda à vne persone; Pour mes Enfants, ie les mets entre les mains du saint Enfant Iesus, ie ne determine rien, & ne sçay pas ce qui se fera demain, mais il me donne vne grande confiance en sa protection, qui me rend aueugle, & sans rien vouloir, & neanmoins pret à tout vouloir.

Avec certe parfaite confiance il ne craignoit rien, il estoit assuré & resolu contre tout & en toutes sortes de rencontres, il alloit hardiment en tous lieux & en tous temps, par les Villes & aux champs, de iour & de nuit, trauctant les bois & les forests où il y auoit bruit de voleurs, & d'autres dangers sans peur & sans autre deffence, que celle que luy donnoit son esperance en Dieu & l'appuy en sa protection; tellement qu'il auoit comme surmonté toutes les frayeurs, dont la nature est attaquée & saisie dans les hafards, ou dans les accidens fâcheux & subits, & qu'on pouuoit l'appeller, le Chrestien sans peur. A dire le vrây vn chrestien ne deuroit auoir peur que du peché, pource qu'il n'y a que le peché seul qui luy peut nuire & le mettre mal avec Dieu, tout le reste luy est auantageux s'il en fait bon vsage.

Vn échaffaut, sur lequel il estoit monté comme il faisoit bastir, estant tombé sous luy & sous quelques ouuriers dont il y en eut de bien blessés, on ne le veit point plus étonné ny

plus émû de sa chute : son esprit demeura immobile & conserua inuiolablement sa mesme assiete , parce qu'il estoit étably en Dieu qui est immuable. Vn de ses amis luy disant vn iour qu'il apprehendoit de sortir le soir sans épée dans Paris, & qu'il eut bien desiré de se défaire de cette apprehension ; mais qu'il craignoit de se trouuer la nuit sans defense s'il estoit attaqué, & qu'il le prioit de luy dōner conseil là dessus de ce qu'il auoit à faire. Il répondit, luy qui depuis long-temps ne portoit plus d'épée, suiuez en cela l'inspiration que Dieu vous donnera apres l'auoir prié, & souuenez vous qu'il nous assiste selon nostre confiance. Il se trouue dans l'vne de ses lettres adressées à son Directeur ; ayant confiance, foy & amour ie ne crains, ny Diable, ny Enfer, ni toutes les inuentions des hommes, & ie ne pense ny au Ciel ny à la terre, mais à faire en tout & par tout la volonté de Dieu.

On luy a vû faire des actions admirables de cette vertu dans les secheresses interieures, où Dieu le tenoit par fois. C'est dans le delaisement & la priuation du sensible de la grace, manda t'il à vne persone, que se trouue l'abandon heroïque de nous en Dieu, comme l'espoir au milieu mesme du desespoir. Soions Enfans du veritable Abraham: Isaac ne mourra point quoy qu'il semble déjà egorgé, & s'il arriue que le vray Isaac soit enfin crucifié, c'est pour de nos croix & de nostre mort nous donner la vraye vie.

Il écriuit à son Directeur; j'ay vne forte veuë de l'extreme besoin que j'ay de I E S V S - C H R I S T, ie le vois dans ses richesses & moy dans ma pauureté; ie le vois dans sa force & moy dans mes foibleesses, & mon esprit plein de respect à l'impression de ces paroles. *Quid est homo, quod memor es eius?* se confie dans vn abandon total en sa bonté. Ces paroles, *longanimiter ferens*, me sont venuës depuis long temps souuent en l'esprit, sans que ie scûsse d'où elles sont tirées, ny ce qu'elles signifient, sinon qu'il me faut porter avec longanimité l'attente & la venuë de nostre Seigneur, sans m'auancer de moy mesme par recherche ny par action propre, fors celle de respect & de fidelité à luy demander sa grace, & d'esperance en luy; mais il y a quelques iours que prenant mon

nouveau Testament, ie tombay à liure ouuert sur le chapi-
 pitre 6. aux Hebreux, où l'Apostre parle de la foy & de la
 patience, qui nous donnera l'effet des promesses de Dieu,
qui fide & patientia hereditabunt promissiones. Et il apporte pour
 preuë l'exemple d'Abraham, & dit, *& sic longanimiter ferens*
adeptus est repromissionem. Ce rencontre me toucha le cœur,
 & ma langue se trouua consolée, avec vn autre passage de
 S. Iacques qui se presenta à mes yeux quasi en mesme temps.
Patientes igitur estote, fratres, usque ad aduentum Domini: ecce
agricola expectat preciosum fructum terræ patienter ferens. Je suis
 ainsi en paix sur les bases de l'abandon en confiance.

Comme cette excellente vertu donne infalliblement à
 l'ame, qui la possède en perfection, vn profond repos, vne
 solide ioye, vn grand courage, vne haute éléuation au des-
 sus de toutes les choses de la terre, & vn genereux mépris de
 tout ce que le monde estime & desire, avec vn auantgout
 délicieux des plaisirs de la felicité eternelle, comme il est
 bien aisé à qui espere de iouïr bien tost d'vn riche royaume,
 de mépriser vne botte de paille, elle communiqua abon-
 damment tous ces thresors à cet excellent homme, & luy
 imprima tous ces nobles sentimens.

Qui le porterent à encourager les ames de toute sa force
 à cette vertu, connoissant par son experience les biens in-
 estimables qu'elle produit; que c'estoit nostre lenitif dās tous
 nos maux, nostre bâton & nostre souëtien dans nos foibles-
 ses, & nostre port assuré dans nos tempestes. Et il auertissoit
 sagement que Dieu pour nous la faire acquerir & nous y
 donner affermissement, nous mettoit dans des tentations &
 des épreuues, afin de nous obliger d'auoir recours à luy &
 luy demander son aide, & de l'attendre en confiance.

Il donna cette instruction sur ce suiet à vne personne à
 l'occasion de l'épouuante qu'eurent les Apostres voyans
 marcher nostre Seigneur sur les eaux, & le prenans pour vn
 phantôme. Pensez vous que ce fut sans vne particuliere pro-
 uidence, que nostre Seigneur laissa aller ses Apostres seuls
 en vne nacelle, & permit qu'il s'éleuât vn vent contraire qui
 ne sçait que c'est ainsi qu'il forme les ames des Fideles par ses

« absences & par des épreuves, & qu'après venant à montrer
 « son pouuoir sur la mer & sur les orages, il viuifie nostre foy,
 « se faisant connoître le Messie & le vray liberateur du mon-
 « de ; mais remarquez qu'il y a quantité de personnes, qui dans
 « leurs peines tiennent beaucoup de la fraieur qu'eurent les
 « Apostres, voyant, nostre Seigneur marcher sur les eaux :
 « tout leur fait peur, le vent, les vagues, I E S V S - C H R I S T
 « mesme, c'est à dire, leurs agitations d'esprit, leurs retours, &
 « aussi les conseils qu'on leur donne pour les en retirer & les
 « affermir en I E S V S - C H R I S T deuant Dieu ; tout cela leur
 « paroît vn phantôme qui les épouuante, si I E S V S - C H R I S T
 « ne se manifeste dauantage à eux, & ne les fortifie. Manque-
 « rons nous touûjours de confiance pour croire I E S V S - C H R I S T
 « vn phantôme ? n'irons nous point à luy pour tous nos be-
 « soins, comme à nostre seul Liberateur ? On luy portoit au-
 « trefois les malades corporels, & il les guerissoit, est-il venu
 « pour estre plutôt medecin des corps, que des ames ? nostre
 « peu de foy, nostre peu d'amour & nostre peu de confiance
 « est la cause de nos langueurs & des lassitudes inutiles de nos
 « esprits : ainsi allons droit à I E S V S - C H R I S T en confiance.

C H A P I T R E I V.

Son Amour enuers Dieu.



O M M E l'amour de Dieu est sans contredit la plus excellente & la plus parfaite de toutes les vertus, & celle qui principalement & par dessus toutes fait les Saints, nous ne pouuons douter que ce S. Homme ne l'ait possédé en vn eminent degré & qu'il n'ait aimé Dieu de tout son cœur. Il fondoit cet amour sur les perfections infinies de Dieu & sur ses benefices, & voicy ce qu'il en écriuit l'an mil six cens quarante huit à son Directeur, & en quoy il mettoit cette Reyne des vertus.

Le

Le Seigneur rayonne de fois à autre dans mon ame avec ses lumieres, qui la viuifient en luy; elles sont de tant de manieres, & ce qui se fait en de petits momens, demanderoit tant de temps & tant d'estenduë pour l'écrire, que ie n'ose entreprendre d'y commencer. Le tout se rapporte à vn, qui est la charité de Dieu, en IESVS-CHRIST, sa communication de luy à nous par l'Incarnation de son Verbe, & la nostre à luy par le mesme Verbe rendu nostre frere conuersant avec nous & faisant societé de nous avec luy, pour n'estre qu'un en luy, & experimenter quelle est la charité de Dieu enuers nous. Ie ne connois & ne ressens que charité en tout ce que ie lis dans les saintes lettres, & ie vois clairement que le dessein & la fin du Christianisme n'est que charité, *finis autem præcepti est charitas de corde puro*, mais qu'elle s'aquiert par la foy en IESVS-CHRIST, comme l'Apostre le dit en suite, *fide non fidei*, qui nous lie & nous vnit à luy pour sacrifier à la Diuinité nos ames & nos corps dans son esprit, lequel nous conduit à la fin parfaite des preceptes & nous liure à Dieu, & Dieu à nous en charité & tres-chete vnitè inexplicable, qu'il en soit beny à iamais, Amen.

Mon esprit a esté ce matin éclairé d'une lumiere sur ces paroles, que nous estions au monde pour connoître, pour aimer & seruir Dieu, laquelle m'a fait voir que le vray effet de la connoissance de Dieu doit estre de nous aneantir deuant luy; parce que cette connoissance venant à nous découvrir vne Maiesté infinie, l'ame s'abaisse & s'aneantit par vn grand sentiment de crainte & de respect, selon la mesure qu'elle la découvre, & voyla le premier pas de cet état. La charité de Dieu, qui a paru nous donnant son fils, commence à nous toucher d'amour, qui fait que si la veuë de la grandeur de Dieu nous retient en crainte, son amour en IESVS-CHRIST nous dilate & nous eleue, & nous l'aimons en luy, ce qui nous porte à conceuoir toutes sortes de bons desirs selon que son esprit nous anime; c'est le second pas. Mais le troisieme est de le seruir, c'est à dire, de mettre cet amour en pratique par de bonnes œures: car les desirs sont les fleurs, & les œures les fruits. I'auois beaucoup à dire s'il falloit

“ que i'étendisse cecy selon que ie le sens; parce qu'on trouue
 “ tout en Tout, qui est Dieu connû par I E V S-CHRIST, &
 “ aimé & serui par son Esprit. Ce diuin Seigneur fait vne socie-
 “ té & vn royaume de nos ames pour y regner dans vne cha-
 “ rité inconceuable & eternelle.

“ Ectiuant à vne autre persone, il luy manda: Ie benis no-
 “ stre Seigneur de ce qu'il vous dispose à vous abandonner
 “ vous mesme, c'est pour vous mener à la pureté de son amour,
 “ qui sans cela ne peut estre pur: car il faut sçauoir que nostre
 “ amour vers Dieu ne consiste pas à recevoir beaucoup de
 “ dons & de graces de luy; mais à renoncer beaucoup à foy, à
 “ s'oublier & à souffrir pour luy, & cela constamment & cou-
 “ rageusement. C'est ainsi qu'il expliquoit la nature de l'amour
 “ de Dieu.

En effet on n'a iamais dit que l'amour soit à prendre, mais à donner, & que plus on dōne, & des choses grandes & de grand coût, plus on aime; l'amour porte l'aimant selon la mesure de sa flamme à penser à la persone aimée, à vouloir ce qu'elle veut, à rechercher ses interests, à procurer sa gloire, à faire tout ce qu'il sçait luy pouuoir donner du contentement, & auoir vne apprehension extreme de l'offencer. Comme Monsieur de Renty estoit tout brûlant de l'amour de Dieu, il ressentoit parfaitement ces effets: toutes ses pensées, toutes ses paroles, & toutes ses œures estoient des productions de cet amour: car encore qu'il fit des actions des autres vertus, elles auoient pourtant leur origine dans la fournaisé de la charité, qui en estoit le principe, le motif & la fin; ce qu'il a temoigné à des persones confidentes souuent & avec des paroles si embrazées, qu'elles estoient capables d'échauffer les cœurs les plus glacez.

I'ay remarqué, dit l'une de ces personnes, que ce feu diuin estoit par fois si ardent en son ame, que les flammes en paroissent sur son exterieur; & il m'a dit que lors qu'il prononçoit le nom de Dieu, il goûtoit vne douceur sur ses levres qui ne se peut expliquer, & qu'il estoit tout penetré de suavitez celestes. Il écriuit à vne autre il y a neuf ou dix ans, qu'il ne pouuoit luy celer qu'il ressentoit vn feu dans son

cœur qui le brûloit & le consommoit sans cesse. Vne autre assùre l'auoir vû tres-souuent tellement embrazé de l'amour de Dieu qu'il estoit comme hors de soy, & qu'il luy disoit dans ses trans-ports qu'il eût voulu se pouuoir ietter dans vn feu pour témoigner à Dieu son amour. Il conclut vne de ses lettres à vne autre en ces termes: Il faut que ie me taise, » mais si ie cesse de parler, le feu, qui me consume, ne reposera pas pourtant, brûlons donc, brûlons & brûlons en tout » & par tout pour Dieu, puisque nous ne sommes que par luy, » pourquoy ne viurons nous pour luy? ie le dis hautement, & » ma gloire seroit de le confirmer par mon sang: le vous parle avec franchise. »

Ecriuant encore à vne autre, il luy mande; Ie ne sçay pourquoy vous inferez dans vostre lettre ces paroles, *Deus meus & omnia*, mon Dieu & mon tout: mais vous me donnez mouuement de vous dire, & à toutes les creatures, *mon Dieu & mon tout, mon Dieu & mon tout, mon Dieu & mon tout*. Si vous les prenez pour vostre deuise & me les enuoiés pour m'exprimer la plénitude de vostre cœur, puis-ie me taire à cette communication que vous me faites, & ne pas épancher ce que ie sens? Sçachez donc, que *Deus meus & omnia*, & si vous en doutez, ie vous en écriray plutôt vne centaine; ie ne dis rien dauantage, car tout est superfluité à qui a la penetration de, *Deus meus & omnia*, mon Dieu & mon tout. Ie vous y laisse donc en toute iubilation, & vous coniure de demander pour moy la solide grace de ces saintes paroles.

Transporté de cét amour de Dieu, il auoit vn zele incroyable de son honneur, qu'il a procuré & auancé en mille & mille manieres connuës en partie par ce que nous auons dit, & en partie inconnuës, ou pour auoir esté purement spirituelles, ou pour les auoir celées mesme à ses plus cōfidens. Il écriuit le douzième de Mars de l'an mil six cens quarante-cinq à son Directeur ce qui suit à ce propos. Vn iour porté d'un grand desir d'estre tout à Dieu & tout consommé pour luy, ie luy offrois tout ce qui se peut & tout ce qui ne se peut pas, ie luy eusse volontiers donné des Cieux & des Mondes si ie les eusse eus; & d'autre-part ie desirois d'estre sous tous »

« les hommes, & au plus bas état qui peut-estre, & mesme,
 « souûtenu de sa grace, de souffrir avec les demons les peines
 « éternelles, s'il en eut esté plus glorifié. En cette disposition
 « de tranquille ferueur il n'y a sorte de martyre, sorte de gran-
 « deur ny de petitesse, d'ornement ny de dépoüillement, qui
 « ne passe par l'esprit & que l'ame n'accepte pour rendre à
 « Dieu de l'honneur. On voudroit estre Roy pour tout regir,
 « & le dernier des pauvres & des miserables pour tout souffrir,
 « & cela hors de raison par excés de raison. On ne scauroit
 « comprendre comme en si peu de temps on void tant de cho-
 « ses differentes, & il faudroit vn fort grand discours pour en
 « éclaircir vne seule circonstance. Ce que ie pûs faire en cet
 « état, fut de donner à Dieu ma liberté, écriuant sur vn papier
 « le don que ie luy en faisois, & le signant de mon sang.

Voila le zele dont cet homme parfait brûloit pour glori-
 fier Dieu: mais la conformité qu'il auoit à sa volonté, qui
 est la marque infailible de l'amour, estoit merueilleuse. Les
 personnes qui l'ont connu tout à fait, rapportent que l'vnion
 intime de sa volonté à celle de Dieu, estoit vne de ses graces
 singulieres & sa voie, & il a témoigné luy mesme qu'il auoit
 toujours esté en cette sainte disposition, quoy qu'il y ayt
 esté appliqué plus spécialement en quelques années, pen-
 dant lesquelles il faisoit voir euidentement, que l'objet & la
 fin de toutes ses actions estoit la volonté diuine, dans laquel-
 le la sienne estoit absolument perduë.

Il écriuit à vne persone touchant la maladie & la mort de
 Madame de la Chastre, avec laquelle il auoit, comme nous
 « auons dit, de grandes liaisons de grace. Je vous diray qu'e-
 « stant absent de Madame de la Chastre, mon cœur ressentoit
 « sa peine: car ie scauois qu'elle souffroit beaucoup, mais l'or-
 « dre de mon Dieu est mon desir, & lors qu'il m'est signifié, il
 « me fait la grace de m'y rendre. L'après sa mort entrant dans
 « Paris, lors ie me donnay pleinement à Dieu, de qui i'atten-
 « dois la volonté pour la suiure. Il manda vne autre fois à son
 « Directeur; depuis trois semaines i'ay esté arresté par vne fié-
 « vre, par vne fluxion & par vne foiblesse; mon état en tout ce-
 « la n'a esté qu'une simple suite & adherence à ce que Dieu

veuloit & faisoit. Je ne vois rien de particulier notable à vous ,, écrire, sinon que j'ay le cœur tourné à des tribulations qui ,, me doiuent arriuer. Je desire tout ce qui est de l'ordre de ,, Dieu, & ie le demande. ,,

Nous auons dit que l'an mil six cens quarante & vn, il luy mourut vn de ses Enfans, qu'il aimoit beaucoup; quand on luy en apporta la nouuelle, il ne dit pas vne parole & ne fit paroître aucun mouuement, sinon de soumission aux ordres de Dieu, agreant dans vne parfaite complaisance la disposition qu'il faisoit de cet enfant, & la perte qu'il luy enuoioit.

Sur la fin de l'année 1643. Madame sa femme fut tres-griëuement malade & pensa mourir; lors qu'elle fut abandonnée des Medecins, qu'elle eut perdu la parole & l'usage des sens & qu'on croioit qu'elle alloit rendre l'ame, Monsieur de Renty dans la viue douleur que cette separation luy causoit, & avec grand sujet, fit paroître vne conformité tres-parfaite à la volonté de Dieu, qui alla mesme si auant qu'il dit: Je ne peux pas nier que ma nature ne ressent vne grande douleur de cette perte; mais mon esprit est rempli de tant de ioye de me voir en état de donner & de sacrifier à Dieu vne chose qui m'est si chere, que si la bien-seance ne m'empêchoit, ie la ferois éclater au dehors, & en donnerois des témoignages publics. Par où il montra que la Volonté de Dieu estoit tellement la sienne, que non seulement il vouloit ce que Dieu vouloit, quoy que tres-difficile, mais qu'il le vouloit encore, comme Dieu, c'est à dire, avec plaisir: d'autant que Dieu ne veut & ne fait pas simplement les choses; mais il les veut & les fait avec vne ioye infinie, parce qu'il est infiniment bien-heureux, & il rendit la santé à la malade, ayant égard, comme il y a beaucoup d'apparence, à cette action heroïque qu'exerça son seruiteur, & encore plus au vœu qu'il fit à nostre-Dame pour l'obtenir.

Sa conformité n'alloit pas seulement iusques-là; mais encore plus auant & aux choses plus delicates qui regardent son salut & sa perfection, qu'il ne desiroit que dans la volonté de Dieu; car encore qu'il aspirât ardemment à la sainteté, & que pour y arriuer il trauaillât avec vn courage, avec

« vne ferueur & vne diligence qui ne se peut dire, c'estoit tou-
 « tefois dans vn abandon entier aux desseins de Dieu sur luy.
 « S'ouuant à son Directeur sur ce sujet il luy écrit: l'état
 « que ie porte est vne adherence de ma volonté à tout ce que
 « Dieu veut de moy, que ie sens dans le fond de mon esprit;
 « i'ay esté en de grands delaissemens interieurs, excepté cer-
 « tains instans, où tout est ouuert & l'ame se donne & se liure à
 « Dieu dans des manieres inexplicables, & d'où elle demeure
 « affermie, pleine de certitude & de veritez, lesquelles ne
 « s'effacent pas, quoy qu'elles ne soient pas autrement déue-
 « loppées. Ayant écrit & signé de son sang le don de sa liberté,
 « donr nous auons parlé, il luy mande; depuis ce temps vne
 « conformité à la volonté de Dieu m'a esté donnée telle, que
 « comme ie vois tout regi par sa main, ie prens aussi tout de
 « cette diuine main. Et il écrit à vne autre persone fort intime;
 « la persone, c'est à dire luy, parce qu'il parle de foy, a ressenti
 « du depuis vne conformité si grande à la volonté de Dieu,
 « qu'elle ne peut vouloir que ce que Dieu veut, & elle ne sçait
 « comme l'on peut vouloir autre chose. Cela porte à aller tout
 « droit & tout court.

Dans cette disposition il ne regardoit iamais les choses en
 elles mesmes, mais toujours dans la volonté de Dieu, & c'e-
 stoit vn des principaux auis qu'il donnoit pour paruenir à la
 perfection; Il faut, disoit-il, que l'ame s'abandonne à Dieu,
 « & qu'elle aille en simplicité dans ses actions, ne s'appliquant
 « pas aux choses pour les choses; mais parce que c'est l'ordre
 « de Dieu: ainsi elle ne demeure point liée aux choses, mais à
 « Dieu, à qui elle obeit & qu'elle honore en tout.

De cette parfaite conformité à la volonté diuine naissoit
 la tranquillité admirable interieure & exterieure qui paroif-
 soit en luy, & de cette source découloient ces torrens de
 paix & de profond repos qu'il possedoit en tout, iusques à vn
 tel point, que dans les rencontres les plus surprenans son
 cœur & son esprit n'en estoient point alterez, & mesme
 ses facultez inferieures & son corps n'en receuoient aucune
 émotion; ce que luy mesme a confessé. Il m'écrit vn iour;
 Je ne comprens pas ce que l'on appelle mortification, si on

vit dans cet état de conformité, parce que n'y ayant plus de résistance en l'esprit, il n'y a plus de mortification: qui ne veut[»] que ce que Dieu veut, est toujours content, quoy qu'il luy[»] arriue.

CHAPITRE V.

Son Respect enuers Dieu, qui produisoit en luy vne admirable Pureté de conscience.



NE des plus excellentes dispositions de l'ame dans la vie interieure est celle d'un grand respect en la presence de Dieu, comme les saintes Lettres disent des Anges, qui s'abyfiment & s'aneantissent de reuerence deuant sa diuine Maiefté. Monsieur de Renty estoit extremement touché de ce noble sentiment, & parloit à Dieu avec vn si profond respect qu'il passoit iusques au tremblement.

Le regard de sa grandeur le tenoit dans vn abaissement inexplicable, & le faisoit souuent aller, lors qu'il estoit à la campagne, teste nue, à l'ardeur du Soleil, au vent & à toutes les intemperies de l'air. Estant interrogé par vne personne confidente, d'où luy venoit ce grand respect qu'il portoit à Dieu en tout temps, & en tous lieux, & quelque occupation qu'il eut, il répondit que la veüe de sa grandeur, qui par tout luy estoit presente, produisoit en luy par tout cet effet, & le tenoit en reuerence & dans le sentiment d'une extreme petiteffe. Je me vois si petit, disoit il, si petit, & rien[»] deuant cette maiefté infinie: vn atome au Soleil est bien petit, ie suis encore bien moins deuant Dieu; ie ne suis[»] rien.[»]

Ecriuant à son Directeur le premiet iour de Iuin de l'an

« mil six cens quarante sept : il luy manda : l'ay quasi tout
 « le mois passé esté toujours occupé de la connoissance de
 « ma bassesse : Je suis saisi de honte deuant Dieu avec vne
 « retenuë de respect , comme qui auroit les yeux baissés de-
 « uant le thrône de sa maiesté sans oser lesleuer. Et il écri-
 « uit à vne autre persone : tenons nous deuant Dieu, comme
 « les hommes du monde nous apprennent lors qu'ils sont de-
 « uant leur Prince ; car encore qu'ils aient bon esprit & la
 « teste remplie de beaucoup d'affaires, ils sont neanmoins en
 « leur presence teste decouuerte , & la veuë baissée , ils sont
 « modestes, ils ne disent mot , ils ne songent à aucune autre
 « chose sinon à estre attentifs, ils ont tout oublié : & le seul res-
 « pect humain fait tout cela en eux, & enuers vne persone qui
 « souuent est moindre qu'eux en talens & en qualitez natu-
 « relles. Combien plus la sainteté, la dignité & la grandeur
 « infinie de Dieu nous doit-elle rauir à nous mesmes, & nous
 « mettre dans vn extreme respect ?

Voyla le sentiment de petitesse que ce saint homme por-
 toit de soy deuant Dieu, que non seulement les pecheurs,
 mais encore les plus saints doiuent auoir. Celuy qui d'une
 vallée regarde le Soleil qui se leue ; & qui paroist sur la
 pointe d'une haute montagne, croit que celuy, qui est
 dessus, est bienpres du Soleil, & qu'il le peut quasi toucher
 de la main ; mais celuy cy le voit extremement exaucé sur
 sa teste : & encore qu'effectiuement il en soit plus pres que
 celuy qui est en bas, c'est neanmoins de si peu à proportion
 de son éléuation, que cela ne merite pas qu'on en parle :
 ainsi Dieu est tellement releué en sa grandeur, en sa Ma-
 jesté, & en toutes ses perfections infinies au dessus de nous,
 & des imparfaits, & de ceux qui sont mesme sur la çime de
 la plus haute perfection, que tous doiuent s'abaisser & s'a-
 neantir en sa presence.

Cette profonde reuerence, que Monsieur de Renty ren-
 doit à Dieu avec l'ardent amour, dont nous auons parlé au
 chapitre precedent, luy imprimoit vne auersion horrible de
 la moindre offence de Dieu, & produisoit en luy vne par-
 faite pureté de conscience : Ceux qui l'on confessé, diront
 qu'elle

qu'elle alloit iufques au grand étonnement, & que le Prince des tenebres y auoit tres peu d'entrée; & il dit vn iour luy-mefme à vne perfone familiere, qu'il auoit peine, quand il deuoit fe confeffer à d'autres qu'à fon Confefleur ordinaire, parce que ne connoiffans pas fa difpofition, ils ne comprennoient pas fi bien ce qu'il leur difoit, & qu'il eftoit fouuent fort empêché de trouuer quelque chofe à leur dire.

Mais nous pouuons voir clairement cette grande pureté par fon contraire, à fçauoir par fes pechez, qu'il auoit coûtume d'enuoier dans fes lettres de mois en mois à fon Directeur, éloigné de luy, & qui enuoiées par des meffagers, aflez loin de Paris, dans des lettres qui eftoit fignées de fon nom, & qui pouuoient eftre interceptées, eftoit fans doute, en vn homme encore de cette qualité, vne action d'une heroïque humilité.

Voicy ce qu'il luy écrit le vingt-feptieme de Nouembre del'an mil fix cent quarante fix: Je me fuis propofé, fi vous le trouuez bon, de prendre mon temps réglé pour vous rendre compte de mes difpofitions, apres le vingt cinquieme de chaque mois: venant apres fur fes fautes, il dit; pour mes fautes voicy le peu que j'en ay connu entre tant d'autres, que j'ay faites. J'ay dit en deux occafions à deux de mes domeftiques deux paroles par humeur.

J'ay omis deux fois a reciter l'oraifon de l'*Angelus* par inapplication.

En vn autre lettre il luy mande: Je fuis autant ou plus auégle pour mes manquemens que pour le refte. J'ay en general vne afsez grande connoiffance de ma mifere; & ie peux dire que ie n'ignore pas mon indignité & la deprauation pitoiable que le peché a fait en moy; mais pour effets connus voicy ceux de ce mois. Parlant d'une charité à faire, qui eftoit pour retirer des Enfans heretiques orphelins, ie nominay fans y faire reflexion, deux gentil-hommes leurs parens, qui n'auoient pas voulu s'y employer.

J'ay témoigné auoir connoiffance des defauts d'une perfonne, à vne autre qui les fçauoit, & ie le faifois à deffein de luy montrer qu'elle eftoit en meilleur état; mais j'en fentis

“aussi tost du reproche, & ie connûs qu’il suffisoit de parler du
 “bien de cette persone sans faire mention du mal de l’autre,
 “& que c’estoit m’auancer trop dans l’affaire. Du surplus ie
 “suis vn egaré & vne terre pleine d’épines.

“ En vne autre, mes fautes sont vne grande grossiereté que
 “ie ressens en moy, qui fait obstacle à la lumiere de Dieu. Ie
 “suis lâche & ingrat étrangement. Ie vous asûre que ie res-
 “sens bien en moy dequoy me confondre & m’humilier.

“ Ayant trauaillé le long du iour à des accommodemens
 “d’affaires, & le soir voyant entrer vn homme qui selon l’opi-
 “nion de tous auoit soutenu vne fausseté, ie dis par inconfide-
 “ration & par manque de recueillement, voila l’homme de
 “cette fausseté.

“ En vne autre encore, i’ay fort ressenti la faute d’auoir dit
 “vne chose de rien, c’est d’auoir placé vn domestique dans
 “vne grande maison; i’auois eu mouuement de ne la pas dire;
 “mais apres elle m’échappa, ie la ressens puissamment; car il
 “faut estre fidele à l’esprit de Dieu.

“ De plus, ie me suis assis à table deuant vn Prestre: i’en fis
 “grande difficulté, & ie ne sçay comme ie ceday non au
 “Prestre, mais à la persone de condition qui m’en pressoit.

Voila les fautes de cet homme de Dieu qui decouurent manifestement la tres-grande netteté de sa conscience: car il faut sans contredit l’auoir eu tres nette pour ne faire que ces fautes, qui pourroient en quelque façon passer pour des perfections, & comme les taches que l’on voit dans les astres. Ces fautes nous font voir iusques à quel point de pureté & d’innocence peut arriuer vne ame, quand elle y veille, puis qu’un gentilhomme de cette naissance, de son âge, en la vie seculiere & dans vne multitude innombrable d’occupations, en est venu là; aussi y faisoit-il vne attention tres-particuliere & se rendoit tres-fidele à la grace, qui est le vray moien de posseder cette perfection.

CHAPITRE VI.

Son Respect enuers les choses saintes.

MONSIEUR de Renty ne portoit pas seulement respect à Dieu, mais encore par vne suite moralement necessaire à tout ce qui concernoit son seruice & à toutes les choses saintes & diuines; qui est le sentiment, que la vertu de Religion imprime dans vne ame, & l'effet qu'elle luy fait produire à l'exterieur.

Ainsi cet excellent seruiteur de Dieu rendoit vne singuliere reuerence, premierement aux lieux saints. Il seroit difficile de raconter avec quel respect & avec quelle deuotion il se comportoit dans les Eglises; quand il y entroit, c'estoit à se composer à vne plus haute modestie & à vn maintien plus religieux: iamais il ne s'y asseoit ny se couuroit la teste, mesme durant le sermon; il y demouroit le plus qu'il luy estoit possible, & on l'y a vû aux grandes festes les sept & les huit heures de suite à genoux: il y gardoit tres-exactement le silence, & si quelqu'un, de quelque condition qu'il fût, luy parloit, il couppoit court; que si la chose demandoit plus de temps, il le conduisoit adretement dehors, ou s'en deméloit d'une autre façon.

Secondement il portoit grande veneration à toutes les personnes Ecclesiastiques, iusques aux moindres; mais celle qu'il auoit pour les Prestres, estoit admirable: il ne passoit iamais deuant aucun d'eux, ou il luy falloit faire des violences extremes, & nous auons vû ce qu'il nous en a dit au chapitre precedent; quand il en rencontroit, il les salüoit toujours avec grande humilité, & mesme, faisant voiage, il descendoit de cheual pour les salüer, & partout leur rendoit tout l'honneur qu'il pouuoit: il receuoit ceux qui le venoient

voit avec vne cordialité pleine de respect, & ils ne sortoient point de chez luy, si qu'il ne les eut conduits iusques à la porte de son logis; si quelqu'un d'eux disnoit à sa table, il leur donnoit la premiere place, mesme à son chapelain. La Mission estant en quelque vne de ses terres, il faisoit seruir les Missionnaires, qui mangeoient à part, en vaisselle d'argent, & les Gentilhommes & personnes de grande qualité qui le venoient voir, en vaisselle d'étain, passant par dessus tous les respects humains. Vn Seigneur & vne Dame de condition accompagnez d'un Prestre, qui demouroit chez eux en qualité de precepteur de leurs Enfans, l'estant venu visiter, comme il entretenoit ce Seigneur & cette Dame en vne sale, il s'aperçût que ce Prestre estoit demeuré avec leur suite au bas de la sale, & au mesme temps quittant avec ciuilité le Seigneur & la Dame, il s'en va trouuer ce Prestre & luy fait grand honneur, comme à la personne la plus honorable de la compagnie. En fin il auoit vne si haute idée de la Prestriſe, & l'estimoit vn moien si puissant pour procurer à Dieu de la gloire, qu'il dit à quelqu'un, que son dessein estoit de se faire Prestre, si iamais Dieu le mettoit en état de le pouuoir.

Mais comme il faisoit vn tres-grand état de la Prestriſe, il auoit aussi vn desir extreme que les Prestres, & generalement tous les Ecclesiastiques connoissans l'excellence de la condition où Dieu les auoit éleuez, menassent vne vie qui eut du rapport à leur dignité. Il écriuit à son Directeur l'an mil six cens quarante cinq, que voyant comme plusieurs Ecclesiastiques de sa connoissance constituez en autorité & obligez de procurer le salut des ames, ne correspondoient pas à leur profession, ny à leur obligation, il en auoit le cœur tout froissé de douleur, & qu'il se mit là dessus à gemir deuant nostre Seigneur & à luy demander instamment des hommes
 « apostoliques. nos pauures peſcheurs, nos pauures peſcheurs,
 « disoit il souuent, donnez nous nos pauures peſcheurs; i'en-
 « tendois les Apostres, & c'estoit le mot qui me reuenoit pour
 « lors, sans pouuoir dire autre chose, & mon esprit estoit
 « ouuert sur les peſcheurs, & sur les pecheurs. Je voiois

Ces hommes simples à l'exterieur , mais grands princes en l'interieur , dont la vie & l'apparence vile aux yeux des hommes & éloignée de la pompe du monde conuertissoit les ames par leur sainteté , par leurs prieres, par leur vigilance, & par leurs fatigues. Et ie voiois vn abus trop ordinaire en ce que l'on croit, que la grandeur exterieure & le fast fert beaucoup à donner du credit, & rend vne persone plus capable d'aider le prochain pour son salut; mais on se trompe lourdement, car c'est la grace qui a pouuoir sur les ames, & c'est la vie sainte & humble qui gagne les cœurs.

Il deploroit dans le mesme esprit la vitess^e & la precipitation avec laquelle tant d'Ecclesiastiques recitent l'office diuin en tant de lieux. Entendant l'office d'aujourd'hui, m'écriuit il vn iour, plusieurs de ses paroles me faisoient voir avec beaucoup de douleur, que nostre Religion est si sainte, & neanmoins les vns les chantent en courant, sans deuotion & sans esprit, & les autres les entendent de mesme; quelle pitié ! Où est nostre foy? mes yeux vouloient déborder en larmes, mais il fallut les retenir, & se faire force.

En troisieme lieu, il auoit grande reuerence & grand amour pour les personnes religieuses, & pour toutes celles qui se vouloient consacrer au seruice de Dieu; il les y encourageoit & les y aidoit de toute sa force. Il écriuit à l'vne dans le plus rude de ses combats; Je vous auouë que i'ay esté touché, lors que i'ay appris combien de tempestes & d'instantes poursuites vous auez euës à supporter. Je ne sçay pourquoy on s'allarme tant, ny ce que vous auez fait contre l'Euangile, il n'y a toutesfois que cela à condamner. Je crois que l'on aura de la peine à vous faire ce reproche au fuiet de vostre dessein; mais ie ne m'étonne nullement de toutesces trauerfes; il suffit de sçauoir, que vous estes à I E S V S- C H R I S T, & que vous desiréz de le suiure, pour s'attendre que la contradiction vous est deuë pendant les iours de vostre chair. Soyez seulement fidele à vous confier en nostre Seigneur, & prenez garde que le battement du dehors ne mette du trouble & de l'obscurité dans la lu-

“ miere, qui vous à éclairée & pressée de sortir. Je supplie no-
 “ stre grand Dieu de vous deliurer du proces du raisonnement
 “ humain, qui souuent en ces matieres multiplie à l’infiny,
 “ vous assurant que si vous ne l’écoutez point, il se manifesta-
 “ ra à vous, ie veux dire, qu’il vous consolera & vous fortifiera
 “ en foy sur vostre appel, & en experience des dons du saint
 “ Esprit.

“ Il manda à vne autre. Beny soit à iamais le saint Enfant
 “ Iesus de l’entrée en religion de ces deux bonnes ames, dont
 “ vous m’écriuez. I’en ay vne ioye bien grande procedante de
 “ leur perseuerance, qui marque vne grande vocation. Si cet-
 “ re autre persone, que vous sçauetz, auoit vn peu plus de con-
 “ fiance & de force pour rompre ses liens, elle feroit vn grand
 “ coup pour soy. Il ne faut pas tant de sagesse ny d’examen
 “ pour se dedier à la folie des Gentils & au scandale des Iuifs.
 “ Le monde est vn étrange pipeur & amuseur, & il se trouue
 “ par tout, & infecte quasi tout. Dieu n’a que faire de nos
 “ belles parties ny de nos qualitez excellentes, il se plait
 “ quelque fois à confondre les sages par le choix des petits.
 “ Heureuse petiteesse, qui souuent est tenuë pour basseesse, &
 “ qui toutefois renuerse toutes les forces & toute la pruden-
 “ ce de la chair.

Traitant avec des Religieuses il s’eleuoit par fois à nostre
 Seigneur tout d’un coup sur le bon-heur de l’état Religieux
 “ & leur disoit; O que vous estes heureuses, mes sœurs!
 “ & puis leur faisoit vn discours si puissant sur le suiet de
 leur vocation, qu’elles en estoient viuement touchées &
 de reconnoissance enuers Dieu & de courage pour bien
 faire.

Et il écriuit à vne Damoiselle, à la vocation & à l’entrée
 de laquelle il auoit plus contribué apres Dieu que persone,
 “ apres qu’elle eut fait profession. Je benis nostre Seigneur
 “ dans tout le respect, dont ie suis capable, des saintes dispo-
 “ sitions que vostre lettre me monstre pour vostre profession,
 “ i’y connois & i’y tens la grace abondante, qui me fait iuger
 “ que le progres de l’œuure sera magnifique en la liberalité de
 “ Dieu, lequel est à l’ame, qui se donne vraiment à luy, *Mcr-*

tes magna nimis. Vous avez fait vn faut qui vous met en vn »
nouveau monde: Dieu est adorable, quand dans la pleni- »
tude des temps, qui est en sa science & en sa bonté sur vne »
ame, il luy enuoie son fils pour la racheter de la Loy de ser- »
uitude, & la mettre dans l'adoption de ses Enfans. C'est ce »
qu'il a fait maintenant en vous de la maniere la plus specia- »
le & la plus digne qui puisse estre. Vous n'avez iamais esté »
vnice à I E S V S - C H R I S T comme vous l'estes à present par la »
sainte profession; vous auiez encore à donner, ce que vous »
n'auiez pas engagé, & il auoit à recevoir ce qu'il n'auoit pas »
encore pris: mais à present tout est donné & tout est pris, le »
don mutuel est accomply: Plus de moy; plus de vie; plus »
d'heritage qu'en I E S V S - C H R I S T, il est tout en toutes cho- »
ses, en attendant, selon l'Apostre, que nous liurant vn iour »
tous & pleinement à Dieu son Pere, son Pere sera aussi en »
I E S V S & en tous les siens tout en toutes choses, & pris Amen. »

Quatrièmement, il auoit deuotion pour tous les Saints, &
vne particuliere & tres-grande pour S. Ioseph & pour sainte
Therese, laquelle dès l'an mil six cens quarante il auoit choi-
sie pour sa Mere Maistresse, & encore plus grande enuers la
Sainte des Saints & des Saintes, Nostre-Dame, pour mar-
que dequoy, il se consacra aux Ardilliers à son seruice, lors
qu'il s'en alla pour se rendre Chartreux, comme nous auons
rapporté en la premiere Partie, & il voulut l'an mil six cens
quarante estre de la Congregation, qui est erigée en son hon-
neur dans la maison professée des Peres Iesuites de S. Louis.
Il porta quelques années vn cachet à son bras, sur lequel
estoit grauée l'Image de la sainte Vierge tenant entre ses
bras son Enfant, & il en cachetoit d'ordinaire ses Lettres.
Nous auons raconté comme il donna à vne image de nostre
Dame de Grace vn cœur de crystal enchassé dans de l'or,
pour témoigner à cette Mere admirable, c'est ainsi qu'il la
nommoit souuent, son amour, & que dans ce cœur il luy
donnoit le sien. Comme le plus grand plaisir qu'on peut fai-
re à nostre-Dame est d'aimer son Fils nostre Seigneur, aussi
le plus agreable seruice qu'on peut rendre à nostre Seigneur
est d'aimer sa Mere.

Enfin cet homme de Dieu honoroit & aimoit vniquement l'Epouse de I E S U S - C H R I S T la sainte Eglise; il respectoit tout ce qui venoit d'elle & faisoit tres-grand état de toutes ses ceremonies; il disoit qu'il trouuoit vne certaine grace & vne vertu particuliere aux prieres & à l'usage commun de l'Eglise, & qu'il se conformoit volontiers en tout à ses pratiques. Entendant la grande Messe à sa Parroisse, il alloit à l'offrande parmy le peuple, & mesme ordinairement avec vn pauvre; il assistoit aux ceremonies, où les personnes, non seulement de sa condition, mais encore de bien moindre, n'ont pas coûtume de se trouuer, comme à celle des Fonds le Samedy Saint, aux Processions pour loin qu'elles allassent, & quelque mauuais temps qu'il fit. Surquoy il écrit vn iour à vne persone : Nostre Procession va aujour-

“ d'huy à nostre fauxbourg, il faut suiure son Etendart, puis
 “ que nostre Seigneur nous a fait cette grande misericorde
 “ d'estre de son petit peuple. Je tiens à vn honneur singulier de
 “ suiure avec eux la Croix, où l'Eglise nostre Mere nous mène,
 “ n'y ayant rien en elle que de grand, puis qu'il se fait en esprit
 “ de Religion deuant Dieu, & qu'il exprime de grands my-
 “ steres à ceux, qui sont petits & respectueux. Il faut de ces pa-
 roles & de ces actions necessairement inferer qu'un homme
 de cette qualité, & dans vne telle multitude d'affaires, mesme bien plus importantes, ayt eu vne tres-haute estime de toutes les ceremonies de l'Eglise, pour leur auoir rendu vn tel assuietissement & vntel honneur.

Il est vray qu'il les honoroit, mais il desiroit aussi que les Chrestiens de l'exterieur & de la pompe qui donne dans les yeux, passassent à l'interieur & à l'esprit, se pleignant que la magnificence, dôt on pare les Eglises, souuēt les arreste & les amuse, & au lieu de les porter à Dieu qui est leur fin, les en diuertit; Il manda à ce propos à vne persone: il faut nous sou-

“ uenir de la simplicité dans laquelle nos diuins mysteres se
 “ sont passez, pour ne nous tenir à ces appareils, dans lesquels
 “ maintenant on les celebre: cette veuë m'a esté donnée en
 “ entendant la musique & les orgues, & voyant les riches or-
 nemens avec lesquels on faisoit l'office diuin: il faut trouuer
 l'esprit

l'esprit simple, pur, & humilié de leur première institution „ au milieu de ces pompes. Ce n'est pas que cela ne soit saint, „ mais on doit aller au delà, à la simplicité & à la pauvreté de „ Bethleem, de Nazareth, d'Egypte, du Desert, & de la „ Croix. „

Mais il auoit singulierement, à cœur de s'vnir d'esprit, de volonté, & de communication de biens vniuersellement avec tous les Fideles en quelques lieux du monde qu'ils fussent, & d'entrer dans la communion des Saints, qui est vn article du Symbole qu'il goûtoit fort; ainsi il les estimoit tous de quelque nation & de quelque profession qu'ils fussent, sans prendre vn esprit particulier & souuent interessé pour priser les vns & mépriser les autres, pour louer ceux cy & parler mal de ceux là. Il honoroit tous les Ecclesiastiques seculiers, il auoit des communications avec eux pour les exercices de la charité du prochain; il rendoit de grands honneurs à Messieurs ses Pasteurs; il assistoit fort à sa Paroisse; Il frequentoit beaucoup les Religieux, il les aimoit & se seruoit d'eux pour la direction de sa conscience. Tant y a que son cœur dans cette variété, qui se trouue en l'Eglise, n'estoit point partagé; mais dans vne estime, vne approbation & vne affection generale de tous selon leurs degrez, parce qu'il n'estoit poussé en tous ces mouuemens que par vn seul esprit, à sçauoir par l'esprit de I E S U S-CHRIST, qui doit animer tous les Fideles comme les membres de son corps; ne plus ne moins que ceux du nostre, en core qu'ils soient si differens en leur situation, en leur figure, & en leurs emplois, sont neanmoins tous bien vnis & s'accordent parfaitement ensemble, pource qu'ils sont tous viuifiés d'vne mesme ame. Quand il y a de la mes-intelligence, c'est signe qu'il y a deux esprits qui dominant, & la diuision est le principe de la mort.

Cet homme de Dieu eut vn iour vne peine touchant cette communion des Saints, de laquelle il écriuit cette lettre importante à son Directeur. l'experimente vne realité d'v- „ nion en lumiere & en foy, qui est plus que palpable, avec „ la persone de qui ie vous parle, qui ne me laisse aucun doute „

“ que nous ne soyons vn. Je vous diray là dessus ce qui m’a
 “ occupé ces iours derniers, & ce qui me remplit encore,
 “ mais pour vous en rendre vn compte plus net, ie prendray la
 “ chose de plus haut: l’operation que ie sens en moy depuis
 “ deux ou trois ans, m’a toujours tenu lié à suiure nostre Sei-
 “ gneur I E S V S - C H R I S T & à trouuer en luy la vie eternelle
 “ en la presence de son Pere par les hommages de son esprit
 “ ainsi que ie vous en ay rendu compte de temps en temps;
 “ & ie vous diray qu’encore que pour lors i’honorasse au fond
 “ de mon cœur nostre-Dame, les Saints & les Anges, & que ie
 “ desirasse en rendre témoignage en toutes occasions, si est ce
 “ que leur presence & leur commerce estoit obscurcy & com-
 “ me à l’écart dans mon esprit.

“ Je vous auouë que cette pensèe m’est venuë plusieurs fois,
 “ disant en moy mesme, i’honore tant Nostre Dame & quel-
 “ ques Saints & quelques Anges, & ie ne sçay où ils sont; ie
 “ leur éleuois bien mon cœur, mais de presence il n’y en auoit
 “ point, au moins ce me semble, comme ie la ressens mainte-
 “ nant: car il y a quelques mois que i’ay eu ouuerture & lumie-
 “ re avec de puiffants effets sur la charité & la chere vnitèe
 “ faisant conceuoir des choses inexplicables de Dieu, Pere,
 “ Fils, & saint-Esprit, qui est Charité, non par raisonnement
 “ & étenduë d’esprit, mais par vne veuë fort simple, & par
 “ vne touche qui penetre le cœur d’amour, & i’ay connu que
 “ le fils de Dieu nostre Seigneur nous est venu apporter par
 “ son incarnation cette charité, & qu’il s’est vny à nous pour
 “ nous faire estre tous en cette intime & chere vniõ iufques à
 “ ce qu’il nous fasse tout consommez en luy estre vn iour tout
 “ vn en Dieu, lors qu’il luy liurera son Royaume, *ut sit Deus*
 “ *omnia in omnibus*, & que nous entrerons en cette chere vnitèe
 “ du Pere, du Fils & du S. Esprit.

“ Il y à enuiron dix ou douze iours, que m’estant mis à mon
 “ ordinaire le matin à prier Dieu, ie sentoie en moy mesme
 “ n’y auoir aucune entrèe: ie me tins là humilié, la veuë du
 “ Pere, l’accès du Fils, avec lequel ie parle d’ordinaire avec
 “ autant de confiance que s’il estoit encore en terre, & le se-
 “ cours de son saint Esprit me paroissoient distants étrange-

ment de moy, & iefentois vne indignité en moy si grande, ,,
 si veritable & si penetrante, que ien'auois garde de leuer les ,,
 yeux de l'ame, non plus que ceux du corps. Lors il me fut ,,
 donné à connoître qu'en effet i'auois l'indignité que ie sen- ,,
 tois, mais que ie deuois chercher en la cōmunion des Saints ,,
 mon entrée à Dieu & à N. Seigneur & iefus épris en vn in- ,,
 stant d'vne grande presence de respect, d'amour & d'vniōn ,,
 de la saincte Vierge, des Anges & des Saints qui ne se peut ,,
 expliquer, & ie ne vous peux dire la grandeur & la solidité ,,
 de cette grace; car c'est Vie eternelle; c'est Paradis; & cette ,,
 vniōn est & pour les Saints du Ciel & pour ceux de la terre, ,,
 que i'ay toujours, ou presque toujours, en veüe & en presēce. ,,

I'eus connoissance pour lors que Dieu & nostre Seigneur ,,
 ne nous formoient pas pour estre tout seuls & separez, mais ,,
 pour estre vnis à d'autres, & composer avec eux par nostre ,,
 vniōn vn Tout diuin. Comme vne belle pierre, telle que ,,
 seroit le chapiteau d'vne colombe, est inutile, si elle n'est au ,,
 lieu où elle est destinée pour tout l'ouurage, & iusques à ce ,,
 qu'elle soit posée & cimentée avec tout le corps du basti- ,,
 ment, elle n'a ny sa conseruation ny sa decoration, ny en vn ,,
 mot, sa fin: cela m'a laissé dans l'amour & dans la liaison ,,
 veritable & experientale de la Communion & de la ,,
 communication des Saints, avec ordre pourtant de ceux auf- ,,
 quels ie suis plus lié, qui est ma vie en Dieu & en IESVS- ,,
 CHRIST nostre Seigneur. Voyla ce que contient la lettre. ,,

CHAPITRE VII.

Sa Deuotion enuers la saincte Eucharistie.

VNE des plus grandes deuotions de ce saint
 homme a esté enuers la saincte Eucharistie con-
 siderée & comme Sacrifice & comme Sacre-
 ment, de laquelle il faisoit vn état incroyable,
 laquelle il honoroit avec tous les respects qui luy
 estoient possibles, pour laquelle il auoit des amours tres-

tendres, il louoit & benissoit Dieu de son institution, & excitoit de bouche & par lettres tout le monde à faire le mesme, il disoit qu'elle auoit esté instituée pour arrester entre nous nostre Seigneur Dieu & homme, pour nous obtenir tous les biens de grace, dont nous sommes capables en terre, & nous disposer à ceux de la gloire; que le grand dessein de Dieu en l'incarnation, en la vie, en la mort & en la resurrection de son Fils auoit esté de nous donner son esprit pour nous estre vie eternelle, lequel il nous a enseigné par sa parole, il nous a mérité par sa mort, & nous le donne del'état de sa gloire, & pour nous le donner & nous en faire viure mourans à nous mesmes il se donne à nous en la tres-sainte Eucharistie, mort, resuscité, & glorieux, afin de produire en nous par l'operation du saint Esprit ces deux effets de mort & de vie.

Il n'entendoit pas seulement tous les iours la Messe, mais il tenoit à grand honneur de la seruir: il communioit tous les iours, si quelque affaire bien importante & bien pressante de charité ne l'en empêchoit. Et comme l'honneur que l'on rend au tres-saint Sacrement n'est pas de souuent communier, mais de communier bien & parfaitement, il apportoit pour le faire tous les soins, que pouuoit vn homme d'vne si sainte vie & d'vne si eminente vertu comme luy. Il passoit en prieres beaucoup d'heures deuant le saint Sacrement à genoux, & il dit à vn de ses amis, qui s'étonnoit comme il pouuoit y demeurer si long-temps, que c'estoit là qu'il délassoit son esprit, & qu'il prenoit du rafraichissement & de nouvelles forces. Ce n'estoit pas pourtant toujours sans peine, car il écrit à son Directeur le vingt-septieme de Iuin del'an mil six cens quarante sept, cette lettre, qui nous peut seruir d'instruction.

“ J'ay esté bien pauvre tout ce mois, & ie ne sçay si ie l'ay
 “ iamais esté plus en sentimens, & en pesanteur de corps &
 “ d'esprit, que tout le iour du S. Sacrement. Je fus à l'Offi-
 “ ce, à la Procession, à la Messe, à la Communion. au Sermon,
 “ à Vespres & à Compite comme vne vraye beste, ie ne sça-
 “ uois en quel sens me tenir, ny à genoux, ny debout. l'estois

dans vn sentiment inquiet pour le corps, & vague pour l'es-
prit, sinon que dans mon fond ie sçay bien que ie voulois ho-
norer Dieu en nostre Seigneur I E S V S - C H R I S T : apres les
Complies ie me trouuay tellement pesant que me voyant in-
habile à pouuoir demeurer deuant le S. Sacrement, car ie
tombois tout debout, ie voulus voir si me retirant à l'écart ie
serois mieux pour m'assoupir vn peu, mais ie me trouuay
apres encore plus harassé & plus lâche de corps & d'esprit,
i'eusse eu le courage de me coucher tout plat.

Il me vint alors en memoire de ce qu'autrefois i'auois lû
dans vn papier, que vous m'auiez donné, d'vn certain as-
soupissement arriué à vne persone de vertu: aussi-tost ie me
leue & m'en vay sous le Crucifix deuant le S. Sacrement de-
terminé d'honorer nostre Seigneur en tous les états; dès que
ie fus à genoux, & que par le secours diuin i'emportay cette
victoire sur moy, mon esprit fut ouuert, & ie reçûs du saint
Sacrement cette lumiere, que pour estre vn pain, lequel ayt
du rapport avec luy, il falloit que ie fusse moulu comme le
grain, puis pétri avec l'eau, & enfin cuir au feu, & que c'e-
stoit là le moien d'estre incorporé au pain mystereux I E S V S -
C H R I S T, & au mesme instant, qui me faisoit voir cela
tout à la fois, ie sentis vn desir si ardent d'estre dans cet effet,
qu'il m'est toujours demeuré depuis. Le bled, le brisement
& le broiement des meules de moulin m'a esté vne bonne
nourriture: l'eau des afflictions est excellente pour pétrir &
faire changer le grain de forme; Mais la perfection, c'est la
cuisson de l'amour diuin qui affermit & donne couleur. Voi-
la ce que ie sentis en ce moment.

Et i'ay connu depuis que pour entrer dans les voyes de
l'esprit, il faut, comme le bled auant qu'aller au moulin,
estre purgé de sa paille, estre battu & vanné de nos grossie-
retes terrestres; & que le grain n'estoit propre pour nos vsa-
ges qu'estant pur, & qu'il n'auoit sa fecondité que par sa
mort & par sa destruction dans la terre. Ce pain materiel
m'a monstré, pendant cette sainte Octaue, de grandes cho-
ses sur le pain celeste du S. Sacrement. I E S V S - C H R I S T
brisé & broyé par sa Passion se donne a nous à manger, afin

que nous annonçons & que nous exprimons sa mort, sa
 charité & ses vertus en nostre vie. Voila où i'en suis, bien
 amoureux de I E S U S- C H R I S T, bien desirieux d'estre tout
 à luy, & de luy rendre par affection ce qu'il m'a donné, &
 mes biens, & mon corps & mon ame, & mon temps & mon
 eternité. I'ay vne grande soif de le servir, & des desirs que
 ie reserve à vous dire, quand i'auray l'honneur de vous voir.

Son affection singuliere enuers le S. Sacrement luy fit écri-
 re en gros caracteres sur la cheminée de son Château de
 Citry, *Loüé soit le tres-saint Sacrement de l'Autel pour iamais;*
 le fit aller à pied visiter les Eglises à deux lieues aux environs
 pour voir comme le S. Sacrement estoit mis; luy fit donner
 en diuerses contrées vn tres-grand nombre de Ciboires d'ar-
 gent aux pauvres Eglises qui n'en auoient point, & mesme
 des Tabernacles qu'il faisoit & doroit luy-mesme, comme
 il auoit vne adresse merueilleuse pour toutes les choses ma-
 nuelles, dont il m'écriuit le vingt-sixième de Decembre de
 l'an mil six cens quarante six, ce qui suit. I'ay depuis cet Ad-
 uent commencé de mettre en execution ce que ie desirois il
 y a long-temps, à sçauoir, que le temps que ie n'ay pas d'af-
 faire bien pressantes, comme est pour l'ordinaire celuy d'a-
 pres le souper iusques à la priere, ie fesse quelque travail des
 mains: suiuant ce dessein i'ay vne petite établie de Menui-
 sier, & ie taille des Tabernacles pour le S. Sacrement: quand
 ie n'en ferois qu'vn par mois, le temps sera toujours vtile-
 ment employé, & quelque Eglise necessiteuse secourüe.

Cette mesme affection luy donna la pensée dès l'an mil
 six cens quarante-vn, de former en sa Parroisse de S. Paul
 vne compagnie de Dames pour prier tous les apres-disner,
 chacune à son heure, deuant le S. Sacrement: il fit vn petit
 traité de la conduite de cette deuotion, & des motifs pour
 lesquels il falloit l'entreprendre: dont le principal est de
 considerer, comme nostre Seigneur estant continuellement
 en cet adorable mystere pour se communiquer à nous, il
 sembloit tres-raisonnable qu'il y eut aussi incessamment
 quelques personnes dans les Eglises où il est, pour luy rendre
 nos honneurs & nos hommages, & pour satisfaire au desir

qu'il a de se donner à nous. Il presenta avec l'humilité & la dependance qu'il deuoit, ce traité à Monsieur son Pasteur pour le luy faire agreer & le faire mettre en pratique s'il le iugeoit à propos; ce qui est arriué, & se continuë encore avec grãde edification & grand profit, & avec tant de succes, que de là ceste saincte institutiõ s'est étenduë en beaucoup d'autres paroisses, & en d'autres villes, comme à Dijon, où Monsieur de Renty l'établit au premier voyage qu'il y fit, avec zele & avec courage surmontant toutes les difficultez & toutes les resistances qu'il y trouua, & où aussi elle a reüssi avec grande benediction.

Il excita aussi plusieurs personnes de sa Parroisse d'accompagner le S. Sacrement, quand on le porte aux malades; de sorte que dés-lors plusieurs, & hommes & femmes, suiuoient nostre Seigneur avec grande reuerence; le cierge allumé dans la main, & il s'y rendoit luy mesme si assidu, nonobstant toutes ses occupations, qu'il a passé long-temps presque toutes les matinées en ce saint exercice par les plus mauuaises saisons de froid, de chaleur & des autres intemperies de l'air: & vn iour entr'autres qu'il faisoit fort mauuais tēps, & qu'il estoit extremement enrûmé, comme on le pria de n'y point aller pour cette fois, sur ce qu'y allant incommodé comme il estoit, & par vn si mauuais temps, & teste nue, il estoit impossible qu'il n'en reçût vn notable preiudice, tout cela ne pût pas fléchir sa constance, ny retenir sa deuotion, mais il s'y en alla & passa par dessus toutes ces difficultez, & ce qui est admirable, c'est qu'au retour il se trouua quitte de son rûme.

Vn autre iour accompagnant le S. Sacrement, il passa vn carrosse tiré à six cheuaux, sans s'arrester, ny mesme salüer nostre Seigneur: l'on crût que c'estoit des heretiques; luy indigné de cette impieté & animé de zele pour defendre la gloire de son cher Maistre, exposa sa vie pour faire mettre ces gens en leur deuoir, se iettant hardiment au deuant des cheuaux, qu'il retint par merueille tout court, & obligea ceux qui estoient dans le carosse, de demeurer en respect iusques à ce que le S. Sacrement fut passé; ce qui causa, & avec

sujet, de l'admiration à tous ceux qui virent vne action si genereuse.

CHAPITRE VIII.

Son Oraison.



E chapitre & le suiuant tiendront quelque chose de plus, que ne porte vne histoire, parce que deuant traiter de choses difficiles, elles demandent de l'éclaircissement pour pouuoir être bien entendus.

Nous parlons en ce chapitre de l'oraison de cet homme de Dieu, & nous disons que commel'oraison est le grand canal par lequel les dons de Dieu découlent dans nos ames, le moyen le plus assuré pour acquerir les secours & les graces necessaires à nôtre Salut, & l'instrument le plus general, dont nous nous seruons en la vie Spirituelle pour en faire toutes les fonctions, & nous auancer en la vie purgatiue pour la ruine des vices & des pechez, en l'illuminatiue pour la pratique des vertus, & en l'vnitiue pour arriuer à l'vniou avec Dieu, où consiste nostre perfection, tous les Saints ont eu tant d'estime & tant d'amour pour cette diuine action, que quitrans quasi toutes les autres, ils ont passé les iours & les nuits en oraison. Et plusieurs ont abandonné leurs sceptres & leurs coronas, & se sont retirez en des monasteres & en des solitudes, pour auoir l'honneur de pouuoir & plus secretement, & plus priuément, & plus long-temps conuerser & s'entretenir avec Dieu.

Monsieur de Renty éclairé de leurs lumieres & marchant sur leurs traces s'est adonné à ce saint exercice avec tant de soin & avec tant d'affiduité, que nous pouuons dire que ça esté son occupation ordinaire, & que toute sa vie a esté vne vie d'oraison. Je ne dis rien de ses oraisons vocales pour en auoir parlé en la premiere partie, ie dis qu'il a eu vne affe-

ction.

Etion incroyable pour l'Oraison mentale sçachant sa necessité, en ce qu'elle fait cōnoître & qu'elle rend efficaces les verités de nostre Religion, qui ne font point d'effet estans inconnües; son vtilité pour apprendre à l'homme ce qu'il est, & luy faire exercer les vrais actes des verrus, à sçauoir les interieurs; & sa gloire, l'éleuant au deuis familier avec Dieu, qui luy est vn plus grand honneur incomparablement, mesme en vn quart-d'heure, que ne luy seroient les années entieres d'vne communication tres-confidente avec tous les Monarques de la terre. Ne plus ne moins qu'vn homme est plus honoré d'entretenir vn Roy avec liberté & franchise l'espace d'vne heure & encore moins, que s'il entretenoit dix années entieres des vilageois. Je dis de plus qu'il a experimenté les differentes manieres de cette oraison, & qu'il est monté à ses quatre érages, dont le premier est l'oraison de raisonnement & de discours; le second plus releué, l'oraison d'affection; & le troisieme encore plus, l'oraison d'vnion ou la contemplation, qui se partage en deux, en la contemplation actiue & acquise, & en la contemplation passive & infuse, qui est le quatrieme & le plus haut étage de l'oraison.

L'Oraison de raisonnement & de discours ou la Meditation, est vne application que l'homme fait de son esprit pour connoître vne verité de son salut qui luy est cachée, raisonnant & discourant dessus; & pour cela recherchant ses causes, ses effets & ses circonstances, pour le tēps, pour le lieu, pour la façon, pour les personnes afin d'en tirer des motifs de bien viure, allant d'vne circonstance à l'autre, des causes à leurs effets, & des effets à leurs causes: ce qui s'appelle Raisonner & Raisonnement: & parce que nostre esprit est fort prompt en ses operations, & qu'il ne vâ pas, mais qu'il court, cela se nomme Discourir & Discours.

Monsieur de Renty commença par cette sorte d'oraison, & y demeura quelque temps: Comme il faut aussi toujours commencer par là, si on n'est attiré de Dieu à vne autre voye, parce que comme la façon propre & naturelle, que Dieu a donnée à l'homme, pour connoître & affectionner vne chose

est par la consideration & le raisonnement, il doit s'en servir iusques à ce qu'il l'éleue à vne plus sublime: le premier don qu'il luy a fait, est celuy de la raison & du discours, il faut pour cela que ce soit son premier vsage.

Le suiet ordinaire qu'il prenoit pour ses meditations, estoit la vie, la passion & la mort de nostre Seigneur, comme c'est aussi sans contredit le plus profitable, puis que nostre Seigneur nous a esté donné pour nostre exemplaire, en l'imitation & l'expression duquel consiste nostre auancement & tout nostre salut.

Après quelque temps, comme il eut esté bien fidele à Dieu en ce premier étage, il passa au second qui est l'oraison d'affection, & on luy dit; *Amice, ascende superius*: mon amy, monte plus haut; ne plus ne moins qu'un écholier, qui a bien appris, monte à vne classe plus haute & à vne science plus releuée, car il ne croupit pas toujours dans vne grammaire, & il étudie pour passer de science en science, iusques à s'y rendre consommé.

Cette oraison d'affection est vn entretien familier & affectueux de l'ame avec nostre Seigneur, sans discours ou fort peu: c'est vne communication sincere avec Dieu present & resident dans l'interieur, où l'ame quittant les considerations & les recherches, à la seule pensée & à la simple souuenance de Dieu, s'emporte vers luy & s'allume en des affections de loüange, de benediction, d'adoration, de glorification, d'action de graces, d'offre, de demande, & par dessus tout de charité, comme de la Reyne de toutes les vertus, qui est la plus agreable & la plus glorieuse à Dieu & la plus meritoire à l'homme, qui luy donne plus de force pour surmonter les difficultez & pour pratiquer les bonnes œuures, & qui l'vnit plus intimement & plus parfaitement à Dieu.

L'ay dit sans discours, parce que l'entendement a esté suffisamment éclairé des lumieres, que luy ont fourny les meditations precedentes. Il ne faut plus chercher de nouvelles connoissances ny de nouvelles raisons, où l'on en a assez pour aimer & produire les autres affections necessai-

res, si l'on s'en veut seruir.

Or la façon de la faire est, premierement de vous retirer dans le secret cabinet de vostre cœur, & là vous appliquer à Dieu qui y reside, non par la raison ny par les discours, mais par la foy, croyant fermement la presence de sa diuine Maïesté & de toutes ses perfections, & en suite de cette croyance & de cette ferme persuasion, luy faire vne profonde reuerence, l'adorant & vous aneantissant deuant luy par respect de son infinie grandeur, & par sentiment de vostre extreme bassesse, dans la lumiere de ces paroles de Dauid, *Domine, quis similis tibi? Quid est homo, quod memor es eius?* Seigneur, qui vous est semblable? & qu'est ce que l'homme, que vous daignez vous souuenir de luy, & qu'il ose paroître deuant vous? Tenez vous en sa presence dans ces impressions de respect & d'humilité, & tenez vous y long-temps, si vous voulez, afin de vous y mieux établir, car le temps y sera tres-bien employé; & encore plus long-temps si vous sentez que vostre cœur s'ouure à ces affections.

Après bannissant toutes les considerations & toutes les recherches du suiet, sur lequel vous desirez de vous employer, qui sera par exemple, que Dieu est Tout & que vous n'estes rien; qu'il est vostre souuerain Seigneur; & vostre derniere Fin; qu'il à vn soin de tout ce qui vous touche; que nostre Seigneur est mort pour vous, ou autre: Occupez vous de luy par la foy d'une façon tres-simple, faisant & refaisant des actes d'une foy viue de la verité, que l'Eglise vous en a enseignée: puis d'esperance; ou de louange, ou de glorification, ou d'action de graces; ou de douleur de vos pechez, ou d'une autre affection, selon que l'ame y sera disposée; mais particulièrement de l'amour, & prenant garde que ces affections portent coup pour les meurs & operent des changemens.

Voyla la conduite qu'il faut tenir en cette oraison, qui pour cela s'appelle Oraison de presence de Dieu, & oraison de foy, & d'affection: de presence de Dieu, à cause du premier point, où l'ame se met en la presence de Dieu, s'y tient: de foy & d'affection, à raison du second, où elle exerce la

foy & s'épanche en des affections différentes, suivant que le fuyet l'y porte, & selon l'ouverture qu'elle y trouue.

En quoy il faut remarquer soigneusement deux choses: la première, qu'il n'est pas nécessaire en cette manière d'oraison de produire plusieurs affections de diuerses sortes; seulement vne comme d'esperance, ou d'amour, ou vne autre bien formée & bien continuée suffit. La raison y est claire, parce que tandis que Dieu donne grace à l'ame de faire l'action de quelque vertu en sorte qu'elle s'y sent disposée & poussée, & qu'elle l'exerce avec facilité, c'est vne marque euidente qu'il veut qu'elle le serue, & l'honore, & qu'elle se sanctifie & se perfectionne par cette action, & ainsi qu'elle la continuë tandis que ce secours luy durera: de plus prenant la chose du costé de l'ame ainsi disposée & secourüe, ce n'est pas sagesse de quitter vne action bonne & excellente, laquelle luy est aisée, à cause de l'assistance qu'elle y reçoit de Dieu, pour en prendre vne autre, qui luy sera difficile parce qu'elle n'aura pas tât d'aide pour la faire. Ce qui montre qu'il ne faut iamais changer vn exercice de pieté pendant que Dieu nous y donne vne grace abondante, & qu'il nous y applique.

La seconde est de faire & de refaire plusieurs fois les actes d'vne mesme vertu, comme de la foy, de l'esperance, de la charité, ou, ce qui sera encore meilleur, de continuër le mesme acte, pour acquerir vn fond de ces vertus, qui ne s'acquiert que par la reiteration efficace & constante de ses actes; comme vn cloud n'entre pas bien auant pour vn coup qu'on luy donne, mais il luy en faut donner plusieurs & frapper dessus bien des fois; Il en va de mesme des vertus, dont le profit & la force consiste en leur affermissement & en leur enracinement dans l'ame, où elles ne font rien, ou fort peu, si elles n'y sont bien établies & bien prises; ne plus ne moins qu'un arbre ne produit ni feuilles ni fruits, s'il n'est enraciné, & en produit à proportion qu'il a ietté de plus profondes racines.

Il faudra faire le mesme pour les conclusions morales qu'on doit tirer de ces actes, c'est à dire, les redoubler plu-

sieurs fois pour les bien affermir & les rendre efficaces: comme apres les actes reïterez de foy que Dieu est vostre premier Principe, & que de vostre chef vous n'estes rien; que vous esperez en luy & en nostre Seigneur, dites vne fois, deux fois & plusieurs avec affection & avec vne application tranquille, mais pourtant vigoureuse, si ie crois cette verité de Dieu & de moy, pourquoy m'attribüe-ie quelque chose? dois-ie pas m'humilier & m'abbaïsser? qui n'aïmeroit celuy de qui on tient tout? pourquoy ne regarde-ie & moy & toutes les creatures comme des Neants? Si l'espere en Dieu & en nostre Seigneur, dequoy donc ay-ie peur? n'ay-ie pas fuiet de viure en assurance & en ioie? qu'est-cé qui me doit inquieter & me troubler? viuons donc en tranquillité & en repos, comme vne telle esperance m'y oblige. Ces actions faites à diuerses reprises, & redoublées avec fermeté opereront sans doute de grands effets dans vne ame, qui est le fruit que doit produire cette oraison affectiue.

En laquelle Monsieur de Renty s'exercea quelques années & y acquit des thresors inestimables de richesses spirituelles. Cette oraison, dit-il dans vn de ses papiers, n'est point par raisonnement ni par recherche, mais par vn loyal amour, qui tend touiours à donner plûtoſt qu'à recevoir. l'obscurité de la foy est à l'ame plus certaine que toutes les lumieres qu'elle peut auoir, & dont elle doit vser avec respect & action de grace, & non par complaisance ni par attache: il n'y a point là de bandement d'esprit. Cette oraison ne fait point mal à la teste, c'est vn état de presence modeste, dans laquelle on se tient deuant Dieu, attendant de son esprit ce qu'il luy plaira de mettre en nous, que nous receuons en simplicité & en confiance, comme s'il nous parloit.

Les dispositions plus ordinaires, avec lesquelles il entroit en cette oraison, estoient; la premiere, vne profonde reuerence & vn aneantissement de soi mesme en la presence de Dieu, de qui la grandeur le tenoit dans vn sentiment incroyable de sa bassesse, disant, que nous deuions nous regarder

der deuant elle comme de petits atômes, & encore moins. La seconde, vne haute & parfaite confiance en son infinie bonté & misericorde, qui soutenant son humilité & l'impression qu'il auoit de sa bassesse, luy faisoit esperer tout.

Il excitoit beaucoup à cette maniere d'oraison les personnes de sa connoissance qu'il en iugeoit capables, comme estant très-excellente, tres-profitable, & fort facile, puis qu'il ne s'agit pas de considerer vne chose, de la penetrer, ni de discourir dessus: ce qui est mal aisé à tous, comme dit le Sage, & principalement à ceux qui n'ont point de lettres, mais de la croire simplement, & puis de s'y appliquer avec les affections. Il conseilloit de s'adonner beaucoup plus aux operations de la volonté, qu'aux speculations de l'entendement, & par l'instruction, que S. Paul nous donne écriuant à Tite de viure en sobriété, il entendoit la sobriété des sens, & encore plus celle de l'esprit, pour retrancher dans nos oraisons la multitude des connoissances & les discours, & y proceder par la foy.

En effet la foy d'un mystere l'emporte incomparablement par dessus toutes les autres connoissances & tous les discours que le meilleur esprit du monde en peut former; par ce que comme les choses ne se voient bien que par leur propre lumiere, vn flambeau par sa lumiere, le soleil par la sienne, les choses de la gloire par la lumiere de gloire; ainsi celles de la grace ne se connoissent que par des lumieres de grace, dont la meilleure & la plus parfaite sans contredit est celle de la foy. La raison nous a esté donnée pour sçauoir les choses naturelles, & la foy pour apprendre les diuines; nous deons parler aux hommes avec la raison, & à Dieu avec la foy. De plus comme Dieu est infiniment au dessus de toutes les Creatures, & les choses de la Grace au dessus de celles de la Nature, tous les discours des hommes, pour subtils & éleuez qu'ils puissent estre, ne sçauoient y atteindre; parce qu'apres tout ce n'est que leur façon de connoître & la nature qui raisonne.

Adiouçons que quelques connoissances que nous aions en terre de Dieu & des choses spirituelles, ces connoissances

sont toujours en quelque façon trompeuses , parce qu'elles ne representent iamais les choses comme elles sont au vray , a cause que nostre esprit ne peut rien concevoir icy bas qui n'ait auparauant passé par les sens ; où les choses spirituelles s'épaississent & prennent du corps , & ainsi se falsifient & se déguisent ; mais la foy les montre comme elles sont. Il n'y a que deux lumieres assurées & indubitables de tout point , qui surpassent de beaucoup en excellence toutes les autres , qui sanctifient & qui deifient nostre entendement , & qui le réunissent à leur premier principe & à la source de toutes les verités , qui est l'Entendement diuin , à sçauoir , la lumiere de la foy en cette vie , & la lumiere de la gloire en l'autre , parce que ce sont des participations des mesmes connoissances que Dieu a. Ce qui montre le merite & la perfection de l'oraison affectiue , qui laissant les discours procede par la foy.

SECTION VNIQUE.

Sa Contemplation.

MONSIEUR de Renty n'en demeura pas là , mais il passa plus auant , & de l'oraison d'affection Dieu l'attira & l'éleua à l'oraison d'vnion & à la contemplation , qu'il luy donna en vn tres-haut degré : mais pour l'entendre , Il est à sçauoir , que les Saints parlant de la contemplation , qui est l'oraison la plus sublime que l'on pratique en terre , nous apprennent qu'il y en a de deux sortes , dont l'une est Acquise , & l'autre Infuse. L'Infuse est celle que Dieu tout seul produit en l'ame , sans que l'ame y apporte rien du sien que le simple consentement à receuoir l'operation de Dieu , & ce qu'il fait en elle , d'où on l'appelle encore contemplation Passiue : L'Acquise est celle , que l'homme aidé de la grace de Dieu acquiert par son trauail & qu'il exerce par son industrie & par ses actions , ce qui fait qu'elle est de plus nommée Actiue.

L'Homme ne peut rien à la premiere, elle depend absolument de Dieu qui la donne, & à qui, & quand, & comment il luy plaist, & qui l'oste de mesme, sans qu'on l'en puisse empêcher, non plus que tous les hommes avec tous leurs efforts ne sçautoient faire que le soleil ne se leue & ne se couche; mais tous sont en quelque façon capables de la seconde, & c'est vne veuë simple & sans discours de Dieu où d'un autre objet, qui touche la volonté de saintes affections, & particulièrement de celles de l'amour; c'est vne operation douce & paisible de l'ame qui enuisege vne chose; c'est vn regard tranquille de foy, & en suite de la foy vn regard d'estime, ou de respect, ou de gratitude; ou de confiance, & singulierement d'amour.

Quand vous voiez vn de vos amis malade, que vous le regardez dans son liët souffrir beaucoup, se tourner; se tourmenter & gemir, & que l'aspect de cette chere persone souffrante vous émeut & vous donne des sentimens de pitié, des desirs de le soulager, & de grandes peines de son mal: cela c'est contempler; car vous le regardez sans raisonnement, mais d'une simple veuë, qui pourtant vous frappe & fait impression sur vous. Quand de mesme vous regardez nostre Seigneur au Jardin priant, le visage contre terre, & répandant à l'entour de foy vne sueur de sang; ou lié à la colonne & découpé de foüiets ou cloüé à la croix; mourit dans vne extremité de douleur & d'infamie, & que ce regard attentif, mais simple qui ne porte formellement aucun discours, vous touche de compassion, d'admiration, de regret de vos pechez, d'esperance & d'amour; c'est contempler. Lors que la Magdelaine assise aux pieds de nostre Seigneur & écoutant en foy ses paroles, ou le voyant crucifié & croyant que c'estoit le fils de Dieu son Redempteur, qui luy auoit pardonné ses pechez, qui luy auoit fait tant de graces, qui luy auoit témoigné tant de bonne volonté, & qui souffroit pour son suier, & que de cette source découloient des sentimens d'amour, de gratitude, de contrition, & vn torrent de larmes, elle estoit en vraye contemplation.

L'usage donc de cette contemplation Actiue & Acquisie
consiste

consiste à entrer dans le fond de son esprit, & là en la presence de Dieu quittant les sens & les discours s'appliquer par la foy & par les affections de la volonté sur quelque perfection diuine, ou sur quelque mystere de nostre Seigneur, le regardant avec attention & avec des yeux de foy, de respect, de confiance, d'amour sans raisonner, & mesme sans multiplier vne quantité d'affections différentes, s'affermissant seulement dans ce regard attentif & affectueux, qui encore doit estre si simple & si éloigné de tout soin & de toute reflexion d'aucune autre chose, qu'on les oublie toutes si l'on peut, pour s'occuper seulement à regarder & à écouter nostre Seigneur; comme la Magdelaine, de qui nous venons de parler, & qui assise à ses pieds ne disoit mot, & blâmée par sa sœur ne répondoit rien, ne pensant qu'à le regarder & à l'oïr.

L'ame doit se taire à toutes les creatures & parler à Dieu seul. L'ame parle aux creatures en quatre façons: En premier lieu elle leur parle avec l'entendement, lors qu'elle pense à elles. Secondement avec la volonté, quand elle les affectionne. Troisièmement avec l'imagination, quand elle se les figure, & en quatrièmeli lieu avec les passions, lors qu'elle les conuoite, sans rien dire du langage qu'elle leur tient par les sens extérieurs. Tellement que les paroles qu'elle leur dit, sont les pensées qu'elle en a, les affections qu'elle en conçoit, les images qu'elle en forme, & les conuoitises qu'elle en produit. Comme au cōtraire elle se tait & ne leur dit mot, quand elle ne s'applique pas à elles avec ces facultez, qu'elle n'en occupe point avec ces operations, & qu'elle est en vne cessation d'actes à leur égard: de sorte que n'ayant avec elles aucun commerce, elle est comme si il n'y auoit que Dieu & elle au monde, à qui seul elle parle dans ce silence mystic, dont S. Iean dit qu'il se fit silence au ciel, c'est à dire, en l'ame, & elle luy parle de l'entendement & de la volonté avec les actes de foy, d'esperance, d'amour, d'adoration, de benediction, de glorification, de loüange, de remerciement d'ynion & semblables. Et encore mieux elle se tait de fois à autre & ne luy parle pas, mesme de cette noble maniere &

de ce diuin langage; mais elle l'écoute sans rien dire, & se rend attentue à ses paroles, qui quelquefois peuuent estre articulées, intelligibles pourtant à elle seule, mais qui ordinairement sont les lumieres, avec lesquelles il éclaire son entendement, & les impressions & les mouuemens dont il touche sa volonté, faisant ce que disoit Dauid, *Audiam quid loquatur in me Dominus Deus*, j'écouteray ce que Dieu me dira dans mon interieur, & le suppliant avec Samuël, *loquere, Domine, quia audit seruus tuus*. Parlez, Seigneur, parce que vostre seruiteur écoute.

Nostre Seigneur instruisant ses Apostres à l'oraison, leur dit & à nous en leurs persones: *Orantes nolite multum loqui*. Quand vous priez, ne parlez pas beaucoup: ce qu'il entend non seulement de la bouche, mais encore de l'entendement & des autres facultez de l'ame; ne parlez pas beaucoup, mais écoutez beaucoup: Aussi s'apelle-t'il, *Verbum*, la Parole, parce qu'il veut estre écouté & qu'il le merite: c'est pourquoy on dit à l'ame, *audi filia*, Ecoute ma fille. Ainsi le P. Auila qui a composé vn excellent ouurage sur ces mots, donnoit pour vn auis important, que nous deuous aller à l'oraison plutôt pour écouter que pour parler; & il auoua au celebre Pere Louys de Grenade, qui a fait sa vie, que quand il alloit à ce saint exercice, il attachoit & lioit son entendement comme vn fou, afin qu'il n'y fut point grand parleur.

Il y a de certaines ames qui en leurs oraisons parlent toujours, leur estant auis que le secret consiste à toujours parler à Dieu, & employer sans cesse leurs facultez à produire des actes, & à ne l'écouteriamais, sans considerer que ce que Dieu leur dira, fera bien meilleur & plus vtile pour elles, que ce qu'elles luy peuuent dire, & que dans la conuersation & l'entretien qu'on a avec vne persone, on ne luy parle pas continuellement, mais on luy parle, & apres on l'écoute. ainsi en vos oraisons parlez à nostre Seigneur, & puisoyez le, vous rendât attentue en silēce & en respect à ce qu'il a à vous dire.

C'est ainsi que se pratique la Contemplation Actiue & l'oraison d'Vnion; où il faut remarquer sa difference d'avec l'oraison de Raisonnement & celle d'Affectiō, en ce que

les deux facultez de l'ame, l'entendement & la volonté agif-
fants en ces trois sortes d'oraison, l'entendement agit plus
que la volonté en l'oraison de Raisonnement, la volonté
dauantage en l'oraison d'Affectio: où encore il est à sçauoir
que ceux, qui la commencent, ne sont pas à l'entrée ordi-
nairement sans quelque discours, mais qui va diminuant
peu à peu iusques à ce qu'il cesse tout à fait; & de plus qu'ils
ont d'abord vne grande varieté d'actes affectueux, mais à la
fin beaucoup moins: En l'oraison d'Vnion la volonté predom-
mine encore par dessus l'entendement, mais avec plus de
simplicité qu'en l'oraison d'Affectio; de plus Dieu y opere
dauantage, & l'homme moins, & son operation y est plus
spirituelle, plus pure, & plus diuine, c'est pourquoy il faut
qu'il attende en paix, & en confiance l'action de Dieu, sans
qu'il s'empresse; ce qui faisoit dire à Monsieur de Renty
que la grande imperfection des ames, est de ne pas assez at-
tendre Dieu, & le naturel agissant & qui n'est pas assuieti
se remüe, & sous de beaux pretextes pense faire merueille,
mais c'est ce qui empêche Dieu d'agir dans vne ame, parce
qu'il la trouue dans vn état d'agitation & d'inquierude, &
pour receuoir son action, elle deuroit estre en tranquillité &
en silence.

Quelqu'un me dira qu'il luy semble qu'agissant dans ce
retranchement de discours, dans cette foy si nuë, & cette
grande simplicité d'actions il ne fait pas grand' chose, &
que mesme il perd son temps. A quoy ie répond que cela
n'est pas, au contraire qu'il l'employe fort bien, puisque re-
tranchant les actions des sens & les discours, il oste ce qui
l'eloigne de Dieu, qui est infiniment au dessus de tous les
discours, & encore plus des sens, & marchant par la foy &
par les affectio de la volonté, il s'en approche. Marcher de
cette sorte en ce chemin, c'est s'auancer & faire de grands
progres.

Monsieur de Renty satisfait à ce doure en l'un de ses pa-
piers, disant: quelqu'un me dira, souuent il ne me vient rien
en l'oraison, ie crains de perdre mon temps en paresse. Mais
sçachez que vous ne le perdez pas, quand dans la perte de

“ vous mesme, vous vous mettez en respect & en confiance
 “ deuant Dieu pour luy faire vostre cour. Il ne peut trouuer
 “ mauuais vn tel procedé. Vn autre dira, j’ay eu des distra-
 “ ctions, ie me trouue dans de grandes secheresses & ie suis
 “ trauaillé de beaucoup d’autres peines: ie répond, perseue-
 “ rez avec toutes ces peines en vostre regard de foy, de res-
 “ pect, & en vos affections autant que vous pourrez; Tenez
 “ vous clos & enfermé dans le cabinet de vostre cœur: Laissez
 “ bruire toutes ces tempestes au dehors sans vous en soucier,
 “ à l’exemple de Noë qui estoit paisible, comme son nom
 “ mesme le marque, au milieu de son vaisseau, encore qu’il
 “ fut choqué de tous costez des vagues, & agité des orages.
 “ Cela est necessaire à l’ame pour la purger & la disposer aux
 “ opérations de Dieu. Comme le bois verd auparauant qu’il
 “ flambe, sicc & iette son humidité, & il faut qu’il porte cette
 “ purgation pour estre capable d’estre enflammé: de mesme
 “ les distractions & toutes sortes d’imaginacions nous atta-
 “ quent, selon qu’il plaist à Dieu, mais ne nous troublons point
 “ & ne nous retirons pas pour cela du saint exercice de l’orai-
 “ son; Détournons seulement nostre regard de ces miseres
 “ quand nous nous en aperceuons, & continuons paisiblement
 “ & sans bruit nostre sacrifice, nous assurant que nous ne sou-
 “ tiendrons pas long-temps le Seigneur qu’il ne vienne.

Et luy se trouuant en cet état, crioit à Dieu tout haut
 “ lors qu’il estoit seul: Je suis à vous, ô mon Dieu, malgré
 “ toutes ces distractions & toutes ces ariditez! Je suis à vous,
 “ & j’y veux estre à iamais sans reserve. Vous m’avez créé &
 “ ie vous aimeray toujours. Par fois il l’écriuoit de son doigt
 “ sur la terre, d’autrefois sur son cœur, & disoit: Je suis con-
 “ tent de tout ce que Dieu veut & ordonne de moy, ie ne veux
 “ rien plus: Je ne trauailleray ny pour auoir de la consolation,
 “ ny pour m’exempter de la secheresse, ma resolution est de
 “ benir Dieu en tout temps.

“ Il écriuit à ce propos à son Directeur. Je suis quelquefois
 “ vne heure ou deux à l’oraison, sans qu’il me vienne rien, quel-
 “ quefois j’y souffre par secheresses & par distractions & lassit-
 “ ude, mais de quelque façon que ce soit, ie ne finis iamais

que ie ne voulusse recommencer, & le desir m'en est renou-
uélé ; quelque fois la lassitude du corps s'en va tout à coup
par vne force interieure qui m'est communiquéé, & qui me
dispose à continuer l'oraïson hors du lieu & du temps de l'o-
raïson, dans la conuersation & dans les affaires ; & ie vous di-
ray en sincerité, qu'encore que ie fasse tout si mal, il n'y a gue-
re de difference de tout mon temps pour l'oraïson, me trou-
uant recueillly en tout.

Il manda à vne autre persone fort confidente sur le mes-
me suiet : Je fus l'autre iour trois ou quatre heures dans vne
Eglise avec grande secheresse sans qu'il me vint rien sur
quoy m'arrester. L'entendis derriere moy vn bon seruiteur de
Dieu qui disoit vn chappelet de *gloria patri &c.* i'offris à
Dieu ce qu'il disoit, iusques à ce que tout d'vn coup il me
fut monstré, que quand l'ame estoit seule dans vn desert,
où elle n'auoit rien de crée sur quoy s'appuyer, c'estoit lors
que la corde du pur amour de Dieu luy estoit dōnée & iettée
du Ciel pour l'attirer, & ie ressentis quelque chose de cet
effet. Quoy qu'il ne me vienne rien, quand ie finis de prier,
ie serois encore prest de recommencer. Voyla pour la con-
templation Actiue & Acquisie.

Pour la Passiue & l'Infuse, comme elle depend absolu-
ment de Dieu, elle n'a d'autre regle que sa volonté & la re-
solution qu'il a prise de se communiquer à vne ame, de qui
il éclaire l'entendement de hautes lumieres, & remplit
sa volonté de grandes affections, & specialement de son
amour : tout ainsi que Moyse parfaite image des Contem-
platifs, pour se rendre capable de monter sur la montagne
de Sina, & là conuerser avec Dieu, quitta les troupeaux
des bestes, le peuple, les petits & les grands, son frere mes-
me Aaron, & encore Iosué son ministre qui estoit toujours
avec luy, & puis tout seuls s'en alla sur la croupe de la monta-
gne, où *accessit ad caliginem, in qua erat Deus*, comme parle
l'Ecriture, il entra dans vn sacré nüage où Dieu estoit, & fut
là quarante iours en contemplation & en conuersation inti-
me avec sa diuine Maïesté. Ainsi on doit laisser les sens, les
raisonnemens, les choses sensibles & les intelligibles pour

estre admis à la vraye contemplation, qui se fait dans les nûages de la foy, où Dieu est sans doute, & par la foy dans les lumieres & dans les affections.

Mais il faut remarquer, que toutes ces hautes contemplations & ces grandes communications doiuent auoir pour but de rendre l'ame contemplatiue, soigneuse d'observer les commandemens de Dieu & de l'attacher à sa volonté, comme toutes celles de Moyse aboutirent à luy donner les Tables de la Loy & les luy mettre dans les mains; qu'il rompit encore apres, pour nous apprendre par figure, que l'ame en ces dispositions de sainteté ne laissera pas de faillir, tant nous sommes foibles & proches de tomber avec toutes nos lumieres, si Dieu ne nous souûtient.

L'epoux dans le Cantique inuite les ames avec ces amiables paroles. *Comedite, amici, & bibite, & inebriamini, carissimi.* mangez, mes amis, & beuez, & vous, qui estes mes treschers & mes plus confidens, enyurez vous. Par le manger qui rompt & masche la viande, il entend la meditation; par le boire, où l'on auale vne viande liquide, il signifie l'oraison affectiue, & par l'yuresse la contemplation actiue, & encore plus la passiue, laquelle produit saintement dans vne ame, ce que l'yuresse opere avec desordre dans vn corps & dans vn esprit, la perte de la raison, l'oubly de toutes choses, & la ioye.

Monsieur de Renty fut attiré là de Dieu, & élevé avec Moyse, au haur de la montagne de la contemplation infuse: il écriuit à son Directeur dez l'an mil six cens quarante cinq:

“ Depuis long-temps ie n'ay aucun vsage à l'oraison, ny quasi
 “ aussi en autre temps, de l'entendement ny de la memoire: Je
 “ ne vois rien, ie ne sens rien, ny n'ay gout ny dégout à rien, ie
 “ sens seulement ma volonté viue & presté à tout ce qui luy
 “ fera monsté pour Dieu. Il luy manda dans vne autre lettre:
 “ i'experimente que depuis vn temps mon oraison n'est plus
 “ en regle: Je possede la tres-sainte Trinité avec vne plénitu-
 “ de de verité & de clarté, & cela avec vn trait si simple & si
 “ fort dans la partie supérieure de l'esprit, que ie ne suis di-
 “ uerty de rien de mes occupatiōs exterieures. Vne autre fois:

JESVS-CHRIST opere l'experience de son Regne dans mon cœur, & ie sens bien, qu'il en est le Maistre & que ie suis tout à luy. I'ay maintenant vne ouuerture plus grande, mais pourtāt si simple, qu'il n'y a rien à dire pour l'exprimer, sinon que c'est vne simple, mais vraye veuë de Dieu en Trinité, accompagnée de loüanges, de benedictions, d'offres & d'autres hommages, si simplement que cela ne fait aucun bruit en bas, ny ne se discerneroit pas mesme en haut par ce detail pour l'exprimer, si on n'y faisoit reflexion; Je ne sçay pas mesme si ie dis bien tout à fait.

Ce saint homme vni par ces contemplations à Dieu & à la premiere verité, receuoit vne abondance de grandes lumieres pour soy & pour les autres sur toutes sortes de manieres, mais celles qu'il eut sur l'Ecriture sainte, & specialemēt sur le nouveau Testament & sur les mysteres de nostre Seigneur, furent admirables. Il escriuit à son Directeur. Sur vn mot, que ie liray dans le nouveau Testament, il me viendra quelquefois des connoissances de nos veritez d'vne maniere si penetrante & si remplissante, que mesme i'en sens mon corps plein, c'est à dire, toute ma nature en est penetree. Et il manda à vn de ses amis: quand ie lis les saintes lettres, ie me fortifie pour entrer dans l'effet qu'elles operent, qui est vne plenitude de verité de Dieu, qui rassasie l'ame solidement & experimentalement. Et il a fait des remarques sur tous les Euangiles du Carefme, qui decouurent bien sapieté, & les grandes lumieres, dont son esprit estoit éclairé.

Voilà à peu pres ce que l'on peut dire de l'oraison de ce grand Seruiteur de Dieu pour ce qui a paru, car le principal est ce qui se passoit dans le sanctuaire de son ame; & il auoit vn si puissant attrait à l'oraison & à la conuersation avec Dieu, qu'apres y auoir passé les sept & huit heures de suite, il se trouuoit à la fin comme s'il n'eut fait que la commencer; sinon qu'il auoit encore plus de desir de la continuer: & il est arriué en fin à ce point qu'il n'en fortoit plus, pource qu'il estoit tousiours recueilly & appliqué à Dieu: D'où il auoit à vn amy intime; qu'il n'auoit plus besoin ny de temps, ni de lieu particulier pour faire oraison, parce qu'il la faisoit en

tout lieu, & en tout temps, & en toutes sortes d'occupations.

CHAPITRE IX.

Son Etat de Mort mystique & d'Aneantissement.



Oicy le plus haut degré de la vertu d'une ame, & la dernière disposition, qu'elle doit avoir pour estre capable de s'unir intimement à Dieu où consiste sa perfection. Il faut qu'elle meure pour viure de sa vraye vie, & elle doit s'aneantir pour deuenir quelque chose de grand. Cette mort & cet aneantissement ne gist pas en la destruction de l'homme pour ce qui est de l'estre naturel, tellement qu'il n'ait plus d'entendement, plus de memoire, plus de volonté, ny de passions, plus d'yeux, plus d'oreilles ny plus de langue, mais en la ruine de l'estre corrompu & vicieux du vieil homme, dont le peché l'a infecté, de sorte que son entendement & ses autres facultez spirituelles & corporelles en soient nettoiyées, & animées de l'esprit de IESVS-CHRIST pour operer, non pas selon la nature gastée, ny selon la nature route pure, mais selon la nature éléuée par la grace & sanctifiée par IESVS-CHRIST.

Or comme l'estre corrompu & malin du premier homme regne entierement en nostre nature, & le poison, que son peché a coulé dedans nous, s'est épandu par tout en nos ames & en nos corps, de façon que depuis le sommet de la teste, comme parle le Prophete, iusques à la plante des pieds il n'y à partie en nous qui ne soit malade; il faut guerir toutes ces parties malades, purger toute cette corruption, & faire mourir & aneantir tout à fait cet estre malin. Je dis, tout à fait, autant qu'il se peut en terre, parce que ce n'est qu'au ciel dans l'estat de la gloire, où ce bonheur se trouue en sa perfection; icy bas il y à toujours quelque chose à redire.

Cet

Cet homme saint & illuminé écriuant à vne persone de cet état de mort & d'aneantissement, luy mande que chantant à l'Eglise avec les autres le Magnificat, il eut vne lumiere sur le verfet, *Deposuit potentes de sede & exaltauit humiles*, qui luy fit voir vne ame dans la plenitude d'elle mesme, dans la puissance & la richesse de ses facultez & de ses inuentions naturelles, dans la vie de ses sens interieurs & exterieurs, qui veut tout voir & tout entendre, enfin qui est toute pleine d'elle mesme & vuide de Dieu : Et puis il adiouste, nostre Seigneur me fit comprendre en l'intelligence de ce verfet, qu'il dépouille cette ame de ce propre esprit arrogant & riche d'iniquitez, qu'il l'humilie, la simplifie & l'aneantit, & que par ce moyen, *Exaltauit humiles*, il l'éleve à vn état merueilleux, où ie la vis reduite à ce riche neant vuide d'elle mesme & de tout ce qu'elle auoit des sens & de l'humain, & dépouruillée non seulement de ce qui est de l'ancienne creature, mais mesme de ce qui est des dons de Dieu pour le suiure en nudité, & estre deuant luy en audience pure. Je connûs qu'en cet état, comme elle porte vne grande impression d'abandon & de confiance, Dieu faisoit en elle ce qu'il vouloit, qu'elle estoit tres-éclairée & qu'elle découuroit de loin les moindres choses, comme l'on découure vn petit arbrisseau au milieu d'vne rase campagne.

Il enuoya à son Directeur ce qui suit au mesme suiet. Lors que ieus donné ma liberté à Dieu signée de mon sang, cōme ie vous ay mandé, on me fit connoitre à quel point d'aneantissement il falloit que l'ame vint pour se rendre capable de s'vnir à Dieu. Je voiois mon ame se reduire comme à vn petit point, ie la voiois se serrer, s'apetisser, & se reduire au neant, & au mesme moment ie me voiois, comme si ieusse eu à l'entour de moy tout ce que le monde aime & possède, & comme vne main qui éloignoit tout cela de moy & le iettoit dans l'byisme du neant, premierement les choses exterieures, les royaumes, les gouuernemens, les bastimens superbes, les riches meubles, l'or, l'argent, les diuertissemens, les plaisirs, qui seruent aux ames d'vn grand empchement pour aller à Dieu, dont il veut pour cela les voir dé-

“ pouillées, afin qu’elles puissent arriuer au point de nudité
 “ & de mort, qui les doit mettre dans les solides richesses &
 “ dans la vraie vie.

“ Secondement, les choses interieures qui sont encore plus
 “ delicates & plus precieuses, comme les sciences acquises, les
 “ connoissances recherchées, les operations de la memoire, de
 “ l’entendement & de la raison humaine, les experiences des
 “ sens, dont l’ame doit estre purgée, & mourir à ses propres
 “ actions, & ie connus qu’il falloit deuenir comme de petits
 “ enfans simples & innocens, separez non seulement du mal,
 “ mais mesme de la maniere d’agir que nous auons au bien,
 “ allans aux choses, que la diuine Prouidence nous presente,
 “ par enuoy de Dieu aux choses, & non par les choses à Dieu,
 “ qui est vne façon nuë, degagée & aneantie, qui ne voit rien
 “ que Dieu, non pas mesme, pour ainsi dire, les choses qu’el-
 “ le fait, dont il ne luy demeure rien, ny chois, ny ioye, ny
 “ regret de la plus grande ny de la plus petite, du bon ou du
 “ mauuais succes; mais seulement l’ordre de Dieu qui regne en
 “ tout, & qui en tout aussi contente l’ame, laquelle tient à luy
 “ & non à la vicissitude des choses: c’est pourquoy elle est tou-
 “ jours egale & toujours la mesme au milieu de tous les chan-
 “ gemens.

“ Dans vne autre lettre il luy mande; il faut aneantisse-
 “ ment à tout pour suiure en simplicité, sans regard & sans re-
 “ flexion, ce que nostre Seigneur fait en nous, ou ordonne de
 “ nous, soit cecy ou cela; c’est vn chemin qui m’est monstré,
 “ par lequel ie dois aller à luy; & de là vient que toutes choses
 “ me sont sans goust, & c’est là mon ordinaire.

“ Et dans vne autre encore. Ie ressens de grandes choses sur
 “ la verité & la simplicité de l’aneantissement que ie dois
 “ porter, & i’ay en vn clin d’œil la veuë qu’il doit estre si sim-
 “ ple, que mesme il ne soit pas connu de l’ame; c’est vn état de
 “ mort & d’aneantissement, sans auoir aucun regard sinon
 “ d’estre à son Dieu en abandon, en foy, & en confiance.

“ Il escriuit à vne autre persone. Ie vous assure qu’il n’y a
 “ feureté que dans le neant & dans la mort: qui est baptisé,
 “ doit estre mort en I E S V S- C H R I S T pour mener vne vie

d'aneantissement : le reste n'est pas tout mauuais, mais il est toujours dangereux, particulièrement l'action que nous faisons de nous mesme, ainsi denüons-nous de tout, afin que le saint Enfant Iesus meue tout.

Il dit tout, parce que cet état de mort & d'aneantissement doit estre generalement de tout ce qui en nous vit de la vie corrompüe d'Adam; de sorte que comme vn corps mort, n'est pas seulement mort en l'œil, ou en l'oreille, ou en la main; mais en tous ses sens & tous ses membres, sans qu'il en reste vn seul de viuant, il est encore mort aux richesses & à la pauureté, aux plaisirs & aux douleurs, aux honneurs & aux opprobres, aux louanges & aux blâmes; car il ne sent rien de tout cela, parce qu'il est mort à tout. Il en va de mesme de l'esprit, qui doit estre mort non seulement à vne de ses facultez, comme à l'entendement ou à la volonté, mais à toutes, & à toutes choses, en la façon que nous auons dite; auéc cette difference pourtant, que le corps estant vne fois priué de sa vie, ne la peut iamais naturellement recouurer, où l'esprit mort peut aisement reuiure & l'estre malin d'Adam ne s'en va pas si loing qu'il ne puisse bien tost reuenir si on n'y prend garde, parce qu'en cette vie la mort ny l'aneantissement ne peuuent aller iusques au centre de la nature.

Tout ainsi que dedans vn Jardin vous pouuez nourrir vne mauuaise herbe, à la quelle vous ne toucherez pas; mais vous luy donnerez toute la liberté de pousser, d'étendre ses fueilles & de croître: ou si vous ne voulez pas qu'elle paroisse, vous la retrancherez, la coupant iusques à la racine: ou mesme vous l'arracherez & la déracinerez, de façon qu'elle ne pourra plus reuenir: mais pourtant vous ne sçauriez si bien faire, que la terre n'en puisse produire vne autre semblable, parce qu'elle y est naturellement disposée: Il est de mesme en vostre pouuoir de laisser viure dans vostre ame vne passion dereglée, qui y produira ses saillies & y exercera sa tyrannie; ou bien la mortifier empêchant qu'elle ne pousse, quoy que la racine y demeure, ou mesme encore la deraciner, comme font ceux qui par vn grand courage changent leur naturel & detournent son cours pour luy faire prendre

vne pente toute contraire, du mal au bien & du vice à la vertu, tels qu'ont esté les hommes parfaicts & celuy de qui nous écriuons la vie; mais quoy qu'il arriue & quoy que ces esprits genereux gagnent sureux, nostre nature demeure tousiours gastée en son fond, & en état, si on n'y veille, de reproduire tost ou tard les actions du mesme vice.

SECTION PREMIERE.

Suite du mesme sujet.

Pour venir au detail de la mort mystique & de l'aneantissement de ce saint Homme, il estoit mort & aneanti, premierement aux richesses & à tous les biens de la terre, dont il s'estoit tellement depouillé & pour l'affection du cœur, & mesme pour la possession réelle, qu'il en auoit quitté, comme nous auons vû, la propriété, & n'en vsoit qu'en qualité de pauvre, avec vn ardent souhait de pouuoir mesme se priuer de l'vsage. Je reconnois deuant Dieu, écriuit il vn iour à son Directeur, qu'il me fait cette misericorde en son fils, de me détacher veritablement des choses de ce monde, & mon sentiment ordinaire est, que si son ordre ne m'y tenoit lié par ma condition, & qu'il me mit en état de tout donner ou de tout quitter, ce seroit mon grand desir, apres quoy ie soupire souuent, non par la presomption de ma force, mais apres l'état de IESVS-CHRIST, en IESVS-CHRIST. Et il manda à vn autre persone. Tout ce qui se peut imaginer en ce bas monde, est peu de chose, fust-ce le depouillement de tous nos biens, & la mort de tous les hommes, car toute la fourmilliere du monde me semble ne meriter pas reflexion, & que si nous auions vn peu de foy & vn peu d'amour, qu'heureux seroit celuy qui auroit à donner tout, ou qui auroit déia tout donné pour ne vaquer plus qu'à son Dieu, & dire, *Deus meus & omnia.*

En son proces de Dijon il parut si desinteressé & si mort au gain ou à la perte, qu'on ne pût iamais l'obliger, ie ne diray pas de solliciter ses iuges, mais mesme de leur recomman-

der son affaire, non que par vne indifference vicieuse il la negligeat & n'y fit ce qu'il iugeoit estre absolument necessaire; mais c'est pource qu'il auoit ainsi perdu par vne haute vertu, le sentiment des biens de la terre & s'estoit remis du succes entierement à la volonté de Dieu: ioint qu'il sçauoit que les affaires se traitent & se gagnent bien mieux deuant Dieu par la priere & par la confiance en son secours, que deuant les hommes par vne multitude de sollicitations inutiles.

Secondement il estoit mort & aneant à toutes les recreations & à tous les plaisirs de cette vie, y ayant renoncé depuis le commencement de sa parfaite conuersion, & se tenant en toutes choses dans vn état de continuel sacrifice de son corps & de son ame, qui estoit son grand exercice & son terme ordinaire. Ainsi il ne faisoit point vsage de ses sens ny de leurs obiets, que dans la pure necessité, & suiuant la conduite de nostre Seigneur. Il estoit tellement occupé de Dieu en son interieur, comme nous auons remarqué, que lors qu'il auoit des douleurs cuisantes & qu'il estoit malade, il n'y pensoit quasi pas, & auoit peine d'en parler; ce qui parût notablement en sa derniere maladie.

Troisiement il estoit mort & aneant à l'honneur, aux qualitez de sa naissance & à sa noblesse, dont il s'estoit luy mesme dégradé entre les mains de nostre Seigneur pour se rendre plus humble; il estoit mort à l'estime des hommes & à toutes les louanges, comme aussi à tous leurs opprobres, dont il donna vn illustre rémoignage à vne persone familiere, qui luy dit qu'elle auoit peine de le voir tant honoré & estimé des hommes, à qui il répondit, premierement qu'elle auoit grande raison, parce qu'il n'y en auoit point de suiuet; & puis, comme elle luy demanda quels sentimens il auoit quand il s'entendoit louer, Je n'y fais, dit-il, aucune attention ny aucun retour: cela ne me touche non plus que si on parloit à vne souche: ie suis par la grace de Dieu insensible aux louanges & aux mépris: l'vn & l'autre ne font aucune impression sur mon esprit, & ie n'y réfléchis pas seulement. Il auoit raison, car comme toutes les louanges, que les hommes vous donnent, ne vous font

pas meilleur, leurs blâmes aussi ne vous rendent pas pire; outre que dans la distribution qu'on fait des loüanges & des blâmes, on commet pour l'ordinaire vne des hautes iniustices qui se voie en terre, parce qu'on louë fort souuent des gens infames qui meritoient d'estre confondus, & on blâme des perſones que Dieu estime.

En quatrieme lieu il estoit mort & ancanty aux biens, aux plaisirs & aux hōneurs ſurnaturels, qui ſont ſans comparaiſon de plus grand prix que ceux, dont nous auons parlé. Il estoit mort à toutes les choses bonnes, aux vertus, & à la perfection, qu'il ne deſiroit & ne cherchoit que dans vn eſprit dégagé & ancanty, ſans vouloir ny telle ou telle vertu, ny ce degré de perfection ou vn autre, mais les voulant comme
 « Dieu vouloit qu'il les eut, & diſant que l'amour propre a ſi
 « peur de ſe voir dépouillé, qu'il ne luy importe à quoy il
 « tienne, pourueu qu'il ayt moyen de ſubſiſter & de ſemain-
 « tenir dans ſon petit droit de propriété; ce qui nous oblige
 « de trauailler ſans ceſſe à l'aneantiſſement de tous nos de-
 « ſirs, meſme de ceux qui nous ſemblent ne rendre qu'aux
 « vertus; ie diſ, qui nous ſemblent, parce que ſi Dieu nous
 « donnoit lumiere, nous verrions ſans doute que ce qui nous
 « ſemble ſouuent rendre à nous denüer, va ſecretement, mais
 « veritablement, à poſſeder quelque choſe & à nous conſer-
 « uer nous meſmes; où nous deuous aller toujours à noſtre
 « neant, dans, lequel ſeulement nous pouuons trouuer Dieu.
 « Ô qu'heureux ſont les vrais pauvres d'eſprit!

Il estoit mort & ancanti à tous les gouts de deuotion & à toutes les graces ſenſibles, dont les ames amoureuſes d'elles meſmes ſont ordinairement ſi auides. Sur quoy il diſoit avec
 « ſuier, qu'il faiſoit beaucoup plus d'état des graces où les ſens
 « n'ont point de part, que des viſibles & des ſenſibles. Il écri-
 « uir à vne perſone. Ie crains fort ces graces qui tiennent tant
 « & quaſi tout du ſenſible; il ſe trouue, diſoit il, parmy les Spi-
 « rituels vn grand nombre de mauuais-riches d'eſprit; tous
 « ceux qui ne cherchent que des gouts, des ſentimens &
 « des lumieres en cet exil, où nous deuous viure de foy, ſont
 « de ce nombre. Et ce qui eſt pitoyable, c'eſt qu'il y en a fort

peu qui n'en soient en quelque façon , pource qu'on estime ,,
& qu'on aime cela, à cause que l'homme naturellement aime ,,
à voir, & pour cela il cherche la lumiere, & comme il n'a pas ,,
experience de celle de Dieu, que l'on ne peut bien recevoir ,,
qu'en éteignant la sienne & en se détruisant, il cherche celle ,,
qui est en luy mesme , qu'il prend pour la diuine, parce qu'il ,,
se l'imagine & qu'il l'exprime à sa mode. Il māda à vne autre. ,,
Pour les obscuritez, pour les delaissemēts & les autres peines ,,
d'esprit, on les souffre quoy qu'il en coûte, & on s'y iette à ,,
corps perdu, pour ainsi dire, en abandon, comme vn poisson ,,
en l'eau qui est son élément; à Dieu de tous costez; en Dieu ,,
pour iamais & pour tous. Si nous sommes liés à nostre Sei- ,,
gneur IESVS-CHRIST, nous ne verrons que soumissions & ,,
aneantissement, & nous ne sentirons que cela. ,,

Il estoit mort & aneanti à toutes les choses éclatantes & ex-
traordinaires, dont il n'auoit aucun sentiment, non plus que
le Soleil, qui tout couuert de lumiere & coroné de gloire
n'en est pas plus glorieux, aiant reçu de la part de Dieu par
vne persone de haute grace des promesses de tres-grands
dōs, il escriuit à son Directeur: les choses qu'on m'a enuoiées ,,
& qu'on m'a promises, sont ce qu'elles sont, sans que ie m'y ,,
arreste ny m'y puisse appuyer, il faut viure de foy. Et vn autre ,,
encore l'ayant assuré que nostre Seigneur luy auoit fait vne
faueur tres signalée, l'effet que cette assurance opera en luy
fut, de luy imprimer vn tres-grand mépris & vn plus profond
aneantissement de foy mesme; & comme on luy donna ces
choses expliquées tout au long dans des papiers, il se défit de
ces papiers & les mit entre les mains de son Directeur, com-
me aussi tous les autres les plus secrets & les plus importants
de ses deuotions, & ceux mesmes qu'il auoit écrits de son
sang, dont nous auons parlé, qui ne fut pas vn petit effet
d'aneantissement en luy, parce que souuent on est pris par
ces meubles de pieté, & on y a des arraches d'autant plus dif-
ficiles à rompre, qu'elles sont plus malaisées à connoître, &
qu'elles paroissent plus iustes, à cause du profit qu'on croit
en tirer : mais il faut ne tenir à rien, pour pouuoir bien tenir
à Dieu.

« Voicy ce qu'il écrit à son directeur sur ce sujet. J'ay reçu le
 « papier qui parle de cette grace, dont ie vous enuoie la copie,
 « n'ayant rien à réfléchir dessus, sinon porter la plus grande lati-
 « tude de cœur que ie puis à benir Dieu, à le reconnoître & à
 « le servir. J'ay brûlé ce papier & quantité d'autres choses
 « semblables, & si vous ne iugés que ie vous les doive en-
 « uoyer, ie vous supplie de me mander si vous ne trouuez pas
 « bon que j'en use ainsi. Je souhaiterois, si j'auois à souhaiter
 « quelque chose, de n'auoir rien à moy que mon Dieu, c'est là
 « le grand rassasiement de l'ame, & le riche thresor du cœur.

Il estoit encore mort & aneanty à toutes les choses que
 Dieu faisoit par luy, n'y prenant aucune part, & n'y entrant
 pas plus, apres qu'elles estoient faites, que si elles eussent esté
 faites par d'autres.

Cinquiemement il estoit mort & aneanty aux affections
 non seulement deregliées; mais aussi purement naturelles de
 toutes les creatures, & en particulier de celles qui prenoient
 ses conseils pour la conduite de leur interieur, en qui les liai-
 sons & les attaches de part & d'autre sont, si on n'y veille,
 plus ordinaires, de sorte que dans la separation vous voyez
 souuent des esprits démontez, & des deuotions fort alterées.
 « Il écrit pour cela à l'une de ces personnes. Je ne puis por-
 « ter qu'avec peine le cas que vous faites de mon entretien ou
 « de mes voyages: voyons beaucoup Dieu, lions nous sans
 « cesse à IESVS-CHRIST, afin d'apprendre en luy & de
 « luy l'aneantissement profond de nous mesmes. Et à l'une au-
 « tre: IESVS-CHRIST est permanent & sa grace va toujours
 « croissant, & tant que ie seray à luy, ie seray à vous pour luy
 « & selon luy. Nostre Seigneur ne delie pas les esprits, lors
 « qu'il éloigne les corps, puisque mesme sa coutume est de se-
 « parer l'imparfait, qui bien souuent ne porte qu'alteration à
 « la pleine vie de son esprit, qui n'est iamais telle, que lors
 « qu'il est tout seul.

Faisant sçauoir à l'une personne la mort de Madame la
 Comtesse de la Chastre, pour le salut & la perfection de la-
 quelle il auoit pris de tres-grands soins, comme nous auons
 « rapporté, il luy mande: Je n'estois pas à Paris, mais à Citry,
 quand

quand elle mourut, on m'enuoya querir en haste le iour, de sa mort qui fut vn Samedy, mais ie n'arriuay que deux heures apres, & entrant dans la ville ie l'appris, l'entendant crier dans les ruës: ie me liay aussi-tost fortement à Dieu de qui i'attendois la volonté, & ie n'en ay porté non plus ny au dedans ny au dehors, que si elle estoit encore au monde. Ie vois son ordre en ce que ie n'ay pas assisté à sa mort, & ie ne doute point qu'il n'ayt permis cette priuation pour le bien de cette Dame.

Il écriuit à vne personne qui auoit perdu son Directeur. Touchant l'absence de vostre Pere, ce seroit à la verité vne grande perte & pour vous & pour le pais qu'il quitte, si l'ordre de Dieu ne sanctifioit & n'establissoit plutôt qu'il ne détruit; & s'il éloigne quelque fois nos petits appnis visibles & sensibles, c'est pour nous fonder plus fortement en la fin, à laquelle il nous achemine, qui est de demeurer & de nous tenir en Dieu avec I E S V S - C H R I S T, où nous trouuons toute verité & toute force, & si près de nous qu'il est au milieu de nous; Et à proportion que les appuis des creatures nous manquent par sa conduite, il se fait paroître en sorte, que l'on experimente bien que l'on n'est pas orphelin, soit par l'esprit qui reside en nous pour nous soutenir, soit par les secours des mesmes ministres, lesquels, quoy que plus rares, portent en nous vne grace de plus d'érenduë; tant nostre Pere celeste pouruoit iusques aux moindres besoins de tous ses Enfans, qui luy sont vraiment Enfans.

Ainsi il ne faut point prendre d'autres liaisons aux personnes qui vous aident pour vostre salut, que cōme à des instrumēs, dont Dieu se sert, & dont avec luy vous deuez vous seruir pour l'operer. Tandis qu'il vous les donne vsez en avec soin, & avec fidelité, & retenez qu'en peu de temps on peut bien auancer en fait d'instructions nécessaires. Quand il vous les oste, ou par la mort; ou autrement, ne vous affligez point imparfaitement & ne perdez pas courage, mais rendez luy de bonne grace avec soumission & avec remerciement: & se fera le moyen qu'il vous en donne d'autres, qui vous

aideront encore dauantage & trouueront mieux la iointure de vostre esprit.

En fin il estoit mort & aneanty à l'amour de soy mesme; à son humeur qu'il auoit tellement corrigée, qu'estant naturellement vif & prompt, comme nous auons deja touché, il s'estoit rendu rassis & égal dans vn point, qui a causé de l'admiration à tous ceux qui l'ont connû; ayant vn esprit haut & altier, il auoit acquis vne humilité de cœur tres-profonde, dont il produisoit des actions signalées à l'exterieur, en tout temps, & en tout lieu; & son genie luy donnant inclination à la raillerie, c'estoit l'homme du monde le plus respectueux enuers tous, iusques aux plus petits. Pour ses passions, il les tenoit si assuieties & si bien réglées, qu'elles n'échappoient iamais, & que l'on eut mesme dit qu'il n'en auoit point.

Il estoit mort de cette mort parfaite, dont nous parlons, aux facultez superieures de son ame: à sa Memoire, parce qu'elle estoit si vuide de toutes les choses de la terre, qu'elle ne luy en rapportoit aucune idée capable de le diuertir de la souuenance de Dieu; il ne faisoit aucune reflexion imparfaite sur le passé, ainsi que nous auons vû, & nostre Seigneur luy auoit donné cette grace singuliere, qu'il n'estoit point occupé des actions qu'il faisoit, & lors qu'elles estoient faites, qu'il en perdoit comme le souuenir; tout s'effaçant de sa memoire pour n'en estre point empêché.

“ Il écrit à vne persone familiere; Il y a quelque temps
 “ que me trouuant au milieu d'un grand monde, mon esprit
 “ fut éclairé & touché de ne desirer, ny de connoître persone,
 “ ny d'en estre connu: cela a fait vne merueilleuse separation
 “ en moy de toutes choses, & i'ay appris que de là dépendoit
 “ vn des principaux points de la vie spirituelle, qui porte vne
 “ grande pureté d'esprit, vn grand éloignement de la creatu-
 “ re, & qui met l'ame au monde comme si elle n'y estoit pas,
 “ dans l'oubly & dans l'ignorance de ce qu'elle n'a que faire,
 “ & ne pouuant plus souffrir que le nécessaire.

Il estoit mort à son Esprit, à sa Raison, & à son Iugement,

par ce qu'il viuoit de la Foy qui est sa propre mort. On peut recueillir de ce qui a esté dit, qu'il ne faisoit aucune action de cette puissance par elle mesme, non plus que s'il n'en eut point eu, mais qu'il produisoit tout par le mouuement de **IESVS-CHRIST**, qui viuoit en elle & operoit par elle.

Enfin il estoit mort & aneanti à sa Volonté, que ie mets la derniere, pour estre en cette vie la plus importante de nos facultez dans les choses morales. Il estoit donc mort & aneanti à sa Volonté propre, d'autant qu'il l'auoit renduë entierement conforme à celle de Dieu, ne voulant absolument en tout que ce que Dieu vouloit. I'adore, escriuoit-il à vne persone, tellement la volonté de Dieu en tout ce qu'il luy plait de me marquer, que l'Enfer me feroit vn Paradis, s'il me donnoit l'ordre de le porter. Et à vne autre: Bien loin d'agir en cette affaire par mon esprit, ie le veux aneantir tout à fait, & qu'il ne sçache autre langage que rien, & toujours rien, pour suiure en tout les traits de la diuine volonté dans sa mesure & dans sa maniere. Il dit à vne autre que nostre-Seigneur l'auoit par sa grace mis en vn si grand état d'indifference pour tout, qu'il eut esté tres-content de demeurer toute sa vie paralytique dans vn lit, sans se pouuoir remüer, & sans faire reflexion sur le seruice qu'il rendoit au prochain, & qu'il ne pourroit plus luy rendre, tout luy estant égal dans la volonté de Dieu.

Il manda à vne autre: Ie me suis trouué depuis quelque temps en des emplois de telle nature, tant pour l'exterieur, comme pour l'interieur, qu'un pauvre petit esprit, comme le mien, eut bien rosté choüié, si ie n'eusse abandonné le tout à Dieu. C'est en luy, & par cette voye d'abandon que ie prens tout mon appuy, adorant avec vous & par l'instruction que vous me donnez les decrets de sa tres-sainte & diuine volonté, qui tient toutes choses en sa main pour nous y assujeter par iustice, & nous y sanctifier par amour, si l'épreuue montre que nous ayons vn cœur d'enfant, c'est à dire, l'esprit de **IESVS-CHRIST**, pour gemir à nostre Pere celeste, & luy dire, *Abba Pater.*

SECTION SECONDE.

Continuation du mesme sujet.

MONSIEUR de Renty estant si absolument abandonné à Dieu, & ayant ainsi perdu & aneanti sa volonté dās la sienne, il ne desiroit rien & ne craignoit rien en ce monde, & en suite il y possédoit vn tres-profond repos d'esprit, & vne paix que rien ne pouuoit alterer ; d'où luy venoit cette merueilleuse & inuariable égalité, qui reluisoit en son exterieur en tout temps, en tout lieu, & en toutes occasions.

Vne persone intime voulant sçauoir vn iour s'il n'auoit point desir de quelque chose, luy demanda tout ce que son esprit luy pût suggerer pour tirer cet éclaircissement ; & entre-autres questions elle luy fit celle-cy, s'il ne desiroit pas que les œuures, qu'il entreprenoit pour la gloire de Dieu, reüssissent & eussent vn bon succez ; à quoy il répondit, qu'il n'auoit point d'autres desirs en toutes ses actions & en toutes ses entreprifes, que l'accomplissement de la volonté de Dieu ; & encore qu'il fit tout son possible pour les faire reüssir, qu'il estoit neanmoins abandonné pour tout à ce que sa Majesté en ordonneroit : adioustant beaucoup d'autres choses, qui montroient son ancantissement pour tous les desirs, & la parfaite transformation de sa volonté en celle de Dieu.

Et il n'eut pas plûtôt acheué, qu'il arriua vn accident, où il fit bien paroître cette parfaite mort : car on luy vint dire que le Ciel estoit tout en feu ; à cette nouvelle, qui a coutume de surprendre & d'effrayer si fort, il ne témoigna aucune émotion ; mais avec vne paix & vne tranquillité admirable, il regarda au Ciel & dit, le feu est dans Paris, sans s'alterer dauantage, encore qu'il connût que l'embrasement estoit si grand, qu'une bonne partie de la ville estoit en danger d'estre brulée : plusieurs personnes, qui demeuroient pres de sa maison, disoient qu'il falloit quiter le quartier, parce qu'en effet le feu n'estoit pas loin, & pouuoit s'étendre aise-

mentiusques à eux. En cette fraieur commune demeurant dans son egalité ordinaire & dans son abandon à l'ordre de Dieu il entra en sa Chapelle, où il fut fort long-temps en oraison, s'offrant à Dieu en sacrifice & s'immolant à sa volonté; quelque persone le consideroit en cet état avec admiration, pendant qu'un grand nombre de gens estoient dans l'épouuante, & qu'elles consultoient pour s'en aller. Voila la disposition de son esprit.

Il auoüa aussi à vne autre persone confidente & secreta, qu'il se sentoit par la misericorde de Dieu dans un état de mort si entiere à toutes choses, que ny les Anges, ny les hommes, ny la perte des siens, ny le renuersement de sa famille, ny aucun autre accident ne pourroit luy faire perdre l'affiète de sa paix, mais qu'il demeureroit tranquille & mesme insensible à tout cela: ce qu'il disoit non par vne vaine exaggeration & un certain sentiment boutadeux qui fait souuent proferer des choses bien éloignées de la verité, mais par un établissement ferme & experimental qu'il auoit dans l'insensibilité des Saints.

Telle estoit la mort mystique & l'aneantissement de cet homme de Dieu, qui le combloit de tresors immenses de richesses spirituelles, luy faisoit mener vne vie tres-parfaite, & l'unissoit intimement à Dieu. Aquoy aussi cette mort & cet aneantissement sont absolument necessaires, parce qu'un estre ne peut deuenir ce qu'il n'est point, s'il ne cesse d'estre ce qu'il est: le bois ne scauroit passer à la nature du feu, tandis qu'il conseruera la sienne; il faut qu'il la quitte & que la matiere soit dépoüillée de toutes les formes du bois, & de la substantielle & des accidentelles, & reduite à vne nudité entiere pour estre capable que le feu s'unisse à elle; à moins de cette nudité, l'union est impossible.

C'est vne regle generale dans la nature qui ne souffre point d'exception, qu'un sujet pour receuoir vne forme, doit y estre disposé, & d'autant plus, que la forme est plus noble; & cette disposition consiste en ce dépoüillement du sujet, & en cette perte qu'il doit faire de quelques choses pour en gagner d'autres. Partant pour faire un homme diuin, il faut

Qu'il ne soit plus homme viuant selon sa nature, & pour le rendre digne de s'vnir à Dieu, il doit necessairement mourir & estre anéanti à soy-mesme. Certes si le feu demande de la matiere ce dépoüillement vniuersel pour pouuoir se communiquer à elle: à combien plus forte raison Dieu, qui est vn Esprit infiniment pur & l'Estre premier & souuerain, exigera-t'il de l'homme ce denüement general, cette mort & cet aneantissement à soy & à toutes choses pour se donner & s'vnir à luy? attendu qu'en se donnant à luy, il luy donne la iouissance de soy-mesme, de sa beauté, de sa bonté, de sa sagesse, & de ses autres perfections, & que par son vnion il le rend bien-heureux.

Suiuuant cela quelle admirable pureté est requise à vne ame pour estre vnüe à Dieu au Ciel dans l'état de la gloire? Il est necessaire ou qu'elle conserue encore toute son innocence baptismale, ou, si elle la souillée de la moindre tache, qu'elle en soit nettoïée avec des tourmens étranges par le feu de Purgatoire, quelques bonnes œuures qu'elle ayt faites d'ailleurs, & à quelque degré de sainteté qu'elle soit paruenüe. C'est par proportion le mesme de l'ame en terre dans l'état de la grace, où, pour estre bien préparée à l'vnion avec Dieu, elle doit estre tres-pure; & pour l'estre, comme ce qui la souille, est l'attache aux creatures, & encore plus à elle mesme, & cette vie du premier homme qui la fait viure à ses appetits, à ses desirs & à son propre esprit, il faut qu'elle meure à toutes les creatures & à soy-mesme: ne plus ne moins que nostre corps pour estre parfait & obtenir sa vraye vie, immortelle & bien-heureuse, doit auparauant necessairement mourir; il en va de mesme de nostre ame, si nous voulons qu'elle arriue à sa perfection qui consiste en l'vnion avec Dieu, & qu'elle mène vne vie sainte & diuine, qui est sa veritable vie.

Monsieur de Renty écrit vn iour à ce propos à son Directeur, Je vois tres-clairement que le moyen d'estre vnü à Dieu, c'est d'estre dénüé de tout ce qui n'est point Dieu, & mort à toutes les creatures & à soy. Ha, que ie connois l'importance de ce denüement & de cette mort! & quoy? ce qui

fait interruption à cette vnion continuelle d'amour, que nous deuons auoir avec sa diuine Majesté & avec cette Beauté souueraine, c'est vne espece, c'est vne attache legere à quelque chose creée: & nous souffrirons qu'vne chose si menuë & si indigne nous occupe au lieu de Dieu, & que son esprit diuin, qui est vn feu d'amour tout consumant & qui nous enuironne de toutes parts, n'ait pas la puissance de faire sur nous, ce que le feu elementaire fait sur le bois? Moy vicieux & toujours mécontent par mes miserables plenitudes, & qui ne peux estre parfaitement heureux que par la possession de Dieu, ne me point remplir & m'occuper de Dieu: ce que ie peux avec sa grace, en me separant doucement de toutes choses par vne simple & amoureuse application à luy.

Et il manda à vne autre persone. Quand S. Paul nous dit, vous estes morts, & vostre vie est cachée en Dieu avec IESVS-CHRIST, il pose la mort comme la base necessaire du Chrestien pour nous oster toutes les veuës & toutes les recherches des creatures, comme nous voyons qu'vn mort n'a plus de sentiment ny de mouuement pour rien: car encore que nous sentions par fois des mouuemens rebelles de la nature gasteë, ils ne naissent que pour estre étouffez & aneantis en leur naissance. L'Apostre nous donne nostre Seigneur pour nostre modele, de qui il dit autre part, *Exinaniuit semetipsum*, il s'est aneanty soy mesme: voyons comment & iusques où, c'est depuis l'instant de sa conception iusques à celuy de sa mort. Voyla nostre Regle, nostre Patron, & nostre Rendez-vous de toutes parts.

Il dit à vne autre. Si nous pouuions conceuoir combien le veritable denuëmēt de tout redl'ame capable de Dieu, nous luy demanderions sans cesse cette grace, & nous nous ferions sans doute de grandes violences pour l'obtenir & arriuer à l'état de mort & d'aneantissement, où il faut que tout Chrestien arriue, s'il veut s'vnir à Dieu & monter à sa perfection. Ie reçūs il y à quelques années vne lumiere sur cette verité, qui me fit connoître que le tresor Euangelique caché dans le champ, n'est autre que cet état de mort, &

“ l’aneantissement qui nous oste à nous mesmes pour nous
 “ donner à Dieu, & nous vuidant de toutes les Creatures nous
 “ dispose pour estre remplis du Createur, & en suite de la
 “ source de tout bien. Nostre Seigneur nous dit que qui le de-
 “ couvrira, vendra tout ce qu’il a pour l’acheter : Si nous con-
 “ noissons la valeur de ces tresor precieux, nous donnerions
 “ franchement nostre liberté & tout ce que nous sommes &
 “ tout ce que nous auons pour le posseder. Ce nous est à la ve-
 “ rité vne grande confusion, que tant de choses & tant de puis-
 “ sans motifs nous obligeans de tendre à ce neant, nous y par-
 “ uenions neantmoins si rarement & si tard. O qu’il y a peu de
 “ personnes veritablement aneanties ! peu qui ne vivent encore
 “ de cette vie corrompuë du premier homme, & qui n’en pro-
 “ duisent des actions, où il se presente quelque occasion
 “ d’honneur, ou de profit, ou de plaisir ; peu qui acheuent de
 “ se perdre & de renoncer à eux mesmes en certains points, qui
 “ regardent leur perfection ; nous deurions tirer de toutes nos
 “ forces à l’état bien-heureux du neant.

Que les esprits ainsi morts menent vne vie admirable, &
 que les ames aneanties de cette sorte, & qui ne sont plus
 rien à elles mesmes, sont en Dieu de rares chefs-d’œu-
 ure, & capables de faire de grandes choses pour sa gloi-
 re ! Elles sont intimement vnies à luy, elles sont toutes
 perduës & toutes transformées en luy, & par cette vnion &
 cette transformation, par cette riche perte & cet heureux
 aneantissement elles arriuent au comble de leur perfection,
 elles possèdent vne si profonde paix & iouissent d’vn conten-
 tement si pur & si solide, qu’il surpasse incomparablement
 tous les plaisirs des sens ; & elles sont si hautement releuées
 au dessus de toutes les grandeurs de la terre & de tout ce que
 le monde admire, que, comme dit vn ancien Pere, elles les
 ont en mépris ; elles ne mettent point de distinction entre la
 pompe des Empereurs & les roiles des araignées ; elles com-
 parent les diamans & les plus fines pierreries aux cailloux
 qui sont sur le bord de la mer ; Elles ne tiennent pas la santé
 du corps pour bon-heur, ny la maladie pour malheur ; elles
 ne iugent pas que la pauureté doieue s’appeller misere, ny
 que

que le pauvre soit mal à son aise, & elles ne pezent point la vraye beatitude au poids des écus, ny ne la mesurent par les delices; mais elles disent que tout cela ressemble aux eaux des riuieres qui baignent le pied des arbres plantez le long de leur riuage, à pas vn desquels elles ne s'arrestent, mais elles passent viftement de l'vn à l'autre coulans incessamment à leur fin.

C'est de ces illustres Morts & de ces Ames diuinement ancanties que l'Ange dit à S. Iean en l'Apocalypse; *scribe; beat mortui, qui in Domino moriuntur: à modo iam dicit spiritus, ut requiescant à laboribus suis.* Ecri cette verité, qu'il faudroit écrire par tout en lettres d'or & en caracteres de saphirs & de rubis. Bien-heureux sont les morts, qui sont morts à eux mesmes & à toutes les choses créées pour ne viure qu'au Seigneur; le saint Esprit leur dit & les assure, que dès le moment de leur precieuse mort ils se reposent, parce que tous leurs trauaux & toutes les peines de leur esprit ont pris fin, dautant qu'ils en ont osté les causes & seché les sources, qui sont, comme saint Iaques enseigne, leurs desirs & leurs concupiscences.

Monsieur de Renty en estoit indubitablement venu là; comme il est aisé de voir de ce que nous auons dit, & il deuoit estre mis au nombre de ces Bien-heureux, qui sont les Bien-heureux de l'état de la grace & qui composent le Paradis de cette vie.

C H A P I T R E X.

Sa Mort corporelle.

MONSIEUR de Renty estant mort, comme nous venons de rapporter, de la mort mystique, il fallut pour entrer dans la vie de la gloire & receuoir la recompense que Dieu preparoit là haut au ciel à ses merites, qu'il mourut necessairement de la mort du corps, comme aussi il en mourut il y a auourd'hui, que j'écris

cecy, deux ans, & de la sorte que ie m'en vay dire.

L'onzieme d'Auril de l'an mil six cens quarante neuf se sentant atteint plus viuement du mal, qu'il portoit, il y auoit deja quelques iours sans en rien decouurir, il fut contraint apres auoir employé la iournée en actions de charité de se mettre au liét, où il commença à souffrir de grandes douleurs par tout le corps, dont l'esprit mesme se ressentit en quelque façon, parce qu'il dit que ses réueries estoient étranges & si grotesques, qui si la grace ne les luy eut fait connoître & ne l'ût contenu, il eut dit plus d'extrauagances qu'un insensé, & qu'ainsi son mal estoit bien humiliant, mais qu'il falloit, que le pecheur honorât Dieu en tous les états, où il le mettoit.

Dans toutes les douleurs de son corps, & dans toutes les peines de son esprit, & durant tout le cours de sa maladie, son fond & son occupation ordinaire estoit des éléuations affectueuses à Dieu, des sentimens & des paroles de benediction, de loüange & de soumission à toutes les dispositions qu'il faisoit de luy, de douceur & d'obeissance à tous ceux qui le seruoient, ou qui auoient soin de luy, avec vn esprit si facile & si aisé qu'il trouuoit tout bien fait, encore que par fois il ne le fut pas.

Il y fit paroître vne patience admirable, qui l'empêcha de se plaindre iamais & de permettre qu'on le pleignit, disant qu'il n'enduroit rien quoy qu'il endurât extremement. Et comme sa Garde, qui estoit la sœur de la Charité de la Paroisse, avec qui il auoit visité tant de pauures & tant de malades, le pressa de le luy auoier, il luy répondit. O ma sœur, que l'amour de Dieu essuie de souffrances! les seruiteurs de Dieu ne souffrent rien. Vne autre persone luy demandant s'il enduroit beaucoup, il dit que non, à quoy l'autre repliqua qu'il luy sembloit pourtant que si il est vray, répondit-il, que ie me sens bien accablé de mal; mais ie ne le sens pas, parce que ie ne m'y applique point. Côme on le pressoit de prendre quelques douceurs, il dit les refusant, cela ne fait ny viure ny mourir, & n'est point necessaire. Il prenoit les medecines, encore qu'elles fussent tres-ameres, d'un visa-

ge gay & content, les auant avec grand' peine sans rien laisser. Et comme vn iour deuant sa mort on luy parla d'vn excellent remede qu'on disoit deuoit faire grand effet, il répondit, la patience est vn grand remede, témoignant n'auoir pas beaucoup d'inclination à le prendre : neanmoins quand on le luy apporta, il le prit sans aucune resistance, & mesme sans demander ce que c'estoit, tant il estoit mort à tout ce qui le touchoit.

Encore que son mal allât toujours croissant & le serrant de fort près, il ne demandoit toutefois rien pour son soulagement; & comme on auoit vne fois mis des draps blancs dans son lict, & qu'on luy eut donné vn oreiller qu'il auoit déjà refusé, il dit tout confus & tout humilié dans la croiâce que c'estoit trop prendre ses aises, voila Monsieur bien à son aise. Sentant vn peu de ioye naturelle de voir vne personne avec qui il auoit de grandes liaisons de grace, & qui estoit retournée de la campagne pour le visiter, il reprima cette ioye, disant par trois fois, ie ne veux plus que Dieu, avec vne ardeur, qui faisoit euidentement paroître son parfait degagement de toutes les choses créées.

Il recommanda à cette mesme persone les Missions, la priant d'y trauailler de toute sa puissance, comme à vn employ qui glorifioit Dieu extrememēt, & qui estoit le plus utile à l'Eglise de tous ceux qu'il sçauoit, & luy disant; Promettez moy donc que vous y trauaillerez, & que vous en procurerez, autant qu'il vous sera possible. O que cela plaît à Dieu!

Et se souuenant des pauures qui luy auoient esté si chers, il dit à Madame sa femme, ie vous recommande les pauures; n'en aurez vous pas bien soin? Vous le ferez mieux que moy, & ne craignez point, ce que vous donnerez, n'amoindrira pas le reste. La plus-part du temps de la premiere semaine, & encore beaucoup de la seconde des deux qu'il fut malade, il s'occupa fort aux œures de misericorde, ordonnant qu'on fit des aumônes, & faisant écrire des Lettres en plusieurs provinces pour des affaires de charité dont il s'estoit chargé, & en rendant compte exactement.

Plusieurs persones le visitant par honneur, il les receuoit.

avec vne grande douceur & vne grande affabilité, neant-
 moins avec peine, parce que plusieurs de ces visites n'alloient
 qu'à des paroles de civilité mondaine & à des complimens,
 dont se plaignant, il dit à quelqu'un; ils me viennent parler
 de leur philosophie, ce n'est pas ce dont j'ay besoin. Et vne
 autre fois il dit au mesme suiet; Il faut peu de paroles à vn
 Chrestien.

Vne dame de grande qualité & de grande pieté l'estant
 venuë voir, luy dit, Monsieur, ie voudrois de bon cœur don-
 ner ma vie pour la vostre: à quoy il répondit avec vn visage
 gay & les yeux leuez au Ciel, ce n'est pas se quitter que de
 mourir, nostre conuersation & nostre vnion sera plus intime
 que iamais: elle continuant luy demanda: mais, Monsieur,
 si Dieu vouloit vous rendre la santé & vous laisser encore
 quelque temps en cette vie, le voudriez vous pas bien? Saint
 Martin vouloit bien viure à cette condition; il luy dit avec
 beaucoup de confusion, ah, Madame. point de comparaison
 d'un pecheur à un Saint; la volonté de Dieu soit faite.

Dés le troisieme iour de sa maladie il pria qu'on luy fit ve-
 nir son Confesseur, & comme on luy demanda là dessus s'il
 se sentoit plus mal, il répondit que non, mais qu'en vne con-
 iuncture de telle consequence, comme estoit celle où il se
 trouuoit, & où il est si aisé que l'esprit & le iugement s'alter-
 rent, il ne falloit pas differer ny se laisser surprendre, & qu'il
 estoit bien raisonnable de faire ce qu'il auoit tant de fois
 conseillé aux autres. Le lendemain il se confessa, & apres
 demanda ses Reliques pour entrer en communion plus par-
 ticuliere avec tous les Saints; il se confessa encore le iour
 suivant, & presque tous les autres iusques à celuy de sa mort.

Monsieur son Curé le vint communier; & comme il le veit
 apres la communion entrer dans vn grand silence & ne di-
 re mot, sinon avec vne profonde humilité; mon Dieu, mon
 Dieu, pardonnez moy, ie suis vn grand pecheur, il luy de-
 manda pourquoy il parloit si peu, & ne disoit quelque chose
 aux assistants; il eussent esté bien aises de l'entendre, à qui il
 répondit, qu'il ne deuoit point parler en la presence de la
 Parole Incarnée qu'il venoit de recevoir, & qu'il n'estoit pas

iuste d'occuper aucun lieu dans les cœurs, qui ne deuoient estre remplis que de Dieu seul. Il luy adiousta pourtant que son esprit estoit fort appliqué à la ioye, que deuoit auoir vne creature de se voir sur le point de se reünir à son premier Principe & à sa dernière Fin.

L'apres-difner de ce mesme iour quelqu'un luy difant qu'il falloit se diuertir de cette forte attention qu'il auoit à l'intérieur, & que les medecins iugeoient que sa maladie venoit d'humeur melancholique, il luy dit. Je n'eus iamais vne ioye pareille à celle que j'ay ressentie aujourd'huy; & celuy là luy en aiant demandé le suiet, c'est, dit il, de penser que ie vay m'vnir à mon Dieu. Il témoigna à vn autre qu'il auoit vn extreme desir de s'aller vnir à Dieu, luy difant ces paroles de l'Apostre, *Cupio dissolui & esse cum Christo*, & ces autres du Disciple bien-aymé, *Spiritus & Sponsa dicunt, veni; & qui audit, dicat, veni; & qui sūit, veniat, etiam venio citò. Amen, veni Domine Iesu*. S'abandonnant toutefois & pour la vie & pour la mort à la volonté de Dieu. Il pria vn iour apres midy qu'on luy ouurit les fenestres, pour voir plus à plein le grand iour, & le voyant il s'écria. O beau iour de l'eternité ! que j'ayme cette clarté qui m'aide à penser à celle de ce iour, qui n'aura point de nuit.

Plus il auoit de mal, plus il tâchoit de s'appliquer à Dieu & de le prier, imitant son diuin Maistre qui au fort de son agonie prioit plus instamment, & comme par fois la violence du mal l'abatoit dauantage, & qu'il luy falloit faire plus d'effort pour penser à Dieu, il s'écrioit; courage, courage, l'eternité approche; & dit plusieurs autres paroles avec vne ferueur incroyable, mais qu'il ne pût prononcer distinctement à cause de l'extreme sécheresse de sa bouche que la fièvre luy auoit causée, iusques à ce que s'arrestant tout à coup il se mit à regarder fixement en haut, pres d'un quart d'heure, avec vn visage riant & plein de respect, comme voyant quelque chose de grand, & puis ramassant toutes ses forces il se mit sur son seant, il osta son bonnet, & le tenant en sa main il dit tout rauy & abyssiné en cette contemplation, avec des élans & avec des paroles à demy-étouffées

dans sa bouche tant par l'ardeur de son esprit, comme par
 “ la foiblesse de son corps, le vous adore, ie vous adore.

Monieur son Curé luy donna au temps qu'il falloit l'Ex-
 treme-onction, qu'il reçût avec grande deuotion, répondant
 à toutes les prieres qu'on y fait, & s'occupant des paroles
 qu'on y dit, & les repetant encore quelque temps apres.
 Monieur le Curé luy demanda s'il ne vouloit pas donner
 “ la benediction à ses Enfans, à qui il dit, quoy? donner la
 “ benediction en vostre presence? Je suis trop heureux de la
 “ recevoir; pressé néanmoins de la leur donner, sur ce que
 “ l'Eglise approuuoit cette coûtume, aussi-tost il leua les
 “ yeux & les mains au Ciel, & dit, ie prie Dieu qu'il vous la
 “ donne, & qu'il luy plaise de vous benir & de vous garder
 “ par sa grace de la malignité du monde, & que vous n'y
 “ ayez point de part, & sur tout, mes Enfans, que vous vi-
 “ uiez en la crainte & en l'amour de Dieu, & que vous obeis-
 “ siez à vostre Mere.

“ Le Samedy, iour de sa mort, sur les dix heures & demie
 du matin estant reuenu d'une forte conuulsion qui pensa
 l'emporter, ayant regardé assés attentiuellement ceux qui
 estoient presens, il fit signe de la main, de la teste & des yeux,
 avec ces souris & cet attrait qui luy estoit naturel, à vn hom-
 me de grande qualité & de grande autorité, & de ses
 amis intimes pour le faire approcher, ce qu'ayant fait, il
 luy dit: l'ay vn mot à vous dire deuant que de mourir,
 puis s'estant donné vn peu de loisir pour reprendre ses for-
 ces, il luy témoigna en suite son affection, mais en pa-
 roles qui ne furent pas bien distinctement entendues; &
 après d'un ton plus ferme, d'une voix plus articulée &
 d'une parole plus nette, il luy dit: la perfection de la vie
 “ Chrestienne, est d'estre vny parfaitement à Dieu dans la
 “ croiance de son Eglise, & il ne faut pass'embarasser dans les
 “ nouveantez, adorons sa conduite sur nous, & soyons luy fide-
 “ les iusques au bout: attachons nous à vn Dieu Crucifié pour
 “ nostre salut, vnissons toutes nos actions & tout ce qui est en
 “ nous à ses merites, & esperons, que luy estant fideles par
 “ sa grace, nous aurons part à la gloire de son Pere. l'esper-

la creance & peuuent nous le persuader aisement: neanmoins par ce que ie ne tiens pas ces choses si assurées comme celles que i'ay dites, ioint que la sainteté & la perfection du Christianisme ne consiste pas en elles, & que nous ne pouuons pas les imiter comme les autres, i'e n'y appuie pas dauantage.

Ie dis seulement pour finir que nous auons grand suiet d'admirer en cette mort les conseils de Dieu, d'auoir retiré du monde vn homme qui y faisoit tant de bien, & qui pouuoit encore y en faire dauantage; car se trouuant en la force de son esprit, en la fleur de son age, & en vn tres haut degré d'estime, de credit, & de capacité, il pouuoit y auancer merueilleusement, & encore plus que iamais, l'honneur de Dieu & le salut du prochain. Mais quoy? c'est Dieu qui la fait, & c'est tout dire; & il a voulu monstrer par là, & nous apprendre qu'il n'a que faire de nous pour l'auancement de sa gloire & pour l'execution de ses desseins, & qu'il en viendra bien à bout sans nous, afin que nous ne nous en fassions pas accroire si par fois il nous y emploie; mais que nous soyons tousiours humbles en sa presence. Outre qu'il l'a appelé en vn lieu & à vn état; où il le glorifie beaucoup plus parfaitement qu'il n'ût pas fait icy bas; d'où aussi il porte par excellence le nom du lieu & de l'état de la gloire, qui se doit entendre non seulement de la gloire qu'y reçoient les Bienheureux, mais encore plus de celle qu'ils y rendent à Dieu; sans dire que par fois il nous enleue auant le temps ces hommes diuins, qui sont comme les colomnes de son Eglise & les soutiens des Fideles, pour nous punir du mauuais usage que nous faisons de leur conuersation, & du peu de profit que nous tirons de leurs exemples.

Mais apres tout, quand ie scûs sa maladie & le peril où il estoit, il me tomba dans l'esprit sur la connoissance que i'auois de sa vertu cōsommée & de sa sainteté, que nonobstant routes les considerations des biens qu'il estoit capable de faire en terre, il pourroit bien mourir, par ce que c'estoit vn fruit meur pour le Ciel: de sorte que comme on cueille vn fruit quand il est en sa maturité, & le cueillir ou plûtoſt ou
plus

plus tard, & luy nuire: Dieu de mesme auoit pris Monsieur de Renty au point de la maturité de sa grace & au comble de la vertu à laquelle il l'auoit destiné, & comme vn homme parfait & acheué, pour luy donner au ciel la recompense deüë à ses merites, où il nous desiré, pour avec luy adorer, glorifier, & aimer tres-parfaitement Dieu, le Pere, le Fils & le saint Esprit, à qui soit honneur, louange, benediction, & toutes sortes d'hommages maintenant & toujours, Amen.

CHAPITRE XI.

*Conclusion de tout l'ouurage, comme il faut lire
les vies des Saints.*



POUR conclure cet ouurage & en rendre la lecture plus vtile, ie crois qu'il sera à propos de monstrier comme il faut lire les vies des Saints & les histoires des hommes excellemment vertueux, afin d'en recueillir le fruit pour lequel elles sont faites: sur quoy ie dis. Que nous deuons les lire, regardans ces Ames eminentes de deux costez: le premier, selon qu'elles ont du rapport à Dieu; & le second, entant qu'elles en ont à nous.

Pour le premier, ie dis que les Saints & les personnes illustres en pieté sont les plus riches ouurages, les plus beaux ornemens, les plus precieux ioyaux, les pieçes les plus rares, & les plus grands instrumens de la gloire de Dieu qui soient en terre; parce que si le moindre iuste est incomparablement plus noble, & plus honorable que tous les pecheurs ensemble, attendu que ceux cy estans esclaves du diable & ennemis de Dieu, sont tous, selon la declaration qu'en fait la verité mesme, encore qu'ils fussent Roys & Monarques de l'Vniuers, roturiers & infames; où celuy là

est seruiteur, amy & enfant de Dieu, à qui seruit seulement, c'est regner, à combien plus forte raison le seront les Saints, & les personnes d'une vertu heroïque? parce qu'ils possèdent la iustice & la vertu en un plus haut degré, qu'ils ont une plus grande abondance de graces & de dons, qu'ils participent plus pleinement les perfections de Dieu, qu'ils sont ses plus naïues images, qu'ils ont plus de liaison, plus d'union, & plus de ressemblance avec nostre Seigneur I E S U S-CHRIST, & que ce sont ses plus riches conquestes & ses chefs-d'œuvre.

Tertullien considerant Iob, lors qu'à toutes les mauvaises nouvelles, qu'on luy apportoit coup sur coup, dans le plus fort de ses afflictions & le plus sensible de ses douleurs, il ne s'impatienta point, il ne murmura iamais, & ne s'opposay ny de la moindre parole, ny de la plus legere pensée aux dispositions que Dieu faisoit de luy, mais dit toujours, *Dieu soit beny*; & le regardant tombé de si haut sur un fumier, dénué de tout, & blessé depuis la teste iusques aux pieds, porter cette extremité de maux avec une patience inuincible, dit: *Quale in illo viro feretrum Deus de diabolo extruxit? quale vexillum de inimico gloriæ suæ extulit? cum ille homo ad omnem acerbum nuncium nihil ex ore promeret, nisi Deo gratias?* Quel trophée Dieu a-t'il dressé à son honneur en la personne de Iob patient iusques à ce point, à l'encontre du diable? quel étendart a-t'il élevé contre luy, & quelle victoire a-t'il remportée de l'ennemy de sa gloire? Nous devons étendre ces paroles & cette pensée à tous les Saints, & dire qu'ils ont procuré à Dieu un tres-grand honneur, & comme autant d'éclatantes Trompetes ont fait par tout retentir ses loüanges par leur foy, par leur esperance, leur charité, leur patience, leur force, leur humilité, leur obéissance, leur chasteté, & par leurs autres vertus.

Partant nous devons conceuoir une haute estime de tous les Saints & de toutes les personnes signalées en vertu; nous devons les auoir en grande veneration, les honorer, les louer & les aimer sur le modele, que Dieu & son fils nostre Seigneur nous en donnent, & aimer, louer & honorer Dieu &

son Fils en eux, car sans doute: *Mirabilis Deus in Sanctis suis*, ps. 67. 36. comme dit David: Dieu est admirable, louable, aimable, redoutable en ses Saints. Nous devons admirer sa puissance dans les miracles qu'ils ont faits; la force de la grace, dans les actions heroïques qu'ils ont exercées: nous devons espérer en sa miséricorde, voyans les heureux changemens qu'il a operez en eux; craindre sa iustice, considerans les châtimens qu'il a pris de leurs moindres fautes, & aimer sa bonté dans les témoignages de bien-veillance & d'amitié, qu'il leur a rendus.

Où il est à remarquer, que comme il ne faut pas estre trop leger à croire tout ce que l'on dit & tout ce que l'on écrit des visions, des reuelations, des graces extraordinaires, des faueurs & des caresses que Dieu a faites aux Saints, qui n'ont pas esté encore autorifées par le iugement de l'Eglise parce qu'on peut aysement s'y tromper; & le diable bien plus rusé que nous, qui connoît que nostre nature curieuse & ambitieuse se plaît aux choses qui ont de la nouveauté ou de l'éclat, se déguise en beaucoup de façons & se transfigure, 2. Cor. 11. 14. comme parle S. Paul, en Ange de lumiere: aussi ne doit-on pas estre trop rétif à les approuuer ny précipité à les condamner, parce qu'en effet il y en a & il y en aura toujours de veritables, & il ne faut point mesurer les bontez de Dieu à nostre raison, ny à nostre cœur petit & retreci.

Après les mysteres de l'Incarnation & de l'Eucharistie, & ce que Dieu a fait au premier, & ce qu'il fait encore tous les iours au second pour l'homme, & dont nous ne pouons douter, il n'y a plus rien d'incroyable en fait de grace & de faueur que Dieu puisse faire à vne ame, d'autant qu'il n'y en a pas vne qui puisse approcher à beaucoup près de celles-là. Nostre Seigneur témoigne plus d'amour à vn homme imparfait, & se communique à luy avec plus de transport & plus de merueilles en vne seule Communion, qu'il n'en a fait paroître à tous les Saints en toutes les communications extraordinaires qu'il a eües avec eux. De plus quelle bonté, quelle compassion & quelle tendresse n'a-t'il pas exercée enuets les hommes, tandis qu'il a vécu avec eux? que n'a-t'il

point fait en sa vie, & que n'a-t'il point souffert en sa mort pour eux? apres sa Resurrection glorieuse, encore qu'il fut dans vn état si releué au dessus du leur, quelle familiarité pourtant & quelle priuauté n'a-t'il point montrée à ses disciples, les visitant souuent, & trauesti en diuerses manieres, se montrant visiblement à eux, leur donnant des assignations en de certains lieux pour s'entretenir, leur parlant tres-amiablement, se laissant toucher à eux, & mangeant avec eux? Ces familiaritez sont merueilleuses, & toutefois elles sont bien asûrées.

Il faut dire ce qui est, l'amour que Dieu porte aux hommes, & singulierement aux ames pures, innocentes & simples est inconceuable, *cum simplicibus sermocinatio eius*, nous dit le S. Esprit. Dieu prend plaisir de conuerser & de s'entretenir avec les simples. Les Peres, quoy que sages, serieux & âgez, ioüent par fois avec leurs enfans & begayent avec eux, & vn d'entre-eux, qui fut Agésilas, tres-grand personnage, Capitaine tres-renommé, & Roy de Sparte, ayant esté surpris par vn de ses amis comme il couroit sur vn baston avec vn petit fils qu'il auoit, & remarquant que celui-cy estoit étonné de le voir faire vne telle action, il luy demanda s'il auoit des enfans; l'autre répondant que non; Agésilas luy dit. Ne vous étonnez donc point de ce que ie fais, il faut estre Pere pour auoir ces tendresses, & venir à ces oublis de soy-mesme: ainsi on ne doit pas trouuer étrange, si Dieu, qui est vray le Pere des hommes, & qui surpasse en affection paternelle tous les autres peres avec tant d'auantage, que nostre Seigneur dit, qu'à comparaisson de luy ils ne meritent pas d'en porter le nom, a des bontez si aimables & des douceurs si charmantes pour les Saints, qui sont ses plus chers enfans, s'il pratique enuers eux de si grandes priuantez & s'il les caresse si tendrement; & il faudroit auoir l'amour que Dieu leur porte, pour bien iuger de la verité des témoignages qu'il leur en donne. C'est bien plus, si nous considerons avec quels embrassemens, avec quels baisers & avec quelles caresses ce Pere dans l'Euangile reçût son fils prodigue & debauché qui reuenoit à luy.

PROU. 3. 32.

ZAC. 13. 10.

C'est pourquoy obseruons cette grande maxime des Anciens, rien de trop, ny trop de facilité, ny trop de difficulté à croire ce qu'on nous dit des graces que Dieu fait aux ames saintes, il faut nous balancer iustement entre l'un & l'autre, examinans tout, & y apportans le temperament necessaire, non de la raison humaine, mais de la prudence diuine. Et voila pour le premier aspect, selon lequel nous deuons considerer les Saints: venons au second qui nous regarde, sur lequel ie dis.

*μηδὲν ἀγῶν
Ne quis
nimit.*

Que S. Gregoire le grand à fait vne belle remarque, lors qu'il nous dit que Dieu n'a point allumé tant de flambeaux au ciel pour nous éclairer & guider nos pas sur la terre, qu'il nous en a donné icy bas pour nous conduire à luy, & pour de la terre nous acheminer au Ciel; Entre lesquels les Saints sont sans doute des plus considerables, parce qu'il n'y en a pas vn, de qui la vie ne nous soit vne viuë lumiere pour nous decouurir les routes que nous deuons tenir, & comme ce fameux Phare d'Alexandrie, qui avec ses feux & ses clartez seruoit d'adresse aux Nautonniers pendant la nuit pour regler leur voiage. Les Saints, dit saint Gregoire de Nyffe monstrent leur vie aux hommes qui pretendent d'aller à Dieu, comme vne belle lampe, pour les y mener en assurance; & parlant de saint Ephrem il l'appelle, vn grand Luminaire qui a plus éclairé le monde avec sa vie, que le Soleil nefait avec ses rayons. Et plus bas: que Dieu l'auoit mis comme vne haute colonne viuante & animée pour à la façon des Mercurus des Anciens, qu'on posoit dans les quarefours pour enseigner les chemins, monstret aux hommes les sentiers de la sainteté & de la perfection.

*Homil. 14.
in Euang.*

*καὶ οὐδὲν π
καὶ οὐχὲν ἵ
ἐαυτοῦ βίον,
Lib. de vir-
gin. cap. 11.*

*In vita S.
Ephrem.
τῆς ἡλιακῆς
λαμπροῦτι-
εσιν λαμ-
πρόσα.
σὺν τῷ ἐμ-
ποῦσθαι
ζῶσθαι.
Prifas. in
lob. c. p. 6.*

S. Gregoire le grand nous auertit derechef de considerer, que comme Dieu le Createur par l'ordre admirable d'vne belle œconomie & d'vne profonde sagesse a tellement disposé le cours & les periodes des étoiles, qu'elles viennent chacune en son rang, les vnes apres les autres, pour nous éclairer pendant l'obscurité de la nuit & verser sur nous leurs influences; il a de mesme enuoyé les Saints comme autant d'astres pour nous illuminer durant les te-

nebres de cette vie. Et suiuant ce dessein il a fait paroître Abel pour nous apprendre l'innocence; après Enoch, pour nous enseigner la pureté d'intention dans nos œuures; En suite Noë, pour fortifier nos courages dans l'attente d'une longue esperance: Abraham, pour produire à la veüe de tous les hommes l'effet d'une heroïque obeissance, & ainsi les autres. *Ecce quàm fulgentes stellæ in cælo cernimus*, adiouste ce saint Pontife, *ut inoffenso pede operis iter nostræ noctis ambulemus*. Regardez comme nous voyons dans le ciel de l'Eglise des astres fort brillans, afin que sans nous fouruoier & sans broncher nous puissions tenir le chemin couuert & tenebreux de nostre salut.

Les exemples que les Saints nous ont donné, & les influences de vertu que ces mysterieuses étoiles ont repandues sur nous, sont admirables. *Fuit in eis*, dit saint Augustin, *continentia vsque ad tenuissimum victum panis & aquæ, & non quotidiana solum, sed etiam per plures dies perpetuata ieiunia. Castitas vsque ad coniugii prolisque contemptum. Patientia vsque ad cruces flammæque neglectas. Liberalitas vsque ad patrimonia distributa pauperibus, denique totius mundi aspernatio vsque ad desiderium mortis*. Ils ont pratriqué l'abstinence iusques à ne manger que du pain & ne boire que de l'eau, & à ieûner non seulement tous les iours, mais encore plusieurs iours consecutifs. La chasteré, iusques à ne vouloir point se marier; vne patience, qui s'est portée iusques au mépris des gibets, des rouës & des feux; vne liberalité avec de saintes profusions pour donner tout aux pauvres & ne se reseruer rien; En fin vn si grand dégoût de routes les choses de ce monde, qu'ils auoient la vie en souffrance, & la mort en desir: & tout cela, pour nous apprendre ce que nous deuons faire, parce que, *Sanctorum vita*, nous dit saint Ambroise, *cæteris norma viuendi est*, la vie des Saints est vne regle pour dresser la vie des autres.

*Iib. de vi
lit. creden-
di cap. 17.*

*Cap. 1 de
s. Ioseph.*

Dieu donc nous ayant donné les Saints pour nous seruir de regle en la conduite de nostre vie, & nous tenir lieu de phare à nous éclairer en la nauigation de nostre salut, c'est à nous de les regarder attentiuement & de suiure les traces

qu'ils nous marquent par leurs œuvres. Nous y sommes sans doute obligez, parce que Dieu le demande & l'attend de nous; & nous le devons, parce qu'il nous sera tres-vtile, daurant que ce regard attentif fera de fortes impressions sur nos esprits. Ainsi saint Antoine, au rapport de S. Athanase, recommandoit instamment à ses Religieux, de repasser souuent par leur memoire ce que les Saints auoient fait & ce qu'ils auoient dit, afin de se former sur leur modele: & saint Basile écrit en sa premiere lettre, que comme les ieunes peintres pour se rendre sçauans considerent les pieces des grands Maistres, & demeurent les heures & les iours entiers attachez dessus pour les copier exactement sur leur toile: Ainsi ceux, qui veulent tirer l'image de la vertu sur leur ame, qui est son propre fond, doiuent regarder diligemment des Originaux excellens qui la representent au vif, à sçauoir les vies des Saints, avec quoy ils se rendent en quelque façon semblables à eux. Il dit encore auttepart, que tout ainsi que la lumiere émane naturellement du feu, & la bonne odeur exhale des parfums; on retire de mesme beaucoup de bien de la connoissance des belles actions des Saints, & il s'en épand vne odeur de vertu qui embaume ceux qui les sçauent. A la verité comme il n'est pas possible qu'un homme qui se tient au soleil, ne soit couuert de lumiere, & s'il demeure quelque temps en la boutique d'un parfumeur parmy le musc, la ciuete & l'ambregris, n'en forte parfumé; ainsi ceux qui ont commerce avec les Saints & qui les étudient, ne peuuent qu'ils n'en deuiennent meilleurs & ne se sanctifient.

In eius vi-
la.

Epist. i.

ἔτι καὶ τῶν
ἀγαθῶν
ἀποφθεῖσιν
ἀλαγκνῶν
ἀκολουθεῖ
πὸ ὠφέλιμον
In vita s.
Gordij
marizis.

Confess.
lib. 8. cap.
6.

Ces deux courtisans de l'Empereur, dont parle saint Augustin, lisans la vie de saint Antoine, en furent tellement touchez, qu'ils prirent resolution de quitter le monde & de ne penser plus qu'à leur salut, *legere cepit vnus eorum*; ce sont les mots du Saint, & *mirari*, & *accendi*, & *inter legendum meditari arripere talem vitam*, & *relieta militia seculari seruire tibi*; *legebat* & *mutabatur intus*, & *exuebatur mundo mens eius*. L'un deux commença à lire cette vie, & en la lisant estre faisi d'admiracion & d'ardeur, & conceuoit le dessein d'une

Conf. lib.
9. Cap. 2.

vic semblable, de quitter son épée & le service de l'Empereur pour ne servir que Dieu seul; à mesure qu'il lisoit, il se sentoit changer interieurement & son ame se dégager des affections de la terre, & depouïller le vieil homme pour se reuestir du nouveau. Luy mesme assure de foy que les exemples des seruiteurs de Dieu, luy estoient comme des charbons vifs & ardents, lesquels iettez dans le sein de son esprit l'échauffoient, le brûloient, & le mettoient tout en flamme.

In vitis.
apud Sen-
rium.

S. Columban doit sa conuersion à la lecture & à la consideration de la vie de saincte Marie Egyptienne. Nostre Fondateur saint Ignace est reueuable de la sienne à celle des vies des Saints, & plusieurs autres aussi de la leur: saint Eugende Abbé de saint Claude lisoit incessamment les actions de saint Antoine & de saint Martin, & les ayant toujours deuant les yeux & encore plus en l'esprit, il se façonnoit dessus. Et saint Bonauenture dit de saint François. *Ex recordatione Sanctorum omnium, tanquam lapidum ignitorum, in deificum recalescebat incendium*, que quand il sentoit son cœur se refroidir tant soit peu en l'amour de Dieu, il le réchauffoit & le renflammoit par le souuenir des vertus des Saints, comme par l'attouchement des cailloux embrarez.

In eius
vita. cap.
9.

C'est à quoy nous doiuent servir les exemples des Saints, & il faut que nous retirions ce profit de la lecture de leurs histoires. Les Saints sont nos patrons pour les imiter; que si nous y manquons, ils se rendront témoins contre nous pour nous accuser deuant Dieu, qui apres se seruira d'eux comme de iuges pour nous condamner. Nous pouons dire d'eux avec plus de sùiet, ce que Senèque disoit d'un grand Philosophe Stoïcien de son temps, qu'il auoit esté donné à son siecle, *ne aut exemplum deesset sæculo suo, aut conuiciam*, pour servir aux hommes ou d'exemple, ou de reproche.

I. lib. 7. de
ben. se.
cap. 8.

En effet les Saints estoient comme nous, & nous sommes comme eux: nous sommes tous pestris d'une mesme masse, & issus d'un mesme pere, & si de plus nous seruons le mesme Dieu, nous auons les mesmes loys, nous auons les mesmes Sacremens, les mesmes esperances, & le mesme Para-

dis

dis qu'eux. *Elias*, dit S. Iaques, *homo erat similis nobis passibilis*. Elie estoit vn homme semblable à nous, & passible comme nous. Les Saints auoient vn corps composé de chair & d'os comme le nostre, & ils estoient suiets aux mesmes passions & aux mesmes infirmitéz que nous sommes: Ils ressentoient les mesmes difficultéz que nous, à resister à leurs appetits, à vaincre leurs vices & à pratiquer la vertu, & neanmoins aidez de la grâce, qui ne manque à persone, avec vn courage resolu & déterminé, ils ont franchi toutes ces difficultéz, & ont fait des actions heroïques, encore qu'elles fussent fort contraires à leurs inclinations. Nous deuons sçauoir, dit saint Ambroise dans certe pensée, que les Saints *non natura præstantioris fuerunt, sed obseruantia maioris; nec vitia neficiuerunt, sed emendarunt*, n'ont pas eu vne nature plus excellente ny plus forte que la nostre, mais vne plus grande exactitude pour la vertu, & ils n'ont pas esté exempts des atteintes des vices, mais ils les ont corrigez. C'est pourquoy nous les deuons imiter, parce que nous le pouuons; ou si nous ne le faisons pas, en attendre du blâme.

*Lib. de 10-
si ph. cap 1.*

Saint Augustin raconte, que lors qu'il minutoit sa conuersion, sentant de terribles peines & des angoisses inexplicables, particulièrement à quitter les creatures qu'il aimoit, & à viure en continence, cette vertu se presenta à luy avec vn visage plein de maiesté & de douceur, & le conuia avec vn amiable souris de s'approcher, étendant pour le receuoir & l'embrasser, ses bras charitables, entre lesquels il veit vn grand nombre de personnes, de qui l'exemple pouuoit beaucoup le fortifier. Il y veit vne multitude de ieunes gens, de garçons & de filles, d'hommes & de femmes de tous âges, de sages veues & de vierges auancées iusques à la vieillesse, & la Continence se moquant de luy agreablement & d'vne façon propre à luy donner courage, luy disoit: *Tu non poteris quod isti & istæ? an vero isti & istæ in semetipsis possunt, ac non in Domino Deo suo?* Tu ne pourras pas ce que ces garçons & ces filles, ces hommes & ces femmes ont pû? comme s'ils l'auoient pû de leur propre force, & non par le secours que Dieu leur a donné.

*Lib. 8.
Conf. cap.
11.*

2. b. cap.
10. 17.

Job. 33. 27.

1^{re} epist.
cap. 3. 8.

Nous pouuons donc en nostre maniere ce que les Saints ont pû en la leur, & si nous y manquons, nous sommes coupables, & leurs actions nous condamnent. *Instauras, dit Iob à ce propos selon l'interpretation de saint Gregoire, testes tuos contra me, & multiplicas iram tuam aduersum me.* Vous produisez contre moy vos témoins qui sont vos Saints, & sur ce que ie n'ay pas voulu imiter leurs vertus, vous augmentez vostre colere en mon endroit: & autre part, *Respiciet homines & dicet, peccaui & verè deliqui.* Le pecheur regardera les hommes, c'est à dire, les Saints, qui estans hommes & foibles comme luy, se sont toutesfois roidis contre leurs foiblesses, & se sont surmontez genereusement eux mesmes; & voyant ces victoires, il s'accusera soy mesme & dira, i'ay tort, i'ay peché & ie condamne ma vie lâche, imparfaite & vicieuse.

C'est en ce sens que l'Apostre saint Iude & le Sage deuant luy nous auertissent, que les Saints iugeront les pecheurs & les reprouuez au iour du iugement pource qu'ils leur feront voir, que s'ils eussent voulu correspondre, comme eux, à la grace qui leur estoit donnée, & faire de leur costé ce qu'ils pouuoient, ils seroient participans de la beatitude qu'ils possèdent, & ainsi que leur malheur ne vient que de leur faute.

Lib. 3. de
vita con-
templar.
cap. 12. 16.

Quand nous nous presenterons deuant le Tribunal de nostre souuerain Iuge pour receuoir nostre derniere sentence, dit saint Prosper, que ferons nous? que dirons nous? à qui aurons nous recours? sera-ce aux Saints & aux Amis de Dieu, de qui nous n'auons pas voulu receuoir les instructions ny imiter la vie? nous excuserons-nous sur la corruption de nostre nature, & sur la fragilité de nostre chair? *sed excusationi reclamabunt omnium sanctorum exempla, qui cum fragilitate carnis in carne viuentes quod fecerunt, utique fieri posse docuerunt; maxime quia nec ipsi peccato sua virtute; sed Domini miserantis auxilio restiterunt.* Mais les exemples de tous les Saints s'opposeront à nos excuses & les rendront inutiles, parce que viuans dans la fragilité de la chair & ne s'y laissans point aller, mais s'en rendans victorieux, ils ont montré que ce


qu'ils ont fait , pouuoit affûrement se faire , attendu mesmement qu'ils ne l'ont pas fait & n'ont pas resisté au peché par leur propre vertu , mais par l'assistance qu'ils ont receuë de la misericorde de Dieu: Que répondrons nous donc pour lors , si nostre Seigneur nous dit , comme effectiuement il nous le dira. *Si potuistis , quare non resististis desideris peccatorum? si non potuistis , quare meum contra peccatum non quaesistis auxilium? aut vulnerati , quare pœnitendo non adhibuistis vulneri vestro remedium?* Si vous auez pû resister au peché, pourquoy ne l'auuez vous pas fait? si vous ne l'auuez pû, pourquoy ne m'auuez vous demandé la grace de le pouuoir? ou si dans le combat, que vous auez eu contre luy, vous auez esté blesez, pourquoy n'auuez vous mis l'appareil de la penitence sur vos plaies pour les guerir? à quoy ne sçachans que répondre, adioucte ce Pere, il prononcera contre nous l'Arrest de nostre condemnation & nous enuoiara au supplice.

Gardons nous de ce malheur & pour cela tâchons d'imiter les Saints, & les grands seruiteurs de Dieu, chacun selon sa condition & selon la mesure de sa grace, & en particulier celuy de qui nous auons décrit l'histoire, & qui dans la fleur de son âge, dans vne si haute naissance, dans tous les auantages qu'il auoit pour le monde, & dans l'état seculier, ayant mené vne vie si vertueuse & si sainte, a tracé à toutes sortes de personnes des modeles excellens de vertu pour imiter; ou donné, si on les neglige, de grands suiets de recevoir du blâme.

F I N.

Fautes à corriger.

PAge 2. ligne 31. pattourcau, *lisez* de pastourcau. pag. 5. lig. 16 à vn si long delay, *l'f.* vn si long delay. pag. 6. lig. 3. bigor, *l'f.* bigor. pag. 157 lig. 8. deffudit, *l'f.* suddit. pag. 189 lig 2 n'est point, *l'f.* ce n'est point. *là mesme.* lig. 20. qui écriuit, *l'f.* qu'il écriuit. pag. 206. lig. 12. qui estoit, *l'f.* qui estoient.



La Bibliothèque
Université d'Ottawa
Échéance

The Library
University of Ottawa
Date due



